

Namo tassa bhagavato arahato sammāsambuddhassa

Namakkārapāli

1. Sugataṃ sugataṃ seṭṭhaṃ, kusalaṃkusalaṃ jahamaṃ;
Amataṃ amataṃ santaṃ, asamaṃ asamaṃ dadamaṃ.

Saraṇaṃ saraṇaṃ lokaṃ, araṇaṃ araṇaṃ karaṃ;
Abhayaṃ abhayaṃ ṭhānaṃ, nāyakaṃ nāyakaṃ name.
2. Nayanasubhagakāyaṅgaṃ,
Madhuravarasaropetaṃ;
Amitagaṇagaṇādhāraṃ,
Dasabalamatulaṃ vande.
3. Yo buddho dhitimāññadhāraṃ,
Saṃsāre anubhosi kāyikaṃ;
Dukkhaṃ cetasikaṇca lokato,
Taṃ vande naradevamaṅgalaṃ.
4. Bāttiṃsatilakkhaṇacitradehaṃ,
Dehajjutiniggatapajjalantaṃ;
Paññādhitisīlaguṇoghavindaṃ,
Vande munimantimajātiyuttaṃ.
5. Pātodayaṃ bāladiṅkāraṃva,
Majjhe yatīnaṃ lalitaṃ sirīhi;
Puṇṇindusaṅkāsamukhaṃ anejaṃ,
Vandāmi sabbaññumahaṃ munindaṃ.
6. Upetapuñño varabodhimūle,
Sasenamāraṃ sugato jinitvā;
Abojjhi bodhiṃ aruṇodayamhi,
Namāmi taṃ māraṇaṃ abhaṅgaṃ.
7. Rāgādichedāmalaññakhaṅgaṃ,
Satīsamaññāphalakābhigāhaṃ;
Sīloghalāṅkāravibhūsitāṃ taṃ,
Namāmi bhīṇāvaramiddhupetaṃ.
8. Dayālayaṃ sabbadhi dukkaraṃ karaṃ,
Bhavaṇṇavātikkamamaggataṃ gataṃ;
Tilokanāthaṃ susamāhitaṃ hitaṃ,
Samantacakkhuṃ paṇamāmi taṃmitaṃ.
9. Tahiṃ tahiṃ pāramisaṅcayaṃ cayaṃ,
Gataṃ gataṃ sabbhi sukhappadaṃ padaṃ;
Narānarānaṃ sukhasambhavaṃ bhavaṃ,
Namānamānaṃ jinapuṅgavaṃ gavaṃ.
10. Maggaṅganāvaṃ munidakkhanāviko,
Īhāphiyaṃ ñāṇakarena gāhako;
Āruya yo tāya bahū bhavaṇṇavā,
Tāresi taṃ buddhamaghappahaṃ name.

11. Samatiṃsatipāramisambharaṇaṃ,
Varabodhidume catusaccadasaṃ;
Varamiddhigataṃ naradevahitaṃ,
Tibhavūpasamaṃ paṇamāmi jinaṃ.
12. Satapuññajalakkhaṇikaṃ virajaṃ,
Gaganūpamadhiṃ dhitimerusamaṃ;
Jalajūpamasītalasīlayutaṃ,
Pathavīsahanaṃ paṇamāmi jinaṃ.
13. Yo buddho sumati dive divākarova,
Sobhanto ratījanane silāsanamhi;
Āsīno sivasukhadaṃ adesi dhammaṃ,
Devānaṃ tamasadisamaṃ namāmi niccaṃ.
14. Yo pādapaṅkajamuduttalarājikehi,
Lokehi tīhivikalehi nirākulehi;
Sampāpuṇe nirupameyyatameva nātho,
Taṃ sabbalokamahitaṃ asamaṃ namāmi.
15. Buddhaṃ narānarasamosaraṇaṃ dhitattaṃ,
Paññāpadīpajutiya vihatandhakāraṃ;
Atthābhikāmanaradevahitāvahaṃ taṃ,
Vandāmi kāruṇikamaggamanantaññaṃ.
16. Akhilaguṇanidhāno yo munindopagantvā,
Vanamisipatanavhaṃ saññātānaṃ nicketaṃ;
Tahimakusalachedaṃ dhammacakkaṃ pavatto,
Tamatulamabhikantaṃ vandaneyyaṃ namāmi.
17. Suciparivāritaṃ surucirappabhāhi rattaṃ,
Sirivisarālayaṃ gupitamindriyehupetaṃ;
Ravisaṃmaṅḍalappabhutilakkhaṇopacittaṃ,
Suranarapūjitaṃ sugatamādaraṃ namāmi.
18. Maggoḷumpena muhapaṭighāsādiullolavīciṃ,
Samsāroghaṃ tari tamabhayaṃ pārapattaṃ pajānaṃ;
Tānaṃ leṇaṃ asamasaraṇaṃ ekatitthaṃ patiṭṭhaṃ,
Puññakkhettaṃ paramasukhadaṃ dhammarājaṃ namāmi.
19. Kaṇḍambaṃmūle parahitakaro yo munindo nisinno,
Accheraṃ sīghaṃ nayanashubhagaṃ ākulaṇṇaggijālaṃ;
Dujjāladdhaṃsaṃ munibhijahitaṃ pāṭiheraṃ akāsi,
Vande taṃ seṭṭhaṃ paramaratiṃ iddhidhammehupetaṃ.
20. Munindakko yveko dayudayarūṇo ñāṇavittihīṇabimbo,
Vineyyappānogaṃ kamalakathitaṃ dhammaraṃsīvarehi;
Subodhesī suddhe tibhavakuhare byāpitakkittinañca,
Tilokekaccakkhūṃ dukhamasahanaṃ taṃ mahesiṃ namāmi.
21. Yo jino anekajātiyaṃ saputtadāramaṅgajīvitampi,
Bodhipemato alaggamānaso adāsiyeva atthikassa;
Dānapāramiṃ tato paraṃ apūri sīlapāramādikampi,
Tāsamiddhiyopayātamaggataṃ tamedakāpakaṃ namāmi.

22. Devādevātidevaṃ nidhanavapudharaṃ mārabaṅgaṃ abhaṅgaṃ,
Dīpaṃ dīpaṃ pajānaṃ jayavarasayane bodhipattaṃdhipattaṃ;
Brahmābrahmāgatānaṃ varagirakathikaṃ pāpahīnaṃ pahīnaṃ,
Lokālokābhirāmaṃ satatamabhiname taṃ munindaṃ munindaṃ.

23. Buddho nigrodhabimbo mudukaracaraṇo brahmaghoseṇijaṅgho,
Kosacchādaṅgaṃjāto punarapi sugato suppatiṭṭhitapādo;
Mūdodātuṇṇalomo athamapi sugato brahmujuggattabhāvo,
Nīlakkhī dīghapaṇhī sukhumamalachavī thomyarasaggasaggī.

24. Cattālīsaggadanto samakalapanaṃ antaraṃsappapīno,
Cakkenaṅkitapādo aviraḷadasano mārajussaṅkhapādo.

Tiṭṭhanto nonamantobhayakaramudunā jaṇṇukānāmasanto,
Vaṭṭakkhandho jino gotaruṇapakhumako sīhapubbaḍḍhakāyo.

25. Sattappīno ca dīghaṅguli matha sugato lomakūpekalomo,
Sampannodātadāṭho kanakasamataco nīlamuddhaggalomo.

Sambuddho thūlajivho atha sīhahanuko jālikappādahatto,
Nātho uṇhīsasiṃ itiguṇasahitaṃ taṃ mahesiṃ namāmi.

26. Buddhobuddhotighoso atidulabhataro kā kathā buddhabhāvo,
Loke tasmā vibhāvī vividhahitasukhaṃ sādhave patthayantā.

Iṭṭhaṃ atthaṃ vahantaṃ suranaramahitaṃ nibbhayaṃ dakkhiṇeyyaṃ,
Lokānaṃ nandivaḍḍhaṃ dasabalamasamaṃ taṃ namassantu niccaṃ.

27. Puññenetaṃ sohaṃ nipuṇamati sato samparāye ca titto,
Dakkho diṭṭhujjupaṇṇo avikalavīriyo bhogavā saṃvibhāgī.

Tikkho sūro dhitatto saparahitacaro dīghajīvī arogo,
Dhañño vaṇṇo yasassī atibalavadharo kittimā khantupeto.

28. Saddho dātaṅgupeto paramasiridharo diṭṭhadhamme viratto,
Lajjī kalyāṇamitto abhiratakusalo pañcasīlādirakkho.

Appiccho appakodho ativujhadayo iddhimā appameyyo,
Pāsaṃso pemavāco sujanaguṇavidū māmako so bhaveyyaṃ.

29. Itthaṃ asaṅkhaye nātha, guṇe lakkhaṇadīpīte;
Gāthāsu sūcakāsveka, gāthampi sarate budho.

30. Caturāpāyamutto so, sādhatthadvayassa ca;
Hatūpaddavajālo ca, lābhī hitasukhassa ca.

31. Adhipo naradevānaṃ, catudīpissaropi vā;
Bhaveyya antime dehe, tamaññaṃ setachattakaṃ.

32. Bhāvanāyānamāruyha, samameṣṣati subbato;
Imasmiṃ attabhāvepi, arogo dīghajiviko.

33. Pūjito sabbalokehi, bhāvanābhiratīmano;
Janappiyo manāpo ca, kā kathākhiladhāraṇe.

Namakkārapāli niṭṭhitā.

Namakkāraṭikā

Namo tassa bhagavato arahato sammāsambuddhassa

1. Sugatantyādivaṇṇehi, pasatthañca sukhaddadam;
Vandantānaṃ jinaṃ natvā, dhammaṃ suddham gaṇuttamaṃ.
2. Namakkāraṃ hitatthīhi, porāṇācariyehi ca;
Likhivā ṭhapitaṃ puñña, buddhiyā tena vandinam.
3. Tassatthavaṇṇanaṃ kassaṃ, gambhīratthasubodhanaṃ;
Movipunāmena santena, sīlupetena yācito.
4. Vaṇṇantopi ca tassattham, taṃ taṃ aṭṭhakathādisu;
Vuttañāyena kassāmi, saddhā suṇātha sādhave.
5. Namaṇaṃ namatīti vā, namatī tena vā namo;
Tassa kāronṭi tāhīti, namakkāroṭi vuccati.
6. Tañca buddhaghosācari, yena pubbasutaṃ kataṃ;
Buddhaghosuppattiyāñca, taṃ taṃ pana kathādisu.
7. Na diṭṭhaṃ katakāraṇaṃ, tasmā hitatthikehi ca;
Porāṇācariyehī ca, ṭhapitanti mayā vuttaṃ;
Taṃ kāraṇaṃ viññūhī ca, vicāretvā vijānitanti.
1. Sugataṃ sugataṃ seṭṭhaṃ, kusalaṃkusalaṃ jahaṃ;
Amataṃ amataṃ santaṃ, asamaṃ asamaṃ dadaṃ.

Saraṇaṃ saraṇaṃ lokaṃ, araṇaṃ araṇaṃ karaṃ;
Abhayaṃ abhayaṃ ṭhānaṃ, nāyakaṃ nāyakaṃ name.

1. [Ka] idāni paṭhamaṃ tāva sugatantyādīhi aṭṭhārasahi guṇehi thometvā buddhassa vanditukāmena sugatantiādi gāthādvayaṃ āradhamaṃ. Ayaṃ pana sabbapādādiyamakapathyā vattagāthāti daṭṭhabbaṃ. Taṃ pana yamakaṃ **subodhalaṅkāre** kiliṭṭhadosaṃti vuttaṃ.

Vuttañhi tattha –

“Yaṃ kiliṭṭhapadaṃ mandā, bhidheyyaṃ yamakādikaṃ;
Kiliṭṭhapadadoseva, tampi anto karīyatī”ti.

Ayaṃ panettha patītasaddaracittāyeva pasādaguṇa saṅkhātena saddālaṅkārena saṃyuttā hoti. Tasmā taṃ yamakaṃ suvuttanti daṭṭhabbaṃ. Evaṃ parāsu yamakagāthāsu. Tena vuttaṃ punā **laṅkāre** –

“Patītasaddaracitaṃ, siliṭṭhapadasandhikaṃ;
Pasādaguṇasaṃyuttaṃ, yamakaṃ matamedisa”nti.

Tattha **sugatanti** sobhanagamanattā sundaraṃ ṭhānaṃ gatattā sammā gatattā ca sugato, so hi sobhanaṃ ariyamaggena gacchatīti sugatoti vuccati, supubbo gamudhātu ta. Susaddo sobhanattho. Ariyamaggagamanena parisuddhaṃ anavajjaṃ khemaṃ disaṃ asajjamāno gatoti attho. Tañca gamanaṃ duvidhaṃ hoti kāyagamaṇaṃ, ñāṇagamaṇaṃcāti. Tattha bhagavato

veneyyanupasaṅkamaṇaṃ ekantena tesam hitasukhassa nipphāda nato sobhanaṃ kāyena gamanaṃ kāyagamaṇaṃ nāma. Sayambhū ñāṇena pana sakalampi lokaṃ pariññābhisamayavasena pariḷānānato ñāṇena gamanaṃ ñāṇagamaṇaṃ nāma. Idha pana ñāṇagamaṇaṃ adhippetam.

Aṅguttaraṭṭhikāyaṃ pana “sobhanaṃ gataṃ gamanaṃ etassāti sugato”ti vuttaṃ. Sundaraṃ ṭhānaṃ gacchatīti sugatoti ca vuccati, āramaṇakaraṇavasena amataṃ nibbānaṃ gatoti attho. Sammā aviparītaṃ cesa gacchatīti sugatoti vuccati. Susaddo sammāsaddattho. Tena tena maggena ye kilesā pahīnā, te kilese na puneti na paccehi na paccāgacchatīti attho. Atha vā sammā āgacchatīti sugatoti ca vuccati, dīpaṅkarapādamūlato pabhuti yāva bodhimaṇḍā tāva samatīmsapāramipūrikāya sammāpaṭipattiyā sabbalokassa hitasukhameva karonto sassataṃ ucchedaṃ kāmasukhaṃ attakilamathañcāti ime cante anupagacchanto āgatoti attho. Taṃ sugataṃ buddhaṃ name namāmīti sambandho.

Puna **sugatanti** sammā gadattā sugato. So hi sammā gadati bhāsati sugatoti vuccati. Supubbagadadhātu bhāsāyaṃ viyattiyam vācāyaṃ vā, ta, dassa to. Chasu vācāsu yuttaṭṭhāne yuttameva dvivācaṃ bhāsati attho. Vuttañhi majjhimaṇṇāsapāḷiyam **abhayaṛājakumārasutte** –

1

. “Rājakumāra yaṃ tathāgato taṃ vācaṃ jānāti abhūtaṃ atacchaṃ anattasamhitam, sā ca paresam appiyā amanāpā, na taṃ tathāgato vācaṃ bhāsati. 2. Yampi tathāgato vācaṃ jānāti bhūtaṃ tacchaṃ anattasamhitam, sā ca paresam appiyā amanāpā. Tampi tathāgato vācaṃ na bhāsati. 3. Yañca kho tathāgato vācaṃ jānāti bhūtaṃ tacchaṃ atthasamhitam, sā ca paresam appiyā amanāpā, tatra kālaññū tathāgato hoti tassā vācāya veyyākaraṇāya. 4. Yaṃ tathāgato vācaṃ jānāti abhūtaṃ atacchaṃ anattasamhitam, sā ca paresam piyā manāpā, na taṃ tathāgato vācaṃ bhāsati. 5. Yampi tathāgato jānāti bhūtaṃ tacchaṃ anattasamhitam, sā ca paresam piyā manāpā, tampi tathāgato vācaṃ na bhāsati. 6. Yañca kho tathāgato vācaṃ jānāti bhūtaṃ tacchaṃ atthasamhitam, sā ca paresam piyā manāpā. Tatra kālaññū tathāgato hoti tassā vācāya veyyākaraṇāya”ti.

Ettha pāliyaṃ panesā sukhaggahaṇattham saṅkhepena veditabbā. Kathaṃ hesā abhūtā anattasamhitā appiyā vācā ca, bhūtā anattasamhitā appiyā vācā ca, bhūtā attha samhitā appiyā vācā ca, abhūtā anattasamhitā piyā vācā ca, bhūtā anattasamhitā piyā vācā ca, bhūtā atthasamhitā piyā vācā cāti chabbidhā hotīti. Tattha acoraṃyeva coro ayantiādivasena vattabbavācā paṭhamavācā nāma. Coraṃyeva coro ayantiādivasena vattabbavācā dutiyavācā nāma. Akatapuññatāya duggato dubbaṇṇo appesakkho, idha pana ṭhatvāpi puna puññaṃ na karoti, dutiyacittavāre kathaṃ catūhi apāyehi muccissatīti evaṃ mahājanassa atthapurekkhārena dhammapurekkhārena anusāsanīpurekkhārena vattabbavācā tatiyavācā nāma. Eko dhutto āha-mayaṃ bho mātu mayi kucchigate kapiṭṭhaphaladohaḷo ahoṣi. Sā aññaṃ kapiṭṭhahāraṃ alabhamānā maṃyeva pesesi. Ahaṃ gantvā rukkhaṃ abhiruhitaṃ asakkonto attanāva attānaṃ pāde gahetvā muggaraṃ viya rukkhaṃ upari khipiṃ. Atha sākhaṃ vicaranto phalāni gahetvā otaritaṃ asakkonto gharaṃ gantvā nisseṇiṃ āharitvā oruyha mātu santike gantvā phalāni mātuyā adāsiṃ. Tāni pana mahantāni honti cāṭippa māṇāni. Tato me mātara ekāsane nisinnāya samasatṭhiphalāni khādītāni. Evamādivasena vattabbavācā catutthavācā nāma. Āmisahetu cātukamyatādivasena nānappakāraṃ paresam thomaṇā vācā ceva rājakathaṃ corakathantiādinayappavattā tiracchānakathā ca pañcamavācā nāma. Ariyasaccasannissitā dhammakathā chaṭṭhamavācā nāma. Taṃ pana vassasatampi suṇantā paṇḍitā neva tittim gacchanti. Tāsu pana bhagavā tatiyachaṭṭhamā dvivācāeva bhāsati. Tasmā sappurisehi sāyeva dvivācā vattabbāti. Ayaṃ tadaṭṭhakathāyaṃ āgato saṅkhepanayo. Visuddhimagga mahāṭṭhikāyaṃ pana sārattadīpanīṭṭhikāyañca tadaññākārena vaṇṇito. Tāsu pana taṃ oloketvā gahetabbanti. Ayaṃ panettha saṅgahagāthā –

“Yo bhūtamattasamhitam, paresamappiyā vācaṃ;
Bhūtamattasahitaṇca, paresam piyavācanti;
Dvivācaṃ yuttaṭṭhāneva, vadatīti sugatoti;
Vuccatī ca dakārassa, katvā takāraṇiññunā”ti.

Seṭṭhanti guṇamahantattā pasatthataṃ. So hi pasatthānaṃ visesena pasatthoti seṭṭhoti vuccati.

Pasatthapadam, visesataddhite iṭṭhapaccayo. Pasatthasaddassa so, pasatthānaṃ paccekabuddhāriyasāvakaḍḍīnaṃ sīlasamādhīpaññādi guṇehi visesena pasatthoti attho. Atha vā sundare satipaṭṭhānādibhede dhamme esati gavesati esīm gavesinti vā seṭṭho, buddho. Supubboesa gavesane ta. Tassa raṭṭho. Susaddo sundarattho. Santehi sappurisehi esitabbo gavesitabboti vā seṭṭho. Santasaddūpapado isa gavesane ta, santasaddassa so, ikārasse, tassa ṭṭho. Santehi sappurisehi icchiyati kantiya tīti vā seṭṭho. Santasaddūpapado isu icchākantīsu ta. Atha vā santānaṃ sappurisānaṃ hitasukhaṃ icchatīti seṭṭho, buddho. Kattusādhanoyaṃ. Sundare satipaṭṭhānā dibhede dhamme eseti buddhetīti vā seṭṭho. Hetu kattusādhanoyaṃ. Supubbaesadhātu buddhiyaṃ ta. Taṃ seṭṭhaṃ.

Kusalamaṃkusalamaṃ jahanti ettha kusalam akusalamaṃ jahanti padavibhāgo kātabbo. Kucchitaṃ pāpadhammaṃ salayati calayati kampeti viddhamsetīti kusalam, catubhūmikakusalamaṃ labbhati. Kupubbo saladhātu a. Tatha kāmvacarakusalamaṃ tadanappahānena pāpadhammaṃ salayati calayati, mahaggata ksalamaṃ vikkhambhanappahānena salayati kampeti, lokuttara kusalam samucchadappahānena salayati viddhamsetīti attho.

Atha vā kucchitaṃ apāyadvāraṃ salanti saṃvaranti pidahanti sādhaṃvā etenāti kusalam, karaṇasādhanoyaṃ. Idha pana jahanti vuttatā tebhūmakakusalamevādhīpetamaṃ. Taṃ pana anavajjasukhavipākalakkhaṇamaṃ, akusalaviddhamsanarasamaṃ, vodāna paccupaṭṭhānaṃ, iṭṭhavipākapaccupaṭṭhānaṃ vā, yonisomanasikāra padaṭṭhānaṃ. Na kusalam akusalamaṃ, mittapaṭipakkho amitto viya pahāyakapahātabbābhāvena kusalapaṭipakkhanti attho. Taṃ pana sāvajjadukkavipākalakkhaṇamaṃ, sāvajjāniṭṭhavipāka lakkhaṇamaṃ vā, anattahajanarasamaṃ, aniṭṭhavipākapaccupaṭṭhānaṃ, ayonisomanasikārapadaṭṭhānaṃ. Puññābhisankhārañeñjā bhisankhārasankhātaṃ kusalam apuññābhisankhārasankhātaṃ akusalañca kusalamkusalam. Taṃ pana padaṃ jahantipade kammaṃ.

Jahanti maggakkhaṇe samucchadappahānena phalakkhaṇe paṭippassambhanappahānena pajahantaṃ viddhamsentanti attho. Tañhi arahattamaggañāṇena jahati pajahati, phalañāṇena jahim pajahim paṭippassambhanti vā jaho, buddho. Hādhātu cāge a. Kiñcāpi panettha kusalam maggena pahātabbadhamme na vuttaṃ, vaṭṭamūlabhūte avijjātaṇhādīkilese pana arahattamagga ñāṇena jahite lokiyakusaluppattiyā mūlabhūtāya avijjātaṇhāya abhāvā puññābhisankhāro saṃsāre puna paṭisandhiyā nibbattetuṃ na sakkoti, tasmā vaṭṭamūlabhūte kilese jahite phalūpacārena kusalampi jahitaṃ nāma hoti. Rūpaṃ bhikkhave na tumhākaṃ taṃ pajahathātiādisu viya. Arahantena hi abhisamācārikavattaṃ katampi kusalanti na vuttaṃ, kriyāti pana vuttanti vedītabbamaṃ.

Vuttañhi **nidānavaggasamyuttaṭṭhakathāyaṃ** “khīṇāsavena hi kataṃ kammaṃ neva kusalam hoti nākusalam, avipākaṃ hutvā kriyamatte tiṭṭhatī” ti.

Aṅguttaraṭṭhakathāyañca “arahattamaggo ca kusalākusala kammakkhayaṃ saṃvattatīti evaṃ tena taṃ bhijjati” ti vuttaṃ.

Tena vuttaṃ **cūlaniddesapāliyaṃ** “arahattamaggañāṇena abhisankhāraviññāṇassa nirodhena ye uppajjeyyumaṃ nāmañca rūpañca, etthete nirujjhanti vūpasamanti atthaṃ gacchanti paṭippassambhanti” ti.

Amatanti maraṇavirahitaṃ. So jino hi na mato amato, maraṇadhammassa nibbattakānaṃ kilesānaṃ arahatta maggena samucchinditattā puna maraṇato virahitoti vā amato. Atha vā nibbāne ārammaṇakaraṇavasena adhigate natthi mataṃ maraṇamaṃ yassa jinassāti amatoti vuccati. Jinena hi khandhamaccumāraṃ ajitopi kilesamāraṃ jayitvā tesamaṃ avassamaṃ jiyamānattā phalūpacārena amatoti vuccatīti vedītabbamaṃ.

Puna **amatanti** amatanibbānasamannāgataṃ. Natthi mataṃ maraṇamaṃ etthāti amataṃ, nibbānaṃ. Taṃ pana santilakkhaṇamaṃ, accutarasamaṃ, animittapaccupaṭṭhānaṃ, nissaraṇapaccupaṭṭhānaṃ vā, nibbānassa pana padaṭṭhānaṃ na labbhati.

Vuttañhi **milindapañhe** nāgasenattherena “na kenaci kāraṇena nibbānaṃ uppajjati”’ti.

Taṃ assa atthīti amato, jino. Saddhādito ñāti suttana assathyatthe ṇapaccayo. Saddho paññotiādīsu viya. Assa jinassa catumaggañāṇena sacchikataṃ amataṃ nibbānaṃ atthīti attho, taṃ amataṃ.

Santanti sabbakilesadarathehi ca vaṭṭadukkhehi ca suvūpasantaṃ. So hi buddho sabbakilesadarathavaṭṭadukkhehi samittha vūpasamitthāti santoti vuccati. Samudhātu upasame ta. Dhātvantassa lopaṃ tapaccayassantoādesaṃ katvā padasiddhi veditabbā. Samsāraṇaṃ darathakārakānaṃ kilesānaṃ bodhimaṇḍe arahattamaggañāṇena samucchinditattā sītībhūto santakāyacittoti vuttaṃ hoti, taṃ santaṃ.

Asamanti sīlādiguṇehi kenaci puggalena asadisāṃ, so hi buddho natthi sīlādiguṇehi samo sadiso etassāti asamoti vuccati. Imasmiṃ sattaloke sīla samādhipaññādiguṇehi buddhena sadiso koci manusso vā devo vā brahmā vā natthīti attho. Bhagavato hi asīti anubyañjanapaṭimaṇḍita bāttimāsa mahāpurisalakkhaṇehi vicitrarūpakāyo ca sabbākārehi parisuddhasīlakkhandhādiguṇa ratanasamiddho dhammakāyo ca puññamahattathāmamahatta iddhimahattayasamahattapaññāmahattādiguṇehi ca paramukkamaṃsagato ca atthi, tasmā bhagavā sīlādiguṇehi kenaci asamo asadisoti vuttaṃ hoti.

Asamaṃ dadanti lokiyadhammena asadisāṃ maggaphalanibbāna dhammaṃ veneyyānaṃ sattānaṃ desanāñāṇena dāyakaṃ. Ettha ca asamanti natthi ettha etesaṃ vā samo sadiso lokiyadhammoti asamo, maggaphalanibbānaṃ labbhati. Atha vā asamanti aññesaṃ dhammānaṃ aggabhāvato catubbidhena ariya maggena sacchikātabbaṃ nibbānaṃ vuccati. Vuttañhetāṃ bhagavatā “yāvataṃ bhikkhave dhammā saṅkhatā vā asaṅkhatā vā, virāgo tesāṃ aggamakkhāyati”’ti. Tassa pana padassa dadantipadena kammabhāvena sambandho. Dadātīti dado, buddho. Dādhātu a, so kenaci lokiyadhammena asamaṃ asadisāṃ maggaphalanibbānasaṅkhatāṃ lokuttaradhammaṃ mahākaraṇāppadhānaṃ amatādhigamaṇapaṭipattidassanaṃ desanāñāṇena veneyyānaṃ sattānaṃ dātīti attho. Taṃ asamaṃ dadaṃ.

(Kha) dutiyagāthāyaṃ pana **saraṇanti** sabbasattalokassa paṭisaraṇabhūto parāyaṇo leṇo tāṇoti vuttaṃ hoti. So hi buddho saranti paṭisaranti ettha sattalokāti saraṇoti vuccati. Saradhātu yu. Atha vā saranti osaranti samosaranti ettha sattalokāti saraṇoti vuccati. Saranti cintenti ettha saddhā pasannā devamanussā saraṇamidanti saraṇoti ca. Saranti paṭivijjhanti etthupagatā devamanussā saddhammanti saraṇoti ca vuccati. Sara cintāyaṃ yu. Saraṇagamaṇaṭṭhāne pana sarati himsati bhayaṃ santāpaṃ dukkhaṃ kilesaṅcāti saraṇaṃ. Ratanatta yanti aṭṭhakathāsu vuttaṃ. Taṃ saraṇaṃ.

Puna **saraṇaṃ lokanti** sattasaṅkhārokāsasaṅkhatāṃ lokaṃ sarantaṃ jānantaṃ. Ettha hi lokayati paṭiṭṭhayati ettha puññāpuññaṃca tabbipāko cāti loko, satta loko labbhati. Lokadhātu paṭiṭṭhāyaṃ ṇa. Lujjati palujjati loko, saṅkhāraloko. Lujadhātuṇa. Lokiyati vicittākārena dissatīti loko, lokiyanti paṭiṭṭhiyanti ettha vā jaṅgamā ca thāvarā cāti loko, cakkavāḷasaṅkhatō okāsaloko labbhati. Lokadhātuṇa. Ettha ca sassato lokoti vā asassato lokoti vāti āgataṭṭhāne indriyabaddhānaṃ rūpādīnaṃ khandhānaṃ samūho santāno ca sattoyeva loko sattalokoti vacanatthena sattalokoti veditabbo. Eko loko sabbe sattā āhā raṭṭhitikāti āgataṭṭhāne indriyabaddhānaṃ vā anindriyabaddhānaṃ vā khandhānaṃ samūho santāno ca paccayehi saṅkhariyantīti saṅkhārā, saṅkhārāeva loko saṅkhāralokoti vacanatthena saṅkhāralokoti.

“Yāvataṃ candimasūriyā pariharanti,
Disā bhanti virocamaṇā;
Tāva sahasadhā loko,
Ettha te vattati vaso”’ti.

Āgataṭṭhāne anindriyabaddhānaṃ rūpādīnaṃ samūho santāno ca avakasanti paṭiṭṭhahanti etthāti okāso, soyeva loko okāsalokoti vacanatthena okāsa lokoti veditabbo, taṃ lokaṃ. Sarati jānāti ajānīti vā saraṇo, buddho. Sara cintāyaṃ yu. Lokaṃ saraṇanti sambandho. Buddho pana sattalokaṃ,

sāṅkhāralokaṃ, okāsalokaṃ, kilesalokaṃ, bhavalokaṃ, indriya lokaṃ, khandhalokaṃ, āyatanalokaṃ dhātulokañcātīādīmanekalokaṃ anāvaraṇañāṇena paṭivijjhatīti vuttamā hoti.

Araṇanti nikkilesaṃ, kilesasaṅkhātaraṇavirahitaṃ vā. Raṇasaddo ca kilesesu ca yuddhe cuṇṇavicuṇṇakaraṇe ca dissati. Tathā hi saraṇā dhammā araṇā dhammātiādīsu kilesesu dissati. Te hi raṇanti kandanti sattā etehīti raṇāti vuccanti.

“Dhanuggaho asadiso, rājaputto mahabbalo;
Sabbāmitte raṇaṃ katvā, saṃyamaṃ ajjhupāgami”ti.

Asadisajātake yuddhe dissati. Raṇaṃ katvāti hi yuddhaṃ katvā, saṃyamanti saṃyataṃ isipabbajjaṃ ajjhupāgamiṃti attho. Tiṇaṅca kaṭṭhaṅca raṇaṃ karonto, dhāvimsu te aṭṭhadisā samantatoti chaddantajātake cuṇṇavicuṇṇakaraṇe dissati. Raṇaṃ karontoti hi cuṇṇaṃ vicuṇṇaṃ karonto. Teti sabbe aṭṭhasahassanāgāti attho. Idha pana kilese daṭṭhabbo. Ayaṃ panettha vacanatto. Raṇanti satte rāgādayo cuṇṇenti pīlentīti raṇā, raṇanti sattā etehi kandanti paridevantīti vā raṇā, kilesā. Raṇadhātu sadde a. Natthi raṇā kilesā etassāti araṇoti vuccati. Jinassa kilesamārassa bodhimūle jiyamānattā raṇā kilesā na santīti attho. Taṃ araṇaṃ.

Araṇaṃ karanti veneyyasantāne raṇasaṅkhatakilesassa abhāvakaraṇaṃ. Ettha ca raṇanti etaṃ yehi abhibhūtā sattā kandanti paridavanti etesaṃ rāgādīnaṃ adhivacanaṃ. Tesam abhāvaṃ veneyyasantāne desanāñāṇena karoti attho. Atha vā karotīti karo, buddho. Taṃ karaṃ.

Abhayanti jātibhayādīnaṃ abhāvato nibbhayaṃ. Ettha hi bhayaṃ cittutrāsabhayaṃ, ñāṇabhayaṃ, ārammaṇabhayaṃ, ottappa bhayañcāti catubbidhaṃ hoti. Tattha bhāyati cittenāti bhayaṃ, cittutrāsabhayaṃ. Nāṇena tīretvā bhāyati bhayaṃ, ñāṇaṃ. Bhāyati etasmāti bhayaṃ, ārammaṇabhayaṃ. Bhāyati etena pāpatoti bhayaṃ, ottappabhayaṃ. Bhīdhātu bhaye ṇa.

Mahāniddesapāliyaṃ pana āgatāni jātibhayaṃ, jarābhayaṃ, byādhibhayaṃ, maraṇabhayaṃ, rājabhayaṃ, corabhayaṃ, aggibhayaṃ, udakabhayaṃ, attānuvādabhayaṃ, parānuvādabhayaṃ, daṇḍabhayaṃ, duggatibhayaṃ, ūmibhayaṃ, kumbhīlabhayaṃ, āvaṭṭabhayaṃ, susukabhayaṃ, ājīvikabhayaṃ, asilokabhayaṃ, parisayasārajjabhayaṃ, madana bhayaṃ, duggatibhayantiādīni gahitāni. Natthi bhayāni etassāti abhaya, buddho. Tassa bhayānaṃ kāraṇa bhūtānaṃ sabbakilesānaṃ arahattamaggena samucchinditattā sabbabhayaṃ natthīti attho.

Puna **abhayaṃ ṭhānaṃ nāyakanti** ettha abhayantipadaṃ ṭhānantipade visesanaṃ. Ṭhānantipadaṃ nāyakantipade kammaṃ. Bhayasaddassa attho heṭṭhā vuttoyeva. Natthi sabbabhayaṃ ettha nibbāneti abhayaṃ, nibbānaṃ. Buddhapaccekabuddha arahantā ṭhanti uppajjanti etthāti ṭhānaṃ, nibbānaṃ. Veneyyasatte netīti nāyako, buddho. Nīdhātu nayane ṇvu. So buddho bhabbe kulaputte maggādhi gamappattiyā dhammadesanāya maggaphalañāṇaṃ adhigamanto nibbānaṭṭhānaṃ netīti attho, taṃ nāyakaṃ.

Puna **nāyakaṃ nameti** nāyakaṃ buddhaṃ ahaṃ name namāmīti sambandho. Tattha nāyakanti veneyyasatte saṃsāraṇṇavato nibbānapāraṃ netīti nāyako, buddho. So hi yathā nāviko jane nāvāya orimatīrato pārimatīraṃ neti, evaṃ satte maggaṅganāvāya saṃsāraṇṇavato nibbāna pāraṃ neti pāpuṇetīti attho. Atha vā nāyakanti tiṇṇaṃ lokānaṃ jeṭṭhabhāvagamaṇattā nāyako jeṭṭha seṭṭhavuḍḍhataro. So hi jeṭṭhabhāvaṃ neti gacchati pāpuṇatīti nāyakoti vuccati. Nīdhātu gatimhi ṇvu. So pana idha loka avijjaṇḍagatānaṃ sabbapajānaṃ paṭhamataraṃ avijjaṇḍakosaṃ arahattamaggena padāletvā ariyāya jātiyā jātattā sabbasattānaṃ seṭṭhajeṭṭhavuḍḍhatarabhāvaṃ gatoti attho. Taṃ nāyakaṃ. Nameti ahaṃ tīhi dvārehi sakkaccaṃ namāmīti attho. Ettha hi vattamānamivibhattiyā kvacidhātutyādisuttēna eādeso hoti. Ayaṃ panettha vāccatthādinayo. Nametipadassa ākhyātapadattā vacanatto na kātabbo. Vuttañhi **saddavidūhi** –

“Rulhīkhyātaṃ nipātañcu, pasaggālapanaṃ tathā;
Sabbānāmantimetesu, na kato viggaho chasū”ti.

Taṃ pana padaṃ namudhātuvattamānamhayogaparassapadamivibhatyantam ākhyātapadam. Namudhātuyā vāccattho namanakriyā saṅkhāto kusalacittuppādo padhānavasena labbhati. Mivibhattiyā vāccattho tena cittuppādena upalakkhito uppāda vanto tadākāro puggalo appadhānavasena labbhati. Padasamudāyassa pana vāccattho kattukammabhāvesu kattubhūto atītādikālesu paccuppannakālabhūto dhātvattha kiriyāviseśova labbhati. Ayamettha saṅkhepo.

Vitthāro panevaṃ veditabbo. Namudhātuyā vaccaṃ sugatādi buddhaguṇaṃ ārammaṇaṃ katvā vandanākārappavatto kāyavacī viññattisamuṭṭhāpako saddhācetanāpaññāpadhāno kusala cittuppādo ca dve viññattiyō asamuṭṭhāpetvā manodvāre vandanākārappavatto kusalacittuppādo ca mukhyena labbhati. Buddhaguṇānussaraṇavasena pavatto yonisomanasikā rādipurecarānucarakuśalacittuppādo phalūpacārena. Diṭṭhadhammi kasamparāyikasāṅkhātāṃ pacchimapacchimaphalaṃ rogādiantarāyānaṃ abhāvaṅca vā saggamokkhasampattisukhaṅca kāraṇūpacārena, pure pure vandanā sadisyūpacārena, vandanassa nāmapaññatti ṭhānūpacārena, vatthudvārārammaṇaṃ ṭhānūpacārena, vandana guṇena lakkhitaṃ puggaladabbaṃ guṇūpacārena. Ukkatṭhamajjha muduttamattabhāvo guṇūpacārena, avayavabhūtā vandanā ekadesūpacārena. Samūhabhūtā vandanā ekadesyūpacārena, pubbapubbakusalacittuppādo samīpūpacārena, pacchimapacchima kusalacittuppādo samīpyūpacārena, paṇāmakusalacittuppādabhūtānaṃ paramatthadhammānaṃ nibyāpārabhāvo taddhammūpacārena. Tesam evaṃ dhammatābhāvo ataddhammūpacārena, vandanākāro abhedabhedūpacārena. Vandanasatti bhedaabhedūpacārena labbhati. Mivibhattiyā vaccaṃ taṃmukhyādīhi lakkhito kattu kriyāviseśena ca vattamānavibhattisaṅkhātena vibhattiviseśena ca parassapadasaṅkhātena padaviseśena ca uttamapurisa viseśena ca amhayogaviseśena ca sabbadhātuviseśena ca ekavacanaviseśena ca paccuppannakālaviseśena ca dhātvatthakriyāviseśena ca alīnga viseśena ca bhūvādigaṇa viseśena ca novikaraṇaviseśena ca bhāvakammakattūsukattuviseśena ca lakkhito ahaṃsaṅkhāto khandhasaṅkhato santāno appadhānena labbhati. Kriyāpadassa kriyāya padhānena vācakattā dhātvatthova padhānena labbhati. Apaccayassa vaccaṃ bhūvādigaṇajotakā rūpasiddhimattā pada siliṭṭhatā labbhati.

Atha vā yo ahaṃ namāmīti so name. Sāmaññattha viggahoyaṃ. Vāccattho pana vuttanayena veditabbo. Namaññettha buddhassa sīlānāntaguṇesu ninnapabbhāratāvasena paṇāmakriyābhiniṭṭhādīkā kuśalacetanā. Sā ca vandaneyya vandanakānaṃ khettajjhāsayasampadāhi diṭṭhadhammavedanīyabhūtā yathāladhasampattinimittakassa purimakammaṃ anubalappadāna vasena tannibhattitavipākasantatiyā antarāyakarāni upapīlakaupacchedakammāni paṭibāhitvā pavattikāle rogādiantarāyānamappavattim sādheti. Samparāye ca upapajjavedanīyabhūtā saggamokkhasampattisukhaṃ nibbattetīti.

Ayaṃ panettha **dassanattanayo**. Nametiiminā buddhassa sugatādiguṇaṃ ārabba pavattā tividhā paṇāmakusala cetanā mukhyena dasseti. Taṃ dassanena tassā kāraṇabhūtā yonisomanasikārādayo ca catucakkasampattiṅca buddhuppādanavamakhettaṅca pubbabhāge pavattaṃ saddhāpaññāpadhānaṃ kuśalacittuppādaṅca phalūpacārena dīpeti. Taddīpanena tassā phalabhūtaṃ diṭṭhadhammarogādiantarāyavisosanaṅca saggamokkha sukhaṅca paṭhamakāraṇūpacārena pakāseti. Tappakāsanena buddhassa paṇāmārahabhāvaṃ dutiyakāraṇūpacārena vibhāveti. Taṃvibhāvanena vandakassa me khettaṅgatabhāvaṅca paṇāme tabbābhāvaṅca tatiyakāraṇūpacārena anubhāveti.

Ayaṃ panettha **alaṅkāranayo**. Nametivācakapadassa vāccabhūtā tividhā buddhapaṇāmakusalacetanā samaṭṭhāyī bhāvo nāma. Kasmā, sarīrattā. Atha vā tividhāya buddhapaṇāmakusalacetanāya sampayutto samādhīpadhāno mahā kuśalacittuppādo samaṭṭhāyībhāvo nāma. Kasmā, buddhassa sugatādiguṇārammaṇe ekaggattā samāhitacittattā vā. Soyeva pana santaraso nāma. Kasmā, buddhapaṇāmacetanā kuśalaṅgena akusalaṅgassa pahīnattā. Buddhantipāṭhasesa padassa vāccabhūto buddhadabbo ārammaṇavibhāvo nāma. Kasmā, tassa paṇāmakusalacittuppādassa ārammaṇapaccayena upakāratā. Buddhassa sugatantyādiguṇo uddīpanavibhāvo nāma. Kasmā, paṇāmassa kāraṇattā. Kāraṇabhūtaṃ taṃ samaṭṭhāyībhāvaṃ upādāya jānitabbo diṭṭhadhammarogā diantarāyābhāvo ca samparāye saggamokkhasukhasampatti ca anubhāvo nāma. Kasmā, ānisaṃsaphalattā.

Tattha hi kiñcāpi ānubhāvadīpakam padam natthi. Kāraṇassa pana phalena vinābhāvato kāraṇassa phalam viññeyyanti. Atha vā nametipadassa sāmattihiyato ānubhāvo dassitoyevāti daṭṭhabbo. Āvibhūto ussuko ca buddhapaṇāmassa ānisaṃsapajānānā mati ca alasābhāvo ca cittappasādo ca samādhityādi ca byabhicārībhāvo nāma. Lomahaṃsādībhāvo satvaṃkābhāvo nāmāti alaṅkāra nayo vedītabbo. Evaṃ pacchimapacchimagāthāsūti.

Ayam panettha **sankhepayojanā**. Sugataṃ sobhanagataṃ sundaranibbānaṭṭhānaṃ gataṃ vā sammā gataṃ vā, sugataṃ sammā vacanaṃ gadaṃ bhāsanam, seṭṭham pasattharam satipaṭṭhānādībhede dhamme gavesantaṃ vā santehi gavesitabbaṃ vā sattānaṃ hitasukham icchitaṃ vā, kusalamkusalam kusalamakusalam, jamaṃ jahitaṃ, amataṃ maraṇavirahitaṃ amataṃ amatanibbānasamannā gataṃ, santaṃ kilesadarathavūpasamaṃ, asamaṃ lokiyadhammena asadisamaṃ maggaphalanibbānadhammaṃ. Dadaṃ dātaṃ dāyakaṃ vā, saraṇaṃ sabbasattalokassa paṭisaraṇabhūtaṃ. Lokaṃ sattaśākhā rokāśāśākhataṃ tilokaṃ, saraṇaṃ jānantaṃ, araṇaṃ nikkilesaṃ, kilesaśākhāraṇavirahitaṃ vā. Araṇaṃ sattesu kilesarajassābhāvaṃ, karaṃ desanāñāna kataṃ, abhayaṃ nibbhayaṃ, abhayaṃ nibbhayaṭṭhānaṃ nibbānadisaṃ, nāyakaṃ satte nibbānapāraṃ nentaṃ, nāyakaṃ tilokānaṃ jeṭṭhaṃ pāmokkhaṃ buddhaṃ sakkaccaṃ tīhi dvārehi ahaṃ name namāmīti.

Paṭhamavandanagāthādvayaṇṇanā samattā.

2. Nayanasubhagakāyaṅgaṃ,
Madhuravarasaropetaṃ;
Amitagaṇagaṇādhāraṃ,
Dasabalamatulaṃ vande.

2. Evaṃ paṭhamaṃ gāthādvayena buddhassa namassitvā idāni nayanasubhagakāyaṅgāntiyādīhi pañcahi guṇehi thomitvā buddhaṃ vanditum **nayanasubhagakāyaṅgāntiyādīgāthamaḥa**. Ayam pana na na maganaṃyuttatā navakkharehi lakkhitā bhujagasu sugāthāti daṭṭhabbā. Vuttañhi **vuttodaye** “bhujagasusumatā nāmo”ti.

Ayam panettha yojanā. Yassaṃ paṭipādaṃ nā ca dve nagaṇāmo ca maganaṃ ca yadi siyā. Sā bhujagasusu gāthāti matā nītabbāti. Tattha pana **nayanasubhagakāyaṅgānti** sabbasattānaṃ cakkhussa sobhanaṃ gatena kāyaṅgenasamannāgataṃ. Ettha hi nayananti samavisamaṃ dassentaṃ atabhāvaṃ netīti nayaṃ, cakkhu labbhati. Nīdhātu yu. Subhaṃ sobhanaṃ gacchati subhagaṃ, kāyaṅgaṃ labbhati. Subhasaddūpapado gamudhātu kvi. Kāyassa aṅgaṃ avayavaṃ kāyaṅgaṃ. Bhagavato kāyaṅgaṃ labbhati. Chatṭhītappurisasaṃsāyamaṃ. Nayanassa subhagaṃ nayanasubhagaṃ, taṃ kāyaṅgaṃ yassa buddhassāti nayanasubhaga kāyaṅgo, buddho. So hi rūpakāyassa dassanā nuttariyagaṇayogato sabbasattānaṃ pasādacakkhussa sobhanaṃ gatena dvattīṃsamahāpurisalakkaṇehi ca asīyā nubyāñjalalakkaṇehi ca lakkhitena kāyaṅgena samannāgatoti attho.

Madhuravarasaropetanti piyapemaṇīyuttamasaddena samannāgataṃ, so hi bhagavā madhiyati piyati pemiyaṃ vāti madhuro. Madhadhātu uro. Vuttañhi **majjhimapannaśāṭikāyaṃ** “madhuroti piyo pemaṇīyo apalibuddho”ti. Atha vā madhiyati assādiyatīti madhuro, madhati sabbasattānaṃ pītiṃ undeti vaḍḍhetīti madhuro, madhadhātu unde uro. Tena vuttaṃ **saddanītiyaṃ** “madha unde”ti. Varītabbo icchītabbo patthītabbo vāti varo, saro. Varadhātu icchāyaṃ a. Sarati gacchati sotaviññāṇārammaṇabhāvanti saro, saddo. Saradhātu gatiyaṃ a. Sarati gacchati suyyamānanti vā saro, sariyati suṇiyatīti vā saro, bhagavato aṭṭhaṅgasamannāgato saddo labbhati. Upasampajjati upeto, upapubbaidhātu ta. Madhuro ca varo ca so saro cāti madhuravarasaro, tena upeto sampanno samannāgatoti madhuravarasaropetoti vuccati. Bhagavato pana hadaya vatthuno suvisuddhattā pītiṃsamahādihi apalibuddhattā deva manussehi madhurena piyena manāpiyena varena icchītapatthi tena aṭṭhaṅgasamannāgatena sarena saddena upeto sampanno samannāgatoti vuttaṃ hoti.

Ettha ca kiñcāpi saropetanti sāmāññavasena vuttaṃ, bhagavato saro pana viṭṭho ca, viññeyyo,

mañju, savanīyo, bindu, avisārī, gambhīro, ninnādi cāti visesena aṭṭhaṅgasamannāgatoti attho daṭṭhabbo. Vuttañhi majjhima pañṇāse **brahmāyusutte** “aṭṭhaṅgasamannāgato kho panassa gotamassa mukhato ghoso niccharati visaṭṭho ca, viññeyyo ca, mañju ca, savanīyo ca, bindu ca, avisārī ca, gambhīro ca, ninnādi ca. Yathāparisaṃ kho pana so bhavaṃ gotamo sarena viññāpeti, na cassa bahiddhā parisāya ghoso na niccharatī”ti.

Tassāṭṭhakathāyaṃ pana visaṭṭhoti siniddho apalibuddho. Viññeyyoti viññāpanīyo pākaṭo. Visaṭṭhattāyeva cesa viññeyyo hoti. Mañjūti madhuro. Savanīyoti sotasukho, madhurattāyeva cesa savanīyo hoti. Bindūti sampiṇḍito. Avisārīti avisaṭo. Binduttāyeva cesa avisārī hoti. Gambhīroti gambhīrasamuṭṭhito. Ninnādīti ninnadavā. Gambhīrattāyeva cesa ninnādi hoti. Yathāparisanti cakkavālapariyantāpi ekabaddhaṃ parisaṃ viññāpeti. Bahiddhāti aṅgulimattampi parisato bahiddhā na gacchati. Kasmā. So evarūpo madhurasaro akāraṇā mā nassīti. Iti bhagavato ghoso parisāya mattakeneva caratīti vaṇṇitoti. **Abhidhānappadīpikāyañca** vuttā saṅgahagāthā –

“Visaṭṭhamañjuviññeyyā, savanīyāavisārino;
Bindugambhīraninnādi, tyevamaṭṭhaṅgiko saro”ti.

Yathā hi brahmuno saro pittasemhehi apalibuddhattā visuddho madhuro hoti. Yathā ca sīhabyagghādīhi vālamigehi anubandhā dhāvanta khuddakamigā karavīkasakuṇassa vikūjamānaṃ saddaṃ sutvā sarassa madhurattā maraṇabhayaṃ hitvā adhāvivā ukkhittapādaṃ anikkhipivā tiṭṭhanta suṇanti, evaṃ karavīkassa saddo dhammatābhāvena madhuro piyo manāpo hoti. Evaṃ bhagavatā kataṃ kammaṃ vatthuṃ sodheti, vatthussa suddhattā pittasemhehi ca apalibuddhattā bhagavato nābhito samuṭṭhahanto saropi aṭṭhaṅgasamannāgato suvisuddho atimadhuro atipiyo atimanāpo hoti. Sā panesā hīnūpamā hoti, bhagavato hi saro tehi saddehi satabhāgena sahasabhāgena atimadhuro atipiyo atimanāpo hoti, tathā hi dhammāso karaṇā asandhimittā devī karavīkasakuṇassa madhurasaddaṃ sutvā cintesi “imassa tiracchānassa madhuro saddo, ko nāma sabbaññutaññasiriṃ pattassa bhagavato atimadhuro saddo”ti, pītiṃ uppādetvā taṃ pītiṃ avijahitvā sattahi jaṅghasatehi saddhiṃ sotāpattiphale patiṭṭhāti, tasmā bhagavato madhuravarasaropetanti thometīti.

Amitaguṇagaṇādhāranti aparimiṇitabbasīlādiguṇasamūhānaṃ patiṭṭhānabhūtaṃ. Ettha ca samitoti parimiṇitabboti mito, mādhātu parimāṇe ta, na mito amito. Guṇoti sīlādayo dhammā. Te hi guṇenti taṃsamaṅgīpuggalaṃ pakāsentīti guṇāti vuccanti. Guṇadhātu pakāsane a. **Maṇisāramañjūsāṭīkāyaṃ** pana “guṇanti attano ādhāraṃ pākaṭaṃ karontīti guṇā”ti vuttaṃ.

Saddanītidhātumālāyañca “guṇa āmantane, guṇoti sīlādayo dhammā, kenaṭṭhena te guṇā, goṇāpiyati āmantāpiyati attani patiṭṭhito puggalo daṭṭhuṃ sotuṃ pūjituñca icchantehi janehīti guṇo. Ettha kiñcāpi sīlādī dhammānaṃ āmantāpanaṃ natthi, tathāpi taṃhetu āmantanaṃ nimantanañca teyeva karonti nāmāti evaṃ vuttaṃ. Aññe pana guṇjante abyayante iti guṇāti atthaṃ vadanti. Tadanurūpaṃ pana dhātusaddaṃna passāma. Guṇa āmantane icceva passāma. Vicāretvā gahetabba”nti vuttaṃ. Amito guṇo amitaguṇo, tesam gaṇo samūho amitaguṇagaṇo, tesam. Ādhārati tiṭṭhāti etthāti amitaguṇagaṇādhāro, jino labbhati. So pana samuddodakaṃ nālipattena aparimitaṃ viya kenaci aparimitānaṃ sīlādiguṇasamūhānaṃ ādhāro patiṭṭhānabhūtoti attho.

Dasabalanti aññehi asādhāraṇaṃ tathāgatadasabalasampannaṃ. Ettha hi balanti kehici viruddhehi kāraṇe hi balanti na kampenti thirantīti balaṃ, dasa balāni yassa soti dasabalo, buddho. Taṃ pana duvidhaṃ hoti tathā gatassa dasabalaṃ kāyadasabalañca, ñāṇadasabalañcāti. Tesu hi kāyabalaṃ hatthikulānusārena veditabbaṃ. Vuttañhetam **porāṇehi** –

“Kālā vakañca gaṅgeyyaṃ, paṇḍaraṃ tambapiṅgalaṃ;
Gandha maṅgalaheṃmañca, uposathaṃ chaddantime dasā”ti.

Imāni hi dasa hatthikulāni. Tattha kālāvakanti pakatihatthikulam daṭṭhabbaṃ. Yaṃ dasannaṃ purisānaṃ kāyabalaṃ, taṃ ekassa kālāvakahatthino. Yaṃ dasannaṃ kālāvakānaṃ balaṃ, taṃ ekassa gaṅgeyyassa. Yaṃ dasannaṃ gaṅgeyyānaṃ, taṃ ekassa paṇḍarassa. Yaṃ dasannaṃ paṇḍarānaṃ,

taṃ ekassa tambassa. Yaṃ dasannaṃ tambānaṃ, taṃ ekassa piṅgalassa. Yaṃ dasannaṃ piṅgalānaṃ, taṃ ekassa gandhahatthino. Yaṃ dasannaṃ gandhahatthīnaṃ, taṃ ekassa maṅgalassa. Yaṃ dasannaṃ maṅgalānaṃ, taṃ ekassa hemavatassa. Yaṃ dasannaṃ hemavatānaṃ, taṃ uposathassa. Yaṃ dasannaṃ uposathānaṃ, taṃ ekassa chaddantassa. Yaṃ dasannaṃ chaddantānaṃ, taṃ ekassa tathāgatassa, nārāyanasaṅghātabalantipi idameva vuccati. Tadeva pakatihatthīnaṃ gaṇanāya hatthikoṭisahassānaṃ. Purisagaṇanāya dasannaṃ purisakoṭisahassānaṃ balaṃ hoti. Idaṃ tathāgatassa kāyabalaṃ hoti. Idaṃ pana tāsu tāsu pālīsu na āgataṃ. Aṭṭhakathāsuyeva āgataṃ. Tena vuttaṃ dasaka nipāta **añguttaraṭṭhikāyaṃ** “dasa balañānaṃ pana pālīyaṃ āgatameva. Na kāyabalaṃ viya aṭṭha kathārūḷhamevāti adhippāyo”ti. Ettha ca nārāyana saṅghāta balanti ettha nārā vuccanti rasmiyo, tā bahū nānāvīdhā ito uppajjantīti nārāyanaṃ, vajiraṃ. Tasmā nārāyanasaṅghāta balanti vajirasaṅghātabalanti atthoti.

Ñānadasabalaṃ pana vibhaṅgapālīyaṃca mūlapaṇṇāse mahā sīhanādasutte dasakanipātaṅguttarapālīyaṃca vitthārena āgatameva. Sukhaggahaṇatthaṃ pana saṅkhepena dassayissāmi. Seyyathidaṃ. Thānāṭṭhānañānaṃca, kammaśāntānaṃ vipākāñānaṃ, sabbatthagāminipaṭipadāñānaṃ, anekadhātu nānādhātu loka ñānaṃ, sattānaṃ nānādhimuttikataṃ ñānaṃ, parasattānaṃ parapuggalānaṃ indriyaparopariyattiñānaṃ, jhānavimokkhasamādhisamāpattīnaṃ saṃkilesaṃ vodānaṃ vuṭṭhānaṃ ñānaṃ, pubbenivāsānussatiñānaṃ, sattānaṃ cutūpapātaṃ ñānaṃ, āsavānaṃ khayañānaṃca. Ayaṃ pana kamo abhidhammavibhaṅgapālīyaṃ āgatakkamo.

Cutūpapātañānaṭṭhāne pana mūlapaṇṇāsapālīyaṃ mahāsīhanādasutte ca dasakanipātaṅguttarapālīyaṃ dibbacakkhuñānaṃ āgataṃ. Atthato pana dibbacakkhuñānaṃ cutūpapātaṃ passitātaṃ sadisamevāti. Tattha hi thānāṭṭhānañānanti kāraṇākāraṇaṃ yathābhūtaṃ jānanañānaṃ. Kāraṇaṃhi yasmā tattha phalaṃ tiṭṭhati tadāyattavuttitāya uppajjati ceva pavattati ca, tasmā thānanti vuccati. Kammasamādhānaṃ vipākāñānanti samādiyitvā katānaṃ atītānāgata paccuppanānaṃ kusalākusalakammānaṃ sugatiduggatipaṭisaṅkhātānaṃ vipākānaṃ nibbānaphalaṃca yathābhūtaṃ pajānanañānaṃ. Sabbattha gāminipaṭipadaṃ ñānanti sabbatthagāminiṃca paṭipadaṃ maggaṃ yathābhūtaṃ pajānanañānaṃ. Tattha ca paṭipadanti paṭipajjati pāpuṇāti etenāti paṭipadaṃ, maggaṃ. Gatigāmininti nirayādīpaṇcagatigāminiṃ. Agatigāmininti nibbānagāminiṃ. Vuttañhi “nibbānañānaṃca sārīputta pajānāmi nibbānagāminiṃca paṭipada”nti.

Anekadhātunānādhātulokaṃ ñānanti ettha aneka dhātūti cakkhudhātuādīhi kāmadhātūhi vā bahudhātūti. Nānādhātūti tāsaṃyeva dhātūnaṃ vilakkhaṇatā visadisa sabhāvattā nānāppakāradhātūti. Lokanti khandhāyatana dhātulokaṃ. Ñānanti yathābhūtaṃ pajānanañānaṃ. Sattānaṃ adhimuttikataṃ ñānanti sattānaṃ hīnādīhi adhimuttīhi nānādhimuttikabhāvaṃ yathābhūtaṃ pajānanañānaṃ. Parasattānaṃ parapuggalānaṃ indriyaparopariyattiñānanti ettha parasattānanti padhānasattānaṃ. Parapuggalānanti tato paresaṃ hīnasattānaṃ. Ekattameva vā etaṃ padadvayaṃ veneyyavasena dvedhā vuttaṃ. Indriyaparopariyattiñānanti saddhādīnaṃ indriyānaṃ parabhāvaṃ vaḍḍhaṃca aparabhāvaṃ hāniṃca yathābhūtaṃ pajānanañānaṃ.

Jhānavimokkhasamādhisamāpattīnaṃ saṃkilesaṃ vodānaṃ vuṭṭhānaṃ ñānanti ettha jhānavimokkhasamādhisamāpattīnanti paṭhamādīnaṃ catunnaṃ jhānaṃ, rūpī rūpāni passatītiādīnaṃ aṭṭhannaṃ vimokkhānaṃ, savitakkasavicāradīnaṃ tiṇṇaṃ samādhīnaṃ, paṭhamajjhāna samāpattītiādīnaṃca navannaṃ anupubbasaṃpattīnaṃ. Saṃkilesanti hānabhāgiyadhammaṃ. Vodānanti visesabhāgiyadhammaṃ. Vuṭṭhānanti yena kāraṇena jhānādīhi vuṭṭhahanti, taṃ kāraṇaṃ. Ñānanti yathābhūtaṃ pajānanañānaṃ. Pubbenivāsānussatiñānanti pubbe nivutthakkhandhānussaraṇasaṅkhātānaṃ pajānanañānaṃ. Sattānaṃ cutūpapātaṃ ñānanti sattānaṃ cutiṃca upapātaṃca pajānanaṃ dibbacakkhuñānaṃ. Āsavānaṃ khayañānanti kāmāsavādīnaṃ khayasaṅkhātānaṃ āsavanirodhaṃ nibbānaṃ yathābhūtaṃ pajānanañānaṃ. Imāni pana ñānāni aññehi asādhāraṇāni tathāgatassa dasabalañānānti daṭṭhabbāni.

Honti cettha –

“Thānāṭṭhānaṃ vipākañca, ñāṇaṃ paṭipadaṃ ñāṇaṃ;
Anekadhātulokañca, sattānaṃ adhimuttikaṃ. [sā panesā setavavipulāgāthāti daṭṭhabbā;]

Indriyaparāparañca, jhānādīnaṃ saṃkilesaṃ;
Vodānaṃ vuṭṭhānaṃ ñāṇaṃ, pubbenivāsānussatiṃ;
Sattānaṃ cutūpapātaṃ, āsavakkhayaṃ ñāṇanti;
Dasimāni buddhassa cā, sādharmaṇāni ñāṇāni”ti. [sā panesā sāmāññagāthāti daṭṭhabbā;]

Nanu dasabalañāṇaṃ nāma pāṭiyekkaṃ natthi, sabbaññutañāṇameva hoti, atha kasmā taṃ ñāṇaṃ dasabhedena vuttanti. Vuccate. Aññameva hi dasabalañāṇaṃ, aññāṃ sabbaññutañāṇaṃ, dasabalañhi sakasakakiccameva jānāti. Sabbaññutañāṇaṃ pana tampi tato avasesampi pajānāti. Dasabalañāṇesu hi paṭhamaṃ kāraṇākāraṇameva jānāti. Dutiyāṃ kammantara vipākantaremeva. Tatiyāṃ kammaparicchedameva. Catutthaṃ dhātu nānattakāraṇameva. Pañcamaṃ sattānaṃ ajjhāsayaḍhimuttimeva. Chaṭṭhaṃ indriyānaṃ tikkhamudubhāvameva. Sattamaṃ jhānādīhi saddhiṃ tesāṃ saṃkilesādimeva. Aṭṭhamaṃ pubbe nivutthakhandhasantatimeva. Navamaṃ sattānaṃ cutipāṭisandhimeva. Dasamaṃ saccaparicchedameva. Sabbaññutañāṇaṃ pana etehi jānitabbañca tato uttariñca pajānāti. Etesāṃ pana kiccaṃ na sabbaṃ karoti. Tañhi jhānaṃ hutvā appetuṃ na sakkoti. Iddhi hutvā vikubbituṃ na sakkoti. Maggo hutvā kilese khetuṃ na sakkoti. Evaṃ tesāṃ ñāṇadvayānaṃ visesoti. Taṃ pana idha ñāṇadvayaṃ adhippetanti.

Atulanti sīlādīhi guṇehi kenaci puggalena asadisāṃ. Ayaṃ panettha vacanatto. Tulanaṃ ummānaṃ tulā, tula sadisaṃ. **Saddanītiyañhi** “tula ummāne”ti vuttaṃ. Atha vā tuliyati pamiyati eṭāyāti tulā, pakatitulā. Tulā viyāti tulā, ñāṇaṃ. Tāya sammīto tulo. Sammita taddhite apaccayo. Tulasadisāñāṇena sammīto puggalo. Na tulo atulo. Kammadhārayamissakatappurisa samāsoyaṃ. Sīlādiguṇehi kenaci puggalena asadiso bhagavā labbhati. Atha vā natthi tulo sadiso puggalo etassāti atulo, bhagavā. Atagguṇasaṃviññāṇoyāṃ bahubbhīhi. Sīlādiguṇehi kenaci asadiso aggapuggaloti attho. Sadevake loke aggapuggalabhāvato. Yathāha “yāvata bhikkhave sattā apadā vā dvīpadā vā catuppadā vā, tathāgato tesāṃ aggamakkhāyati, virāgo seṭṭho dhammānaṃ dvīpadānañca cakkhumā”ti. Taṃ atulaṃ buddhanti sambandho. **Vandeti** buddhassa nayanasubhagakāyaṅgādiguṇaṃ anussarivā tīhi dvārehi sakkaccaṃ ahaṃ vandāmīti attho. Ettha ca mivibhattiyā mahāvisayasuttēna ekārā desoti daṭṭhabbo. Vandanaṃ pana tivadhā hoti kāyavacīmanovandanāvāsenāti. Yathāha “tisso imā bhikkhave vandanā. Katamā tisso. Kāyena vandati, vācāya vandati, manasā vandati”ti.

Tattha yoniso manasikāracittaṃ paccupaṭṭhāpetvā jāṇudvayakapparaḍvayanalāṭasāṅkhātāni pañca āṅgāni bhūmiyaṃ paṭiṭṭhāpetvā vandaneyyānaṃ abhimukhaṃ nipatanto kāyena vandati nāma. Yaṃ sandhāya “pañcapaṭiṭṭhitena vandivā”ti aṭṭha kathādīsu vuttaṃ. Buddhaguṇapadāni vācāya pavattento vācāya vandati nāma. Vipassissa namatthu, sikhissāpi namatthu, vessa bhussa namatthu, kakusandhassa namatthu, koṇāgamanassa namatthu, kassapassa namatthu, āṅgīrassassa namatthu tyādīsipi vācāvandanāyeva. Buddhādī guṇāni anussaranto manasā vandati nāmāti.

Ayaṃ panettha **saṅkhepayojanā**. Nayanasubhagakāyaṅgaṃ sabbasattānaṃ cakkhussa sobhanaṃ gatena kāyaṅgena samannāgataṃ, madhuravarasaropetaṃ piyapemañiyena assādī yena uttamasaddena samannāgataṃ, amitaguṇagaṇādhāraṃ aparimīṇitabbasīlādiguṇasaṃmūhānaṃ paṭiṭṭhānabhūtaṃ, dasabalaṃ anaññasādhāraṇena tathāgatassa kāyañāṇadassa balena samannāgataṃ, atulaṃ sīlādiguṇehi kenaci asadisāṃ buddhaṃ tīhi dvārehi sakkaccaṃ ahaṃ vande vandāmīti.

Dutiyavandanagāthāvaṇṇanā samattā.

3. Yo buddho dhitimāññadhārako,
Saṃsāre anubhosi kāyikaṃ;
Dukkhaṃ cetasikañca lokato,
Taṃ vande naradeva maṅgalaṃ.

3. Evaṃ tatiyagāthāya buddhassa vandivā idāni samādhi ādīhi catūhi guṇehi thomitvā

vanditukāmo **yo buddho dhitimāññadhārako** tiādigāthamāha. Ayaṃ pana masajagaṇa garuyuttattā dasakkharehi lakkhitā suddhavirā jitagāthāti daṭṭhabbā. Vuttañhi **vuttodaye**-msājgā suddhavirā jitaṃ matanti. Tassattho. Yassaṃ paṭipādaṃ msā masagaṇā ca jgā jagaṇagarukā ca ce siyyuṃ, taṃ vuttaṃ suddhavirājītaṃ mataṃ ñātabbanti. Dhitimā aññadhārako yo buddho lokato saṃsāre kāyikaṃ dukkhañca cetasikaṃ dukkhañca anubhosi naradevamaṅgalaṃ, taṃ buddhaṃ ahaṃ vandeti sambandho.

Tattha hi **yoti** aniyamaniddeso. Yo yādisoti attho. Tassa ca aniyamavācaka sabbanāmapadattā vacanattho na kātabbo. Tassa pana ya oti padavibhāgo kātabbo. Tesu ca yasaddassa vācamaṃ aniyamo buddhadabbo appadhānena labbhati, tassa yādisayuttajaccanāmagottasīlavihārī gocarasaṅkhātaṃ aniyamasāmaññākāratagūṇameva padhānena labbhati. Paṭhamāsivibhattiyā kāriyabhūtaṃ okārasa vācamaṃ pakatūpanissayasāṅkhātaṃ kattukārakekavacanasāṅkhyamaṃ labbhati. Atha vā sabbanāmapadattā yāti gacchatīti yo, aniyamavācakaṃ bhāvaṃ yāti gacchatīti vā yo, sabbanāma bhāvena yāti pavattatīti vā yo, sabbanāmapadattā yātabbo ñātabboti vā yo, yātabbo ñātabbo etena vā aniyamatthoti yo.

Tenaṃ **porāṇā** –

“Nānākāraṇaṃ paṭicca, dhātupaccayaviggamaṃ;
Cintakānaṃ pabhāvova, padhānaṃ hoti cintane”ti.

Buddhoti paṭividdhacatusaccadhammo. Ayaṃ panettha vacanattho. Bujjhati cattāri saccānīti buddho, bhagavā. Suddhakattusādhanoyaṃ. Budhadhātu ta. Bodhetā pajāyāti vā buddho, hetu kattusādhanoyaṃ. Aññesaṃ cattāri saccāni bodhetīti attho. Atha vā anaññabodhito hutvā savāsānāya sammohaniddāya bujjhati jāgarotīti buddho, dinakarakiraṇa samāgamena paramarucirasirīsobhaggappattiyā vikasitamiva padumaṃ aggamaggañāṇasamāgamena aparimitagūṇaṅgalaṅkata sabbaññutaññāṇappattiyā bujjhati vikasatīti vā buddho, nibbāna saṅkhātaṃ ekāyanamaggaṃ bujjhati gacchatīti vā buddho. Budhasaddo hi ñāṇādīsu catūsvatthesu vattati.

Tena vuttaṃ –

“Ñāṇe vikasane ceva, gamane cāpi jāgare;
Catūsvetesu atthesu, budhasaddo pavattatī”ti.

Atha vā sabbañeyyadhamme bujjhati jānātīti buddho, pārami bhāvitāya paññāya sabbe saṅkhatāsaṅkhatadhamme bujjhati abujjhi bujjhissatīti vā buddho, sammāsambuddho vata so bhagavatī adhigatañāṇagūṇavisesehi bujjhitabboti vā buddho, bhagavatā bujjhitabbaṃ ñātabbanti buddhaṃ. Kiṃ taṃ, sabbaññuta ñāṇaṃ, tadassatthīti buddho, bhagavā. Atthato pana pāramitā bhāvito sayambhūñāṇena saha vāsānāya vihataviddhata niravasesakleso mahākaraṇāsabbaññutaññāṇādiapari meyyagūṇaṅgadhāro khandhasantāno buddho. Yathāha “buddhoti yo so bhagavā sayambhū anācariyako pubbe ananussutesu dhammesu sāmaṃ saccāni abhisambujjhi, tattha ca sabbaññutaṃ patto, balesu ca vasībhāva”nti.

Ettha ca buddho nāma sabbaññubuddha, paccekabuddha, catusaccabuddha, suta buddhavasena catubbidho hoti. Tattha kappasatasahassādhikāni cattāri asaṅkhyeyyāni samatīmsapāramiyo pūretvā sambodhipatto sabbaññubuddho nāma. Kappasatasahassādhikāni dve asaṅkhyeyyāni pāramiyo pūretvā sayambhūpatto paccekabuddho nāma. Avasesā khīṇāsavā catusaccabuddho nāma. Bahussuto sutabuddho nāma. Idha pana sabbaññubuddho adhippeto.

Dhitimāññadhārakoti ettha dhitimā aññadhārakoti padacchedo kātabbo. Dhitimāti samādhivanto, sampayutta dhamme ekārammaṇe dhāretīti dhiti, samādhī. Dhādhātuti. Ākārasa ikārādeso. Dhiyati ṭhapeti ekārammaṇe sampayuttadhammeti dhiti, cittena yogeneveso ekā rammaṇe patiṭṭhāpanavasena cittassa ārammaṇe niccalabhāvena patiṭṭhāpetīti attho. Dhiti assa atthīti dhitimā, buddho. So hi yathā mahāmeru catūhi disāhi bhusaṃ āgatehi vātehi na samīñjati, evaṃ paṭipakkhehi micchāvāda vātehi ca iṭṭhāniṭṭhārammaṇehi ca lābhālābha yasāyasa nindā pasamsa

sukhadukkhasaṅkhātehi lokadhammehi ca na samiñjati, samādhivantoyeva hotīti vuttaṃ hoti.

Aññadhārakoti arahattaphalahārako. Vimuttisaṅkhātaṃ arahattaphalasetacchattaṃ dhārento vā. Jānāti paṭhama maggena diṭṭhasaccassa āmariyādaṃ anatikkaṃitvā vāti aññaṃ, arahattaphalaṃ. Āpubbaññadhātu kvi. Āsaddo mariyādattho. Saṃyogaparattā ākāraṃ rasso, taṃ dhāretīti aññadhārako. Aññasaddūpapadadharadhātu ṇvu. **Samṣāreti** khandhadhātuāyatanānaṃ abbochinnaṃ pavattamāne saṃsāraṃvaṭṭe.

Vuttañhi **aṭṭhakathāyaṃ** –

‘‘Khandhānaṃca paṭipāṭi, dhātuāyatanāna ca;
Abbochinnaṃ vattamānā, saṃsāroti pavuccatī’’ti.

Khandhadhātuāyatanānaṃ aññamaññasambandhena sampunappunaṃ sarati gacchati pavattatīti saṃsāro. Saṃpubbasaradhātu gatimhi ṇa. Atha vā khandhāyatanadhātuyo saṃ abbochinnaṃ saranti gacchanti pavattanti etthāti saṃsāroti vacanatto kātabbo, tasmim. **Anubhosīti** anupunappunaṃ abhuñji, avedayīti attho. **Kāyikanti** kāye sarīre pavattaṃ kāyikaṃ. **Cetasikanti** cetasi pavattaṃ cetasiṃ. Taṃ pana padadvayaṃ dukkhantipade visesaṃ. **Dukkhanti** vaṭṭadukkhaṃ. Dukkhaṃ dukkhaṃ, atha vā dukkhayātīti dukkhaṃ, dukkhadhātu a. Idaṃ pana nibbanaṃ kāritavasena vuttaṃ. Yassa uppajjati, taṃ dukkhitam karotīti vuttaṃ hoti. **Lokatoti** sattalokahetu. Lokiyanti pavattanti ettha puññāpuññāni tabbipāko cāti loko. Lokadhātu ṇa. Atha vā kusalādīni lāti gaṇhātīti loko. Lādhātu okapaccayo. Satta lokova labbhati. Dhitimā aññadhārako yo buddho saṃsāraṃvaṭṭe nimuggānaṃ sattānāmanudayāya saṃsāraṃvaṭṭadukkhaṃ pamocetukāmo kappasatasahassādhikāni cattāri asaṅkheyyāni atidukkarāni samatimsapāramiyo pañca mahā pariccāge ca karonto sattalokahetu kāyikaṃ cetasiṃ saṃsāraṃvaṭṭadukkhaṃ anubhavasīti vuttaṃ hoti. **Tanti** tādisaṃ buddhaṃ. **Vandeti** vandāmi.

Naradevamaṅgalanti naradevānaṃ maṅgalabhūtaṃ. Ayaṃ panettha vacanatto. Nirayaṃ neti pāpuñātīti naro, manusso. Nidhātu pāpunane aro. Ariyamanusso pana bhūtapubbagatika nayena naro nāmāti. Atha vā seṭṭhabhāvaṃ netīti naro, uttamaṃ pabbajjaṃ netīti attho.

Vimānavatthuaṭṭhakathāyaṃ pana jeṭṭhabhāvaṃ netīti naro. Puttabhātubhūtopi hi puggalo mātujeṭṭhabhaginīnaṃ pituṭṭhāne tiṭṭhati, pageva bhattubhūto itarāsanti vuttaṃ.

Visuddhimaggamahāṭīkāyaṃ pana naratīti naro, puriso. Yathā hi paṭhamapakatibhūto satto itarāya pakatiyā seṭṭhatṭhena puriucce ṭhāne seti pavattatīti purisoti vuccati, evaṃ nayanatṭhena naroti vuccati. Puttabhātu bhūtopi hi puggalo mātujeṭṭhabhaginīnaṃ pituṭṭhāne tiṭṭhati. Pageva itarā itarāsanti vuttaṃ. Tasmā idha pana naranti sāmāñña vuttampi visesena purisanaranti viññāyati padhānanayena gahaṇassa yuttatā. Dibbanti kāmaguṇa jhānābhīññācittissariyādīhi kīlāntīti devā. Divudhātu ṇa. Atha vā sarīrālaṅkārajutiyā dibbantīti devā. Devā ca nāma tividhā honti sammutidevā, upapattidevā, visuddhidevā cāti. Tattha mahāsammatakalato paṭṭhāya lokena devāti sammatatā rājāno deviyo rājakumārā ca sammutidevā nāma. Devaloke upapannā upapattidevā nāma. Buddhapaccekabuddhakhīṇāsavā visuddhidevā nāma. Idha pana upapattidevā adhippetā.

Maṅgalanti maṅgalabhūtaṃ. Tantipade visesaṃ. Maṅganti vaḍḍhenti sabbasampattīhi sattānaṃ etenāti maṅgalo, buddho. Maṅgala dhātu vaḍḍhane alo. Atha vā maṅgaṃ vuccati pāpaṃ, taṃ veneyyānaṃ desanāya lunāti chindatīti maṅgalo, buddho. Maṅgasaddūpapadaludhātu kvi. Narā ca devā ca naradevā, tesam maṅgalo naradevamaṅgalo, buddho. So pana manussadevabrahmānaṃ pūjanīyattā ca saṅkhe, cakkam, puṇṇakumbho, garā, sirī, setacchattaṃ, aṅkuso, dhajam, sovattikañcāti aṭṭhahi lokiyamaṅgalehi seṭṭhattā uttamattā ca maṅgalo nāmāti vuccati, tasmā buddhassa naradevamaṅgalanti thometīti adhippāyoti.

Ayaṃ panettha **saṅkhepayojanā**. Dhitimā samādhivanto aññadhārako arahattaphaladhārako arahattaphalase tacchattaṃ dhārento vā, yo yādiso buddho, saṃsāre saṃsāraṃvaṭṭe, kāyikaṃ kāye pavattaṃ dukkhaṃca vaṭṭadukkhaṃca cetasi pavattaṃ dukkhaṃca vaṭṭadukkhaṃca, lokato lokahetu, anubhosi punappunaṃ abhavasī avedayi, naradevamaṅgalaṃ naradevānaṃ maṅgalabhūtaṃ, taṃ tādisaṃ buddhaṃ ahaṃ vande vandāmīti.

Tatiyavandanagāthāvaṇṇanā samattā.

4. Bāttiṃsatilakkhaṇacitradehaṃ,
Dehajjutiniggatapajjalantaṃ;
Paññādhitisīlaguṇoghavindaṃ,
Vande munimantimajātiyuttaṃ.

4. Evaṃ tatiyagāthāya buddhassa natvā idāni bāttiṃsatilakkhaṇacitradehantyādīhi chahi guṇehi thomitvā munino vanditukāmo **bāttiṃsati lakkhaṇa citra deha** ntyādīgāthamāha. Ayaṃ pana ta ja ja gaṇa garudvaya yuttattā ekādasakkharehi lakkhitā upaṭṭhitā gāthāti daṭṭhabbā. Vuttañhi **vuttodaye** tjā jgā garunāyamupaṭṭhitā sā''ti. Tassattho. Yassaṃ paṭipādaṃ tjā tajagaṇā ca jgājaganagarū ca garunā pādantagarunā ce yuttā, sā ayaṃ gāthā upaṭṭhitā nāmāti. Ettha ca eka garuke satipi dvigarukepi lakkhaṇasamānattā upaṭṭhitā gāthā nāmāti daṭṭhabbā. Tattha **bāttiṃsati lakkhaṇa citra dehanti** dvattiṃsamahāpurisalakkhaṇehi vicitraṃ sarīravantaṃ. Ettha ca dvīhi adhikaṃ tiṃsaṃ bāttiṃsati. Dvisaddassa bādeso. Lakkhiyati lakkhitabbaṃ buddhasarīraṃ etenāti lakkhaṇaṃ. Dihati upacayati vaḍḍhati vā ettha kusalā kusalanti dehaṃ, sarīraṃ. Dihadhātu upacaye vaḍḍhane vā ṇa. Bāttiṃsati mahāpurisalakkhaṇehi citraṃ vicitraṃ dehaṃ sarīraṃ yassa soti bāttiṃsatilakkhaṇacitradeho, muni labbhati.

Idaṃ panettha dvattiṃsamahāpurisalakkhaṇasarūpassa **saṅkhepa dassanaṃ**. Suppatiṭṭhitapādo ca, āyatapaṇhi, dīghaṅguli, muduta luṇahatthapādo, jālahatthapādo, ussaṅkhapādo, eṇijaṅgho, ṭhitakova anonamanto ubhohi pāñitalehi jānu kāni parimasati parimajjati, kosohitavattthaguyho, suvaṇṇa vaṇṇo kaṅcanasannibhattaco, sukhumacchavī, ekekalomo, uddhaggalomo, brahmujugatto, sattussado, sīhapubbaddha kāyo, citantaraṃso, nigrodhaparimaṇḍalo, samavaṭṭakkhandho, rasaggarasī, sīhahanu, cattālīsadanto, samadanto, aviraḷadanto, susukkadāṭho, pahūtajivho, brahmassarō karavīkabhāni, atinīlanetto, gopakhumo, uṇṇā bhamu kantare jāto, uṇhīsāsīso cāti dvattiṃsavidhāni honti mahāpurisalakkhaṇāni.

Tena vuttaṃ pātheyyavagge **lakkhaṇasutte** “katamāni tāni bhikkhave dvattiṃsamahāpurisassa mahāpurisalakkhaṇāni, yehi samannāgatassa mahāpurisassa dve gatiyo bhavanti, anaññā. Sace agāraṃ ajjhāvasati rājā hoti cakkavatti...pe... sace khopana agāraṃ anagāriyaṃ pabbajati, arahaṃ hoti sammā sambuddho loke vivaṭcchado 1. idha bhikkhave mahā puriso suppatiṭṭhitapādo hoti. Yampi bhikkhave mahā puriso suppatiṭṭhitapādo hoti. Idampi bhikkhave mahā purisassa mahāpurisalakkhaṇaṃ bhavati 2. puna caparaṃ bhikkhave mahāpurisassa heṭṭhāpādatalesu cakkāni jātāni honti saḥassārāni sanemikāni sanābhikāni sabbā kāraparipūrāni. Idampi bhikkhave mahāpurisassa mahāpurisa lakkhaṇaṃ bhavati 3. puna caparaṃ bhikkhave mahāpuriso āyatapaṇhī hoti 4. dīghaṅguli hoti 5. mudutaluṇa hatthapādo hoti 6. jālahatthapādo hoti 7. ussaṅkhapādo hoti 8. eṇijaṅgho hoti 9. ṭhitakova anonamanto ubhohi pāñitalehi jānukāni parimasati parimajjati 10. kosohitavattthaguyho hoti 11. suvaṇṇavaṇṇo kaṅcanasannibhattaco 12. sukhumacchavī hoti sukhumattā chaviyā rajojallaṃ kāye na upalimpati 13. ekekalomo hoti, ekekāni lomāni lomakūpesu jātāni 14. uddhaggalomo hoti. Uddhaggāni lomāni jātāni nīlāni añjanavaṇṇāni kuṇḍalā vattāni padakkhiṇāvattakajātāni 15. brahmujugatto hoti 16. sattussado hoti 17. sīhapubbaddha kāyo hoti 18. citantaraṃso hoti 19. nigrodhaparimaṇḍalo hoti, yāvatakvassa byāmo, tāva takvassa kāyo 20. samavaṭṭakkhandho hoti 21. rasagga saggī hoti 22. sīhahanu hoti 23. cattālīsadanto hoti 24. samadanto hoti 25. aviraḷadanto hoti 26. susukkadāṭho hoti 27. pahūtajivho hoti 28. brahmassarō hoti karavīkabhāni 29. atinīlanetto hoti 30. gopakhumo hoti 31. uṇṇā bhamukantare jātā hoti odātā mudutūla sannibhā. Yampi bhikkhave mahāpurisassa uṇṇā bhamukantare jātā hoti odātā mudutūlasannibhā. Idampi bhikkhave mahāpurisassa mahāpurisalakkhaṇaṃ bhavati 32. puna caparaṃ bhikkhave mahāpuriso uṇhīsāsīso hoti. Yampi bhikkhave mahāpuriso uṇhīsāsīso hoti. Idampi bhikkhave mahāpurisassa mahāpurisalakkhaṇaṃ bhavati. Imāni kho tāni bhikkhave dvattiṃsamahāpurisassa mahāpurisa lakkhaṇāni''ti. Etesaṃ pana dvattiṃsamahāpurisalakkhaṇaṃ attho pacchā āvibhavissatīti.

Dehajjutiniggatapajjalantanti bhagavato rūpakāyato nikkhantehi chabbaṇṇaraṃsīsāṅkhātehi obhāsehi parisamantato vijjotavantaṃ. Javati dibbatīti juti. Judhātuti. Nigacchati niccharatīti niggatā, rasmi. Nipubbagamudhātu ta. Pakārena jalate dibbate pajjalantaṃ. Ettha ca dehaniggatajūtīti

vattabbe chandānurakkhaṇattham padavipariyāyena dehajjutiniggatanti vuttam. Tasmā dehato niggatā jutīti samāso datṭhabbo. Dehato rūpakāyato niggatehi niccharehi jutīhi ramṣīhi pajjalantam yassa soti dehajjuti niggatapajjalanto, muni labbhati. Munino hi puratthimakāyato chabbaṇṇarasmiyo utṭhahitvā asītihatthattṭhānam agga hesi. Pacchimakāyato dakkhiṇahatthato vāmahatthato chabbaṇṇā rasmiyo utṭhahitvā asītihatthattṭhānam aggahesi. Upari kesantato paṭṭhāya sabbakesavattehi moragīvavaṇṇā rasmi utṭhahitvā gaganatale asītihatthattṭhānam aggahesi. Heṭṭhāpādālehi pavāḷavaṇṇā rasmi utṭhahitvā ghanapathaviyam asītihatthattṭhānam aggahesi, evam samantā asītihatthamattam thānam chabbaṇṇā buddharasmiyo vijjotamānā vipphandamānā kañcanaḍḍadīpikāhi niccharitvā ākāsam pakkhandajālā viya catuddīpika mahāmeghato nikkhantavijjulatā viya vidhāvimsūti vuttam hoti. Tasmā dehajjutiniggatapajjalantanti thometīti.

Paññādhiṭi sīla guṇoghavindanti ettha paññāti sabbaññuta ñāṇam. Dhītīti jhānamaggaphalasampayuttasamādhi. Sīlanti pacceka buddhāriyasāvakehi asādhāraṇam suvisuddham catupārisuddhisīlam. Oghanti samūham. Vindanti laddham. Pakārena yathāsabhāvam sabbañeyyadhammam vā jānāti paṭivijjhatīti paññā. Sabbaññuta ñāṇam. Papubbaññadhātu a. Sā panesā pajānanalakkhaṇā paṭivedhalakkhaṇā obhāsanalakkhaṇā ca, visayobhāsa rasā, asammohapaccupaṭṭhānā, samādhipadaṭṭhānā. Dhitisaddassa vacanatto heṭṭhā vuttoyeva. Sīlatīti sīlam. Kāyavacīkammāni sammā dahati sammā ṭhapetīti attho. Atha vā sīlati samādhiyati kāyakammādīnam susilya bhāvena na vippakiratīti sīlam, sīlanti samādahanti cittam etenāti vā sīlam, catupārisuddhisīlam. Sīladhātu a. Idaṃ pana paṭiṭṭhāpanalakkhaṇam, dussilyaviddhamsanarasam anavajjarasam vā, soceyyapaccupaṭṭhānam, hiriottappapadaṭṭhānam. Guṇasaddassa vacanatto heṭṭhā vuttoyeva. Uhanati samūham karoti ettha avayavanti ogho, samūho. Upubbhanadhātu ṇa. Ussa o. Hanassa gho. **Abhidhānappadīpikāṭīkāyam** pana “avayavam byapiyati gacchatīti ogho” ti vuttam. Vindanaṃlabhanam vindaṃ, vindiyittha labbhittṭhāti vā vindaṃ, paññā ca dhiti ca sīlaṅca tam guṇaṅcāti paññādhitisīlaguṇā, tesam ogho samūhoti tathā, tam vindaṃ labhanam yassāti paññādhitisīlaguṇoghavindo, muni. Atha vā vindaṃ labhitabbam paññādhitisīlaguṇogham yenāti paññādhitisīlaguṇoghavindo. Tatiyābahubbhīhi samāsoyam. Vindānam labhitabbānam paññādhitisīla saṅkhātānam guṇānam samūho atthīti attho. Tam.

Vandeti aham vandāmi. **Muninti** buddham. Munāti jānāti paricchindati vā hitāhitanti muni, buddho. Munadhātu ñāṇe i. Atha vā munāti jānāti ubho attheti muni, khandhādi loke tulam āropetvā minanto viya ime ajjhattikā khandhā ime bāhirātiādīnā nayena idhalokatthaṅca paralokatthaṅca bhagavā jānātīti attho. So panesa agāriyamuni, anāgāriyamuni, sekhamuni, asekkhamuni, paccekamuni, munimuni cāti anekavidho. Tattha agāriyamunīti gihipi āgataphalo viññātasāsano. Anāgāriyamunīti tathārūpova pabbajito. Sekhamunīti satta sekkhā. Asekhamunīti khīṇāsavo. Paccekamunīti paccekabuddho. Munimunīti sammāsambuddho. Tesu pana idha munimuni adhippeto, tam munim. **Antimajātiyuttanti** antimena carimabhavena yuttam. Avasānam amati gacchatīti antam. Amadhātu ta. Massa no. Ante bhavo antimo, carimabhavo. Jānanam nibbattanam jāti, khandhānam pavatti. Kammena janiyati nibbattiyatīti vā jāti. Upapattibhavo labbhati. Jānidhātuti. Dhātvaṅta lopo. Antimajātiyā yuttoti antimajātiyutto, muni. Āyatiñhi tisu bhavesu paṭisandhijanakānam sabba kilesānam bodhipallaṅkeyeva aggamaḅgena samucchinditattā bhagavato anāgate punabbhavo natthi, tasmā ayam ariyajāti pacchimattabhāvayuttoti vuttam hoti.

Tena vuttam **dhammacakkapavattanasutte** –

“Ñāṇaṅca medassanam udapādi, akuppāme vimutti, ayamantimā jāti, natthidāni punabbhavo” ti.

Ayam panettha **saṅkhepayojanā**. Bāttiṃsatilakkhaṇacitraṃ deham dvattiṃsamahāpurisalakkhaṇehi vicitraṃ rūpakāyavantam, dehajjutiniggata pajjalantam rūpakāyato niggatehi chabbaṇṇaram sīhi parisamantato vijjotavantam, paññādhitisīlaguṇo ghavindaṃ paññādhitisīlasaṅkhātānam guṇānam samūham labhanavantam, vinditabbānam paññādhitisīlasaṅkhātānam guṇānam samūhavantaṃ vā, antimajātiyuttam carimabhavena carimattabhāvena vā yuttam munim buddham aham tīhi dvārehi sakkaccaṃ vande vandāmīti.

Catutthavandanagāthāvaṇṇanā samattā.

5. Pātodayaṃ bāladivākaraṃva,
Majjhe yatīnaṃ lalitaṃ sirīhi;
Puṇṇindusaṅkāsamukhaṃ anejaṃ,
Vandāmi sabbaññumahaṃ munindaṃ.

5. Evaṃ catutthagāthāya buddhaṃ vanditvā idāni sirīhi lalitantyādīhi catūhi guṇehi thomitvā vanditukāmo **pātodayanti**ādīgāthamāha. Ayaṃ pana ta ta ja gaṇadvigārūhi yuttattā ekādasakkharehi lakkhitā indavajirā gāthāti daṭṭhabbā. Vuttañhi **vuttodaye** ‘‘indādikā tā vajirā jagāgo’’ti. Tassattho, yassaṃ paṭipādaṃ tā dveta gaṇā ca jagā jagaṇa garu ca go garu ca ce bhavanti, sā indā dikā indasaddaādikā vajirā vajirāgāthā nāmāti.

Tattha **pātodayanti** ettha pāto udayanti padacchedo kātabbo. Page pubbaṇhasamaye pācīnalokadhātuto uggatanti attho. Pāto page pācīnalokadhātuto udeti uggacchatīti pātodayo, sūriyo. Pātopubba udadhātu uggamane ayo, taṃ pātodayaṃ. **Bāladivā karaṃ vāti** bāladivākaraṃ ivātipadacchedo. Bāladivākaraṃ vāti niggaṭābhinavasūriyaṃ viya. Ettha ca bāloti sampati jāto taruṇadārako potako vā. So hi balati assasitapassasitamattena jīvati na seṭṭhena paññājīvitenaṃ bālo, taruṇadārako. Baladhātu pāṇane jīvāyaṃ vā. Sūriyaraṃsinā divati dibbatīti divā. Divudhātu a. Atha vā dīyati khīyati andhakāro etenāti divā. Dīdhātu khaye a, vāgamo. Taṃ karotīti divākaro, divā divase vā karo ābhā yassāti divākaro, sūriyo. Bālasadiso divākaro bāladivākaro. Atha vā bālo iva divākaroti bāladivākaro, navuggatasūriyo. So pana ākāse nakkhattatārānaṃ majjhe sahasaraṃsīhi lalati vilāsati viyāti attho.

Yatīnanti bhikkhūnaṃ. Te hi yatanti uṭṭhahanti ghaṭanti vāyamanti kusale dhammeti yatīti vuccanti. Yata dhātu patiyatane vāyāme vā i. Atha vā yamanti uparamanti akusale dhammeti yatīti vuccanti. Yamudhātu uparame i. Dhātvantalopo. Tesam yatīnaṃ. **Lalitanti** vilāsitaṃ. Lalati vilāsetīti lalito, muni. Laladhātu vilāse ta. Taṃ. **Sirīhīti** bhagavato kāyaṅgasobhaggapattehi sirīhi, bāttiṃsalakkhaṇāsītyā nubyañjanachabbaṇṇaraṃsīsaṅkhatehi sampattisirīhi vā. Katapuññe nissayatīti sirī. Sidhātu sevāyaṃ rapaccayo itthi liṅgajotakaīpaccayo ca. Katapuññehi seviyatīti vā sirī, sampattī. **Mūlaṭīkāyaṃ** pana ‘‘sirīti paññāpuññāna metaṃ adhivacana’’nti vuttaṃ. Yatīnaṃ bhikkhūnaṃ majjhe sirīhi lalitaṃ vilāsitanti sambandho. Ettha ca idaṃ vuttaṃ hoti, yathā pāto udito uggato sūriyo ākāse nakkhattatārānaṃ majjhe sahasaraṃsīhi lalati vilāsati, evaṃ muni loke yatīnaṃ bhikkhūnaṃ majjhe bāttiṃsalakkhaṇā sītyānubyañjanachabbaṇṇaraṃsīhi alaṅkatehi sarīrasobhagga pattīhi sampattisirīhi lalati vilāsatīti.

Puṇṇindusaṅkāsamukhanti puṇṇacandena sadisaṃ ānanaṃ sampannaṃ. Yathā hi cando kāḷapakkhe paṭipadaḍḍasato paṭṭhāya dīne dīne ūno hoti, evaṃ na munino mukhaṃ ānanaṃ ūnaṃ. Bhagavato pana mukhaṃ niccaṃ paripuṇṇacandamaṇḍalaṃ viya anūnaṃ hutvā sobhati, tasmā puṇṇasaddena visesetvā puṇṇindusaṅkāsamukhanti thometi. Soḷasakalehi pūretīti puṇṇaṃ. Pūradhātu ta, tassa ṇṇo. Idati nakkhattatārānaṃ issariyaṃ karotīti indu, ididhātu issariyaṃ u. Puṇṇaṃ paripuṇṇaṃ indu puṇṇindu, cando. Saṅkāsaṃ sadisaṃ. Saṅkāsasaddo hi upamāvācako nipāto. Vuttañhi

Subodhālaṅkāre –

‘‘Ivādi iva vā tulya, samānanibhasannibhā;
Yathā saṅkāsa tulita, ppakāsa patirūpakā’’tyādi.

Puṇṇacandaṃ viya mukhati sobhatīti mukhaṃ, ānanaṃ. Mukhadhātu a. Puṇṇindunā saṅkāsaṃ sadisaṃ mukhaṃ ānanaṃ yassa sotī puṇṇindusaṅkāsamukho, munindo. Taṃ. Munindassa pana puṇṇa candassa sahasaraṃsīhi sassiriko viya bhikkhūnaṃ majjhe bāttiṃsa mahāpurisa lakkhaṇāsītyānubyañjana paṭimaṇḍitehi sirīhi ca byāmapabhāparikkhittehi āveḷāveḷā yamakāyamakā gumbāgumbā hutvā viniccharantīhi ghanabuddharasmisaṅkhatehi alaṅkito sassirikamukho hotīti vuttaṃ hoti. Tasmā puṇṇindusaṅkāsamukhanti thometi.

Anejanti nittañhaṃ. Lābhālābhādiṃ paṭicca ejati kampaṭīti ejā, taṇhā. Ejadhātu kampane a, natthi ejā yassāti anejo, munindo. Vuttañhi **mahāniddesapāḷiyam** “lābhālābha yasāyasa nindāninda sukhadukkhehi na iñjatīti anejo, bhagavā labbhatī”’ti.

Sabbaññunti paṭividdha sabbañeyyadhammaṃ. Saṅkharavikāralakkhaṇanibbāna paññattivāsena pañcavidhaṃ sabbaṃ ñeyyadhammaṃ jānāti paṭivijjhati sīlenāti sabbaññū, munindo. Sabbasaddūpapada ñādhātu rū. Ettha ca sabbe saṅkhatadhammā saṅkharā nāma sakasakapaccayehi saṅkhariyantīti katvā. Viññattidvayaṃ lahutādittayañca vikāro nāma catūhi mahābhūtehi virūpaṃ kariyatīti katvā. Viññattidvayassa yathākkamaṃ cittajavāyodhātu cittajapathavī dhātūnaṃ visesaguṇattā, lahutādittayassa ca citto tvāhārajanipphanarūpānaṃ visesaguṇattā. Phassādiddhammānaṃ phusanādilakkhaṇaṃca pathavīdhātuvādīnaṃ kakkhaḷādilakkhaṇaṃca, cittassa ārammaṇavijānalakkhaṇaṃca, nibbānassa santilakkhaṇaṃca, rūpassa ruppanalakkhaṇaṃca, nāmassa namanalakkhaṇaṃca, aniccatādittayāni ca upacayādicattāri lakkhaṇarūpāni ca lakkhaṇāni nāma lakkhiyanti etena lakkhitabbā dhammāti katvā. Asaṅkhatadhātunibbānaṃ nāma vānaṃ vuccati taṇhā, tato nikkhantanti katvā. Paricchedarūpaṃ itthipurisādighaṭapaṭādayo sabba vohāratthā ca paññatti nāma paññāpiyati pakārena ñāpiyatīti katvā. Ettha ca saṅkhāranibbānāni paramatthadhammā honti. Vikārādīsu pana vikāralakkhaṇāni paññattivisesattā viṣuṃ vuttāni. Imehi dvīhi vinimuttā pana paricchedarūpā sabbavohāratthā paññattīti vuttāti veditabbā. **Apadāna aṭṭhakathāyaṃ** pana “sabbaṃ atīdābhedaṃ hatthāmalakaṃ viya jānātīti sabbaññū”’ti vuttaṃ.

Sabbaññūti ca kamasabbaññū, sakimṃ sabbaññū, satatasabbaññū, satti sabbaññū, ñātasabbaññū cāti pañcavidhā hoti sabbaññū. Tattha yathākkamaṃ sabbaṃ jānanadhammo kamasabbaññū nāma. Ekāvajjanena javanavārena jānitabbaṃ catusaccadhammaṃ jānanadhammo sakimṃsabbaññū nāma. Cakkhuvīññāṇādīnaṃ niyatārammaṇattaṃ jānanadhammo satatasabbaññū nāma. Ekappahārena sabbadhammaṃ jānanasamattho dhammo sattisabbaññū nāma. Āvajjanābhedenā jānitabbaṃ sabbadhammaṃ jānanadhammo ñātasabbaññū nāma. Tesu ca sakimṃ sabbaññū sattisabbaññūvasena dve dhammā maggañāṇāniyeva. Tadavasesā sabbaññūtaññāni honti. Taṃ sabbaññūṃ.

Munindanti ettha munisaddassa attho heṭṭhā vuttoyeva. Munīnaṃ indo issaro munindo, taṃ munindaṃ ahaṃ vandāmīti sambandhoti.

Ayaṃ panettha **saṅkhepayojanā**. Pātodayaṃ pageva udayaṃ uggataṃ, bāladvīkaraṃva navuggatasūriyamāṇavoiva, yatīnaṃ bhikkhūnaṃ majjhe sirīhi bāttimsamahāpurisalakkhaṇā sītyānubyañjanasampattisaṅkhātehi sirīhi lalitaṃ vilāsitaṃ, puṇṇindusaṅkāsamukhaṃ puṇṇacandena sadisaṃ ānavantaṃ, anejaṃ nittañhaṃ, lokadhammehi aniñjanaṃ vā, sabbaññūṃ sabbadhamma vijānantaṃ, munindaṃ buddhaṃ sakkaccaṃ tīhi dvārehi ahaṃ vandāmīti.

Pañcamavandanagāthāvaṇṇanā samattā.

6. Upetapuñño varabodhimūle,
Sasenamāraṃ sugato jinitvā;
Abojjhi bodhiṃ aruṇodayamhi,
Namāmi taṃ māraṇaṃ abhaṅgaṃ.

6. Evaṃ pañcamagāthāya munindaṃ vanditvā idāni māraṇaṃ gūṇena thomitvā vanditukāmo **upetapuñño** tyādigāthamāha. Ayaṃ pana ja ta ja gaṇa dvigaruyuttattā ekādasakkharehi lakkhitā upendavajirāgāthāti daṭṭhabbā. Vuttañhi **vuttodaye** “upādikā sāva jatā jagā go”’ti. Tassattho, yassaṃ paṭipādaṃ jatā jagaṇa tagaṇā ca jagā jagaṇagarū ca go garu ca ce siyā, sāva sāgāthāeva upādikā upasaddādikā indavajirāgāthā nāmāti.

Upetapuñño yo sugato varabodhimūle sasena māraṃ jinitvā aruṇodayamhi bodhiṃ abojjhi māraṇaṃ abhaṅgaṃ, taṃ sugataṃ ahaṃ namāmīti sambandho. Tattha **upetapuññoti** sampannadānasīlādīpāramīpuññavā. Dānasīlādi pāramīpuññena samannāgato vā. Dānasīlādīpāramīpuññena upeto samupeto upagato samupagato sampanno samannāgatoti attho. Ayaṃ panettha vacanatto, upanno sampanno hutvā eti gacchati pavattatīti upetaṃ, puññaṃ.

Upapubbaidhātu gatiyaṃ ta. Punāti attano kārakanti puññaṃ, pāramīpuññaṃ labbhati. Puddhātu piṇane sodhane vā ñyo. Tassa ño. Tattha attano kārakanti punappunaṃ pavattiyā sacittasantatiṇca samjanitapaṇītarūpavisatena sanissaya rūpasantatiṇca punāti piṇeti sodheti vāti attho. Ayaṃ **paṭisambhidāmaggaṇṭhipade** vutto. Pūreti ajjhāsayaṃti vā puññaṃ. Pūradhātu ñya. Yo puggalo puññaṃ karoti tassa ajjhāsayaṃ pūretīti attho.

Atha vā pujaṇca bhavaṃ nibbattetīti puññaṃ. Nibbattitaddhitāyaṃ. Pūja padaṃ ñyapaccayo. Yo puññaṃ karoti, tassa pūjitabbaṃ bhavaṃ pavattetīti attho. Tena vuttaṃ **sammohavinodanī aṭṭhakathāyaṃ** “punāti attano kārakam pūreti cassa ajjhāsayaṃ pujaṇca bhavaṃ nibbattetīti puñño”ti. **Mūlaṭṭikāyaṇca** “punātīti sodheti apuññaphalato dukkhasamkilesato ca hitajjhāsayaṃ puññaṃ karotīti taṃ nipphādanena kārakassajjhāsayaṃ pūretīti puñño. Pūraṃ pujaṇibbattako ca niruttillakkaṇena puññoti veditabbo”ti vuttaṃ. **Visuddhimaggamahāṭṭikāyaṇca** “punāti attano santānaṃ apuññaphalato dukkhasamkilesato ca visodhetīti puññaṃ. Hitasukhajjhāsayaṃ puññaṃ karotīti taṃnipphādanena kārakassa ajjhāsayaṃ pūreti, pujaḥbhavaṃ nibbattetīti vā puññaṃ. Iti pūraṃ pujaṇibbattako ca niruttinayena puññanti veditabbo”ti vuttaṃ. Upeṭaṃ sampannaṃ puññaṃ pāramīpuññaṃ yassa soti upetaṃ puñño, sugato labbhati.

Varabodhimūleti uttamassa bodhirukkhasa samīpe. Tattha **varoti** varitabbo patthitabbo icchitabboti vā varo. **Bodhimūleti** ettha bodhīti vuccati rukkhopi, maggopi, sabbaññutaññaṃpi, nibbānaṃpi. Tattha hi bodhirukkhamūle paṭhamābhi sambuddhoti ca, antarā ca bodhiṃ antarā ca gayanti ca āgataṭṭhāne rukkho. Bodhīti vuccati catūsu maggesu ñāṇanti āgataṭṭhāne maggo. Pappoti bodhiṃ varabhūri medhasoti āgataṭṭhāne sabbaññutaññaṃ. Patvāna bodhiṃ amataṃ asaṅkhatanti āgataṭṭhāne nibbānaṃ bodhīti vuccati. Idha pana bodhirukkhoti adhippeto. Ayaṃ pana tesam vacanatto. Bujjhati abujjhi bujjhissati cattāri ariyasaccāni sabbaṃ ñeyyadhammampi etthāti bodhi, bodhirukkho. Budhadhātu ñi. Bujjhati cattāri saccānīti bodhi, maggo. Bujjhati sabbañeyyadhammanti bodhi, sabbaññutaññaṃ. Ariyena bujjhitabbanti bodhi, nibbānaṃ labbhati. Varo uttamo bodhirukkhoti varabodhi, tassa mūlaṃ samīpaṃ varabodhimūlaṃ, tasmim.

Sasenamāraṇti saha senāya pavattaṃ māraṇāyaṃ. Tattha siyati bandhiyatīti senā. Sidhātu bandhaneyu. Tāya saha pavattatīti saseno, māraṇāya. Anatto niyojento guṇamāraṇena satte māretīti māro. Maradhātu ṇa. Sattānaṃ kusalaṃ māreti vināsetīti vā māro. Saseno ca so māro cāti sasenamāro, māraṇāya. Taṃ. Jinitvāti pade kammaṃ. Upeṭapuñño yo sugatoti sambandho. Sugatasaddassa attho heṭṭhā vuttoyeva.

Jinitvāti visākhapuññaṃmiyaṃ buddhadine anattaṅgateyeva sūriye pāramīpuññatejēna vijayitvāti attho. **Abojjhīti** paṭivijjhi adhigami vā. **Bodhinti** anuttaraṃ sammā sambodhiṃ, arahattamaggasabbaññutaññaṇanti attho. Sabbaññuta ñāṇapadaṭṭhānañhi maggaññaṃ, maggaññaṇapadaṭṭhānañca sabbaññutaññaṃ bodhīti vuccati. Taṃ bodhiṃ.

Aruṇodayamhīti aruṇodayamhīti padacchedo. Aruṇuggamanavelāyanti attho. Tattha āsamantato ālokaṃ karonto unati gacchatīti aruṇo. Āpubbaunadhātu gatimhi ṇa. Ākāraṇa rasso. Rakāraṇaṃ. Nassa ṇo. Sūriyassa udayato pubbe uggataraṃsi aruṇo nāmāti attho. Vuttañhi dasakanipāta **aṅguttarapāliyaṃ** “sūriyassa bhikkhave udayato etaṃ pubbaṅgamaṃ etaṃ pubbanimittaṃ yadidaṃ aruṇuggaṃ, evameva kho bhikkhave kusalaṇaṃ dhammaṇaṃ etaṃ pubbaṅgamaṃ etaṃ pubbanimittaṃ yadidaṃ sammādiṭṭhī”ti. Yaṃ sandhāya vuttaṃ **abhidhānappadīpikāyaṃ** “sūrasodayato pubbu, ṭṭhitaraṃsi siyāruṇo”ti. **Abhidhānappadīpikāṭṭikāyaṃ** pana “aruṇavaṇṇatāya arati gacchatīti aruṇo”ti vuttaṃ. Udeti uggacchatīti udayo, sūriyo. Udihātu a. Udayassa sūriyassa aruṇo uggataraṃsīti aruṇodayo. Tassaṃ aruṇuggamanavelāyaṃ. Bodhiṃ abojjhīti sambandho.

Bhagavā hi visākhapuññaṃmiyaṃ anattaṅgateyeva sūriye mārabalaṃ vidhametvā cīvarūpari patamānehi bodhirukkhaṅkarehi rattapavālapallavehi viya pūjayamāno rattiyā paṭhamayāme pubbenivāsaṃ anussaritvā majjhimayāme dibbacakkhuṃ visodhetvā pacchimayāme paṭiccasamuppādaṃ anulomapaṭilomaṃ manasikarivā ānāpānecatutthajjhānaṃ nibbattetvā tadeva pādakaṃ katvā mahāvajiraññaṇasaṅkhātaṃ vipassanaṃ vaḍḍhetvā maggaṭṭipāṭiyā adhigatena

catutthamaggañāṇena sabbakilese khepetvā yadā aruṇo uggamissati, tadā sabbaññutaññādisabba buddhagūṇe paṭivijjhi adhigamīti vuttam hoti.

Mārajini pañcamārānaṃ vijitāviṃ. Devaputta kilesābhi saṅkhārakhandhamaccusaṅkhāte pañcamāre jināti ajini jinissatīti mārajino, sugato. Devaputtakilesābhisāṅkharasāṅkhatam māratayam jināti ajini, khandhamaccusaṅkhatam māradvayam avassam jinissatīti attho. Yadi evam kasmā vijitāvinti vuttanti. Aviraddham ekantena jiyamānattāti. **Abhaṅganti** sasenamārassa bhañjituṃ viddhamṣituṃ asamattham. Yassa kassaci bhañjituṃ viddhamṣituṃ asamattham vā. Tatrāyam vacanatto. Mārena yena kenaci bhañjituṃ na sakkotīti abhaṅgo, tena vā na bhañjyati na viddhamṣiyatīti abhaṅgo, sugato. Napubba bhanjadhātu ta. Tassa dhātvantena gākārādeso. Atha vā bhanjati viddhamṣatīti bhaṅgo, māro. Yo koci vā. Natthi bhaṅgo māro yo koci vā yassāti abhaṅgo, sugato. Tam abhaṅgam. **Tanti** sugatam. Mārajinaṃ abhaṅgam tam sugatam aham namāmīti sambandho.

Imissam pana gāthāyam **ekanipātajātakaṭṭhakathāyam, apadānaṭṭhakathāyañca** āgatanayena buddhassa māravijayādīṃ sotujanānaṃ bahussutattham saṅkhepena veditabbam. Bodhi satto hi mahāsampattiṃ anubhavitvā hatthagatam cakkavattirajjam khelapiṇḍam viya anapekkho chaṭṭetvā ekūnatimsavasse āsalhipuṇṇamāya uttarasaḷhanakkhattena yutte mahābhinnikkhamaṃ nikkhamitvā anomanadīṭire ghaṭṭikārahmunā dinnam arahatta dhajabhūtam aṭṭhaparikkhāram paṭiggahetvā nivāsetvā samaṇapabbajam katvā chabbassāni dukkarakārikam caritvā nigrodharukkhamūle senanigame senakuṭumbikassa dhītarāya sujātāya saha satahassagghiyā suvaṇṇapāṭiyā dinnam sabbam appodakam madhupāyāsam ekatṭhitālapakkappamānaṃ ekūnapaññāsālopaṃ paribhuñjitvā sāyanhasamaye devatāhi alaṅkatena maggena bodhirukkhabhimukho gacchante antaramagge sotthiyena nāma tiṇahārakena dinnam aṭṭhamuṭṭhikaṭṭhāyam gahetvā bodhimaṇḍam āruya idam thānam sabbabuddhānam avijahitam acalaṭṭhānam kilesabhañjanaṭṭhānanti ṇatvā tāni tiṇāni agge gahetvā cālesi. Tāvadeva cuddasahattho pallaṅko ahosi. Tānipi tiṇāni tathārūpena saṅthānena santharimsu saṅthahimsu vā. Yathārūpaṃ sukusalopi vicittakāro vā potthatāro vā ālikhitumpi samattho natthi. Bodhi satto bodhikhandham piṭṭhito katvā puratthābhimukho daḷhamānaso hutvā –

“Kāmaṃ taco ca nhāru ca, aṭṭhi ca avasussatu;
Upasussatu nisesam, sarīre maṃsalohita”nti.

Na tveva sammāsambodhiṃ apatvā imaṃ pallaṅkam bhindissāmīti asanisatasannipātenapi abhejjarūpaṃ tam pallaṅkam abhañjitvā nisīdi. Tasmim samaye māro devaputto siddhatthakumāro “mayham vasaṃ atikkamitukāmo, na dāni assa atikkamituṃ dassāmī”ti mārabalassa santikaṃ gantvā etamattham ārocetvā māraghosanaṃ nāma ghosāpetvā mārabalam ādāya nikkhami. Sā mārasenā mārasa purato dvādasa yojanā honti. Dakkhiṇato ca vāmato ca dvādasa yojanā. Pacchato cakkavāḷapariyantaṃ katvā thitā, uddham navayojanubbedhā. Yassā unnānantiyā unnādasaddo yojanasahassato paṭṭhāya pathavīundriyasaddo viya suyyati. Atha māro devaputto diyaḍḍhayanāsatikam girimekhalam nāma hatthim abhirūhitvā bāhusahassam māpetvā nānāvudhāni aggahesi. Avasesāyapi māraparisāya dve janā ekasadisam āvudham na gaṇhimsu. Nānappakāraṇṇā nānappakāra mukhā hutvā mahāsattam ajjhottharamānā āgamaṃsu.

Dasahassacakkavāḷadevatā pana mahāsattassa thuti yo vadamānā aṭṭhamṣu. Sakko devarājā vijayuttarasāṅkham dhamamāno aṭṭhāsi. So kira saṅkho vīsatthasatikko hoti. Sakim vātam gāhāpetvā dhamanto cattāro māse saddam karitvā nissaddo hoti. Mahākāḷanāga rājā atirekapadasatena vaṇṇam vadanto aṭṭhāsi. Mahābrahmā setacchattam dhārayamāno aṭṭhāsi. Māra bale pana bodhimaṇḍalam upasaṅkamante tesam ekopi thātuṃ nāsakkhi. Sammukha sammukhaṭṭhānena palāyimsu. Kālo nāma nāgarājā pathaviṃ nimujjitvā pañcayojanasatikam mantirakanāgabhanam gantvā ubhoḥi hatthehi mukham pidahitvā nipanno. Sakko vijayuttarasāṅkham piṭṭhiyam katvā cakkavāḷamukha vaṭṭhiyam aṭṭhāsi. Mahābrahmā setacchattam koṭhiyam gahetvā brahmalokameva agamāsi. Ekadevatāpi thātuṃ samattho nāma nāhosi. Mahāpuriso ekakova nisīdi. Māropi attano parisam āha “tāta suddhodanaputtana siddhatthena sadiso añño puriso nāma natthi, mayam sammukhā yuddham dātuṃ na sakkhissāma, pacchā bhāgena dassāmā”ti.

Mahāpurisopi tīṇi passāni oloketvā sabbadevatānaṃ palāyitattā suññāni addasa. Puna uttarapassena mārabalaṃ ajjhottharamānaṃ disvā “ayaṃ ettako jano maṃ ekakaṃ sandhāya mahantaṃ vāyāmaṃ karoti, imasmiṃ ṭhāne mayhaṃ mātā vā pitā vā bhātā vā añño koci ñātako vā natthi, imā pana dasa pāramiyova mayhaṃ dīgharattaṃ puttaparijanasadisā, tasmā mayā pāramiyova phalakaṃ katvā pāramisattheneva paharivā ayaṃ balakāyo mayā viddhamsetuṃ vaṭṭatī”ti dasa pāramiyo āvajjamāno nisīdi.

Atha māro devaputto eteneva siddhatthaṃ palāpessāmīti vātamaṇḍalaṃ samuṭṭhāpesi. Taṅkhaṇaṇṇeyeva puratthimā dibhedā vātā samuṭṭhahitvā aḍḍhajojanaekayojana dviyojanatiyojanappamaṇāni pabbatakūṭāni padāletvā vanagaccharukkhādīni uddhaṃ mūlāni katvā sāmantaṃ gāmanigame cuṇṇavicuṇṇaṃ kātuṃ samatthāpi mahāpurisassa puññatejena mahānubhāvena bodhisattaṃ patvā cīvarakaṇṇamattampi cāletuṃ nāsakkhimsu. Tato udakena ajjhottharivā māressāmīti mahāvassaṃ samuṭṭhāpesi. Tassānubhāvena uparūpari satapaṭalasaḥassapaṭalādibhedā vaḷāhakā uṭṭhahitvā vassimsu. Vuṭṭhidhāravegena pathavī bhinnā ahoṣi. Vanarukkhādīnaṃ uparibhāgena mahāmegho āgantvā mahā sattassa cīvare ussāvabinduggahaṇamattampi temetuṃ nāsakkhi. Tato pāsānavassaṃ samuṭṭhāpesi. Mahantāni pabbatakūṭāni dhūmāyantāni pajjalantāni ākāsenāgantvā bodhisattassa pādāmūle dibbamālāguḷabhāvaṃ āpajjimsu. Tato paharavassaṃ samuṭṭhāpesi. Ekatothārā ubhatodhārā asisattikhurappādayo dhūmāyantā pajjalantā ākāsenāgantvā bodhisattaṃ patvā dibbapupphāni ahesuṃ. Tato āngāravassaṃ samuṭṭhāpesi. Kimsukavaṇṇā āngārā ākāsenāgantvā bodhisattassa pādāmūle dibba pupphāni hutvā vikirimsu. Tato kukkuḷavassaṃ samuṭṭhāpesi. Accuṇṇo aggivaṇṇo kukkuḷo ākāsenāgantvā bodhisattassa pādāmūle dibbacandanacuṇṇaṃ hutvā nipatati. Tato vāḷukavassaṃ samuṭṭhāpesi. Atisukhumavāḷikā dhūmāyantā pajjalantā ākāsenāgantvā bodhisattassa pādāmūle dibbapupphāni hutvā nipatiṃsu. Tato kalalavassaṃ samuṭṭhāpesi. Taṃ kalalavassaṃ dhūmāyantaṃ pajjalantaṃ ākāse nāgantvā bodhisattassa pādāmūle dibbavilepanaṃ hutvā patati. Tato iminā bhimsuṃ siddhatthaṃ palāpessāmīti andhakāraṃ samuṭṭhāpesi. Taṃ caturaṅgasamannāgataṃ andhakāraṃ viya mahātamaṃ hutvā bodhisattaṃ patvā sūriyappabhā vihatam viya antaradhāyati.

Evam māro imāhi navahi vātavassapāsānapaharaāngāra kukkuḷavāḷuka kalalaandhakāravuṭṭhīni bodhisattaṃ palāpetuṃ asakkonto “kiṃ bhaṇe tiṭṭhatha imaṃ siddhatthakumāraṃ gaṇhatha hanatha palāpethā”ti parisam āṇāpetvā sayampi girimekhalassa hatthino khandhe nisinno cakkāvudhaṃ ādāya bodhisattaṃ upasaṅkamitvā “siddhattha uṭṭhāhi etasmā pallaṅkā, nāyaṃ tumhākaṃ pāpuṇāti, mayhameva pāpuṇāti”ti āha. Mahāsatto tassa vacanaṃ sutvā avoca “māra neva tayā dasapāramiyo pūritā, na upapāramiyo na paramattha pāramiyo nāpi pañcamahāpariccāgā pariccattā na ñātathacariyā na lokatthacariyā na buddhatthacariyā pūritā, sabbā tā mayāyeva pūritā, tasmā nāyaṃ pallaṅko tuyhaṃ pāpuṇāti, mayhameva pāpuṇāti”ti. Māro kuddho kodhavegaṃ asahanto mahāpurisassa cakkāvudhaṃ vissajjesi. Taṃ tassa dasapāramiyo āvajjantassa uparibhāge mālāvitānaṃ hutvā aṭṭhāsi. Taṃ kira khuracakkāvudhaṃ aññadā tena kuddhena vissatthaṃ ekaghanapāsāna thambhe vaṃsakaḷire viya chindantaṃ gacchati. Idāni pana tasmim mālāvitānaṃ hutvā ṭhite avasesā māraparisā idāni pallaṅkato vuṭṭhāya palāyissatīti mahantamahantāni selakūṭāni vissajjesuṃ. Tānipi mahāpurisassa pāramiyo āvajjantassa mālāguḷabhāvaṃ āpajjitvā bhūmiyaṃ patiṃsu.

Devatā cakkavāḷamukhavatṭiyaṃ ṭhitā gīvaṃ pasāretvā sīsaṃ ukkhipitvā “nattho vata bho siddhatthakumārassa rūpaggappatto attabhāvo, kiṃ nu kho karissatī”ti oloketi. Tato mahāpuriso pūritapāramīnaṃ bodhisattānaṃ abhi sambujjanadivase pattapallaṅko mayhaṃva pāpuṇātīti vatvā ṭhitaṃ māraṃ āha “māra tuyhaṃ dānassa dinnabhāve ko sakkhī”ti. Māro “ettakā janā sakkhino”ti māra balābhimukhaṃ hatthaṃ pasāreti. Tasmim khaṇe māraparisāya “ahaṃ sakkhī ahaṃ sakkhī”ti pavattasaddo pathavīundriyasaddasaddo ahoṣi. Atha kho māro mahāpurisaṃ āha “siddhattha tuyhaṃ dānassa dinnabhāve ko sakkhī”ti. Mahāpuriso “tuyhaṃ tāva dānassa dinnabhāve sacetanaṃ sakkhino. Mayhaṃ pana imasmiṃ ṭhāne sacetano koci sakkhī nāma natthi. Tiṭṭhatu tāva me avasesattabhāvesu dinnadānaṃ, vessantarattabhāve pana ṭhatvā mayhaṃ sattasattaka mahādānassa dinnabhāve acetanāpi ghanamahāpathavī sakkhī”ti cīvaragabbhantarato dakkhiṇahatthaṃ nīharivā vessantarattabhāve mayhaṃ sattasattakamahādānassa dinnabhāve tvaṃ sakkhi na sakkhīti mahāpathaviyābhimukhaṃ hatthaṃ pasāresi. Mahā pathavī “ahaṃ te dānassa sakkhī”ti

viravasahassena viravasatasahassena mārabalaṃ avattharamānā viya unnadi.

Tato mahāpurise dinnam te siddhattha mahādānam uttama dānanti vessantaradānam sammasante diyadḍhayaḥjanasatiko girimekhalo hatthī jāṇukehi patiṭṭhāsī. Mārāparisā disāvidisā palāyimsu. Dve ekamaggena gatā nāma natthi. Sīsābharaṇāni ceva vatthābharaṇāni ca pahāya sammukha sammukhatṭhāne disāvidisāhiyeva palāyimsu. Tato devasaṅgho palāyamānam mārabalaṃ disvā mārassa parājayo jāto. Siddhatthakumārassa jayo. Jayapūjaṃ karissāmāti nāgā nāgānam, supaṇṇā supaṇṇānam, devatā devatānam, brahmāno brahmānam pesetvā gandhamālādi hatthā mahāpurisassa santikaṃ bodhipallaṅkaṃ āgamaṃsu. Evaṃ gatesu ca panetesu –

“Jayo hi buddhassa sirīmato ayam,
Mārassa ca pāpimato parājayo;
Ugghosisuṃ bodhimaṇḍe pamoditā,
Jayaṃ tadā nāgagaṇā mahesino.

Jayo hi buddhassa sirīmato ayam,
Mārassa ca pāpimato parājayo;
Ugghosisuṃ bodhimaṇḍe pamoditā,
Jayaṃ tadā supaṇṇasaṅghā mahesino.

Jayo hi buddhassa sirīmato ayam,
Mārassa ca pāpimato parājayo;
Ugghosisuṃ bodhimaṇḍe pamoditā,
Jayaṃ tadā devagaṇā mahesino.

Jayo hi buddhassa sirīmato ayam,
Mārassa ca pāpimato parājayo;
Ugghosisuṃ bodhimaṇḍe pamoditā,
Jayaṃ tadā brahmagaṇāpi tādino’’ti.

Avasesesu dasasu cakkavālasahassesu devatā mālāgandhavilepanehi ca pūjayamānā nānappakāra thutiyo ca vadamānā aṭṭhaṃsu. Evaṃ anattaṅgateyeva sūriye mahāpuriso mārabalaṃ vidhametvā cīvarūpari pata mānehi bodhirukkhaṅkurehi rattapavālapallavehi viya pūjayamāno paṭhamayāme pubbenivāsaṅgaṇam anussarivā majjhimayāme dibbacakkuṃ visodhetvā pacchimayāme paṭicca samuppāde ñāṇam otāresi. Athassa dvādasapadikaṃ paccayā kāram vaṭṭavivaṭṭavasena anulomato paṭilomato sammasantassa dasasahasilokadhātu udakapariyantam katvā dvādasakkhattuṃ sampakampi. Mahāpurisena pana dasasahassi lokadhātuṃ unnādetvā aruṇuggamanavelāyam sabbaññuta ñāṇam paṭivijjhīti vuttaṃ hoti. Idha pana vuttāvasesam tāsū ca oloketvā gahetabbanti.

Ayam panettha **saṅkhepayojanā**. Upetapuñño sampanna dānādīpāramīpuññavā dānādīpāramīpuññena sampanno vā, yo sugato varabodhimūle uttamassa bodhirukkhasa samīpe, sasenamāram senāya saha pavattaṃ mārārājam, jinitvā pāramīpuññatejena vijayitvā, aruṇodayamhi visākhapuṇṇamiyam aruṇuggamanavelāyam, bodhiṃ arahattamaggañña sabbaññutaññaṇasaṅkhātam bodhiṃ, abojjhi paṭivijjhi adhigami vā, mārajinaṃ pañcamārānam vijitāvim, abhaṅgaṃ sasenamāro yo koci vā bhindītuṃ asamatthaṃ taṃ sugataṃ ahaṃ namāmīti.

Chaṭṭhamavandanagāthāvaṇṇanā samattā.

7. Rāgādi chedāmalāññakhaggaṃ,
Satisamaññāphalakābhigāhaṃ;
Sīloghalaṅkāravibhūsitaṃ taṃ,
Namāmibhiññāvaramiddhupetaṃ.

7. Evaṃ chaṭṭhamagāthāya sugataṃ vanditvā idāni arahatta maggaññādīhi catūhi guṇehi

thomitvā vanditukāmo **rāgādityādigāthamāha**. Ayaṃ pana indavajira upendavajira gāthādavyayassa lakkhaṇassa missakattā ekādasakkharehi lakkhitā upajātigāthāti daṭṭhabbā. Vuttañhi **vuttodaye** “anantarodīritalakkaṇā ce, pādāvimissā upajātiyo tā”ti. Tassattho. Yassā vuttiyā anantaro dīritalakkaṇā anantare udīritam vuttam indavajiropenda vajiragāthānam lakkhaṇavantā pādā vimissā saṃsaṭṭhā ce bhavanti, tā vuttiyo upajātiyo nāmāti.

Tattha **rāgādichedāmala nāṇakhagganti** ettha rāgādicheda amalañāṇakhaggantipadacchedo. Rāgādikilesam chindantam malavira hitam arahattamaggañāṇasaṅkhātam asivantanti attho. Tatrāyam vacanattho. Rūpādīsu rañjatīti rāgo. Rañjadhātu rāge ṇa. Rāgo ādi yesanteti rāgādayo, kilesā. Te chindatīti rāgādichedaṃ, arahattamaggañāṇam. Apāyam malati dhāretīti malaṃ, rāgādi. Atha vā malati saṃkilissati etenāti malaṃ. Maladhātu saṃkilesane a. Malato virahitam amalaṃ, nāṇam. Cattāri saccāni jānāti paṭivijjhatīti nāṇam, arahattamaggañāṇam. Rāgādichedaṅca amalaṅca tam nāṇaṅcāti rāgādichedāmalañāṇam. Rukkhaḍim khaggati chindati etenāti vā khaggaṃ, pakatiasī. Khaggaṃ viyāti khaggaṃ, nāṇam. Rāgādichedāmalañāṇasaṅkhatam khaggaṃ yassa sotī rāgādichedāmalañāṇakhaggo, buddho. Rāgādikilesam chindantena malavira hitena aggamaggañāṇasaṅkhatena asinā samannāgatoti attho. Tam.

Satisamaññā phalakābhigāhanti ettha satisamaññāphalaka abhigāhantipadacchedo. Sammāsatināmikaṃ phalakaṃ daḷhagāha kanti attho. Tatrāyam vacanattho. Saraṇam sati, saratī sampayuttadhammā etāyāti, saratīti vā sati. Saradhātuti. Atha vā pamādam saratī hiṃsatīti sati, sammāsati. Saradhātu hiṃsāyaṃti. Sammā ājānāti etāyāti samaññā, satiiti samaññā satisamaññā, asiādisattham phalati nivāretīti phalakaṃ, khetakaṃ. Phaladhātu nivāraṇe ṇvu. Satisamaññam phalakaṃ abhidāham gaṇhatīti satisamaññāphala kābhigāho, buddho labbhati. Yathā hi senāya phalakaṃ asiādisattham rakkhati, evaṃ satisaṃvaro cakkhādi dvāresu rūpādīrammaṇam pavisitum adatvā rakkhati. Tasmā bhagavā satidhammo sabbākusalānam rakkhakattā sabbakusala dhammānam upakāratvā sabbatthānam sādhakattā ca satiphalakaṃ daḷham gaṇhatīti vuttam hoti. Vuttañhi “ye keci kusalā dhammā, sabbe te appamādamūlakā appamādasamosaraṇā, appamādo tesam dhammānam aggamakkhāyati”ti ca. “Satiṃ khvāham bhikkhave sabbatthikaṃ vadāmi”ti ca.

Sīloghalānkāravibhūsitanti sīlaoghaalānkāra vibhū sitanti padacchedo. Visuddhasīlānam samūhasaṅkhātena alānkārena vibhūsitanti attho. Tattha sīlanti lokuttara sīlam. Tassa attho heṭṭhā vuttoyeva. Tam pana cetanā sīlam, cetasikaṃ sīlam, saṃvaro sīlam, avītikkamo sīlaṅcāti catubbidham hoti. Tattha cetanā sīlam nāma pañātipātā dīhi vā viramantassa vattapaṭipattim vā pūrentassa cetanā. Cetasikasīlam nāma pañātipātādīhi viramantassa viratī. Saṃvaro sīlanti ettha saṃvaro pātimokkhasaṃvaro, sati saṃvaro, nāṇasaṃvaro, khantisāṃvaro, vīriyasaṃvaro cāti pañcavidho hoti, sabbametam saṃvaro sīlam nāma. Avītikkamo sīlam nāma samādinnaśīlassa kāyikavācasiko anatikkamoti. Vuttañhetam **paṭisambhidāyam** “kiṃsīlanticetanā sīlam, cetasikaṃ sīlam, saṃvaro sīlam, avītikkamo sīla”nti. Idha pana avītikkamo sīlam nādhippetam. Kasmā. Bhagavato samādinnaśīkḥāpadassa abhāvato. Buddhānañhi śikkhāpadaṃ nāma natthīti. **Oghoti** samūho. Oghasaddo hi samūhavācako. Tena vuttam **abhidhānappadīpikāyam** –

“Samūho gaṇasaṅghātā, samudāyo ca sañcayo;
Sandoho nivaho ogho, visaro nikaro cayo”tyādi.

Avahanati gacchati pavattati avayavam etthāti ogho, samūho. Avapubbahanadhātu gatimhi ṇo. Avassa o, hanassa gho. **Abhidhānappadīpikāṭikāyam** pana “avayavam katvā byāpiyati gacchatīti ogho”ti vuttam. Sīlānam ogho samūho sīlogho. **Alānkāro**ti piḷandhano. Alaṃ vibhusam tam samaṅgīpuggalaṃ karoti anenāti alānkāro, sīlam. Alaṃsaddūpapadakaradhātu ṇo. Sīlogho eva alānkāro sīloghālaṅkāro, tena vibhū siyatīti sīloghalaṅkāravibhūsito, buddho. Tena pana aññehi asādhāraṇena lokuttarasīlālaṅkārena vibhūsito. Na cīvarādīnālaṅkārenāti attho. Sīlālaṅkārena hi sadiso alānkāro nāma natthi. Tam sīloghalaṅkāravibhūsitam.

Namāmibhiññāvaramiddhupetanti ettha namāmi abhiññāvaram iddhi upetanti padacchedo. Tattha namāmīti vandāmi. Abhiññāvaramiddhupetanti abhiññāsaṅkhātāya uttamāya iddhiyā samannāgatanti attho. Abhivisesena jānātīti abhiññā, chabbidham nāṇam. Tañhi iddhividhadibbasota

paracitta vijānana pubbenivāsānussati cutūpapāta āsavakkhaya ñāṇavasena chabbidhaṃ hoti. Tattha iddhividhañāṇanti ekopi hutvā bahudhā hotītiadinayappavatte iddhividhe jānana ñāṇaṃ. Dibbasotañāṇanti dūrasantikādibhedasaddārammaṇāya dibbasotadhātuyā jānanañāṇaṃ. Paracittavijānanañāṇanti parasattānaṃ cittaparicchedassa vijānanañāṇaṃ. Pubbenivāsānussatiñāṇanti attasantāne vutthavasena ceva gocara nivāsavasena ca pubbe atītabhavesu khandhādīnaṃ anussaraṇa satiyā sampayuttaṃ ñāṇaṃ. Cutūpapātañāṇanti sattānaṃ cutiyañca upapāte ca jānanañāṇaṃ. Ettha ca aṭṭhakathāsu cutūpapātañāṇaṭṭhāne tassa sādhakattā dibbacakkuñāṇanti vuttaṃ. Āsavakkhayañāṇanti saccaparicchedassa jānanaṃ arahatta maggañāṇanti. Varanti uttamaṃ. Iddhīti ijjhanaṃ samijjhanaṃ. Ijjhati samijjhatīti vā iddhi. Idhadhātuti. Abhiññāsañkhātāya varāya iddhiyā upeto samupeto samannāgatoti abhiññāvaramiddhupeto, buddho. Taṃ abhiññāvaramiddhupetaṃ. Taṃ buddhaṃ ahaṃ namāmīti sambandho.

Ayaṃ panettha **sañkhepayojanā**. Rāgādichedāmalañāṇa khaggaṃ rāgādikilesaṃ chindantaṃ malavirahitaṃ arahattamaggañāṇa sañkhātāṃ asivantaṃ, satīsamaññāphalakābhigāhaṃ sammā satināmikaṃ phalakaṃ daḷhagahaṇaṃ, siloghalañkāravibhūsitāṃ silānaṃ samūhasañkhātēna alaṅkāreṇa vibhūsitāṃ, abhiññā varamiddhupetaṃ abhiññāsañkhātāya varāya uttamāya iddhiyā upetaṃ samupetaṃ samannāgataṃ taṃ buddhaṃ ahaṃ namāmīti.

Sattamavandanagāthāvaṇṇanā samattā.

8. Dayālayaṃ sabbadhi dukkaraṃ karaṃ,
Bhavaṇṇavātikkamamaggataṃ gataṃ;
Tilokanāthaṃ susamāhitaṃ hitaṃ,
Samantacakkhuṃ paṇamāmi taṃmitaṃ.

8. Evaṃ sattamagāthāya buddhaṃ vanditvā idāni mahākaruṇā dīhi navahi guṇehi thomitvā vanditukāmo **dayālaya**ntyādigāthamāha. Ayaṃ pana ja ta ja ragaṇehi yuttattā dvādasakkharehi lakkhitā catupādantayamakā vaṃsaṭṭhagāthāti daṭṭhabbā. Vuttañhi **vuttodaye** “vadanti vaṃsaṭṭhamidaṃ jatā jarā”ti. Tassattho, yassaṃ paṭipādaṃ jatā jatagaṇā ca jarā jaragaṇā ca ce bhavanti, idaṃ vuttaṃ vaṃsaṭṭhaṃ vaṃsaṭṭhagāthā nāmāti munayo isayo vadantīti.

Tattha **dayālayanti** mahākaruṇāya ca, mettāya ca ādhāraṃ. Dayāsaddo hi karuṇāya ca, mettāya ca vattati. Adayāpannoti ettha hi karuṇāya vattati. Nikkaruṇikataṃ āpannoti attho. Dayāpannoti ettha mettāya mettacittataṃ āpannoti attho. Idha pana tadubhayampi vaṭṭati. Tasmā dayā ca dayā ca dayāti saddasarūpekaseso kātabbo. Vacanattho panettha evaṃ veditabbo. Dayati hiṃsati kāruṇikanti dayā, mahākaruṇā. Dayadhātu hiṃsāyaṃ a. Yā karuṇā yāva yathādhippetaṃ parassa hitanipphattiṃ na pāpuṇāti, tāva kāruṇikaṃ hiṃsaṭīti attho. Dayati hiṃsati apaneti paradukkhanti vā dayā. Atha vā dayati attano sukhampi pahāya khedaṃ gaṇhāti sajjano etāyāti dayā, dayati anuggaṇhāti pāpajanampi etāyāti vā dayā, dayanti gaṇhanti bodhisattā sammāsambodhiṃ etāyāti vā dayā, bodhisattā buddhabhāvāya abhinīhāra karaṇa kāle hatthagatampi aggaphalaṃ chaṭṭetvā mahākaruṇāya saṃsārasāgarato satte samuddharitukāmā anassāsa karaṃ mahantaṃ saṃsāradukkhāñca pacchimabhava saha amata dhātupaṭilābhena anekaguṇasamalaṅkataṃ sabbaññūtañāṇaṃ gaṇhantīti attho. Dayati dadāti sattānaṃ abhayaṃ etāyāti dayā, mettā. Dayadhātu dāne a. Dayati gacchati vibhāgaṃ akatvā sattesu samaṃ pavattatīti dayā. Yathā udakaṃ sabbasattesu sītena samaṃ pharati rajomalañca pavāheti, evaṃ mettā pāpakalyāṇajanesu vibhāgaṃ akatvā samaṃ pavattatīti attho.

Aparo nayo. Dayanti anurakkhanti satte etāya, sayam vā anuddayati anuddayamattameva vā etanti dayā, karuṇāmettā labbhanti. Tāya ālayati patiṭṭhanti etthāti dayālayo, buddho. Bhagavā hi devadattādīsū virodhi sattesu ca avirodhisattesu orase rāhule ca samaṃ niccaṃ hitajjhāsayatāya mahākaruṇāya mettāya ca ṭhito, tasmā dayālayanti thometīti vuttaṃ hoti. Vuttañhetam **apadānapāliyaṃ** –

“Vadhake devadatte ca, core aṅgulimālake;
Dhanapāle rāhule ca, samacitto mahāmuni”ti.

Sabbadhīti sabbasmim attabhāve. Buddhabhāvāya abhinīhārato paṭṭhāya sabbattabhāvesūti attho. **Dukkaranti** dukkhena karitabbaṃ pañcamahāpariccāgādikammaṃ dukkhena karitabbanti dukkaraṃ, pañcamahāpariccāgādikammaṃ labbhati. Ettha ca pañcamahā pariccāgoti dhanapariccāgo, aṅgapariccāgo, puttapariccāgo, bhariyapariccāgo, jīvitapariccāgo cāti pañcavidho hoti. Tattha hatthiassa dāsīdāsādi saviññānakassa dhanassa vā muttāmañirajatādi aviññānakassa dhanassa vā pariccāgo dhanapariccāgo nāma. Hatthapādacakkhukaṇṇanāsādisarīra vā yavassa pariccāgo aṅgapariccāgo nāma. Puttassa ca dhītu yā ca pariccāgo puttapariccāgo nāma. Bhariyāya pariccāgo bhariyapariccāgo nāma. Jīvitindriyapaṭibaddhassa sarīrassa pariccāgo jīvitapariccāgo nāma. Kiñcāpi pana dhanapariccāgā dayo dānapāramiyāyeva antogadhā, tathāpi pariccāga visesabhāvadassanattañceva sudukkarabhāvadassanattañca mahāpariccāgavasena visum katanti adhippāyo. **Mahāpadānasuttaṭīkāyaṃ** pana “aṅgapariccāgo, nayanapariccāgo, attapariccāgo, rajjapariccāgo, puttadārapariccāgoti ime pañca mahāpariccāgā. Tatthapi kāmaṃ aṅgapariccāgādayopi dānapāramīyeva. Tathāpi pariccāgavisesabhāvadassanattañceva sudukkarabhāvadassanattañca mahāpariccāgānaṃ visum gahaṇaṃ. Tatoyeva ca aṅgapariccāgatopi visum nayanapariccāgaggahaṇaṃ. Pariccāgabhāvasāmaññepi rajjapariccāga puttadārapariccāgaggahaṇaṃ kata’nti vuttaṃ. Taṃ dukkaraṃ. Idaṃ pana karanti etassa kammaṃ. **Karanti** karontaṃ, karotīti karo, buddho. Taṃ.

Bhavaṇṇavātikkamamaggatanti ettha bhavaṇṇavaatikkamaṃ aggatanti padacchedo. Bhavaṇṇavātikkamanti kāmarūpaarūpabhavasaṅkhatā aṇṇavā samuddato atikkantaṃ. Bhavanti sattā etthāti bhavo. Aṇṇo vuccati udakaṃ. Taṃ etasmim atthīti aṇṇavā, samuddo. Bhavasaṅkhāto aṇṇavoti bhavaṇṇavā, mahāsamuddo. Bahūhi ūmivegādīhi bhayehi okiṇṇo viya tividhopi bhavo bahūhi jātījarāmaṇādīhi dukkhabhayehi okiṇṇo hoti, tasmā bhavaṇṇavāti vuccati. Taṃ atikkamittha uttaritthāti bhavaṇṇavātikkamo, buddho. Tassa hi gambhīre mahāudakakkhandhe mahāsamudde udakaṃ abbochinnaṃ pavattati sandatiiva tibhavasaṅkhathe saṃsāre paṭisandhicutiyo abbochinnaṃ nibbattakānaṃ diyaḍḍhasahassakilesānaṃ bodhimaṇḍe arahattamaggañāṇena asesam viddhaṃsitattā tīsu bhavesu punabbhavo natthi. Tasmā buddhaṃ bhavaṇṇavātikkamanti abhitthavitum arahatīti vuttaṃ hoti. Taṃ bhavaṇṇavātikkamaṃ.

Aggatanti sabbasattānaṃ seṭṭhabhāvaṃ. Ayaṃ panettha aggasaddo ādikoṭikoṭṭhāsaseṭṭhesu dissati. Tathā hesa ajjatagge pāṇupetaṃ saraṇaṃ gatantiādīsu ādimhi dissati. Teneva aṅgulaggena taṃ aṅgulaggaṃ parāmaseyyātiādīsu koṭiyam. Anujānāmi bhikkhave viharaggena vā pariveṇaggena vā bhājetuntiādīsu koṭṭhāse. Aggo hamasmi lokassātiādīsu seṭṭhe. Svāyamidhapi soyeva daṭṭhabbo. Devamanussānaṃ seṭṭhabhāvaṃ ajati gacchatīti aggo, buddho. Asadisaṭṭhena guṇavisitṭhaṭṭhena asamasamaṭṭhena ca aggo seṭṭho nāmāti attho. Atha vā dullabhapātu bhāvato acchariyamanussabhāvato bahujaṇahitasukhāvahato adutiyaasahāyādibhāvato ca bhagavā loke aggo seṭṭho nāmāti attho. Vuttañhi **aṅguttarapāliyaṃ** “yāvata bhikkhave sattā apadā vā dvipadā vā catuppadā vā bahuppadā vā, tathāgato tesam aggamakkhāyati”ti. Aggassa bhāvo aggataṃ. Taṃ pana gatantietassa kammaṃ. **Gatanti** pattaṃ, pāpuṇantanti attho.

Tilokanāthanti kāmarūpaarūpasaṅkhatānaṃ tiṇṇaṃ lokānaṃ paṭisaraṇaṃ. Ettha ca lokasaddassa attho heṭṭhā vuttoyeva. Tayo lokā tilokā. Nāthasaddo pana nipphannānipphannavasena duvidho hoti. Tattha anipphannañāthasaddo paṭisaraṇattho hoti saṅketavasena. Tathā hi vuttaṃ **aṭṭhakathāyaṃ** “saṅketavacanaṃ saccam, lokasammunikāraṇa”nti. Tilokānaṃ nātho paṭisaraṇoti tilokanātho, buddho. Sabbānatthaparihāra pubbaṅgamāya niravasesahitasukhavidhānatapparāyaniratisayāya payogasampattiyā ca sadevamanussāya pajāya accantupakāritāya aparimitanirupamappabhāvaguṇavisesasamaṅgītāya ca sabbasattuttamo bhagavā aparimāṇasu lokadhātūsu aparimāṇānaṃ sattānaṃ ekapaṭisaraṇo nāmāti attho.

Nipphannañāthasaddo pana yācane, upatāpe, issariye, āsīse cāti catūsvatthesu vattati. Tattha yācane nāthati yācatīti nātho, buddho. Nāthadhātu a. So pana veneyyasatte attano hitakaraṇe yācivāpi niyojetīti attho. Atha vā bhagavā sādhu bhikkhave bhikkhu kālena kālaṃ attasampattiṃ paccavekkheyātiadinā sattānaṃ taṃ taṃ hitapaṭipattiṃ yācivāpi karuṇāya samussāhito te tattha niyojeti. Tasmā nātho nāmāti attho. Upatāpe nāthati veneyyagate kilese upatāpetīti nātho, buddho. Dhammadesanāya veneyyasantāne kilese viddhaṃsāpetīti attho. Issariye nāthati issariyati satteti

nātho. Paramena pana cittissariyena samannāgato bhagavā sabbasatte dhammena isati abhibhavatīti attho. Āsīse pana nāthati āsīsātīti nātho. Veneyyānaṃ hitasukhaṃ mettāya navasena patthetīti attho. Tilokānaṃ nātho tilokanātho, buddho. Taṃ tilokanāthaṃ.

Susamāhitanti lābhālābhādilokadhammehi acala mānattā sundarasamādhivantam. Saṃsamam ādhiyati ekārammaṇe sampayuttadhamme ṭhapeti etenāti samādhi. Saṃpubba dhā dhātu i. Sundaro pasattho vā samādhi susamādhi. Taṃ assa atthīti susamāhito, buddho. Assathyatthe to. Pabbatotiādīsu viya. Dhassa ho. Catūhi disāhi āgatehi vātehi acalamāno mahāmerupabbato viya bhagavā lābhālābhādilokadhammehi ca micchāvāda vātehi ca acalamānena samādhinā samannāgoti attho. Taṃ susamāhitam.

Hitanti manussadevabrahmasaṅkhātānaṃ sabbasattānaṃ payojana dhārentam. Kāraṇānurūpaṃ hinoti pavattatīti hitam, payojanam. Hidhātu gatiyam ta. Taṃ dhāretīti hito, buddho. Kitanta samāsoyam. Hitadharanti vattabbe chandānurakkhaṇatthāya uttara padalopena hitanti vattabham. Yathā samajjanī padīpoti. Atha vā dukkham hiṃsatīti hitam. Hiṃsadhātu hiṃsāyam tapaccayo. Yathā ca byādhiyā osamam rogīnam hitanti vuccati, evam dukkhahananato hitam nāma hoti. Sukham vidadhātīti vā hitam. Dhādhātu dhāraṇe ta. Yathā ca rudhiramaṃsādi dhātu vaḍḍhanam rasāyatanam kissānam hitanti vuccati, evam sukhavahanato hitanti vuccati. Payojanam taṃ dhāretīti hito, buddho. So pana dhammadesanāya veneyyajanānaṃ dukkhāpanayanampi ñāṇaparipācanampi katvā lokiyalokuttarahitasukham dhāretīti vuttam hoti. Taṃ hitam.

Samantacakkhanti ettha cakkhu nāma buddhacakkhu, dhammacakkhu, ñāṇa cakkhu, samantacakkhu, dibbacakkhūti pañcavidham hoti. Tattha addasam kho aham bhikkhave buddhacakkhunā lokaṃ volokentoti idam buddhacakkhu nāma. Virajam vītamalam dhammacakkhanti idam heṭṭhimamaggatta yasaṅkhātam dhammacakkhu nāma. Cakkhum udapādīti idam ñāṇacakkhu nāma. Samantacakkhu vuccati sabbaññutañāṇanti idam samantacakkhu nāma. Addasam kho aham bhikkhave dibbena cakkhunā visuddhenāti idam dibbacakkhu nāma. Idha pana samantacakkhu adhippetam. Parisamantato sabbañeyyadhammam passantam sabbaññutañāṇavantanti attho. Ayam panettha vacanattho. Samantato sabbañeyyadhammam cakkhati passatīti samantacakkhu, sabbaññutañāṇam. Cakkhadhātu u. Tena vuttam **mahāniddesapāliyam** “samantacakkhu vuccati sabbaññutañāṇa”nti. Samantacakkhu assa atthīti samantacakkhu, buddho. Vuttañhetam **paṭisambhidāmagge** –

“Na tassa addiṭṭhamidhatthi kiñci,
Atha aviññātamajānitabbam;
Sabbam abhiññāsi yadatthi neyyam,
Tathāgato tena samantacakkhū”ti.

Tassattho. Tassa tathāgatassa addiṭṭham apossantam kiñci dhammajātam idhaloke na atthi. Atha aviññātam aviditam apākaṭam vā ajānitabbam dhammajātam na atthi. Neyyam ñātabbam yam dhammajātam atthi. Sabbam taṃ dhammajātam tathāgato abhiññāsi paṭivijjhi. Tena tasmā tathāgato samantacakkhu nāmāti. Taṃ samantacakkhum.

Paṇamāmi taṃmitanti ettha paṇamāmi taṃ amitanti padacchedo. Amitam taṃ buddham aham paṇamāmīti sambandho. Tattha amitanti aparimeyyam ñāṇena aparicchinnam vā, silāsamādhi paññādiguṇavantam. Amitabbam ñāṇena aparicchinditabbanti vā amitam, silādiguṇam. Napubba mādhātu parimāṇe ta. Taṃ assa atthīti amito, buddho. Yathā hi mahāsamudde na sukaram udakassa pamāṇam gaṇetum ettakāni udakāḷhakānīti vā, ettakāni udakāḷhakasatānīti vā, ettakāni udakāḷhakasahassānīti vā, ettakāni udakāḷhakasatasahassānīti vāti. Atha kho asaṅkhyeyyo appameyyo mahāudakakkhandhotveva saṅkhyam gacchati, evameva buddhassa na sukaram silādiguṇassa pamāṇam gaṇetum ettakam silaguṇam, ettako samādhiguṇo, ettakā paññāguṇātiadināti. Atha kho asaṅkhyeyyo appameyyo mahāguṇakkhandhotveva saṅkhyam gacchati. Tenavuttam **apadānapāliyam** –

“Buddhopi buddhassa bhaṇeyya vaṇṇam,

Kappampi ce aññamabhāsamāno;
Khīyetha kappo ciradīghamantare,
Vaṇṇo na khīyetha tathāgatāna’’nti ca.

‘‘Asaṅkhyeyyāni nāmāni, sagaṇena mahesino;
Guṇena nāmamuddheyyaṃ, api nāmasahassato’’ti ca.

Tena buddhaṃ amitanti thometīti.

Ayaṃ panettha **saṅkhepayojanā**. Dayālayaṃ mahākaruṇāya mettāya ādhāraṃ. Sabbadhi sabbasmiṃ attabhāve, dukkaraṃ dukkhena karitabbaṃ pañcamahāpariccāgādīkammaṃ karaṃ karontaṃ, bhavaṇṇavātīkkamaṃ tibhavaṣaṅkhātasamuddato atikkantaṃ, aggataṃ sabbasattānaṃ seṭṭhabhāvaṃ, gataṃ pattaṃ, tilokanāthaṃ kāmarūpa arūpasaṅkhātassa tilokassa paṭisaraṇaṃ, susamāhitaṃ sundara samādhivantaṃ, hitaṃ sabbasattānaṃ lokiyalokuttarasāṅkhātāṃ atthadhāraṇaṃ, samantacakkhuṃ parisamantato sabbañeyyadhammaṃ passantaṃ sabbaññutañāṇavantaṃ, amitaṃ aparimeyyaṃ silādiguṇavantaṃ, taṃ buddhaṃ ahaṃ paṇamāmi vandāmīti.

Aṭṭhamavandanagāthāvaṇṇanā samattā.

9. Tahim̐ tahim̐ pāramisañcayam̐ cayam̐,
Gatam̐ gatam̐ sabbhi sukhappadam̐ padam̐;
Narānarānam̐ sukhasambhavam̐ bhavam̐,
Namānamānam̐ jinapuṅgavam̐ gavam̐.

9. Evaṃ aṭṭhamagāthāya buddhaṃ vanditvā idāni pāramisañcayam̐ cayantyādīhi pañcahi guṇehi thomitvā vanditukāmo **tahim̐ tahim̐ pāramisañcayam̐ cayantyādīgāthamāha**. Ayaṃ pana jātajara gaṇehi yuttattā dvādasakkharehi lakkhitā sabbapādādyantayamakā vaṃsaṭṭhagāthāti daṭṭhabbā. Vuttañhi **vuttodaye** ‘‘vadanti vaṃsaṭṭhamidaṃ jatā jarā’’ti. Tassattho heṭṭhā vuttoyeva.

Tattha **tahim̐ tahinti** tasmim̐ tasmim̐ bhave attabhāve vā, buddhavaram̐ paṇidhānato paṭṭhāya tesu tesu bhavesu attabhāvesu vāti attho. **Pāramisañcayanti** dānādīpā ramīnam̐ samūham̐. Ettha ca pāramī nāma dānasīlanekkhammaapaññā vīriya khantisaccaadhiṭṭhānamettāupekkhāvasena dasavidhā hoti. Vuttañca **buddhavam̐se** –

‘‘Dānam̐ sīlañca nekkhammaṃ, paññā vīriyena pañcamam̐;
Khantisaccamadhiṭṭhānam̐, mettupekkhāti te dasā’’ti.

Ayaṃ pana pāramīsaddassa vacanattho. Dānasīlādiguṇa visesayogena sattuttamatāya mahābodhisatto paramo. Tassa ayaṃ bhāvo kammanti vā pāramī, dānādi kriyāva labbhati. Santakabhāvakammataddhite ṇapaccayo. Itthilīngajotaka īpaccayo ca. Atha vā dānādīni pūretīti paramo. Dānādiguṇānaṃ pūrako pālako ca bodhisatto. Pūradhātu amapaccayo. Pare satte mavati attani bandhati guṇavisesayogenāti vā paramo, bodhisatto. Parasaddūpapada mudhātu bandhane kvi. Paraṃ atirekaṃ majjati kilesamalototi vā paramo. Parasaddūpa pada majjadhātu saṃsuddhiyam̐ kvi. Parasaddo atirekattho. Paraṃ seṭṭhaṃ nibbānaṃ visesena mayati gacchatīti vā paramo. Parasaddūpapada mayadhātu gatiyam̐ kvi. Dhātvantalopo. Para saddo seṭṭhattho. Paraṃ lokam̐ pamāṇabhūtena ñāṇa visesena idhalokamiva munāti paricchindatīti vā paramo. Parasaddūpa pada munadhātu paricchindane kvi. Paraṃ ati viya silādiguṇagaṇam̐ attano santāne minoti pakkhipatīti vā paramo. Parasaddūpapada midhātu pakkhipane kvi. Parasaddo atirekavācako. Paraṃ attabhūtaḍḍhammakāyato aññam̐ paṭipakkham̐ vā tadanatthakaram̐ kilesacoragaṇam̐ mināti him̐satīti vā paramo, mahābodhisatto. Parasaddūpapada midhātu him̐sāyam̐ kvi. Parasaddo aññavācako, paṭipakkhavācako vā. Paramassa ayantiādīnā vuttanayena pāramīti. Api ca pāre nibbāne majjati sujjetatīti pāramī, mahābodhi satto. Suddhakattusādhanoyam̐. Pārasaddūpapada majjadhātu saṃsuddhiyam̐ kvi. Ī ca. Pāre nibbāne satte majjati sodhetīti vā pāramī, hetukattusādhanoyam̐.

Pārenibbāne satte mavati bandhati yojetīti vā pāramī. Pāraṃ nibbānaṃ mayati gacchati satte ca māyeti gameti vā pāramī. Pāraṃ nibbānaṃ yāthāvato munāti paricchindatīti vā pāramī. Pāre nibbāne satte minoti pakkhipatīti vā pāramī. Midhātu pakkhipane ī. Pāre nibbāne sattānaṃ mināti hiṃsatīti vā pāramī, mahābodhisatto. Tassa ayaṃ bhāvo kammanti dānādikriyā pāramīti. Iminā vuttanayena pāramīsaddassa vacanattho veditabbo. Kiñcāpi pana pāramīsaddassa nibbacanaṃ saṅkhepena vuttaṃ. Sotūnaṃ pana niruttinayakosallatthaṃ vitthārena vuttanti daṭṭhabbaṃ.

Sā pana dasapāramī, dasaupapāramī, dasaparamatthapāramī cāti tividhā hoti. Tattha saviññāṇaviññāṇakaṃ dhanam pariccāgaṃ katvā pūritā bodhisambhārā dasapāramiyo nāma. Hattha pāda kaṇṇa nāsādiṅgapaccaṅgapariccāgaṃ katvā pūritā bodhisambhārā dasaupapāramiyo nāma. Jīvitindriyapariccāgaṃ katvā pūritā bodhisambhārā dasa paramatthapāramiyo nāmāti. Dānādipāramīnaṃ pana attho cariyapiṭakaaṭṭhakathādīsu gahetabbo. Avayavaṃ saṅghavasena cayati gacchati pavattatīti sañcayo, saṃpubba cidhātu gatiyaṃ ṇa. Sañcinoti avayavanti vā sañcayo, samūho. Pāramīnaṃ sañcayo samūhoti pāramisañcayo, taṃ pāramisañcayam. Taṃ pana cayanti etassa kammaṃ. **Cayanti** upacitaṃ, parisambhūtaṃ attho. Cayati upacinātīti cayo, ciyittha upaciyitthāti vā cayo, buddho. Cidhātu upacaye ṇa. Taṃ cayaṃ. Sabbhigatanti sambandho.

Tattha **sabbhīti** santēhi sappurisehi. Rāgādikilese samenti upasamentīti santā, sappurisā. Samudhātu upasameta, antapaccayo vā. Santēhīti vattabbe smāhismimnaṃ mhā bhīmhiṃvāti suttēna hivibhattiyā bhikāraṃ santasaddassa so bhe bo canteti suttēna bhakāre pare santasaddassa sakāraṃ katvā ante ca bakārāgaṃ katvā sabbhīti vuttaṃ. Tehi sabbhi. Taṃ pana gatanti etassa avuttakattā. **Gatanti** upagamitabbaṃ. Tañhi devamanussehi gamiyati upagamiyati upasaṅkamiyatīti gatoti vuccati. Taṃ buddhaṃ atthakāmehi sappurisehi devamanussehi silādiānantaguṇikattā saraṇanti abhimānā payirupāsītāboti vuttaṃ hoti. Taṃ gataṃ. Sukhappadaṃ padaṃ gatanti sambandho. Tattha **sukhappadanti** accantasukhassa patiṭṭhānabhūtaṃ. Sukhanaṃ sukhaṃ, tassa pajjati tiṭṭhāti etthāti sukhappadaṃ, nibbānaṃ. **Padanti** nibbānaṃ. Tañhi buddhādīhi ariyehi pajjijiyati gamiyatīti padanti vuccati. Gatanti agaminti gato, buddho. Dukkhādiasammissassa ekantasukhassa patiṭṭhānabhūtaṃ nibbānaṃ ārammaṇakaraṇavasena apāpuṇinti vuttaṃ hoti. Taṃ gataṃ.

Narānarānanti naraanarānanti padacchedo. Manussadevānanti attho. Pabbajjādisetṭhabhāvaṃ narati netīti naro, narīyati sakena kammaṃ niyatīti vā naro, manusso, satto vā. Naradhātu nayane a. Na naro anaro, devo. Naro ca anaro ca narānaro, tesam narānarānaṃ. Taṃ pana sukhasambhavanti pade sambandho.

Sukhasambhavanti lokiyalokuttarasukhassa kāraṇaṃ. Tividhasukhassa labhanakāraṇabhūtaṃ puññaṃ vā. Sukhayatīti sukhaṃ. Tividhasukhaṃ. Yassa uppajjati, taṃ sukhitam karotīti attho. Atha vā suṭṭhu dukkhaṃ khanatīti sukhaṃ. Supubbakhanudhātu avadhāraṇe a. Sambhavati sukhasaṅkhātaṃ phalaṃ anena puññenāti sambhavaṃ, puññakaraṇaṃ. Saṃpubbabhūdhātu sattāyaṃṇa. Sukhassa sambhavaṃ sukhasambhavaṃ, taṃ pana bhavantipade kammaṃ. **Bhavanti** nibbattentaṃ. Taṃ sukhasambhavaṃ bhāveti nibbatteṭīti bhavo, buddho. Taṃ bhavaṃ. So hi mahākaraṇāpubbaṅgamāya dhammadeśanāya devamanussānaṃ lokiyalokuttarasukhassa labhanakāraṇabhūtaṃ dānasīlabhāvanāsāṅkhātaṃ puññaṃ kāreti, tasmā bhagavato narānarānaṃ sukhasambhavaṃ bhavanti thometīti daṭṭhabbaṃ.

Namānamānanti padassa name anamānanti padacchedo. Nameti ahaṃ namāmīti attho. Ettha ca mivibhattiyā ekārādesoti veditabbo. Anamānanti anamentānaṃ avandantānaṃ anādarānanti attho. Taṃ pana gavantietassa visesanaṃ. **Gavanti** goṇasadisānaṃ bālānaṃ. Gavanti hi chaṭṭhībahuvacanantaṇāmapadaṃ. Tato namaṃ patimhālutte ca samāseti sutte samabhinivīṭṭhena caggahaṇena naṃvacanassa aṃ ādesaṅca goiccetassa okārassa avādesam katvā rūpasiddhi veditabbā. Gacchantīti gāvo, goṇā. Gāvo viyāti gāvo, tesam gavaṃ bālānaṃ. Taṃ pana jinapuṅgavantipade chaṭṭhīkammaṃ. **Jinapuṅgavanti** jayantapurisuttamaṃ buddhaṃ name namāmīti sambandho. Ettha ca puṅgava saddo kammadhārayasamāse seṭṭhatthavācako. Munipuṅgavotiādīsu viya. Vuttaṅca **amarakose** –

“Uttarasmim pade byaggha, puṅgavosabhakuñjarā;

Sīhasaddūlanāgādyā, pume seṭṭhatthagocarā’’ti.

Tassattho. Kammadhārayasamāse uttarapade vattamānā byagghapuṅgavosabhakuñjarā byagghapuṅgavausabhakuñjarasaddā ca sīha saddūlanāgādyā sīha saddūla nāgāsaddā ca pume seṭṭhattha vācakāti. Ayaṃ panettha vacanattho. Go viya buddhagūṇe ajānante anamante aññadiṭṭhike bāle jināti ajinīti vā jino. Pakatṭhabhāvaṃ padhānabhāvaṃ vā uddham gacchatīti puṅgavo. Paupubba gamudhātu gatiyaṃ avapaccayo. Niggahitā gamo. Tassa kavaggantaṃ dhātventalopañca yadādinā katvā rūpasiddhi veditabbā. Jino ca so puṅgavo cāti jinapuṅgavo, buddho. So pana gunnaṃ viya buddhānaṃ silādike appameyyagūṇe ajānantānaṃ anamantānaṃ agāravantānaṃ avandantānaṃ añña diṭṭhigatikānaṃ bālānaṃ asatthena pāramīpuññatejēna ajinīti vuttaṃ hoti. Taṃ jinapuṅgavanti.

Ayaṃ panettha **saṅkhepayojanā**. Tahim tahim tasmim tasmim bhave, attabhāve vā, pāramisañcayāṃ dānādipāramīnaṃ samūhaṃ, cayaṃ upacitaṃ parisambhūtaṃ, sabbhi santehi sappurisehi, gataṃ upagamitabbāṃ payirupāsītāṃ, sukhappadaṃ accantasukhassa patiṭṭhāna bhūtaṃ, padaṃ nibbānaṃ gataṃ pattaṃ agamiṃ, narānarānaṃ manussadevānaṃ, sukhasambhavaṃ lokiyalokuttarasukhassa kāraṇaṃ tividha sukhasa labhanakāraṇabhūtaṃ puññaṃ vā bhavaṃ nibbattantaṃ, anamānaṃ anamantānaṃ anādarānaṃ avandantānaṃ vā, gavaṃ goṇasadisānaṃ bālānaṃ jinapuṅgavaṃ jayantapurisuttamaṃ buddhaṃ ahaṃ name namāmīti.

Navamavandanagāthāvaṇṇanā samattā.

10. Maggaṅganāvaṃ munidakkhanāviko,
 Īhāphiyāṃ ñāṇakarena gāhako;
 Āruya yo tāya bahū bhavaṇṇavā,
 Tāresi taṃ buddhamaghappahaṃ name.

10. Evaṃ navamagāthāya buddhaṃ natvā idāni bahū satte tibhavasāṅkhātā samsārasamuddato tārentena guṇena ca sattānaṃ dukkhappahānena guṇena ca thomitvā buddhaṃ vanditu kāmo **maggaṅganāvāntya**ādigāthamāha. Ayaṃ pana tata jara gaṇehi racitattā dvādasakkharehi yuttā indavaṃsa gāthāti daṭṭhabbā. Vuttañhi **vuttodaye** “sāyindavaṃsā khalu yattha tā jarā’’ti.

Tassattho. Yattha yassaṃ gāthāyaṃ tā tagaṇadvayañca jarā jagaṇa ragaṇā ca ce siyuṃ, sā gāthā khalu ekantaṃ indavaṃsagāthā nāmāti.

Tattha yo munidakkhanāvikoti sambandho. Yo buddha saṅkhāto cheko nāvājeṭṭhakoti attho. Tattha **munī** ubho loke munāti jānātīti muni, bhagavā. Munadhātu ñāṇe i. Atha vā monaṃ vuccati sabbaññutaññaṃ, taṃ assa atthīti muni, bhagavā. Assathyatthe ipaccayo. Vuttañhi ekanipāte **vaṇṇapathajātakatṭhakathāyaṃ** “munīti monaṃ vuccati ñāṇaṃ. Kāya moneyyādīsu vā aññatarena samannāgatattā puggalo munīti vuccati. So panesa agāriyamuni, anagāriyamuni, sekkhamuni, asekkhamuni, paccekamuni, munimunīti anekavidho. Tattha agāriyamunīti gihi āgataphalo viññātasāsano. Anagāriyamunīti tathārūpova pabbajito. Sekkhamunīti sattasekkhā. Asekkhamunīti khīṇāsavo. Paccekamunīti paccekasambuddho. Munimunīti sammāsambuddho’’ti. Idha pana munimuni adhippeto.

Dakkhoti cheko. Samuddataraṇe dakkhati kusalattaṃ gacchatīti dakkho, nāviko. Dakkhadhātu gatiyaṃ a. Atha vā dakkhati kusalakamme aññasmiñca kiccākicce adandhatāya sīghaṃ gacchatīti dakkho, yokoci kusalo puggalo. Dakkhadhātu sīghatthe a. Dakkho viyāti dakkho, buddho. Nītatthēna pana buddho sattānaṃ samsārasamuddato uddhāraṇassa kāraṇaṃ dakkhati paricchindati ñāṇenāti dakkhoti vuccati. **Nāvikoti** samuddatīraṃ nāvāya taratīti nāviko, nāvājeṭṭhako. Taratitaddhite ñiko. Nāviko viyāti nāviko, buddho. Nītatthēna pana buddho nibbānaṃ pāraṃ atṭhamaggaṅganāvāya taratīti nāvikoti vuccati. Dakkho nāviko dakkhanāviko, muni ca so dakkhanāvikocāti munidakkhanāviko, kammadhārayasamāsoyaṃ. Atha vā dakkhanāviko viya dakkho munīti munidakkhanāviko, buddho. Upamākammadhārayasamāsoyaṃ. Yathā hi samuddataraṇe cheko nāviko manusse samuddapāraṃ neti, evaṃ buddho veneyyasatte nibbānapāraṃ netīti vuttaṃ hoti.

Maggaṅganāvaṃ āruyhāti sambandho. **Maggaṅganāvanti** aṭṭhamaggaṅga saṅkhātāvaṃ nāvaṃ. **Āruyhāti** ārohitvāti attho. Kilese mārento ārammaṇakaraṇavasena nibbānaṃ gacchatīti maggo. Mārasaddūpapada gamudhātu kvi. Mārenta goti vattabbe niruttinayena maggoti vuttaṃ. Atha vā nibbānaṃ maggati gavesatīti maggo. Maggadhātu gavesane a. Nibbānatthikehi maggiyati gavesiyatīti vā maggo. Ekantato jāti jarābyādhimaraṇadukkhādīhi pīḷitehi sattehi dukkhakkhayaṃ nibbānaṃ pāpuṇatthāya maggitabbo gavesitabboti maggo, catumaggo. Vuttañhi ‘‘maggoti kenatṭhena nibbānaṃ magganatṭhena nibbānatthikehi magganīyatṭhena cā’’ti. Aṅgati gacchati phalanibbānaṃ etenāti aṅgaṃ. Agidhātu gamane a. Maggassa aṅgaṃ kāraṇanti maggaṅgaṃ, sammādiṭṭhi sammāsaṅkappa sammāvācā sammākammanta sammājīva sammāvāyāma sammāsati sammāsamādhivasena aṭṭhamaggaṅgaṃ labbhati. Nuyati thaviyatīti nāvā. Nudhātu thaviyaṃ avo. Atha vā orato pāraṃ netīti nāvā, bhāraṃ nayanti etāyāti vā nāvā. Nidhātu nayane avo. Maggaṅgasāṅkhātā nāvā maggaṅganāvā. Atha vā nāvā viya maggaṅganti maggaṅga nāvā. Yathā hi nāvā attani āruḷhe manusse samudda nadīpāraṃ neti, evaṃ aṭṭhamaggaṅgadhammā attānaṃ paṭipajjante nibbāna pāraṃ nentīti vuttaṃ hoti. Taṃ maggaṅganāvaṃ.

Īhāphiyanti vīriyasaṅkhātāvaṃ dabbisāraṃ. Vuttañhi **suttani pātaṭṭhakathāyaṃ** ‘‘phiyenāti dabbisāraṅkā’’ti. Īhāti ārabhatīti Īhā. Īhāti vāyamati cetayati etenāti vā Īhā, vīriyaṃ. **Saddanītiyaṃ** pana ‘‘Īha cetāya’’nti vuttaṃ. Phāti vaḍḍheti udakaṃ etenāti phiyaṃ. Phādhatu vaḍḍhiyaṃ iyo. Phāti ghaṭṭeti udakanti vā phiyaṃ. Atha vā phāyati gacchati nāvaṃ etenāti phiyaṃ. Dabbisāraṃ. Phāyī dhātu gatiyaṃ a. Ākāraṃsa i. Īhasāṅkhātāvaṃ phiyanti Īhāphiyaṃ. Phiyaṃ viya Īhāti Īhāphiyaṃ. Yathā hi phiyena nāvā icchitaṭṭhānaṃ gacchati, evaṃ Īhasāṅkhātēna vīriyena taṃ taṃ kiccaṃ sādheti, icchitaṃ nibbānatṭhānaṃ gacchatīti adhippāyo. Taṃ pana gāhakoti pade kammaṃ. **Ñāṇakarenāti** sabbaññutaññasaṅkhātēna hatthēna. Sabbaṃ ñeyyadhammaṃ jānātīti ñāṇaṃ, sabbaññutaññāṃ. Taṃ taṃ kammaṃ karotīti karo, hattho. Ñāṇasaṅkhāto karo ñāṇa karo, karaṃ viya ñāṇanti vā ñāṇakaro, tena ñāṇakarena. **Gāhakoti** dalhagaṇhamāno hutvā. **Tāyāti** aṭṭhamaggaṅga saṅkhātāya tāya nāvāya, **bahūti** aneke veneyyasatte. **Bhavaṇṇavāti** tibhavasāṅkhātā saṃsāraṇṇasaṅkhātā vā mahāsamuddato. Tassa pana vacanattho heṭṭhā vuttoyeva.

Tāresīti otiṇṇesi, atikkamesīti attho. **Buddhanti** paṭividdhacatusaccadhammaṃ. **Aghappahanti** sattānaṃ dukkhappaja hantaṃ. Dukkhaiddhamṣentanti attho. Atha vā aghappahanti sattānaṃ kilesappajahantaṃ. Kilesaviddhamṣentanti attho. Ettha hi aghasaddo dukkhe kilese ca vattati. Tattha hi dukkhaṃ aghayati dukkhayatīti aghanti ca, aghayati dukkhākāreṇa pavattatīti vā aghanti ca vuccati. Kilesa pana aghayanti pāpaṃ karonti sattā etenāti aghoti vuccati. Aghadhātu pāpakaraṇe a. Aghaṃ pajahati viddhamṣetīti aghappaho, buddho. Aghasaddūpapadapubbahādhatu cāge. Buddho veneyyasattānaṃ dukkhañca kilesañca dhammadesanāya apanetīti attho. Ettha ca paṭhamavikappe dukkhassa appahātabbadhammattā maggena appahātabbampi phalūpacāreṇa dukkhappajahantanti vuttaṃ. **Tanti** munidakkhanāvikaṃ ahaṃ name namāmīti sambandhoti.

Ayaṃ panettha **saṅkhepayojanā**. Yo munidakkhanāviko yo buddhasāṅkhāto cheko nāvājeṭṭhako, maggaṅganāvaṃ aṭṭhamaggaṅgasāṅkhātāvaṃ nāvaṃ āruya ārohitvā Īhāphiyaṃ vīriyasaṅkhātāvaṃ dabbisāraṃ, ñāṇakarena sabbaññutaññasaṅkhātēna hatthēna, gāhako dalhagaṇhamāno hutvā tāya aṭṭhamaggaṅganāvāya, bahū aneke veneyyasatte bhavaṇṇavā tibhavasāṅkhātāmahāsamuddato, tāresi oṭāresi, buddhaṃ paṭividdhacatusaccadhammaṃ aghappahaṃ sattānaṃ dukkhaviddhamṣentaṃ kilesa viddhamṣentaṃ vā taṃ munidakkhanāvikaṃ ahaṃ name namāmīti.

Dasamavandanagāthāvaṇṇanā samattā.

11. Samatiṃsatipāramisambharaṇaṃ,
Varabodhidume catusaccadasaṃ;
Varamiddhigataṃ naradevahitaṃ,
Tibhavūpasamaṃ paṇamāmi jinaṃ.

11. Evaṃ dasamagāthāya buddhaṃ vanditvā idāni samatiṃ satipāramisambharaṇādīhi pañcahi guṇehi thomitvā jinaṃ vanditukāmo **samatiṃsatipāramisambharaṇantyādigāthamāha**. Ayaṃ pana

catūhi saganēhi racitattā dvādasakkharehi yuttā toṭakagāthāti daṭṭhabbā. Vuttañhi **vuttodaye** ‘‘iha toṭaka mambudhisehi mita’’nti. Tassattho. Yassaṃ paṭipādaṃ ambudhisehi catūhi saganēhi mitaṃ pamitaṃ racitaṃ lakkhitaṃ vā vuttaṃ idha jagatichande toṭakaṃ nāmāti.

Tattha pana **samatimsatipāramisambharaṇanti** dasapāramiyo, dasa upapāramiyo, dasa paramatthapāramiyo cāti samatimsapāramiyo sambhūtaṃ, paripūritanti attho. Tāsaṃ pana viseso pāramisaddassa ca vacanattho heṭṭhā vuttoyeva. Sambharittha paripūrayitthāti sambharaṇo, jino. Saṃpubbabbharadhātu pūraṇe yu. Samatimsapāramiyo sambharaṇoti samatimsatipāramisambharaṇo, jino. Dīpaṅkarabuddhassa pādamūle laddhabyākaraṇato paṭṭhāya kappasatasahassādhikāni cattāri asaṅkhyeyyāni samatimsapāramiyo pūrayitthāti attho. Taṃ samatimsatipāramisambharaṇaṃ. **Varabodhidumeti** uttamabodhirukkhamūle. Ettha ca varabodhisaddassa vacanattho heṭṭhā vuttoyeva. Davati gacchati mūlakhandhatacasākha viṭapa pallava phalehi vuḍḍhiṃ virūliṃ vepullaṃ rajata suvaṇṇamaṇi santā rucīhi atisobhanaṃ vā pāpuṇāṭṭi dumo, bodhisattassa vijāṭādivaseyeva bodhisattena saddhiṃ saha jāto satahatthubbedho asatthadumarājā labbhati. Dudhātu gatimhi amo. **Apadānaṭṭhakathāyaṃ** pana ‘‘dunāti kampaṭṭi dumo. Dumati pūreti ākāsatālanti vā dumo’’ti vuttaṃ. Varo bodhi varabodhi, varabodhi ca so dumo cāti varabodhidumo, tasmim.

Catusaccadasanti cattāri ariyasaccāni maggañāṇena paṭivijjitaṃ. Ettha ca saccasaddo anekesvatthesu dissati. Seyyathidaṃ. Saccam bhaṇe na kujjheyyātiādīsu vācāsacce. Sacce ṭhitā samaṇabrāhmaṇātiādīsu viratisacce. Kasmā nu saccāni vadanti nānā pavādiyāse kusalāvadānātiādīsu diṭṭhisacce. Ekañhi saccam na dutiyamatthītiādīsu paramatthasacce nibbāne ceva magge ca, catunnaṃ saccānaṃ kati kusalātiādīsu ariyasacce. Svāyamidhāpi ariyasacce vattatīti veditabbo. Sathanaṃ saccam, avitathaṃ. Sathadhātu avitathe ṇyo. Yathā hi aggīnaṃ sabhāvo ekantaṃ uṇhoyeva hoti, na sītaḷo, evaṃ dukkhādīnaṃ piḷanādi sabhāvaṃ ekantaṃ saccam tathaṃ avitathaṃ anaññathaṃ hoti. Taṃ pana catubbidhaṃ hoti dukkhasaccam, samudayasaccam, nirodhasaccam, maggasaccañcāti. Tattha dukkhasaccanti dukkhasaccam kham tuccanti dukkham. Kammadhārayasamāsoyaṃ. Vuttañhetam **saccavibhaṅgaṭṭhakathāyaṃ** ‘‘duiti ayaṃsaddo kucchite dissati. Kucchitañhi puttaṃ duputtoti vadanti. Khaṃsaddo pana tucche. Tucchañhi ākāsaṃ khanti vuccati. Idañca paṭhamasaccam kucchitaṃ. Anekaupaddavādhiṭṭhānato, tucchambālanaparikkappitadhuvasubhasukhattabhāvavirahitato. Tasmā kucchitattā tucchattā ca dukkhanti vuccati’’ti. Dukkhañca taṃ saccañcāti dukkhasaccam. Tebhūmikavaṭṭam labbhati.

Samudayasaccanti ayati pavattati dukkhaphalaṃ etenāti ayo, lobho. Ayadhātu gatimhi a. Saṃ avasesa paccayasamāyoge sati u dukkhuppattiyā ayo kāraṇoti samudayo. Chaṭṭhīṭappurisasamāsoyaṃ. Vutteñhetam **sacca vibhaṅgaṭṭhakathāyaṃ** ‘‘saṃiti ca ayaṃsaddo samāgamo sametantiādīsu samāyogaṃ dīpeti. Uti ayaṃsaddo uppannaṃ uditantiādīsu uppattim. Ayasaddo pana kāraṇam dīpeti. Idañcāpi dutiyasaccam avasesapaccayasamāyoge sati dukkhasuppattikāraṇam. Iti dukkhasa samāyoge uppattikāraṇattā dukkhasamudayanti vuccati’’ti. Samudayo ca so saccañcāti samudayasaccam, lobhasaṅkhātā taṇhā labbhati. Nirodhasaccanti rodhati carati pavattatīti rodho, tebhūmikavaṭṭadhammo. Rodhadhātu caraṇe ṇa. Natthi tebhūmikavaṭṭadhammassa rodho caraṇam etthāti nirodho, nibbānaṃ. Atha vā nirujjhati saṃsāradukkham etthāti nirodho, nibbānaṃ. Rudhidhātu āvaraṇe ṇa. Vuttañhetam **saccavibhaṅgaṭṭha kathāyaṃ** ‘‘tatiyasaccam pana yasmā nisaddo abhāvaṃ. Rodha saddo cāraṇam dīpeti. Tasmā abhāvo ettha saṃsāra cārasaṅkhātassa dukkharodhassa sabbagatisuññattā. Samadhi gate vā tasmim saṃsāracārasaṅkhātassa dukkharodhassa abhāvo hoti tappaṭipakkhattātipi dukkhanirodhanti vuccati’’ti. Dukkhasa vā anuppādanirodhapaccayattā dukkhanirodhanti. Nirodho ca so saccañcāti nirodhasaccam. Nibbānaṃ. Maggasaccanti dukkhanirodham nibbānaṃ maggati gacchati etenāti maggo. Aṭṭhaṅgiko maggo. Maggadhātu gatiyaṃ a. Vuttañhetam **sacca vibhaṅgaṭṭhakathāyaṃ** ‘‘catutthasaccam pana yasmā etaṃ dukkhanirodham gacchati ārammaṇavasena tadabhimukhabhūtattā paṭipadā ca hoti dukkhanirodhappattiyā. Tasmā dukkhanirodhagāminipaṭipadāti vuccati’’ti. Maggo ca so saccañcāti maggasaccam. Aṭṭhaṅgiko maggo labbhati. Yasmā panetāni buddhādayo ariyā paṭivijjhanti, tasmā ariyasaccānītipi vuccanti. Atha vā buddhādīhi ariyehi paṭivijjhiyanti, tasmā ariyasaccānītipi vuccanti.

Tesaṃ pana lakkhaṇādīni evaṃ veditabbāni. Ettha hi bādhanalakkhaṇam dukkhasaccam, santāpanarasam, pavattipaccupaṭṭhānaṃ, pabhavalakkhaṇam samudayasaccam,

anupacchedakaraṇarasam, palibodhapaccupaṭṭhānam. Santilakkhaṇam nirodhasaccam, accutirasam, animittapaccupaṭṭhānam. Niyānalakkhaṇam maggasaccam, kilesappahāna karaṇarasam, vuṭṭhānapaccupaṭṭhānanti. Etesu pana catūsu saccesu paṭhamatatiyasaccāni phalāni honti. Duttiya catutthasaccāni hetūni honti. Purimāni dvesaccāni dudda sattā gambhīrāni. Pacchimāni dvesaccāni gambhīrattā duddasāni.

Api ca kho pana dukkhanirodham ariyasaccam gambhīrañceva duddasañcāti veditabbam. Ekekassa pana saccassa catunnam catunnam athānam vasena soḷasa saccaṭṭhā honti. Tena vuttam **paṭisambhidā maggapāliyam** “dukkhassa piḷanaṭṭho saṅkhataṭṭho santāpaṭṭho vipariṇāmaṭṭho, ime cattāro dukkhassa dukkhaṭṭhā tathā avitathā anaññathā. Evaṃ dukkham tathaṭṭhena saccam. Samudayassa āyūhanaṭṭho nidānaṭṭho samyogaṭṭho palibodhaṭṭho, ime cattāro samudayassa samudayaṭṭhā tathā avitathā anaññathā. Evaṃ samudayo tathaṭṭhena saccam. Nirodhassa nissaraṇaṭṭho vivekaṭṭho asaṅkhataṭṭho amataṭṭho, ime cattāro nirodhassa nirodhaṭṭhā tathā avitathā anaññathā, evaṃ nirodho tathaṭṭhena saccam. Maggassa niyānaṭṭho hetvaṭṭho dassanaṭṭho adhipateyyaṭṭho, ime cattāro maggassa maggaṭṭhā tathā avitathā anaññathā, evaṃ maggo tathaṭṭhena sacca’nti.

Dassanam dasam, disati passatīti vā dasam, catumaggañānam. Disadhātu apekkhane a. Catunnam saccānam dassanam assāti catusaccadaso, jino. Atha vā cattāri saccāni adassi apassīti catusaccadaso, jino. So cattāri saccāni catumaggañānena appaṭivijjhīti attho. Tam catusaccadasam. Catusaccañānam pana duvidham hoti anubodhañānañca, paṭivedha ñānañcāti. Tattha anubodhañānam lokiyaṃ anussavādivasena nirodhe magge ca pavattati, paṭivedhañānam lokuttaram nirodhamārammaṇam katvā kiccato cattāripi saccāni paṭivijjhanti. Yathāha yo bhikkhave dukkham passati, dukkhasamudayampi so passati. Dukkhanirodhampi passati, dukkhanirodhagāminipaṭi padampi passatīti sabbam vattabbam. Catusaccapaṭivedhañānam pana anubodhañānena vinā na pavattati, tasmā anubodha ñānaṭṭhāya pubbe catusaccakammaṭṭhānam paṇḍitena samārambhi tabbanti. Nanu ca ariyasāvaka cattāri saccāni paṭivijjhanti. Atha kasmā jinoyeva catusaccadasanti thomitoti. Bhagavā pana ariyasāvakehi viṣiṭṭhena anaññopadesena arahattamaggañānena cattāri saccāni paṭivijjhanti. Tasmā bhagavāyeva catusaccadasanti abhitthavitoti. Tattha pana ṭhapetvā taṇhañca nibbānañca avasesadhammā dukkhasaccam nāma. Aṭṭhasatataṇhāvicarītā samudayasaccam nāma. Nibbānam nirodha saccam nāma. Aṭṭhaṅgiko maggo maggasaccam nāma. Vuttam pana **abhidhammatthasaṅghe** –

“Dukkham tebhūmakam vaṭṭam, taṇhā samudayo bhava;
Nirodho nāma nibbānam, maggo lokuttaro mato’nti.

Varamiddhigatanti varam iddhigatam. Uttamam atītabuddhānam iddhiṃ pattanti attho. Atha vā uttamānam iddhīnam paṭiṭṭhānabhūtantī attho. Ijjhanam samijjhanam iddhi, ijjhanti samijjhanti nippajjatīti vā iddhi. Iddhividhañānañca arahattamaggo ca labbhati. Vuttañhi **visuddhimagge** “tathā nekkhammam ijjhantīti iddhīti ca arahattamaggo ijjhantīti iddhī’nti ca. Atha vā ijjhanti sattā etāya iddhā vuddhā ukkaṃsagatā hontīti iddhi, aṭṭhasamāpattiyo ca cattāro maggā ca labbhanti. Idhadhātu vuḍḍhiyanti paccayo. Atha vā tapaccayo itthilingajotako ipaccayo ca. Iddhiṃ agaminti iddhigato, jino. Atha vā gacchati paṭiṭṭhahati etthāti gato, varānam uttamānam iddhīnam gato paṭiṭṭhānabhūtoti varamiddhigato, jino. Tam varamiddhigatam. Kiñcāpi pana ariyasāvaka iddhipattā hontī, buddhā pana visesato etāya abhiññāya iddhā samiddhā vuddhā atiukkaṃsagatā hontī, tasmā buddhoyeva varamiddhigatanti abhitthavitum arahatīti veditabbo.

Naradevahitanti manussadevānam lokiya lokuttara saṅkhātam hitam payojanam dhāraṇam. Tesam pana attho heṭṭhā vuttoyeva. **Tibhavūpasamanti** tibhavaupasamaṃ. Punabbhavābhiniḍḍattiyā abhāvato kāmarūpaarūpasāṅkhātehi tīhi bhavēhi tīsu bhavesu punabbhavābhiniḍḍattito vā upasamitam nibbutam niruddhanti attho. Bhavanti sattā etthāti bhavo, tayo bhavā tibhavā, tehi upasamitthāti tibhavūpasamo, jino. Tam tibhavūpasamaṃ. Bhagavato pana bodhipallānkeva kāmarūpārūpasāṅkhātesu tīsu bhavesu paṭisandhijanakānam avijjātaṇhāmūlakānam puññādisāṅkhārānam arahattamaggañānena niravasesam pahīnattā punabbhavābhiniḍḍatti natthi. Tasmā bhagavantamyeva visesena tibhavūpasamanti thometīti vuttam hoti. **Jinanti**

pañcamārajayantaṃ buddhaṃ. **Pañamāmīti** ahaṃ ñāṇasampayuttacittena ādaraṃ vandāmīti yojanā.

Ayaṃ panettha **saṅkhepayojanā**. Samatimsati sambharaṇaṃ samatimsapāramiyo sambhūtaṃ paripūritaṃ, varabodhidume uttamabodhirukkhamūle, catusaccadasaṃ cattāri ariyasaccāni maggañāṇena passantaṃ paṭivijjhantaṃ, varamiddhigataṃ uttamaṃ atīta buddhānaṃ iddhipattaṃ uttamānaṃ iddhīnaṃ paṭiṭṭhānabhūtaṃ vā, naradevahitaṃ manussadevānaṃ lokiyalokuttarasāṅkhātaṃ payojanaṃ dhāraṇaṃ, tibhavūpasamaṃ kāmarūpaarūpasāṅkhātehi tīhi bhavehi upasamitaṃ, kāmarūpārūpasāṅkhātesu tīsu bhavesu punabbhavā bhinibbattito upasamitaṃ nibbutaṃ vā, jinaṃ pañcamārajayantaṃ buddhaṃ pañamāmi ahaṃ ñāṇasampayuttacittena ādaraṃ vandāmīti.

Ekādasamavandanagāthāvaṇṇanā samattā.

12. Satapuññajalakkhaṇikaṃ virajaṃ,
Gaganūpamadhiṃ dhitimerusamaṃ;
Jalajūpamasītalasīlayutaṃ,
Pathavīsahanaṃ pañamāmi jinaṃ.

12. Evaṃ ekādasamagāthāya jinaṃ vanditvā idāni satapuññajalakkhaṇikantyādīhi chahi guṇehi thomitvā jinaṃ vanditu kāmo **satapuññajalakkhaṇikantyādigāthamāha**. Ayaṃ pana catūhi sa gaṇehi racitattā dvādasakkharehi yuttā toṭakagāthāti daṭṭhabbā. Sādhakaṃ pana anantaragāthāvaṇṇanāyaṃ vuttameva.

Tattha **satapuññajalakkhaṇikanti** anekapāramīpuññatejena jātena dvattimsamahāpurisalakkhaṇena sampannaṃ. Ettha ca satasaddo anekasaṅkhyāvācako. Satatejo sahasaraṃ sītīādīsu viya. Satena anekena pāramīpuññatejena jātanti satapuññajaṃ, lakkhiyati lakkhitabbaṃ buddhadabbaṃ etehīti lakkhaṇaṃ, dvattimsamahāpurisalakkhaṇādi. Lakkhadhātu dassanañkesuyu. Satapuññajaṅca taṃ lakkhaṇaṅcāti satapuññaja lakkhaṇaṃ. Taṃ assa atthīti satapuññajalakkhaṇiko, jino. Taṃ. Bhagavā hi anantesu cakkavāḷesu sabbe sattā ekekaṃ puññakammaṃ satakkhattuṃ kareyyuṃ. Ettakehi janehi kataṃ puññakammaṃ bodhisatto ekova ekekaṃ sataguṇaṃ katvā nibbattena pāramīpuññatejena jātehi dvattimsa mahāpurisalakkhaṇehi ca asītianubyañjana lakkhaṇe hi ca sampannoti satapuññajalakkhaṇikanti thometīti adhippāyo. Vuttañhi **buddhavaṃsaṭṭhakathāyaṃ** –

“Satapuñña lakkhaṇoti anantesu cakkavāḷesu sabbe sattā ekekaṃ puññakammaṃ satakkhattuṃ kareyyuṃ, ettakehi janehi katakammaṃ bodhisatto sayameva eko sataguṇaṃ katvā nibbatto. Tasmā satapuññalakkhaṇoti vuccati. Keci pana satena satena puññakammena nibbattaṃ ekekalakkhaṇoti vadanti. Evaṃ sante yo koci buddho bhaveyyāti. Taṃ aṭṭhakathāsu paṭikkhitta”nti.

Pātheyyaṭṭhakathāyaṃ pana “sata puññalakkhaṇanti satena satena puññakammena nibbattaṃ ekekaṃ lakkhaṇaṃ. Evaṃ sante yo koci buddho bhaveyyāti na rocayīmsu. Anantesu pana cakkavāḷesu sabbe sattā ekekaṃ kammaṃ satakkhattuṃ kareyyuṃ. Ettakehi janehi kataṃ kammaṃ bodhisatto ekova ekekaṃ sataguṇaṃ katvā nibbatto. Tasmā satapuññalakkhaṇoti imamattaṃ rocayīmsū”ti vuttaṃ. Dvattimsamahāpurisalakkhaṇaṃ pana upari āvibhavissatīti.

Virajanti rāgarajādīnaṃ abhāvā vigatarajaṃ. Rañjati sañjati rūpādiārammaṇesūti rajo, rāgādirajo. Ranjadhātu rāge a. Vigato rajo assāti virajo, jino. Taṃ virajaṃ. Jino hi bodhipallaṅkeyeva sabbakilesamāra rajassa jayitattā vigatarajoti attho. **Gaganūpamadhinti** ettha dhī vuccati sabbaññutañāṇaṃ. Tasmā ākāsūpamasabbaññuta ñāṇavantanti attho. Gacchanti ettha vihaṅgamādayoti gaganāṃ, ākāso. Gamudhātu gatiyaṃ yu. Makārassa go. Upamiyate upamā. Bhāvasāadhanoyaṃ. Upapubbamādhātu parimāne a. Sabbañeyyadhammaṃ dharati jānātīti dhī, sabbaññuta ñāṇaṃ. Dharadhātu ñāṇe kvi, itthilīṅgajotakaīpaccayo ca. Gaganena ākāseṇa yuttā upamā gaganūpamā, taṃ sadisaṃ dhī sabbaññutañāṇaṃ yassāti gaganūpamadhī, jino. Taṃ gaganūpamadhī. Ayaṃ pana anantādiguṇahīnattā dhammahīnopamā nāma. Vuttañhi **subodhālaṅkāre** “dhammahīnāmukhambhoja, sadisaṃ munino itī”ti. Yathā hi ākāso anantoti

vuttattā ākāso ananto hutvā vittharati, evaṃ bhagavato anantaṃ buddhaññanti vuttattā sabbaññutaññassa anantārammaṇattā ca ñāṇaṃ anantaṃ hutvā vittharati. Tasmā gaganūpamadhinti thometīti.

Dhitimerusamanti ettha dhiti vuccati samādhi. Sinerupabbata sadisaṃ acalasaṃmādhivantanti attho. Dhiyati ṭhapiyati sampayuttadhamme ekārammaṇe etenāti dhiti, bhagavato lokiyalokuttarajhānasamādhi. Dhidhātu dhāraṇeti. Raṃsiyā andhakāraṃ mināti hiṃsatīti meru, pabbatarājā. Mīdhātu hiṃsāyaṃ rupaccayo. Imaṃ vacanattañhi sinerussa pācīnapassaṃ rajatamayaṃ, dakkhiṇapassaṃ maṇimayaṃ, pacchimapassaṃ phallikamayaṃ, uttarapassaṃ suvaṇṇamayaṃ hotīti vuttavacanaṃ sandhāya vuttaṃ. Atha vā mināti hiṃsatī sabbe pabbate attano uccataṭṭhenāti meru, merunā samo dhiti samādhi yassāti dhitimerusamo, jino. Taṃ dhitimeru samaṃ. Yathā hi merurājā aṭṭhahi disāhi āgatehi vātehi na kampati na calati, evaṃ jino kāmaccchandādinīvaraṇe pajahitvā lokuttarajjhānasamādhinā samannāgatattā aṭṭhahi lokadhammehi ca micchādīṭṭhivātehi ca na kampati na calatīti dhitimerusamanti thometi.

Jalajūpamasītalasīlayutanti udakajātappadumasadisena atisītalena asaṅkhyeyyasīlena saṃyuttaṃ. Vuttañhi **apadāna pāliyaṃ** “sīlaṃ tassa asaṅkhyeyya”nti. **Tadaṭṭhakathāyaṅca** “bhagavato pana sīlaṃ asaṅkhyeyyamevā”ti. Jalati dibbatīti jalaṃ, udakaṃ. Jaladhātu dītiyaṃ a. Jale udake jātaṃ jalajaṃ, padumaṃ. Jalajena padumena upamaṃ sadisanti jalajūpamaṃ, sīlaṃ. Sukhatthikehi seviyatīti sītalaṃ, sīlaṃ. Sidhātu sevāyaṃ talapaccayo. Atha vā sītaguṇaṃ lāti gaṇhātīti sītalaṃ, sīlaṃ. Sītasaddūpapada lādhātu gahaṇe kvi. Udale pana jātaṃ padumaṃ udakena uṇhassa samitattā sītalaṃ viya. Sīlaṃ pana buddhassa kilesatā panassa sametattā accantasītalaṃ hoti. Surakkhitañhi visuddhaṃ sīlaṃ kilesappahānena sattānaṃ kilesapariḷāhaṃ upasameti na haritacandanaṃ muttāhāro maṇi udakaṃ vāto candakiraṇo ca. Tasmā sīlameva sītalanti accantasītalanti vuccati. Tena vuttaṃ **visuddhimagge** –

“Na taṃ sajaladā vātā, na cāpi haricandanaṃ;
Neva hārā na maṇayo, na candakiraṇaṅkurā;
Samayantīdha sattānaṃ, pariḷāhaṃ surakkhitaṃ;
Yaṃ sametidaṃ ariyaṃ, sīlaṃ accantasītala”nti.

Ayaṃ pana tassa gāthādvayassattho. Surakkhitaṃ suṭṭhurakkhitaṃ ariyaṃ visuddhaṃ accantasītalaṃ idaṃ sīlaṃ idhaloke sattānaṃ yaṃ pariḷāhaṃ sameti, taṃ pariḷāhaṃ sajaladā udakadadena meghena saha pavattā vātā sītavātā na samayanti haritacandanañcāpi na samayati. Hārā muttāhārā neva samayanti. Maṇayo veḷuriyādimaṇiyo na samayanti. Candakiraṇaṅkurā candassa raṃsiaṅkurā na samayantīti. Sīlati samādhīyati kāyakammādīnaṃ susīlyavasena na vipakkiratīti sīlaṃ. Sīladhātu samādhimhi a. Atha vā sīlanti samādahanti cittaṃ etenāti sīlaṃ, sīlenti vā etena kusale dhamme upadhārenti ābhuso dhārenti sādhavoti sīlaṃ, cetanādhhammo, kusalacittuppādo vā labbhati. Sīladhātu upadhāraṇe a. Vuttañhettaṃ **visuddhimaggaṭṭhakathāyaṃ** “kenatthena sīlanti sīlanatthena sīlaṃ. Kimidaṃ sīlaṃ nāma, samādhānaṃ vā, kāyakammādīnaṃ susīlyavasena avippakīṇatāti attho. Upadhāraṇaṃ vā, kusalānaṃ dhammānaṃ patiṭṭhānavasena ādhārabhāvoti attho”ti. Jalajūpamena padumasadisena sītalena accantasītalena sīlena asaṅkhyeyyasīlena yuttoti jalajūpamasītalasīlayuto, jino. Taṃ jalajūpamasītalasīlayutaṃ. Yathā hi udake jātaṃ padumaṃ jalena sītalaṃ hoti, evaṃ bhagavato maggasīlena kilesupatāpanassa pahīnattā taṃ sītalaṃ accantasītalaṃ. Tena sampayuttoti jalajūpamasītalasīla yutanti thometīti vuttaṃ hoti.

Pathavīsahananti pathavī viya khantisampannaṃ khantivantaṃ vā. Pathanti patiṭṭhahanti ettha tarupabbatādayoti pathavī, bhūmi. Pathadhātu patiṭṭhāyaṃ vīpaccayo. Atha vā puthu hutvā jātanti pathavī. Jātataddhitatthe vīpaccayo. Sahayate khamiyate sahanaṃ, sahati khamaṭīti vā sahanaṃ, adhiṃvāsanakhanti. Sahadhātu khantiyaṃ yu. Pathavī viya sahanaṃ khamanaṃ yassa sotī pathavīsahano, jino. Taṃ pathavīsahanaṃ. Yathā hi pathavī attano upari pakkhittaṃ sucimpi asucimpi sabbaṃ sahati, na paṭighānunaṃ karoti, evaṃ jino iṭṭhārammaṇampi anīṭṭhārammaṇampi sabbaṃ sahati, na tattha paṭighānunaṃ karotīti pathavīsahananti thometīti adhippāyo. Tena vuttaṃ **apadānapāliyaṃ** –

‘‘Lābhālābhe na sajjanti, sammānavimānane;
Pathavīsadisā buddhā, tasmā te na virādhiyā’’ti.

Ahaṃ jinaṃ paṇamāmi vandāmīti sambandho.

Ayaṃ panettha **saṅkhepayojanā**. Satapuññajalakkhaṇikaṃ anekapāramīpuññatejena jātena dvattiṃsamahāpurisalakkhaṇena sampannaṃ, virajaṃ rāgarajādīnaṃ abhāvā vigatarajaṃ, gaganūpamadhiṃ ākāśūpamasabbaññutaññāvantam, dhitimerusamaṃ sinerupabbatasadisam acalasaṃmādhivantaṃ, jalajūpamasītala sīlayutaṃ. Udakajātappadumasadisena accantaatisītalena asaṅkhyeyyasīlena sampayuttaṃ, pathavīsahanaṃ pathavī viya khantisampannaṃ, khantivantaṃ vā, jinaṃ pañcamāravijayaṃ buddhaṃ ahaṃ sakkaccaṃ paṇamāmi vandāmīti.

Dvādasamavandanagāthāvaṇṇanā samattā.

13. Yo buddho sumati dive divākarova,
Sobhanto ratijanane silāsanamhi;
Āsīno sivasukhadaṃ adesi dhammaṃ,
Devānaṃ tamasadisam namāmi niccaṃ.

13. Evaṃ dvādasamagāthāya jinaṃ vanditvā idāni tāvatimsapure mātudevaputtappamukhānaṃ upapattidevānaṃ abhidhammaṃ desaka guṇena abhitthavitvā vanditukāmo **yo buddho sumati**yādīgāthamāha. Ayaṃ pana ma na ja ra gaṇehi ca ekagarunā ca tīhi yatīhi ca dasahi yatīhi ca racitattā terasakkhara saṃyuttā pahasiṇīgāthāti daṭṭhabbā. Vuttañhetam **vuttodaye** ‘‘mnā jarā go tidasayatippahassiṇī sā’’ti.

Tassattho. Yassaṃ paṭipādaṃ mnā magaṇa nagaṇā ca jarā ja gaṇa ragaṇā ca go garu ca tidasayati tiyati ca dasayati ca ce siyā, sā gāthā pahasiṇīgāthā nāmāti. Tattha sumati yo buddho dhammaṃ devānaṃ adesīti sambandho. **Yoti** aniyamavācakasabbanāmapadaṃ. Tassa vacanattho na kātabbo. Vuttañhi **saddavidūhi** –

‘‘Ruḷhīkhyātam nipātañcu, pasaggālapanam tathā;
Sabbanāmanti etesu, na kato viggaḥo chasū’’ti.

Atha vā sabbanāmabhāvaṃ yātīti yo, aniyamavācaka bhāvaṃ yātīti vā yo. Sabbanāmabhāvena yāti pavattatīti vā yo. Aniyamavācakabhāvena yāti pavattatīti vā yo. Sabbanāmabhāvena yātabbo ñātābboti vā yo, yātabbo ñātābbo etena aniyamatthoti vā yo. Sabbanāmasaṅkhātam yaitipadaṃ labbhati. Yo yādī soti attho. **Buddhoti** paṭividdhacatusaccadhammo, paṭividdhasabbaññeyyadhammo vā. Tassa pana vacanattho heṭṭhā vuttoyeva. **Sumatīti** sundarasabbaññutaññāvato, desanāññāvato vā. Adesi dhammaṃ devānanti vuccamānattā hi idha sabbaññuta ñāṇam sumatīti vuccati. Manati jānāti sabbaññeyyadhammaṃ desetabbadhammaṃ vāti mati. Manadhātu ñāṇeti. Sundarā mati sumati, sabbaññeyyadhammānaṃ yathāsabhāvajānanasamatthaṃ tesam dese tabbappakārajānanasamatthaṃ bodhetabbapuggalānaṃ āsayādhi muttiyādivibhāvanasamatthañcāti tisamatthasampannaṃ sabbaññutaññāṇam labbhati. Sumatīti iminā hi sabbaññutaññāṇameva abhidhammakathāya samuṭṭhānabhāve samatthaṃ. Nāññanti imamattaṃ dīpento abhidhammakathāya anaññasādhāraṇabhāvaṃ dasseti. Sundarā mati assa asmiṃ vā atthīti sumati, buddho. Samāsanta taddhitāyaṃ. Tadassatthīti vī cāti sutte casaddena apaccayo. Yathā pītisukhanti. Vuttañhi **pārājikaṇḍaṭṭhakathāyaṃ** ‘‘ayañca pīti idañca sukhaṃ assa jhānassa asmiṃ vā jhāne atthīti idaṃ jhānaṃ pītisukhanti vuccatī’’ti.

Diveti divase. Sūriyobhāsenā dibbati etthāti divo. Divudhātu jutiyam a. Tasmim dive. **Divā karovāti** sūriyo iva. Divādīnaṃ karotīti divākaro, sūriyo. Divāsaddūpa pada karadhātu karaṇe a. Atha vā divā divase karo raṃsi assāti divākaro. Karasaddo hi raṃsivācako. **Sobhantoti** virocāmāno hutvā. Subhati virocati chabbaṇṇaraṃsiādīhīti sobhanto, buddho. Subhadhātu sobhe, dittiyaṃ vā antapaccayo. Bhagavā hi chabbaṇṇaraṃsīhi dvattiṃsamahāpurisalakkhaṇehi ca devānaṃ majjhe sobhati virocātīti attho. **Ratijananti** devānaṃ

atappakapītisomanassuppādane, pemuppādane vā. Ramanam rati. Ramudhātu kīlāyanti. Tam janeti uppādetīti ratijananam. Silāsanam. Ratisaddūpapada janadhātu janane yu. Tasmim ratijanane.

Silāsanamhīti tidasālaye, pāricchattakamūle jāte nikkhitte vā dīghato saṭṭhiyojane vitthārato paṇṇāsa yojane puthulato pannarasayojane vaṇṇato jayasumanapupphasadise rattakampalavaṇṇe vā saṅhasukhume paṇḍukampa lanāmake silāsane. Sakkena sevyatīti silam. Pāsāṇo. Sidhātu sevāyam alapaccayo. Āsiyati etthāti āsanam. Atha vā āgantvā sevyati etthāti āsanam. Āpubbasidhātu sevāyam yu. Silameva āsanam silāsanam. Paṇḍukampalasilāsanam labbhati. Tasmim silāsanamhi. **Āsīnoti** dasahi cakkavālasahashehi āgamma sannisinnānam devānam gaṇena parivārīto hutvā nisīdanto. Āsīdanam nisajjanam āsīno. Āsamantato sīdati vasatīti vā āsīno. Abhidhammakathābhimukham sīdati nisajjatīti vā āsīno, buddho. Āpubbasīdadhātu nisajjāyam. Visaraṇa gatyāvasānesu vā tapaccayo. Tassa īṇādeso, ṇassanattam, dhātvantalopo. **Sivasukhadanti** nibbānasukhadāyakam. Ariyehi sevyatīti sivaṃ, nibbānam. Sidhātu sevāyam avo. Atha vā rāgaggiādīhi samatī upasamatī etthāti sivaṃ, nibbānam. Samudhātu upasame rivo. **Abhidhānappadīpikāyāyam** pana “sivaṃ khemabhāvaṃ karotīti sivaṃ, saṃsārabhīrukehi sevītabbattā vā sivaṃ. Yadādinā vapaccayo”ti vuttam. Sukhayatīti sukham. Yassuppajjati, tam sukhitam karotīti attho. Atha vā suṭṭhu dukkham khanatīti sukham. Supubba khanudhātu avadāraṇe kvi. Sivassa nibbānassa sukham sivasukham, tam dadātīti sivasukhadam, abhidhammadhammo. Sivasukhasaddūpapadadhātu a. Yo hi abhidhammadhammam suṇāti, so tassa nibbānasukham dadātīti attho.

Adesi dhammam devānanti devānam dhammam adesīti sambandho. Ettha ca **dhammanti** nānāyavicittam gambhīram saṅhasukhumam duddasam abhidhamma dhammam. Attano sabhāvaṃ dhāretīti dhammo, paṇḍitehi dhāriyati na bālehīti vā dhammo, abhidhammapīṭakam. Dharadhātu dhāraṇe rammaṇapaccayo. Tam dhammam. **Devānanti** pubbe manussaloke mātubhūta devaputtamukhānam upapattidevānam. Vuttañhetam **aṭṭhasālinīaṭṭhakathāyam** –

“Mātaram pamukham katvā, tassā paññāya tejasā;
Abhidhammakathāmaggaṃ, devānam sampavattayī”ti.

Ettha ca mātarantipadassa pubbe manussaloke mātubhūtam devaputtanti attho daṭṭhabbo. Vuttañhetam **jinālaṅkārapāliyam** –

“Tato puttam gahetvāna, gatā mātā sakaṃ gharam;
Sattamiyam cutā gantvā, devaputtattamāgamī”ti.

Taṭṭikāyaṅca “bodhisattamātā gabbhavuṭṭhānato sattame divase kālaṅkatvā tusitapure devaputto hutvā nibbattī”ti vuttam. Ettha ca devaputtasaddena vuttameva. **Kāḷudāyī theragāthāaṭṭhakathāyaṅca** “parivārītati ca itthilinganiddeso purimattabhāvasiddham itthibhāvaṃ devatābhāvaṃ vā sandhāya kato. Devūpapatti pana purisabhāvena jātā”ti vuttam. **Jātakaṭṭikāyaṅca** “devorohaneti mātudevaputtassa temāsam abhidhammapīṭakam desetvā devorohanakāle”ti mātudevaputtasaddena vuttam. **Abhidhammāvatāraṭṭikāyaṅca** “devānanti tadā dhammapaṭṭigāhakānam dasasahassacakkavāḷadhivāsīnam mātudevaputtappamukhānam upapattidevāna”nti mātudevaputta saddena vuttam. **Sirīmahāmāyāsatthe** ca “sirīmahāmāyā devīpi sattadivaseyeva vasitvā kālaṅkatvā attano puññānubhāvena tusitabhavane devaputto hutvā nibbattī”ti devaputtasaddena vuttam. **Maṇḍipāṭikāyaṅca** “mātaranti pubbe manussaloke mātubhūtam devaputtanti attho. Sirīmahāmāyā hi bodhisattam vijāyitvā sattāhamattam ṭhatvā ito cavitvā tusitabhavane purisabhāveneva nibbato, na itthibhāvenā”ti vuttam. Tasmā mātarantipadassa mātubhūtam devaputtanti attho mukhyena daṭṭhabbo.

Madhusārattha dīpanīṭikāyam pana –
“Suddhodano nāma pitā mahesino,
Buddhassa mātā pana māyā nāma.

Bodhisattam parihariya kucchinā,
Kāyassa bheda tidivasmim modati;

Sā gotamī kālaṃkatā ito cutā,
 Dibbehi kāmehi samaṅgibhūtā;
 Āmodati kāmagaṇehi pañcahi,
 Parivāritā devagaṇehi tehi’'ti; **Therāpāli;**

Tadaṭṭhakathāyaṃ ‘‘parivāritāti ca itthilinganiddeso purimatta bhāvasiddhaṃ itthibhāvaṃ devatābhāvaṃ vā sandhāya kato. Devūpapatti pana purisabhāvena jātāti vuttattā mātaranti manussatthabhāvavasena vutta’’nti vadanti. Therāṭṭhakathā pana nasaṅgahāruḷhā. Aññāṭṭhakathāṭṭhikāsu ca tādisaṃ vacanaṃ natthi. Patthanākāle ca buddhamātā hutvā pacchā puriso homīti patthanā natthi. Tiṃsadammatāyañca buddhamātuyā purisabhāvo nāma natthi. Tasmā taṃ vīmaṃsitabbantipi vidū vadantīti vuttaṃ. Taṃ pana na gahetabbaṃ. Kasmā, saṃsayavacanena vīmaṃsitabbanti vidūvadantīti ca vuttattā ca yathāvuttatṭhakathāṭṭhikāvacanehi ujukaṃ viruddhattā ca. Devatāsaddo hi devaputte brahme devadhītāya ca vattati. Tathāhesa ‘‘atha kho aññatarā devatā abhikkantāya rattiyā abhikkantavaṇṇā’’tiādīsu devaputte. Vuttañhi **khuddakapāṭṭhakathāyaṃ** ‘‘aññatarāti aniyamita niddeso. Sā hi nāmagottato apākaṭā. Tasmā aññatarāti vuttā. Devoyeva devatā. Itthipurisasādhāraṇamevetam. Idha pana purisoeva. So devaputto. Kintusādhāraṇanāmavasena devatāti vutto’’ti. **Sunītattheraapadāna pāliyaṃ** āgatāsu ‘‘tathā tā devatā sattasatā uḷārā brahmā vimānā abhinikkhamitvā’’tiādīsu brahme. **Padīpavimānavatthupāliyaṃ** vuttāsu –

‘‘Abhikkantena vaṇṇena, yā tvaṃ tiṭṭhati devate;
 Obhāsenti disā sabbā, osadhī viya tārakā’’ti.

Ādīsu devadhītāya. Evaṃ pana parivāritāsaddopi veditabbo. Tasmā ācariyadhammapālatherena katāya therāṭṭhakathāya vuttavacanaṃ jātaṭṭhikāya vuttavacanañca ācariyasumaṅgalattherena katāya abhidhammāvātāṭṭhikāya vuttavacanaṃ pamāṇaṃ katvā mātudevaputtoti atthoyeva daṭṭhabbo. Etarahi pana keci ācariyā therāpāliyaṃ āgataṃ parivāritāsaddaṅgaṃ madhusāratthadīpanīṭṭhikāvacanāñca paṭicca mātudevadhītāti vadanti. Taṃ pana tesam matimattanti daṭṭhabbaṃ. **Adesīti** mahākaraṇāpubbaṅgamaṇa sabbāññutaññena kathesi. Asadisam tanti sambandho. Ettha ca **tanti** buddhaṃ. **Asadisanti** appaṭipuggalaṃ. Natthi etassa sadiso paṭipuggaloti asadiso, buddho. Sadevake loke silādiguṇena buddhena sadiso koci puggalo natthīti attho. Tenāha **vinayamahāvaggapāliyaṃ** –

‘‘Na me ācariyo atthi, sadiso me na vijjati;
 Sadevakasmiṃ lokasmiṃ, natthi me paṭipuggalo’’ti.

Niccantisatataṃ samitaṃ, sabbakālaṃ nirantaranti attho. Asadisam taṃ buddhaṃ niccaṃ namāmīti sambandhoti.

Ayaṃ panettha **saṅkhepayojanā**. Sumati sundarasabbaññutaññavāto, desanāññavāto vā. Yo yādiso buddho. Dive divase divākarova sūriyoiva, sobhanto virocamaṇo hutvā, ratijanane devānaṃ atappakapīti somanassuppādane, pemuppādane vā, silāsanamhi paṇḍu kampalanāmake silāsane, āsīno nisīdanto hutvā sivasukhadaṃ nibbānasukhadāyakaṃ, dhammaṃ abhidhammadhammaṃ, devānaṃ mātu pubbadevaputtappamukhānaṃ upapattidevānaṃ adesi kathesi. Asadisam appaṭipuggalaṃ taṃ buddhaṃ ahaṃ niccaṃ satataṃ namāmi vandāmīti.

Terasamavandanagāthāvaṇṇanā samattā.

14. Yo pādapaṅkajamuduttalarājikehi,
 Lokehi tīhivikalehi nirākulehi;
 Sampāpuṇe nirupameyyatameva nātho,
 Taṃ sabbalokamahitaṃ asamaṃ namāmi.

14. Evaṃ terasamaḡāthāya buddhaṃ vanditvā idāni buddhassa pādātale vicittappavattehi aṭṭhasatacakkalakkhaṇehi thomitvā vanditukāmo **yo pādapaṅkajatyādigāthamāha**. Ayaṃ pana ta bha ja ja gaṇehi ca garudvayena racitattā cuddasakkharehi yuttā vasantatilakāgāthāti daṭṭhabbā.

Vuttañhetam **vuttodaye** ‘‘vuttā vasantatilakā ta bha jā jagā go’’ti. Tassāyamattho. Yassam paṭipādam ta bha jā ta bha ja gaṇā ca jagā jagaṇagarukā ca go garu ca ce bhavanti, sā gāthā vasantatilakāgāthāti chandācariyehi vuttāti.

Tattha pana yo nātho avikalehi nirākulehi pādapaṅkajamuduttalehitīhi lokehi nirupameyyatam sampāpuṇeeva sabbalokamahitam asamam tam nātham aham namāmīti sambandho. Ettha pana saddakkamena adassetvā atthakkamena vaṇṇanam dassayissāma. **Yo nāthoti** yo yādiso sabbasattānam paṭisaraṇo buddho. Tam pana padam sampāpuṇeevātīpade kattubhāvena sambandhitabbam. Nāthassa pana vacanattho heṭṭhā vuttoyeva. **Avikalehīti** kenaci avekallehi sabbapādacakkalakkhaṇehi sampuṇṇehīti attho. Virūpam kalati gacchatīti vikalo. Vipubbakaladhātu gatiyam a. Natthi kiñci vikalam etissā rājīyāti avikalā, pādarāji. Pādadvaye paribiyattam saṅghānarūpam kiñci vikalam natthīti attho. Tehi avikalehi.

Nirākulehīti ākulavirahitehi. Pādacakkalakkhaṇānam aññamaññam asaṃmissehi asaṃsatṭhehīti attho. Ābhuso kulati bandhatīti ākulam, āpubba kuladhātu bandhane a. Atha vā ābhuso kulati āvarati sobhananti ākulam, natthi ākulam aññamaññamissam etissā pādarāji yāti nirākulā, pādarāji. Tehi nirākulehi. Tam pana padadvayam pādapaṅkajamuduttalarājīkehītipade visesanam.

Pādapaṅkajamuduttalarājīkehīti pādasāṅkhātapadumassa saṅha tale jātehi aṭṭhasatacakkalakkhaṇarājīkehīti padati gacchati etenāti pādo. Padadhātu gatimhiṇa. Paṅke kaddame jātanti paṅkajam, padumam. Pādasāṅkhātam paṅkajam pādapaṅkajam. Paṅkajamiva pādo vā pādapaṅkajam, pādo. Saṅghabhāvena mudati pavattatīti mudu, mudadhātu gatiyam u. Talati patiṭṭhati etthāti talam. Taladhātu patiṭṭhāyam a. Mudu ca tam talañcāti muduttalam, pādapaṅkajassa muduttalam pādapaṅkajamuduttalam, rājati dissatīti rājikā, rājati sobhati etenāti rājikā. Rājadhātu sobhane ñiko. Pādapaṅkaja muduttale jātam aṭṭhasatacakkalakkhaṇasaṅkhātam rājikanti pādapaṅkajamuduttalarājīkam, tehi.

Tam pana aṭṭhasatapādacakkalakkhaṇam nāmevam veditabbam. Bhagavato pādapaṅkajamudutalassa majjhe nābhi dissati. Nābhīpaṭicchinnā vaṭṭalekhā dissati. Nābhīmukhaparikkhepaṭṭo dissati. Panāḷimukham dissati. Arā dissanti. Aresu vaṭṭalekhā dissanti. Nemi dissati. Nemimaṇikā dissanti. Idam tāva pāliāgatameva. Sampahulavāro pana anāgato, so evam daṭṭhabbo. Satti, sirīvaccho, nandiyāvaṭṭam, sovattiko, vaṭṭamsako, vaḍḍhamānakam, macchayugalam, bhaddapīṭham, aṅkusam, tomaro, pāsādo, toraṇam, setacchattam, khaggo, tālavaṇḍam, morahatthako, vāḷabījani, uṇhīsam, patto, maṇikusumadāmam, nīluppalam, rattuppalam, setuppalam, padumam, puṇḍarikam, puṇṇaghaṭo, puṇṇapāti, samuddo, cakkavālam, himavā, sineru, candimasūriyā, nakkhattāni, cattāro mahādīpā, dveparittadīpasahassāni antamaso cakkavatti rañño parisam upādāya sabbo cakkalakkhaṇasseva parivāroti ettakameva **majjhimapaṇṇāsattakathāyam** vuttanti veditabbam.

Jinālaṅkāraṭīkāyam pana ‘‘heṭṭhāpādātalesu cakkāni jātānīti cakkalakkhaṇam nāma dvīsu pādātalesu dve cakkāni ekekasmim sahasamattā arā yuttā honti. Nemivalayam suvaṇṇavaṇṇam. Nābhi indanīlamanīvaṇṇā. Tasmim majjhe ca nābhīpariyante ca nābhīmukhe ca vaṭṭalekhā majjhe chiddam cakkapariyante nemito bahiddhā vaṭṭe. Satti, sirīvaccho, nandiyāvaṭṭam, sovattiko, vaṭṭamsakam, vaḍḍhamānakam, bhaddapīṭham, aṅkuso, pāsādam, toraṇam, setacchattam, khaggam, tālavaṇḍam, mayūrahattham, cāmaram, uṇhīsam, pattam, maṇi, sumanadāmam, nīluppalam, rattuppalam, rattapadumam, setapadumam, puṇḍarikam, puṇṇakalasaṃ, puṇṇapattam, samuddo, cakkavālapabbato, himavantapabbato, merupabbato, sūriyamaṇḍalam, candamaṇḍalam, nakkhattam, saparivārā catumahādīpā, saparivāro sattaratanasamaṅgī cakkavatti, dakkhiṇāvāṭṭa setasaṅkhā, suvaṇṇamacchayugalam, cakkāvudham, sattamahāgaṅgā, sattaikulapabbatā, sattaśīdantasāgarā, suvaṇṇa haṃsarājā, saṃsumāro, dhajapaṭāko, suvaṇṇasivikā, suvaṇṇavāḷabījani, kelāsapabbato, sīharājā, byaggharājā, valāhakaassarājā, uposathachaddantahatthirājā, vāsukīnāgarājā, haṃsarājā, usabharājā, erāvaṇa hatthirājā, suvaṇṇamakaram, catumukhasuvaṇṇanāvā, savacchakā dhenu, kimpuriso, kinnarī, karavīko, mayūrarājā, koñcarājā, cakkavākarājā, jīvañjīvakarājā cha devalokā, soḷasa brahmalokāti ime ettakā aggamaṅgalalakkhaṇā pādātalesu paññāyanti’’ti vuttam. Iminā ca vacanena aṭṭhasata pādacakkalakkhaṇam paripuṇṇam veditabbanti.

Tīhi lokehīti sambandho. Tīhi kāmarūpārūpa lokehīti attho. Tassa pana vacanattho heṭṭhā vuttoyeva. Taṃ panetaṃ katvatthe karaṇavacanaṃ. Tassa pana padassa nirupameyyāti padena kattubhāvena sambandho. **Nirupameyyatanti** appameyyabhāvaṃ. Upamitabbanti upameyyaṃ. Upapubba mādhatu pamāne ñyo. Upameyyassa bhāvo upameyyataṃ. Natthi upameyyataṃ assa rājikassāti nirupameyyataṃ. Atha vā natthi upameyyaṃ etassa rājikassāti nirupameyyo, pādacakkalakkhaṇarājiko labbhati. Tassa bhāvo nirupameyyataṃ. Taṃ pana padaṃ sampāpuṇe evātipade kammaṃ. Sampāpuṇeevāti sambandho. Sammā gacchatievāti attho. Kasmā pana tīhi lokehi pādapaṅkajamudutalehi nirupameyyataṃ pāpuṇātīti. Buddhato aññassa kassaci devamanussassa pādalamajjhe pādacakkalakkhaṇassa abhāvato. Bhagavato hi pādapaṅkajamudutale pāramipuṇṇānubhāvena nibbattāni aṭṭhasatapādacakkalakkhaṇāni sampāpuṇanti, na aññesaṃ. Tasmā nirupameyyataṃ pāpuṇātīti.

Sabbalokamahitanti sabbalokena pūjitaṃ. Sabbena devamanussalokena mahitabbo pūjitabboti sabbaloka mahito, nātho labbhati. Taṃ. Uppanne hi tathāgate ye keci mahesakkhā devamanussā buddhassa pūjenti, pageva aññā. Tathā hi brahmā sahampati sinerumattena ratana dāmena tathāgataṃ pūjeti. Yathābalañca aññepi devā manussā ca bimbisāraḥkosalarājādayo nibbutampi bhagavantaṃ uddissa channavutikoṭidhanaṃ vissajjetvā asoka mahārājā sakalajambudīpe caturāsītivihārasahassāni patiṭṭhāpeti. Kā kathā pana aññesaṃ pūjāti vuttaṃ hoti.

Asamanti sabbamanussadevabrahmehi asadisāṃ. Appaṭipuggalanti attho. Natthi samo sadiso puggalo assāti asamo, nātho. So pana asītianubyañjanapaṭimaṇḍita dvattiṃsa mahāpurisalakkhaṇa vicitrarūpakāyo. Sabbākāra parisuddha sīlakkhandhādiguṇaratanasamiddhadhammakāyo. Puṇṇamahatta thāmamahattaiddhimahatta yasamahatta paññāmahattānaṃ paramukkaṃsa gato ca hoti, tasmā tathāgatena samo sadiso nāma natthīti attho. Taṃ asamaṃ. **Tanti** nāthaṃ ahaṃ namāmīti sambandho.

Ayaṃ panettha **saṅkhepayojanā**. Yo nātho yo yādiso sabbasattānaṃ paṭisaraṇo buddho, avikalehi kehici avekallehi, nirākulehi ākulavirahitehi, pādapaṅkaja muduttalarājikehi pādasaṅkhātapadumassa saṅhatale jātehi aṭṭhasatacakkalakkhaṇarājikehi, tīhi lokehi kattubhūtehi, nirupameyyataṃ appameyyabhāvaṃ appamitabba bhāvaṃ vā, sampāpuṇeeva sammā gacchatieva, sabbalokamahitaṃ sabbalokena pūjitaṃ, asamaṃ sabbamanussadevabrahmehi asadisāṃ taṃ nāthaṃ ahaṃ namāmīti.

Cuddasamavandanagāthāvaṇṇanā samattā.

15. Buddhaṃ narānarasamosaraṇaṃ dhitattaṃ,
Paññāpadīpajutiyā vihatandhakāraṃ;
Atthābhikāmanaradevahitāvahaṃ taṃ,
Vandāmi kārūṇikamaggamanantaññaṃ.

15. Evaṃ cuddasamagāthāya nāthaṃ natvā idāni narānaraṣa mosaraṇantyādīhi sattahi guṇehi thomitvā buddhaṃ vanditu kāmo **buddhaṃ narānarasamosaraṇantyādīgāthamāha**. Ayaṃ pana tabhajajagaṇehi garudvayena ca racitattā cuddasakkharehi yuttā vasantatilakāgāthāti daṭṭhabbā. Sādhakaṃ panettha heṭṭhā vuttameva.

Tattha pana **narānarasamosaraṇanti** ettha naraanarasamaṃ osaraṇanti padavibhāgo. Manussadevānaṃ samaṃ osaraṇaṃ sannipatitaṭṭhānanti attho. Narānarasaddassa vacanattho heṭṭhā vuttoyeva. Samaṃ avasaranti sannipatanti etthāti samosaraṇo, buddho. Samaavapubba saradhātu gatiyaṃ yu. Narānaraṇaṃ manussadevānaṃ samosaraṇo narānarasamosaraṇo, buddho. Yathā hi mahānigrodho phalakāmānaṃ sakuṇa samūhānaṃ samosaraṇaṃ hoti, evaṃ buddho lokiya lokuttarasampattikāmānaṃ manussadevānaṃ samosaraṇo sannipatito paṭisaraṇo vā hoti. Tasmā narānarasamosaraṇanti thometi.

Dhitattanti samāhitacittaṃ. Ettha attasaddo attasammā paṇidhi cātiādīsu attasaddo viya cittavācako daṭṭhabbo. Dhiyati ṭhapiyati ettha etena vā ekārammaṇe sampayutta dhammāti dhito,

samādhi. Dhādhātu patitṭhāyaṃ ta. Ārammaṇaṃ adati ādadātīti attamaṃ, cittaṃ. Adadhātu ādāne ta. Dhitamaṃ samāhitamaṃ attamaṃ cittaṃ yassāti dhitatto, buddho. Taṃ dhitattamaṃ.

Paññāpadīpajutiyā arahattamaggañāṇasankhātapadīpobhāsenā karaṇabhūtenā. Pajānātīti paññā, arahattamagga ñāṇaṃ. Yathāsabhāvaṃ sabbappakārehi catusaccadhammaṃ paṭivijjhatīti attho. Paññāva ñeyyāvaraṇappahānato sabbapakārehi dhammasabhāvaṃ dīpetīti paññāpadīpo. Jotetīti juti, paññāpadīpobhāso. Judhātu dittiyaṃ. Paññā padīpoeva juti paññāpadīpajuti. Atha vā paññāpadīpassa juti paññāpadīpajuti, ayaṃ pana samāso abhedabhedū pacārena daṭṭhabbo. Tāya paññāpadīpajutiyā.

Vihatandhakāranti hanitabbaavijjāsankhātamo hatamaṃ. Savāsanakilesappahānato visesena hanitabboti vihato. Vipubbahanadhātu himsāyaṃ ta. Andhaṃ tamaṃ karotīti andhakāro, avijjāsankhātamo ho. Visayasabhāvapaṭicchādanato andhakārasarikkhakatāya moho andhakāroti vuccati. Atha vā andhaṃ paññācakkhuandhaṃ karotīti andhakāro, moho. Andhasaddūpapada karadhātu ṇa. Vihato andhakāro yena soti vihatandhakāro, buddho. Taṃ vihatandhakāraṃ. Yathā hi loke padīpo attano jutiyā andhakāraṃ hanati, evaṃ buddhassa arahattamaggapaññāpi avijjandhakāraṃ hanatīti vuttā. Ayaṃ pana hīnūpamāti vuccati. Paññāvato hi ekapallaṅkenapi nisinnassa dasasahassi lokadhātu ekapajjotā hoti. Vuttañhetamaṃ bhagavatā ‘‘cattārome bhikkhave pajjotā. Katame cattāro. Candapajjoto, sūriyapajjoto, aggipajjoto, paññā pajjoto. Ime kho bhikkhave cattāro pajjotā. Etadaggaṃ bhikkhave imesaṃ catunnaṃ pajjotānaṃ yadidaṃ paññā pajjoto’’ti.

Paññāpadīpajutiyā vihatandhakāranti ettha pana paññāpadīpa jutiyātiiminā buddhassa arahattamaggañāṇaṃ mukhyena dasseti. Taṃ dassanena pāramīñāṇaṃ vipassanāñāṇaṃ heṭṭhimamaggaṃ phalaṃ phalūpacārena dīpeti. Taddīpakena avijjandhakārappahānaṃ paṭhamakāraṇūpacārena pakāseti. Tappakāsanena arahatta phalañāṇalabhanamaṃ dutiyakāraṇūpacārena vibhāveti. Taṃ vibhāvanena sabbāññūtaññādisabbabuddhaguṇalabhanamaṃ tatiya kāraṇūpacārena ānubhāveti.

Nanu ca sabbesampi khīṇāsavānaṃ paññāpadīpajutiyā vihatandhakāratā sambhavati, atha kasmā aññāsādhāraṇāvisesa guṇena buddhassa thomaṇā katāti. Savāsanappahānena anaññāsādhāraṇāvisesatāya sambhavato. Sabbesampi hi khīṇāsavānaṃ satipi paññāpadīpajutiyā vihatandhakāratte ariyasāvaka paccekabuddhānaṃ savāsanāya kilesappahānaṃ na vijjati. Sammāsambuddhānaṃyeva savāsanappahānena kilesappahānassa viseso vijjatīti sātisayavasena avijjandhakārappahānena bhagavantaṃyeva paññāpadīpajutiyā vihatandhakāranti thometīti.

Atthābhikāmaṃ sattalokassa lokiyalokuttara sankhātaṃ payojanaṃ ativiya icchantamaṃ. Kāraṇānurūpaṃ asati bhavatīti atthamaṃ, phalaṃ. Asadhātu bhuvīmhi tha. Taṃ abhiatirekaṃ kāmeti icchatīti atthābhikāmo, buddho. Atthasaddūpapada abhipubbakamudhātu icchāyaṃ ṇa. Taṃ atthābhikāmaṃ. **Naradevahitāvahaṃ** manussadevānaṃ hitamaṃ dhāraṃ. Hitamaṃ narati netīti nara, manusso. Atha vā nariyati sakena kammaṇa niyyatīti nara, manusso. Naradhātu nayane a. Vuttañhi ‘‘kammaṇa niyyati loko’’ti. Kāmaguṇa jhānābhīññacittissariyādīhi dibbanti kīṭantīti devā, tesu vā viharantīti devā, divudhātu kīṭādīsu ṇa. Narā ca devā ca naradevā. Hinoti vaḍḍhatīti hitamaṃ, phalaṃ. Hidhātu vaḍḍhane ta. Naradevānaṃ hitamaṃ naradevahitamaṃ, taṃ āvhatīti naradevahitāvaho, buddho. Naradevahitasaddūpapadaāpubba vahadhātu haraṇe ṇa. Buddho hi sabbadevamanussānaṃ lokiyalokuttarasampattiattamaṃ dhammadeśanāya dhāretīti vuttamaṃ hoti, taṃ naradevahitāvahaṃ. **Kāruṇikamaggamananta ñāṇanti** ettha kāruṇikaṃ aggaṃ anantañāṇantipadacchedo. Tattha kāruṇikanti sabbasattesu mahākāruṇāya yuttamaṃ, mahākāruṇavantaṃ vā. Kiratīti karuṇā. Kiradhātu apanayane uṇapaccayo. Paradukkamaṃ vikkipati apanetīti attho.

Atha vā kinātīti karuṇā. Kidhātu himsāyaṃ ruṇapaccayo. Paradukkhe sati kāruṇikaṃ himsati vibādhatīti attho. Paradukkhe sati sādhuṇaṃ hadayakampanamaṃ karotīti vā karuṇā. Karadhātu uṇapaccayo. Atha vā kaṃ vuccati sukhaṃ, taṃ rundhatīti karuṇā. Kaṃsaddūpapada rudhidhātu āvaraṇe yupaccayo. Esā hi paradukkāpanayanakāmatā lakkhaṇā. Attasukhanirapekkhatāya kāruṇikānaṃ sukhaṃ rundhati vibādhatīti attho. Karuṇāya mahākāruṇāya yutto kāruṇiko. Karuṇā assa atthīti vā kāruṇiko, buddho. Taṃ kāruṇitamaṃ. **Aggaṃ** jātīpuñña guṇamahattabhāvena

sabbasattuttamaṃ seṭṭhabhāvaṃ ajati gacchatīti aggo, buddho. Ajadhātu gatiyaṃ a. Jassa go. Buddho hi asambhinnakhattiyavaṃse jātattā jātivasena ca pūritapāramīpuññattā puññavasena ca aparimitanirupamasīlādi guṇavisesena samannāgatattā guṇavasena ca anantalokadhātūsu sabbasattuttamabhāvaṃ gacchatīti aggo. Nibbānaṃ ajati gacchatīti vā aggo. Atha vā ajeti khepeti kileseti aggo, buddho. Ajadhātu khepane a. Taṃ aggaṃ. **Anantañāṇanti** gaṇavasena ca sabhāvavasena ca visayavasena ca antivirahitañāṇaṃ. Kenaci puggalena ñāṇena anantaṃ aparicchinnaṃ, sabbaññutañāṇavantaṃ vā. Natthi antaṃ yassāti anantaṃ, ñāṇaṃ. Sabbañeyyadhammaṃ jānātīti ñāṇaṃ, sabbaññutañāṇaṃ. Anantaṃ ñāṇaṃ yassa soti anantañāṇo, buddho. Buddhassa hi ñāṇaṃ koci manusso vā devo vā brahmā vā ettakanti paricchindituṃ na sakkoti, tasmā anantaṃ aparimāṇaṃ hotīti vuttaṃ hoti.

Vuttañhettaṃ **sāriputtatheraapadāne** –

“Sakkā samudde udakaṃ, pametuṃ alhakena vā;
Natveva tava sabbaññu, ñāṇaṃ sakkā pametave”’ti.

Kāruṇikamaggamanantañāṇanti ettha ca karuṇaggahaṇena sammāsambodhiyā mūlaṃ dasseti, mahākaruṇāsañcoditamānaso hi bhagavā saṃsārapaṅkato sattānaṃ samuddharaṇatthaṃ dīpaṅkarapādamaṃle katābhinihāro kappasatasahassādhikāni cattāri asaṅkhyeyyāni anupubbena pāramiyo pūretvā anuttaraṃ sammāsambodhiṃ adhigatoti karuṇā sammāsambodhiyā mūlanti. Agganti etena bhagavato aparimitanirupamasīlādiguṇasamaṅgītāya aparimāṇāsu lokadhātūsu aparimāṇānaṃ sattānaṃ uttamabhāvaṃ dasseti. Anantañāṇantietena sammāsambodhiṃ dasseti. Sabbaññutañāṇapadaṭṭhānañhi aggamaggañāṇaṃ, aggamaggañāṇapadaṭṭhānañca sabbaññutañāṇaṃ sammāsambodhīti vuccati. Tassa ca sāmattiyena catupaṭṭisambhidāñāṇaṃ catuvesārajjāñāṇaṃ chaasādhāraṇañāṇāni ca chaabhiññā aṭṭhasu parisāsu akampāna ñāṇāni dasabalañāṇāni soḷasañāṇacariyā ca catucattārīsañāṇavattūni sattaṣattatiñāṇavattūni cāti evamādīnaṃ anekesaṃ paññāpabhedānaṃ vasena ñāṇācāraṃ dasseti. Taṃ buddhaṃ ahaṃ vipassanna cetasā vandāmīti sambandhoti.

Ayaṃ panettha **saṅkhepayojanā**. Narānarasamosaraṇaṃ manussadevānaṃ samaṃ osaraṇaṃ sannipatitaṭṭhānaṃ, dhitattaṃ samāhitacittaṃ, paññāpadīpajutiyā arahattamaggañāṇasaṅkhāta padīpobhāseṇa karaṇabhūteṇa vihatandhakāraṃ hanītabba avijjāsaṅkhātamoḥatamaṃ, atthābhikāmaṃ sattaḷokassa lokiyalokuttaraṅkhatapayojanaṃ ativiya icchantaṃ, naradevahiṭāvahaṃ manussadevānaṃ hitaṃ dhāraṇaṃ, kāruṇikaṃ sabbasattesu mahākaruṇāya yuttaṃ mahākaruṇavantaṃ vā, aggaṃ jātipuññaguṇamahattabhāveṇa sabbasattuttamaṃ, ananta ñāṇaṃ gaṇavasena ca sabhāvavasena ca visayavasena ca antivirahitañāṇaṃ, anantaṃ sabbaññutañāṇavantaṃ vā taṃ buddhaṃ ahaṃ vipassanna cetasā vandāmīti.

Pannarasamavandanagāthāvaṇṇanā samattā.

16. Akhilaguṇanidhāno yo munindopagantvā,
Vanamisipatanavhaṃ saññātānaṃ nicketaṃ;
Tahimakusalachedaṃ dhammacakkaṃ pavatto,
Tamatulamabhikantaṃ vandaneyyaṃ namāmi.

16. Evaṃ pannarasamagāthāya buddhaṃ vanditvā idāni isipātana migadāye dhammacakkapavattanādiguṇehi thomitvā munindaṃ vanditu kāmo **akhilaguṇanidhāno** tyādigāthamāha. Ayaṃ pana nanamayayagaṇehi racitattā pannarasakkharehi yuttā mālinī gāthāti daṭṭhabbā. Vuttañhi **vuttodaye** “nanamayayayutāyaṃ mālinībhogisīhī”’ti. Tassattho. Yassaṃ paṭipādaṃ bhogisīhi aṭṭhasattayatīhi yuttā ca nanamayayayutā nanagaṇamagaṇa yayagaṇehi yuttā ca ce siyuṃ, ayaṃ gāthā mālinīgāthā nāmāti. Ettha ca bhogisīhīti bhogaisīhīti padacchedo. Bhogasaddo aṭṭhasaṅkhyā vācako. Isisaddo sattaṣaṅkhyāvācakoṭi daṭṭhabbo.

Tattha **akhilaguṇanidhānoti** sabbalokiyalokuttara saṅkhātānaṃ sīlasamādhīpaññādiguṇasamūhānaṃ patitṭhāno. Ettha ca akhīlasaddo anavasesavācako. Sabboti

attho. Vuttañhi **madhuṭikāyaṃ** ‘‘khilasaddo hettha avasesavācako’’ti. Na khilaṃ akhilaṃ. Atha vā na khīyatīti akhilaṃ, sabbaṃ. Napubbakhidhātu khaye lo. Guṇasaddassa vacanattho heṭṭhā vuttoyeva. Akhilāni sabbāni guṇāni akhilaguṇāni, tesam nidhāti tiṭṭhati etthāti akhilaguṇanidhāno, munindo labbhati. **Yoti** yo yādiso. **Munindopagantvāti** ettha munindo upagantvāti padacchedo. **Munindoti** agāriyamuni, anagāriyamuni, sekkhamuni, asekkhamuni, pacceka munivasena pañcannaṃ munīnaṃ indo issaroti attho. Tassa pana vacanattho heṭṭhā vuttoyeva. Akhilaguṇanidhāno yo munindo saññatānaṃ nicketaṃ isipatanaavhaṃ vanaṃ upagantvā tahiṃ akusalachedaṃ dhammacakkaṃ pavattoti sambandho.

Vanamisipatanavhanti vanaṃ isipatanaavhanti padacchedo. Ettha vananti migadāyavanaṃ. Tañhi vivekakāmehi vanitabbaṃ sambhajitabbaṃ etthāti vananti vuccati. Vanadhātu sambhattiyaṃ kvi. Isipatanavhanti isipatananāmikaṃ isīnaṃ patanaṭṭhānattā isipatananti voharitabbaṃ vā, sīlakkhandhādike esanti gavesantīti isi, paccekabuddhādayo. Isadhātu gavesane ipaccayo. Te patanti sannipatanti etthāti isipatanaṃ, vanaṃ. Isisaddūpapadapatadhātu gatiyaṃ yu. Atha vā isīnaṃ patanaṃ isipatanaṃ, vanaṃ. Avhetabbaṃ voharitabbanti avhaṃ. Āpubbavhedhātu avhayane kvi. Saṃyogaparattā ākāssa rassādeso. Isipatananti avhetabbanti isipatanavhaṃ, vanaṃ. **Saññatānanti** kāyavacīmanosaṃyamantānaṃ sādhuṇaṃ. Saṃyamantīti saññatā, paccekabuddhādayo sādhu. Saṃpubbayamudhātu uparame ta. Tesam saññatānaṃ. **Niketanti** vasanaṭṭhānaṃ, rammaṇaṭṭhānaṃ vā. Nikitati nivasatī rammati vā etthāti nicketaṃ, vanaṃ. Nīpubba kitadhātu nivāse ṇa. **Upagantvāti** gamitvā. **Tahinti** tasmīṃ isipatananāmake migadāyavane. **Akusalachedanti** akusalassa samucchedaṃ. Akusalaṃ chindati samucchindati etena suttenāti akusalachedaṃ, dhammacakka pavattanasuttaṃ. Akusalasaddūpapadachididhātu dvidhākaṇe ṇa.

Dhammacakkanti dhammacakkapavattanasuttaṃ. Ettha hi cakkasaddo sampattiyaṃ, lakkhaṇe, rathaṅge, iriyāpathe, dāne, ratana dhammakhuracakkādīsu ca dissati. Cattārimāni bhikkhave cakkāni, yehi samannāgatānaṃ devamanussānantiādīsu hi sampattiyaṃ dissati. Pādātalesu cakkāni jātanīti ettha lakkhaṇe. Cakkaṃva vahato padanti ettha rathaṅge. Catucakkaṃ navadvāranti ettha iriyāpathe. Dadaṃ bhuñja mā ca pamādo cakkaṃ vattaya sabbapaññanti ettha dāne. Dibbacakkaratanaṃ pāturahosīti ettha ratanacakke. Mayā pavattitaṃ cakkanti ettha dhammacakke. Icchāhatassa posassa cakkaṃ bhamati matthaketi ettha khuracakke. Khurapariyante cakkenti ettha paharaṇacakke. Asanivicakkanti ettha asanīmaṇḍale. Idha pañāyaṃ dhammacakke daṭṭhabbo. Tañhi satipaṭṭhānādiddhammaṃ cakketi pavatteti dhammacakkanti vuccati. Ariyasaccādidhammaṃ vā cakketi pavatteti cakkanti. Atha vā dhammato anapetattā dhammañca taṃ āñācakkāñcāti dhammacakkaṃ. Dhammena ñāyena cakkanti dhammacakkaṃ, tena vuttaṃ **paṭisambhidāyaṃ** ‘‘dhammacakkanti kenaṭṭhena dhammacakkaṃ. Dhammañca pavatteti cakkāñcāti dhammacakkaṃ, cakkāñca pavatteti dhammañcāti dhammacakkaṃ, dhammena pavatteti dhammacakkaṃ, dhammacariyāya pavatteti dhammacakkaṃ, dhamme ṭhito pavatteti dhammacakka’’ntiādi. Api ca dhammacakkanti paṭivedhaññānaṃpi desanāññānaṃpi. Tattha paṭivedhaññānaṃ nāma yena ñāṇena bodhipallaṅke nisīno cattāri saccāni soḷasahākārehi saṭṭhinayasahashehi paṭivijjhi. Desanāññānaṃ nāma yena ñāṇena tiparivaṭṭaṃ dvādasākāraṃ dhammacakkaṃ pavattesi. Ubhayampetaṃ dasabalassa ure jātaññānameva. Tesu pana dhammadesanāññānaṃ adhippettaṃ. Suttaṃ pana ṭhānūpacārena dhammacakkanti vuccati. **Pavattoti** pañcavaggiyānaṃ bhikkhūnaṃ dveme bhikkhave antā pabbajitena na sevitaḍḍhiādinā adesayi.

Tamatulamabhikantanti taṃ atulaṃ abhikantanti padacchedo. Ettha tanti munindaṃ. Atulanti sīlādīhi guṇehi kenaci asadisam. Natthi tulo sadiso puggalo etassāti atulo, munindo. Tassa hi aparimāṇāsu loka dhātūsu sīlādīhi guṇehi sadiso puggalo natthi. Asadisehi buddhehi samoti attho. **Abhikantanti** sabbadevamanussehi ativiya kantaṃ kamañīyaṃ sarīravaṇṇavantaṃ. Atirekaṃ tusitabbasarīravaṇṇasampannaṃ vā. Abhikkantavaṇṇanti hi vattabbe chandānurakkhaṇatthaṃ kakāralopañca vaṇṇapadalopaṃ katvā vuttasandhivasena abhikantanti vuttaṃ. Uttarapadalopa vasena vā. Munindassa pana sarīravaṇṇaṃ sabbadevamanussehi ativiya atirekaṃ vā kamiyati tosiyatīti abhikantanti vuccati. Abhipubbakamudhātu icchākantīsu ta. Abhikantaṃ vaṇṇaṃ sarīravaṇṇaṃ yassa soti abhikanto, munindo. Tassa hi dvattimsamahāpurisalakkhaṇehi ca asītyānubyañjana lakkhaṇehi ca chabbaṇṇaramsīhi ca suvaṇṇavaṇṇena ca samannā gatattā sarīrasobhaggappattito sabbadevamanussehi ativiya kamañīyo tuṭṭho sarīravaṇṇo atthīti abhikantanti

thometi. Taṃ abhikantaṃ. **Vandaneyyanti** devamanussānaṃ vandanārahaṃ. Tehi vanditabbaṃ vā, vandiyate thomiyate vā vandanāṃ. Bhāvasādhanoyaṃ. Vandadhātu vadidhātu vā abhivādanathutisu yu. Taṃ arahatīti vandaneyyo, munindo. Vandapadaṃ arahatitaddhite ñeyyo.

Atha vā devamanussehi vanditabbaṃ thomitabbanti vā vandaneyyo, munindo. So hi ādimajjhapariyosāna guṇehi samannāgatattā sabbadevamanussānaṃ vandanāraho tehi vā vanditabbo hoti. Tattha ca ādiguṇaṃ nāma karuṇānidānaṃ sīlaṃ pāṇātipātādiviratippavattito. Majjha guṇaṃ nāma samādhi jhānattayayogato. Pariyosānaguṇaṃ nāma paññā tato uttari karaṇīyābhāvatoti visesena bhagavato vandaneyyanti thometi. Ahaṃ tīhi dvārehi namāmi vandāmīti sambandho.

Ayaṃ panettha **saṅkhepayojanā**. Akhilanidhāno sabba lokiyalokuttarasaṅkhātānaṃ sīlasamādhipaññādiguṇa samūhānaṃ patiṭṭhāno yo yādiso munindo pañcannaṃ munīnaṃ indo issaro bhagavā, saññātānaṃ kāyavacīmanosaṃya mantānaṃ sādhuṇaṃ, nicketaṃ vasanaṭṭhānaṃ rammaṇaṭṭhānaṃ vā, isipatanavhaṃ isipatananāmikaṃ isipatananti voharitabbaṃ vā, vanaṃ migadāyavanaṃ, upagantvā gamitvā tahiṃ tasmim isipatananāmaka migadāya vane, akusalassa samucchedaṃ, dhammacakkaṃ dhammacakkappavattanasuttaṃ, pavatto pañcavaggiyānaṃ bhikkhūnaṃ adesayi, atulaṃ sīlādīhi guṇehi kenaci asadisāṃ, abhikantaṃ sabbadevamanussehi ativiya kantaṃ kamaṇīyaṃ tuṭṭhi sarīraṇṇavantaṃ, vandaneyyaṃ deva manussānaṃ vandanārahaṃ tehi vā vanditabbaṃ, taṃ munindaṃ ahaṃ tīhi dvārehi namāmi vandāmīti.

Soḷasamavandanagāthāvaṇṇanā samattā.

17. Suciparivāritaṃ surucirappabhāhi rattaṃ,
Sirivisarālayaṃ gupitamindriyehupetaṃ;
Ravisasimaṇḍalappabhutilakkhaṇopacittaṃ,
Suranarapūjitaṃ sugatamādaraṃ namāmi.

17. Evaṃ soḷasamaḡāthāya munindaṃ vanditvā idāni suciparivāritantyādīhi sattaḥi guṇehi thomitvā vanditukāmo **suciparivāritantyādīgāthamāha**. Ayaṃ pana na jabhajaragaṇehi ca ekagaruṇā ca racitattā soḷasakkharehi yuttāvāṇinīgāthāti daṭṭhabbā. Vuttañhi **vuttodaye** “najibhajarā yadā bhavati vāṇinī gayuttā”’ti. Tassattho. Yassaṃ paṭipādaṃ najabhajarā nagaṇa jagagaṇa bhagaṇa jagagaṇa ragaṇā yadā gayuttā pādantagaruṇā saṃyogā ce siyūṃ, tadā sā vuttā vāṇinī vāṇinīgāthā nāma bhavatīti.

Tattha **suciparivāritanti** rāḡādimalavisuddhāhi ariyasāvakaḡadiparisāhi parikkhāritaṃ kilesamalavisuddhaṃ parikkhāravantaṃ vā. Rāḡādimalahehi sucāti sujhatīti suci, parisā. Sucadhātu soceyye i. Parisamantato ariyabhikkhuādīhi deva manussehi vāriyatī parikkhāriyatīti parivāro, sugato. Paripubbavaradhātu āvaraṇe parikkhāre vā ṇa. Sucīhi parisāhi parivārito suciparivārito, sugato. Tatiya tappurisasamāsoyaṃ. Bhagavato hi sadā rāḡādimala visuddhehi ariyabhikkhuādīhi catūhi parisāhi aṭṭhahi parisāhi vā parivārito hotīti adhippāyo. Atha vā suciparisuddhaṃ parivāritaṃ yassa soti suciparivārito, sugato. **Surucirappabhāhīti** suṭṭhu kantitasarīranikkhanta byāmamattaraṃsīhi karaṇabhūtehi suṭṭhu ruciyati kamiyati tusiyatīti surucirā, raṃsi. Supubba rucadhātu rocane iro. Pakārena bhāti dibbatīti pabhā, raṃsi. Ppubba bhādhātu dibbane kvi. Surucirā ca sā pabhā cāti surucirappabhā, tāhi surucirappabhāhi. **Rattanti** niccaṃ rañjitaḡabbakāyaṃ. Rañjijyatīti rattaṃ, kāyo. Ranjadhātu rāge ta. Ratta kāyo yassa soti rattaṃ, sugato. Uttarapadalopasamā soyaṃ. Rūpassa bhavo rūpaṃ viya, taṃ rattaṃ. Bhagavato hi sarīrato niccaṃ nikkhantehi byāmamattaraṃsīhi rañjitaḡabbo rūpakāyo atthīti vuttaṃ hoti.

Sirivisarālayanti paññāpuññasaṅkhātālakkkhisamūhānaṃ patiṭṭhānaṃ. Ettha ca sirīti paññāpuññānametaṃ adhivacanaṃ. Atha vā puññānibbattā sarīrasobhaggādisampatti. Sā hi katapuññe siyati nissayati, katapuññehi vā siyati nissiyatīti sirīti vuccati, paññāpuññaṃ, issariyaṃ vā. Sarīrasobhaggādi sampatti vā labbhati. Vuttañhi **vimānavatthuaṭṭhakathādīsu** “sirīti buddhipuññānaṃ adhivacanaṃ ca. Sirīti issariyanti ca sirīti rūpakāyasampatti”’ti ca. Sidhātu sevāyaṃ, rapaccayo ca, itthilīṅgajotakaīpaccayo ca. Sirīti hi dīghavasena vattabbe gāthābandhattā chandānurakkhaṇatthaṃ rassavasena vuttaṃ. Visarālayanti visaraālayanti padacchedo. Visaroti

samūho. Visanti pavisanti avayavā yasmim samūheti visaro, samūho. Visadhātu pavesane arapaccayo. Atha vā visaranti samosaranti avayavā yasminti visaro. Vipubba saradhātu samosaraṇe a. Potthakesu pana visayāla yanti yakārena pāṭho dissati. Na so yujjati. Kasmā, visarasaddasseva samūhavācakattā. Vuttañhi **abhidhānappa dīpikāyaṃ** –

“Samūho gaṇasaṅghātā,
Samudāyo ca sañcayo;
Sandoho nivaho oggho,
Visaro nikaro cayo” tyādi.

Ālayanti patiṭṭhānaṃ. Ālayanti patiṭṭhanti etthāti ālayo, sugato. Āpubba lidhātu alliyane ṇa. Sirīnaṃ paññāsāṅkhātalakkhīnaṃ visaro samūho sirīvisaro, tesam ālayo sirīvisarālayo, sugato. Tam sirīvisarālayaṃ. **Gupitamindriyehupetanti** gopitabbehi samvaritabbehi cakkhādīhi chahi indriyehi upetaṃ samupetaṃ samannāgataṃ. Gupiyanti rakkhiyantīti gupitāni. Gupadhātu rakkhane ta. Idanti sahaṅgādamme issariyaṃ karontīti indriyāni. Ididhātu paramissariye iyo. Gupitāni indriyāni gupitamindriyāni, cakkhādiindriyāni labbhanti. Tehi. Upeti sampajjatīti upeto, sugato. Upapubba idhātu gatiyaṃ ta, taṃ upetaṃ. Kiñcāpi buddhato aññehi ariyasāvakaḍḍhihi puggalehi cakkhādiindriyāni rakkhitāni. Buddhoyeva pana bodhipallaṅke saha vāsanāya sabba kilesānaṃ arahattamaggena viddhamasitattā viṣiṭṭhena cakkhādi indriyaṃ rakkhito hotīti tassa gupitamindriyehupetanti thometi.

Ravisasimaṅḍalappabhutilakkhaṇopacittanti sūriyamaṅḍala candamaṅḍalādīhi pādacakkalakkhaṇehi abhivicitrapādaṃ. Upasaddo cettha bhusaṭṭhavācako. Abhivicitraṃ sūriyamaṅḍala candamaṅḍalādīhi pādacakkalakkhaṇavantaṃ vā. Ettha ca ravīti sūriyo, so hi ravati sīghaṃ gacchatīti ravīti vuccati. Rudhātu gatiyaṃ ṇi. Vuttañhi **pātheyyaṭṭhakathāyaṃ** “cando ujukaṃ saṅkaṃ gacchati, sūriyassa pana ujukaṃ gamanaṃ sīgha” nti. Nvādi **moggallāne** pana “rusadde i. O avādeso. Ravati gajjatīti ravi. Ādicco” ti vuttaṃ. **Abhidhāna ṭīkāyaṅca** “ravanti etena sattā pabhāvitattāti ravī” ti vuttaṃ. Sasīti cando. So hi sasati tiṇena pāṇati jīvatīti saso, sasapaṇḍito. Sasadhātu pāṇe a. Sasarūpalakkhaṇamettha atthīti sasīti vuccati. Atīte hi sasarājā brāhmaṇavesena āgantvā yācakassa sakkarañño aṅgārārāsīmhi laṅghitvā jīvitaṃ pariccajītvā kāyaṃ adāsī. Atha pana sakko rājā tassa sasapaṇḍitassa jīvitapariccajitassa jīvitadānaguṇo sakalakappaṃ pākato hotīti pabbataṃ pīletvā pabbatarasaṃ ādāya candamaṅḍale sasarūpalakkhaṇaṃ likhitvā ṭhapesi. Tasmā cando sasīti lokehi vohariyati. Tassa pana vitthāro sasapaṇḍitajātake passitvā gahetabbo.

Atha vā sasati hiṃsati uṇhaguṇanti sasīti vuccati. Sasudhātu hiṃsāyaṃ ipaccayo. Maṅḍiyati vibhūsiyati paricchadakaṇavasenaṅgāni maṅḍalaṃ. Maṅḍadhātu maḍidhātu vā vibhūsane alo. Atha vā maṅḍaṃ vibhūsanaṃ parisamantato lāti gaṇhātīti maṅḍalaṃ. Maṅḍasaddūpapada lādīdhātu gahaṇe kvi. Ravino maṅḍalaṃ ravimaṅḍalaṃ, sasino maṅḍalaṃ sasimaṅḍalaṃ, ravimaṅḍalaṅca sasimaṅḍalaṅca ravisasimaṅḍalaṃ, maṅḍalasaddo ravisaddepi yojetabbo. Maṅḍalasaddassa dvandapadato suyyamānattā. **Pabhutīti**ādi. So hi ādyatthavācako abyayanipāto. Ravisasimaṅḍalaṃ pabhutiādi yassāti ravisasimaṅḍalappabhuti, pādacakkalakkhaṇaṃ labbhati. Lakkhiyati lakkhitabbaṃ etenāti lakkhaṇaṃ, pādappa vattacakkalakkhaṇaṃ, ravisasimaṅḍalappabhuti ca taṃ lakkhaṇaṅcāti ravisasimaṅḍalappabhutilakkhaṇaṃ, tena upacittaṃ ativicitraṃ pādaṃ yassa sotī ravisasimaṅḍalappabhutilakkhaṇopa citto, sugato. Atha vā upacittaṃ ativicitraṃ ravisasi maṅḍalappabhutilakkhaṇaṃ pādacakkalakkhaṇaṃ assāti tathā, sugato. Tam.

Suranarapūjitanti devamanussehi pūjitabbaṃ. Suranti issariya kīlādīhi dibbantīti surā, devā. Suradhātu dibbane a. Atha vā surati isati devissariyaṃ pāpuṇāti virocati cāti surā, devā. Suradhātu issariyadittīsu a. Sundarā rāvācā etesanti vā surā, devā. Khandhasantānaṃ sakakammaṃ vā naranti niyantīti narā, manussā. Naradhātu nayane a. Surā ca narā ca suranarā, tehi pūjitabboti suranara pūjito, sugato. Tam. **Sugatanti** buddhaṃ. So hi sobhanaṃ gataṃ gamanaṃ etassāti sugatoti vuccati. Bhagavato hi veneyyajanūpasaṅkamaṇaṃ ekantena tesam hitasukhanipphādanato sobhanaṃ. Tathā lakkhaṇānubyañjanappaṭi maṅḍitarūpakāyatāya dutavilambitakhalitānukaḍḍhananippiḷinukkuṭika kuṭilākuṭilatādi dosarahita mavahasita rājahaṃsausabha vāraṇa migarājagamaṇaṃ kāyagamaṇaṃ.

Ñāṇagamaṇca vipula nimmala karuṇā sati vīriyādi guṇavisesa sahita abhinīhārato yāva mahābodhi anavajjātāya sobhanamevāti.

Atha vā sayambhūñāṇena sakalampi lokam pariññābhi samayavasena pariñānanto ñāṇena sammā gato avagatoti sugato, tathā lokasamudayaṃ pahānāṭisamayavasena pajahanto anuppattidhammataṃ āpādentō sammā gato avagatoti sugato, lokanirodham nibbānam sacchikiriyābhisamayavasena sammā gato avagatoti sugato, lokanirodhagāminipāṭipadaṃ bhāvanābhi samayavasena sammā gato paṭipannoti sugato, sotāpattimaggena ye kilesā pahīnā, te kilese na puneti na pacceti na paccāgacchatīti sugatotiādīnā nayena ayamatto vibhāvetabbo. Atha vā sundaram ṭhānam sammāsambodhiṃ nibbānameva vā gato adhigatoti sugato. Yasmā vā bhūtam taccham atthasamhitam veneyyānam yathāraham yuttameva ca dhammam bhāsati, tasmā sammā gadatīti sugato dakārassa takāram katvā. Iti sobhana gamanatādīhi sugato, tam sugatam. **Ādaranti** sakkaccaṃ, ādaraṃ ādaro. Āpubba daradhātu ādare ṇa. Tam ādaram. **Namāmīti** aham vandāmīti atthoti.

Ayam panettha **saṅkhepayojanā**. Suciparivāritam rāgādimala visuddhāhi ariyasāvakaḍiparisāhi parikkhāritam kilesamalavisuddham parikkhāravantaṃ vā, surucirappabhāhi suṭṭhu kantita sarīranikkhantabyāmamattaraṃsīhi karaṇabhūtehi, rattaṃ niccam rañjītabbakāyam, sirivisarālayam paññāpuññasaṅkhātalakkhisa mūhānam paṭiṭṭhānam, gupitamindriyehi gupitabbehi samvaritabbehi chahi cakkhādiindriyehi, upetaṃ samupetaṃ samannāgataṃ, ravisasimaṇḍalappabhutilakkhaṇopacittaṃ sūriyamaṇḍalacandamaṇḍalādīhi pādacakkalakkhaṇehi abhivicitrapādam, abhivicitram sūriya maṇḍalacandamaṇḍalādīṃ pādacakkalakkhaṇavantaṃ vā, suranarapūjitaṃ devamanussehi pūjītabbam, sugataṃ buddham ādaram sakkaccaṃ aham namāmi vandāmīti.

Sattarasamavandanagāthavaṇṇanā samattā.

18. Maggoḷumpena muhapaṭighāsādiullolavīcim,
Samsārogham tari tamabhayaṃ pārapattam pajānam;
Tāṇam leṇam asamasaraṇam ekatittham paṭiṭṭham,
Puññakkhettaṃ paramasukhadaṃ dhammarājāṃ namāmi.

18. Evaṃ sattarasamagāthāya sugataṃ vanditvā idāni samsārogham taritādīhi navahi guṇehi thomitvā vanditukāmo **maggoḷumpenatyādigāthamāha**. Ayam pana ma bha na ta ta gaṇehi ca garudvayena ca racitattā sattarasakkharehi yuttā mandakkantāgāthāti daṭṭhabbā. Vuttañhi **vuttodaye** “mandakkantā ma bha na tata gā go yugutvassa kehī”ti. Tassā panāyamatto. Yassaṃ paṭipādam yugutvassakehi catu cha sattayatīhi ma bha na ta ta gā magaṇa bhagaṇa nagaṇa tagaṇa tagaṇa garū ca go garu ca ce yuttā, mandakkantāgāthānamāti. Yugutvassakehīti ettha ca yugasaddassa maggaphalacatubbidhapurisayugaḷavācakattā yugasaddo catusaṅkhyāvācako, utūnam hemantasisira vassanta gimha vassāna sarada utuvasena chabbidhattā utusaddo chasaṅkhyāvācako. Assasaddo sattasaṅkhyāvācakoti veditabbo. **Chappaccayaṭikādīsu** hi “assasaddassa sattasaṅkhyāvācakabhāvo vutto”ti.

Tattha pana yo dhammarājā muhapaṭighāsādiullolavīcim samsārogham maggoḷumpena tari, abhayaṃ pārapattam pajānam tāṇam leṇam asamasaraṇam ekatittham paṭiṭṭham puññakkhettaṃ paramasukhadaṃ tam dhammarājāṃ aham namāmīti sambandho. Etissaṃ pana atthakkamena vaṇṇayissāmi. **Muhapaṭighāsādi ullolavīcinti** mohadosaṇhādisaṅkhātam mahātaṅga khuddaūmikam. Muyhanti etena sampayuttadhammā, sayam vā muyhati, muyhanamattamevetanti muho, moho. Muhadhātu vekhitte ṇa. Paṭihaññanti sampayuttadhammā, sayam vā paṭihaññati paṭihaññanamattamevetanti paṭigho, doso. Paṭipubba hanadhātu hiṃsāgatīsu a. Hanassa gho. Asanam icchanam āsā, isati icchatīti vā āsā, taṇhā. Isudhātu icchāyam a. Issa ā. Muho ca paṭigho ca āsā ca muhapaṭighāsā, te ādi yesanteti muhapaṭighāsādi, lobhādikilesā labbhanti. Ettha ca ādisaddena māna diṭṭhi vicikicchā thina uddhacca ahirika anottappakilese ca akusalacittuppāde ca saṅgaṇhāti. Uddham udakam lolati ākuletīti ullolo, mahātaṅgo. Uppalola dhātu ummādane ṇa. Tiram ulati gacchatīti vā ullolo. Uladhātu gatiyam olapaccayo. Vimhayaṃ vicittam cinotīti vīci, khuddakaūmi.

Vipubba cidhātu caye kvi. Ullolo ca vīci ca ullolavīci. Kesuci potthakesu ca kullolavīcintipātho dissati. Na so yujjati, kasmā, kullasaddassa uḷumpatthavācakattā. Ullolasaddoyeva hi mahātaṅgāttha vācako hotīti. Vuttañhi **abhidhānappadīpikāyaṃ** “ullolo tu ca kallolo, mahāvīcisu kathyate”ti.

Mūlapaṇṇāsattakathāyaṅca “kullo nāma taraṇatthāya kalāpaṃ katvā bandho. Pattharivā baddhā pana padaracāti ādayo uḷumpo”ti vutto. Muhapaṭighāsādieva ullolavīci. Sā asmim saṃsāroge atthīti muhapaṭighāsādiullolavīci. Samāsantataddhitāyaṃ. Pītisukhaṃ, mahāsannaṃ, rattidivantyādīsu viya. Evaṃ panettha vacanattho kātabbo. Pīti ca sukhañca pītisukhaṃ, taṃ assa jhānassa atthi, tasmim vā vijjatīti pītisukhaṃ, jhānaṃ. Mahantaṃ āsanaṃ mahāsanaṃ, tassa bhāvo mahāsannaṃ. Ratti ca divā ca rattidivaṃ. Rattidivaṃ kataṃ rattidivanti. Atha vā ullolavīci viya muhapaṭighāsādi ullolavīci, saṃsāroghaṃ labbhati. Upamā bahubbīhisamāsoyaṃ. Yathā pana mahāsamudde bhāyitabbā mahātaṅgaūmivegādayo ca saṃsumāra timi tipingalādi macchamakārādayo ca okiṇṇā hontī, evaṃ mohādīkilesā ca akusalacittuppādā ca tehi nibbattā bhayānakā bahū jātijarābyādhimaraṇadukkhādayo ca khandhādayo ca okiṇṇā hontīti vuttaṃ hoti. **Saṃsāroghanti** saṃsārasaṅkhātaṃ oghaṃ samuddajalappavāhaṃ. Saṃpunappunaṃ abbochinnaṃ vā sarati gacchati pavattatīti saṃsāro. Saṃpubbasaradhātu gatiyaṃ ṇa. Khandhadhātuāyata nānaṃ abbochinnaṃ pavattatīti attho. Tena vuttaṃ **aṭṭhakathāsu** –

“Khandhānañca paṭipāṭi, dhātuāyatanāna ca;
Abbochinnaṃ vattamānā, saṃsāroti pavuccatī”ti.

Satte ottharivā ajjhottharivā heṭṭhā hanati haratīti ogho, jalappavāho. Avapubba hanadhātu haraṇe ṇa. Hanassa gho. Avasaddo ottharaṇattho. Attani patite satte heṭṭhā katvā haneti osīdāpetīti vā ogho, jalappavāho. Avapubba hanadhātu osīdāpane ṇa. Avasaddo heṭṭhābhāgattho. Ogho viyāti ogho, saṃsāro. Atha vā sattasaṅkhāre ottharivā ajjhottharivā abhibhavitvā vaṭṭasmim hanati haratīti ogho, ohaneti osīdāpeti vaṭṭasmim sattasaṅkhāreti vā ogho, rāgādi kilesā labbhanti. Saṃsāroeva ogho saṃsārogho, taṃ saṃsāroghaṃ.

Maggoḷumpenāti ettha maggaḷumpenāti padacchedo. Aṭṭhamaggaṅgasaṅkhātena kullenāti attho. Ettha ca maggo vuccati aṭṭhaṅgikamaggo. Magganti gacchanti buddhā ca ariyasāvaka ca agataṃ disaṃ nibbānanti maggo. Aṭṭhaṅgiko maggo. Maggadhātu gatiyaṃ a. Vuttañhi **paṭisambhidāmagge** “etena maggena buddhā ca sāvaka ca agataṃ disaṃ nibbānaṃ gacchantīti aṭṭhaṅgiko maggo”ti. Atha vā nibbānaṃ maggati gavesatīti maggo, nibbānatthikehi maggiyati gavesiyatīti vā maggo, aṭṭhaṅgiko maggo. Nāṇena dassiyatīti attho. Maggadhātu gavesane a. Vuttañhettaṃ **mahāvaggasaṃyuttatṭhakathāyaṃ** “maggoti kenatthena maggo, nibbānaṃ magganatthena nibbānatthikehi magganīyatthena cā”ti. Atha vā maggiyati paṭipajjiyatīti maggo, nibbānatthikehi aṭṭhaṅgiko maggo paṭipajjiyatīti attho. Uḷu vuccati udakaṃ, tato pāti rakkhatīti uḷupo, soyeva niggahitāgamavasena uḷumpo, kullo. Uḷusaddūpapadapādhātu rakkhane kvi. Maggoeva uḷumpo maggoḷumpo, maggasāṅkhāto vā uḷumpo tathā, maggasadiso vā uḷumpo tathā, maggo viya vā uḷumpo tathā, maggo ca uḷumpo ca maggoḷumpo. Atha vā uḷumpoeva maggo maggoḷumpo, uḷumpasaṅkhāto vā maggo tathā, uḷumpa sadiso vā maggo tathā, uḷumpo viya vā maggo tathā, uḷumpo ca maggo ca maggoḷumpoti evaṃ rūpakasādisaupamā samupekkhatthavasena ca parapakkha sakapakkhatthavasena ca vacanattho vedītabbo. Tena maggoḷumpena. **Tarīti** atari. Dhammarājā hi aṭṭhamaggaṅganāvāya saṃsāroghaṃ tarivā nibbānatīraṃ pāpuṇāti. Atītā buddhā pāpuṇiṃsu. Anāgatā buddhā pāpuṇissantīti vuttaṃ hoti. Vuttañhi **mahāvaggasaṃyutte**

“Ekāyanaṃ jātikhayantadassī,
Maggam pajānāti hitānukampī;
Etena maggena tariṃsu pubbe,
Tarissantiyeva taranti ogha”nti; **Buddhavaṃse** ca

“Saṃsārasotaṃ chinditvā, viddhamsetvā tayo bhava;
Dhammanāvaṃ samāruyha, tāremi janataṃ bahu”nti.

Abhayanti jātījarābyādhimaraṇabhayādīnaṃ abhāvato nibbhayaṃ. So hi bhagavā natthi bhayaṃ etassāti abhayoti vuccati. Atha vā abhayanti khemaṃ. Tañhi nibbānaṃ natthi jātiādibhayaṃ etthāti abhayanti vuccati. Etasmiṃ pana dutiyavikappe taṃ padaṃ pārantipade visesanaṃ.

Pārapattanti ettha pāraṇti saṃsāravaṭṭassa paratīraṭṭhena vuccati nibbānaṃ. Tañhi udakaṃ pāti rakkhatīti pāraṃ, samuddapāraṃ. Pādhatu rakkhane aro. Atha vā pāreti samattheti taraṅgādayo vāretunti pāraṃ. Pāradhatu samatthiyaṃ a. Pāraṃ viyāti pāraṇti vuccati. Nītatthena pana evaṃ vacanatto kātabbo. Jāti bhayādiṃ pāti rakkhati etthāti pāraṃ, pāreti samattheti ettha vā jātibhayaṅdayo vāretunti pāraṃ, nibbānaṃ. Taṃ pajjittha adhigamitthāti pārapatto, dhammarājā. Pārasaddūpapada padadhātu gatiyaṃ ta. Atha vā mutto moceyyantiādīnā nayena pavattassa mahābhinihārassa sakalassa saṃsāradukkassa vā sabbaññutaññādiguṇānaṃ vā pāraṃ pariyantaṃ patto gatoti pārapatto, dhammarājā. Pārasaddo hi pariyanta vācako. Taṃ pārapattaṃ. **Pajānanti** sabbasattānaṃ. Tehi kammakilesehi pakārena janiyati nibbattiyatīti pajāti vuccanti. Tesam pajānaṃ.

Tānanti tāyanaṭṭhena tānaṃ. Sattānaṃ saṃsāra bhayato tāyati rakkhatīti tāno, dhammarājā. Tādhatu rakkhane yu. Atha vā tānanti sattānaṃ saṃsāravaṭṭadukkato paripālanaṭṭhena tānaṃ. So hi dhammarājā sattānaṃ saṃsāravaṭṭadukkato dhammadesanāya magga phalanibbānasukhaṃ dadanto tāyati pāletīti tānoti vuccati. Taṃ tānaṃ. **Leṇanti** nilīyanaṭṭhena leṇaṃ, jātibhayaṅdihi pīlītehi sattehi līyanti nilīyanti etthāti leṇo, dhammarājā. Līdhātu nilīyane yu. Atha vā leṇanti saṃsārabhayaṃ passantehi nilīyanaṭṭhena leṇaṃ. So hi dhammarājā saṃsāranissaraṇatthikehi līyanti nilīyanti etthāti leṇoti vuccati. Taṃ leṇaṃ. Dhammarājā hi saṃsārabhayehe pīlītānaṃ sabbasattānaṃ tānaṃ leṇaṃ saraṇaṃ parāyanaṃ ṭhānaṃ hotīti vuttaṃ hoti.

Asamasaraṇanti sabbasattānaṃ asadisāvassayaṇaṃ, natthi etassa samo sadiso sīlādiguṇenāti asamo, dhammarājā. Sarati gacchati avassayati etthāti saraṇo, dhammarājā. Saradhātu gatimhi yu. Asamo asadiso hutvā saraṇoti asamasaraṇo, dhammarājā. Sambhāva nākammadhārayasamāsoyaṃ. Dhammarājā hi sabbasampattisukhānaṃ dāyakattā sabbasattānaṃ anaññāsādhāraṇaṃ asamaṃ saraṇaṃ avassayaṇaṃ parāyanaṃ hotīti attho. Taṃ asamasaraṇaṃ. **Ekatitthanti** nibbānapāragamaṇānaṃ ekatitthabhūtaṃ. Taranti uttaranti ettha etena vā najjasamuddādinti titthaṃ. Najjasamuddādīnaṃ pārimatīragamaṇatthaṃ otaraṇatthānaṃ labbhati. Taradhātu otaraṇe tha. Rassa to, ikārāgamo. Manussānaṃ ekaṃ titthaṃ ekatitthaṃ, taṃ viyāti ekatittho, dhammarājā. Yathā hi titthena najjādiṃ tarantā manussā pārimatīraṃ sukhaṃ pāpuṇanti, na atitthena, evaṃ seṭṭhabhūtena buddhatitthena saṃsāroghaṃ tarantā veneyyasattā nibbānapāraṃ sukhaṃ pāpuṇanti, na atitthena aññatitthiyena, tasmā dhammarājaṃ ekatitthoti thometi. Nītatthena pana eko seṭṭho hutvā nibbānapāraṃ taranti uttaranti etthāti eka tittho, dhammarājā. Khemaṃ nibbānapāraṃ taritukāmā veneyyasattā ettha buddhatitthe desitadhammaṃ sutvā desitadhammānurūpaṃ paṭipajjitvā saṃsāroghaṃ aṭṭhamaggaṅganāvāya chinditvā khemaṃ nibbānapāraṃ sukhaṃ taranti, ititasmā etthātipadena niddiṭṭho so buddho sabbasattānaṃ eko seṭṭho tittho nāma. Na aññatitthiyā ekatitthā nāma hontīti attho. Taṃ ekatitthaṃ.

Patitthanti sabbasattānaṃ mahādīpaṃ viya patitthaṃ ādhārabhūtaṃ. Paṭisaraṇaṃ leṇaṃ parāyanaṇti attho. Patitthahanti etthāti patittho, dhammarājā. Patipubbaṭṭhādhatu gatinivattimhi a. Dhammarājā hi sabbasukhatthikānaṃ sattānaṃ mahādīpo viya patittho paṭisaraṇo leṇo parāyano hotīti attho, taṃ patitthaṃ. **Puññakkhattanti** nibbānasukhatthikānaṃ puññabījassa khettabhūtaṃ. Puññatthikānaṃ puññabījassa vanaṇatthānaṃ khettabhūtaṃ vā, attano kāraṇaṃ pavatī sodhetīti puññaṃ, kusalaṃ. Pudhātu sodhane ṇyo. Atha vā paraṃ pujjabhāvaṃ janetīti puññaṃ, sadā pūjitaṃ vā janetīti puññaṃ, kusalaṃ. Pūjasaddūpapada janadhātu ṇyo. Niruttinayena saddasiddhi veditabbā. Avasesaṃ apuññaṃ punāti sodhetīti vā puññaṃ, kusalaṃ. Pudhātu sodhane ṇyo. Khittaṃ vuttaṃ bījaṃ tāyati rakkhatīti khettaṃ, kedārādi. Khipasaddūpapada tādhatu rakkhane kvi. Bījāni vapantānaṃ manussānaṃ mahapphalabhāvakarāṇena bījaṃ rakkhatīti attho. Atha vā khipanti vapanti ettha bījānīti khettaṃ. Khipadhātu peraṇe khepe vā ta. Khettaṃ viyāti khetto. Dhammarājā. Nītatthena pana puññabījāni vapantānaṃ sattānaṃ mahapphala bhāvakarāṇena khittaṃ vuttaṃ puññabījaṃ tāyati rakkhatīti khetto. Atha vā nibbānatthikehi puññabījāni khipiyanti vapiyanti etthāti khetto. Dhammarājāti kātabbo. Puññaṇaṃ khettaṃ puññaṅkhetto, dhammarājā. Yathā hi rañño vā amaccādīnaṃ vā sālīnaṃ vā yavānaṃ vā virūhanaṭṭhānaṃ rañño vā amaccādīnaṃ vā sālīkhettaṃ yavakhattanti vuccati. Evaṃ dhammarājā sabbalokassa puññaṃmahabbalabhāvakarāṇena puññaṇaṃ

virūha naṭṭhānaṃ dhammarājaṃ nissāya sattalokassa nānāppakārahita sukhasaṃvattanikāni puññāni virūhanti, tasmā dhammarājā puññakkhettanti abhiththavitoti vuttaṃ hoti. Taṃ puññakkhettaṃ.

Paramasukhadanti uttamaṃ nibbānasukhaṃ dadamānaṃ. Vuttañhi “nibbānaṃ paramaṃ sukha”nti. Ettha ca paramasaddo uttamattavācako anipphannapāṭi padiko. Atha vā paraṃ atirekaṃ ariyehi mānitabbanti paramaṃ, nibbānaṃ. Parapubbamādhātu māne a. Pakārena ariyehi ramiyati etthāti vā paramaṃ, nibbānaṃ. Papubbaramudhātu ramane ṇa. **Abhidhānaṭṭikāyaṃ** pana “paraṃ paccanikaṃ māretīti paramaṃ. Pakatṭhabhāve ramatīti paramaṃ. No”ti vuttaṃ. Tassa sukhaṃ paramasukhaṃ. Paramaṃ uttamaṃ vā sukhaṃ paramasukhaṃ. Taṃ dadātīti paramasukhado, dhammarājā. Paramasukhasaddūpapada dādhātu dāne kvi. Dhammarājā pana veneyyasattānaṃ dhammadesanāya ca catupaccayappaṭiggahaṇena ca nibbānasukhaṃ detīti vuttaṃ hoti. Taṃ paramasukhadaṃ. **Dhammarājanti** buddhaṃ. So hi lokiya lokuttaradhammehi devamanussānaṃ rañjeti tosetīti dhammarājāti. Atha vā pāramīdhammeneva buddhattaṃ patvā rājā jātoti dhammarājāti. Pāramīdhammeneva jāto vā rājāti dhammarājāti ca vuccati. Taṃ dhammarājaṃ ahaṃ namāmīti sambandho.

Ayaṃ panettha **saṅkhepayojanā**. Yo dhammarājā muha paṭighāsādiullolavīcim mohadosaṇḍhādisaṅkhātaṃ mahātaṅga khuddakaūmikaṃ, saṃsāroghaṃ saṃsārasaṅkhātaṃ oghaṃ samuddajalappavāhaṃ. Maggoḷumpeṇa aṭṭhamaggaṅgasaṅkhātena kullena tari atariṃ, abhayaṃ khemaṃ, jātiādīnaṃ abhāvato nibbhayaṃ vā, pārapattaṃ nibbānapāraṃ pattaṃ adhigataṃ, pajānaṃ sabba sattānaṃ, tānaṃ tāyanaṭṭhena tānaṃ rakkhaṇaṃ. Leṇaṃ nilīyanaṭṭhena leṇaṃ nilīyanaṃ, asamasaraṇaṃ sabbasattānaṃ asadisāvassayaṇaṃ, ekatitthaṃ nibbānapāragamaṇānaṃ ekatittha bhūtaṃ, paṭiṭṭhaṃ sabbasattānaṃ mahādīpaṃ viya paṭiṭṭhaṃ ādhārahūtaṃ, puññakkhettaṃ nibbānasukhatthikānaṃ puññabījassa khettabhūtaṃ, puññatthikānaṃ puññabījassa vanaṭṭhānaṃ khettabhūtaṃ vā, paramasukhaṃ uttamaṃ nibbānasukhaṃ dadamānaṃ, dhammarājaṃ buddhaṃ lokiyalokuttara dhammehi pajānaṃ rañjāpanaṃ vā, pāramīdhammeneva buddhabhāvaṃ jātaṃ buddhaṃ vā, ahaṃ tīhi dvārehi namāmīti.

Aṭṭhārasamavandanagāthāvaṇṇanā samattā.

19. Kaṇḍambaṃmūle parahitakaro yo munindo nisinnō;
Accheraṃ sīghaṃ nayanāsubhagaṃ ākulaṇṇaggijālaṃ;
Dujjāladdhaṃsaṃ munibhijahitaṃ pāṭiheraṃ akāsi;
Vande taṃ seṭṭhaṃ paramaratijaṃ iddhidhammehupetaṃ.

19. Evaṃ aṭṭhārasamagāthāya dhammarājaṃ vanditvā idāni sāvattihyaṃ kaṇḍambamūle iddhipāṭiherādīhi guṇehi munindassa thometvā vanditukāmo **kaṇḍambaṃmūleyādi** gāthamāha. Ayaṃ pana matanayayagaṇehi ca pañca yati chayati sattaya tīhi ca racitattā aṭṭhārasakkharehi yuttā kusumitalatā vellitāgāthāti daṭṭhabbā. Vuttañhi **vuttodaye** “mo to no yo yā kusumitalatā vellitākkhutvisīhi”ti. Ayaṃ panettha yojanā. Yassaṃ paṭipādaṃ akkhutvisīhi pañcayati chayati sattayatīhi mogaṇo ca togaṇo ca nogaṇo ca yogaṇo ca yā yagaṇadvayaṇca ce yuttā, sā gāthā kusumitalatā vellitā kusumitalatā vellitā gāthā nāmāti. Ettha ca akkhasaddassa pañcindriyavācakattā akkhasaddo pañcasaṅkhyāvācakoti veditabbo. Utūnaṃ hemantasisīravassantagimhavassānasaradavasena chabbidhattā utusaddo chasaṅkhyāvācakoti. Isisaddo vipassīdīnaṃ buddhānaṃ sattavidhattā sattasaṅkhyāvācakoti veditabboti.

Tattha pana parahitakaro yo munindo kaṇḍambamūle nisinnō pāṭiheraṃ sīghaṃ akāsi, taṃ munindaṃ ahaṃ vande vandāmīti sambandho. Atthakkamena panettha vaṇṇayissāmi.

Parahitakaroti attanā paresaṃ sabbasattānaṃ hitaṃ atthaṃ karonto. Hinoti vaḍḍhati sukhaṃ etenāti hitaṃ, atthaṃ payojanaṃ vā. Hidhātu vaḍḍhane ta. Taṃsamaṅgino lokiyalokuttarasukhaṃ vaḍḍhatīti attho. Paresaṃ hitaṃ parahitaṃ, taṃ karotīti parahitakaro, munindo. So hi dīpaṅkarassa bhagavato pādāmūle laddhabyākaraṇato paṭṭhāya attano sukhaṃ pajahanto sattalokassa hitasukhatthāya kappasata sahasādhikāni cattāri asaṅkhyeyyāni samatīmsapāramiyo pañcamahāpariccāge ca karonto sabbaññubuddhabhāvaṃ pattakāle ca pañcacattālīsavassāni dhamma desanāya sattalokassa

lokiyalokuttarahita sukhaṃ karotīti parahitakaroti thometi. **Yoti** yo yādiso. **Munindoti** buddho. So hi agāriya muni, anagāriyamuni, sekkhamuni, asekkhamuni, paccakamunivasena pañcannaṃ munīnaṃ indoti munindoti vuccati. **Kaṇḍambamūleti** ettha kaṇḍambamūleti padacchedo. Chandānurakkhaṇatthaṃ bindāgamo. Kaṇḍanāmikena pasenadīkosalarañño uyyānapālena ropitassa setambarukkhassa samīpeti attho. Ettha ca kaṇḍanti tasseva nāmaṃ. Atha vā kaṃ vuccati sukhaṃ, taṃ ḍeti gacchati pāpuṇātīti kaṇḍo, uyyānapālo. Kaṃsaddūpapadaḍi dhātu gatiyaṃ ṇa. Kaṃ vuccati vā udakaṃ, taṃ rukkhesu siñcanaṃ ṭināti jānātīti kaṇḍo, uyyānapālo uyyāna nāyako vā. Phalakāmehi janehi amiyati gamiyatīti ambo, setambarukkho. Amadhātu gatiyaṃ bo. Kaṇḍanāmikena uyyānapālena ropito ambo kaṇḍambo, tassa mūlaṃ samīpanti kaṇḍambamūlaṃ, tasmīṃ kaṇḍambamūle.

Nisinnoti vasamāno. Vimhāpaniyatṭhena **accheraṃ**. Ayañhi accherasaddo vimhayatthavācako anipphannaṃ pāṭi padiko. Atha vā ābhuso vimhayo carati pavattatīti accheraṃ, pāṭiheraṃ. Āpubba caradhātu gatiyaṃ a. Caradhātussaccherādeso. Ākārassa rasso. Andhassa pabbatārohanaṃ viya niccaṃ na carati na pavattatīti accheraṃ, pāṭiheraṃ. Napubba caradhātu gatiyaṃ a. Yathā hi andhassa pabbatārohanaṃ niccaṃ na hoti, kadāciyeva hoti, evameva bhagavato pāṭihāriyaṃ niccaṃ na hoti, kadāciyeva hoti. Tasmā taṃ accheranti vuccati. Tena vuttaṃ **nettiatṭhakathāyaṃ** “yaṃ abhiṇṇaṃ na pavattati, taṃ acchariya” nti. Atha vā accheraṃ paharituṃ yogganti acchariyaṃ. Yoggataddhite ṇiyapaccayo. Acchariyanti hi vattabbe chandānurakkhaṇatthaṃ iyasaddalopena accheranti vuttaṃ. Vuttañhettaṃ **silakkhandhavaggaṭṭhakathāyaṃ** “andhassa pabbatārohanaṃ viya niccaṃ na hotīti acchariyaṃ. Ayaṃ tāva saddanayo. Ayaṃ pana aṭṭhakathānayo, accharāyogganti acchariyaṃ, accheraṃ paharituṃ yuttanti attho” ti. **Nayanasubhaganti** devamanussānaṃ pasādacakkhussa sobhanapattaṃ. Samavisamaṃ dassentaṃ attabhāvaṃ netīti nayaṃ, pasādacakkhu. Nīdhātu naye yu. Tassa subhaṃ sobhanaṃ gacchatīti nayanasubhagaṃ, pāṭiheraṃ. Nayanasubha saddūpapadagamudhātu gatiyaṃ kvi. Taṃ nayanasubhagaṃ.

Ākulaṇṇaggijālanti ettha ākulaṇṇaggijālanti padacchedo. Parikiṇṇa udakadhāra aggisikhāvantaṃ. Atha vā parisamantato kulaṃ pakiṇṇaṃ aññamaññamissakaṃ yamakaṃ yamakaṃ udakajālaaggijālavantanti attho. Ābhuso kulati udakaggijālaṃ aññamaññamissakaṃ karotīti ākulaṃ, udakaggijālaṃ. Āpubbakuladhātu karaṇe a. Ābhusaṃ kulati bandhati aññamaññanti vā ākulaṃ. Atha vā āsamantato kulati yamakaṃ yamakaṃ udakaggijālaṃ pavattatīti ākulaṃ, udakaggijālaṃ. Udakajālaṃ aggijālena aggijālañca udakajālena sammisso hotīti attho. Ananti jīvanti etena sattāti aṇṇaṃ, udakaṃ. Anadhātu jīvāyaṃ a. Nassa ṇo. Tassa dvittaṃ. Dvibhāvo vā. Atha vā arati gacchati taṃ taṃ ṭhānanti aṇṇaṃ. Aradhātu gatimhito. Tassa annādeso, dhātvantalo, nassa ṇṇattaṃ. Aṇṇassa dhāraṃ aṇṇaṃ. Uttaraṇṇadalo. Kuṭṭilabhāvena ajati gacchatīti aggi, ajadhātu gatiyaṃ i. Jassa ggo. Jalati dibbatīti jālaṃ, sikhāṃ. Jaladhātu dittiyaṃ ṇa. Aggino jālaṃ aggijālaṃ. Aṇṇaṃca aggijālañca aṇṇaggijālaṃ, ākulaṃ parikiṇṇaṃ aṇṇaggijālaṃ assāti ākulaṇṇaggijālaṃ, yamaka pāṭiheraṃ labbhati. Taṃ ākulaṇṇaggijālaṃ.

Dujjāladdhaṃsanti duṭṭhu diṭṭhivādasāṅkhātājālaṃ viddhaṃsitaṃ. Duṭṭhu jalati bandhati saṃsāraṇṇatīti dujjālaṃ, diṭṭhivādajālaṃ. Titthiya vādo hi natthi dinnantiādinayapavatto saṃsārato nissarituṃ appadānavasena jālasadisattā dujjālanti attho. Dupubba jaladhātu bandhane ṇo. Taṃ dhaṃsati viddhaṃsatīti dujjāladdhaṃsaṃ, yamakapāṭihāriyaṃ. **Munibhijahitanti** munibhi ajahitanti padacchedo. Tattha munibhīti sabbasammāsambuddhehi. Te hi monaṃ vuccati sabbaññutaññaṃ, taṃ etesaṃ atthīti munīti vuccanti. Kāyamoneyya vacīmoneyya manomoneyyaṃ etesaṃ atthīti vā muni. Assatthitaddhite ṇipaccayo. Atha vā idhaloka paralokaṃ attahita parahitaṃ hitāhitañca munanti jānantīti munīti vuccanti. Tehi munībhi.

Ajahitanti avijahitaṃ apariccattaṃ vā, hātabbaṃ cajitabbanti jahitaṃ. Hādhātu cāge ta. Na jahitaṃ ajahitaṃ, pāṭiheraṃ. Taṃ ajahitaṃ. Bhagavato hi sāvatthinagarassa dakkhiṇadvāre kaṇḍambarukkhāmūle kataṃ pāṭihāriyañca bhagavā pana tasmīṃ pāṭihāriyāvasāne tāvatimsapuram gato, tasmīṃ pārīchattakamūlamhi paṇḍukambalanāmake silāsane sannisinno devānaṃ abhidhammakathāya desanā ca sabbasammāsambuddhehi avijahitā dhammatāyeva hotīti vuttaṃ hoti. **Buddhavaṃsaṭṭhakathāya**ñhi samatimsadhammatāpakāsane sāvatthi nagaradvāre yamakapāṭihāriyakaraṇaṃ. Tāvatimse bhavane abhidhammadesanāti dhammatābhāvena vuttaṃ.

Tasmā pāṭiheraṃ munībhijahitanti thometi.

Pāṭiheranti paccanīkapaṭiheraṇavasena pāṭihāriyaṃ, paṭipakkhe titthiye madditvā hinoti pavattatīti pāṭiheraṃ. Paṭipubbahidhātu gatiyaṃ ṇo. Hissa herañideso. Atha vā bhagavato ca sāsanaṃ ca paṭipakkhe titthiye harati apanetīti pāṭiheraṃ, iddhividhañāṇaṃ. Paṭipubbaharadhātu apanayane ṇo. Paṭiharati apaneti sattānaṃ diṭṭhimānopagatāni cittānīti vā pāṭiheraṃ. Appasannānaṃ pasādaṃ āharatīti vā pāṭiheraṃ. Samāhite citte vigatūpakkilese katakiccena paṭipacchā haritabbāṃ pavattetabbanti vā pāṭiheraṃ. Paṭīti hi ayaṃsaddo pacchāti etassa atthaṃ bodheti. Tasmim paṭipaviṭṭhamhi añño āgacchi brāhmaṇotiādīsu viya. Atha vā paṭipunappunaṃ udakaggijālaṃ abbochinnaṃ yamaṃ yamaṃ hutvā harati pavattatīti pāṭiheraṃ, yamakapāṭihāriyaṃ. Tañca pana iddhipāṭihāriya, ādesanāpāṭihāriya, anusā sanī pāṭihāriyavasena tividhaṃ hoti. Tesu pana idha iddhipāṭihāriyaṃ adhippetanti. **Sighanti** khippaṃ āsuṃ lahuṃ vā. Taṃ pana akāsītipade kriyāvisesanaṃ. Seti lahu hutvā pavattatīti sīghaṃ. Sidhātu gatimhi ghapaccayo. Dīgho. **Akāsīti** akari.

Ettha ca pāṭihāriyamevaṃ veditabbāṃ. Bhagavā hi abhisambodhito sattame samvacchare sāvattinagarassa dakkhiṇadvāre kaṇḍambarukkhamaṇe devānamindena sakkena āṇāpītena visukammadevaputtena nimmitte dvādasayojane ratana maṇḍape bhagavatā nimmitte yojanappamāṇe ratanapallaṅke ratanacaṅkame ca nisīditvā tiyojanike dibbasetacchatte dhārayamāne samantato dvādasayojanāya parisāya atthādānaparidīpanaṃ titthiyamaddanaṃ uparimakāyato aggikkhandho pavattati, heṭṭhimakāyato udakadhārā pavattati, heṭṭhimakāyato aggikkhandho, uparimakāyato udakadhārā. Puratthimakāyato aggikkhandho, pacchimakāyato udakadhārā. Pacchimakāyato aggikkhandho, puratthimakāyato udakadhārā, dakkhiṇaakkhito aggikkhandho, vāmaakkhito udakadhārā. Vāmaakkhito aggikkhandho, dakkhiṇaakkhito udakadhārā. Dakkhiṇakaṇṇasotato aggikkhandho, vāmakaṇṇasotato udakadhārā. Vāmakaṇṇasotato aggikkhandho, dakkhiṇakaṇṇasotato udakadhārā. Dakkhiṇa nāsikāsotato aggikkhandho, vāmanāsikāso tato udakadhārā. Vāmanāsikāsotato aggikkhandho, dakkhiṇanāsikāsotato udakadhārā. Dakkhiṇaamsakūṭato aggikkhandho, vāmaamsakūṭato udakadhārā. Vāmaamsakūṭato aggikkhandho, dakkhiṇaamsakūṭato udakadhārā. Dakkhiṇahatthato aggikkhandho, vāmahatthato udakadhārā. Vāmahatthato aggikkhandho, dakkhiṇahatthato udakadhārā. Dakkhiṇapassato aggikkhandho, vāmapassato udakadhārā. Vāmapassato aggikkhandho, dakkhiṇapassato udakadhārā. Dakkhiṇapādato aggikkhandho, vāmapādato udakadhārā. Vāmapādato aggikkhandho, dakkhiṇapādato udakadhārā. Aṅgulaṅgulehi aggikkhandho, aṅgulantarikāhi udakadhārā. Aṅgulantarikāhi aggikkhandho, aṅgulaṅgulehi udakadhārā. Ekekalomato aggikkhandho, ekekalomato udakadhārā. Lomakūpato lomakūpato aggikkhandho, lomakūpato lomakūpato udakadhārā pavattati. Channaṃ vaṇṇaṃ nīlānaṃ pītānaṃ lohitaṅkānaṃ odātānaṃ mañjaṭṭhānaṃ pabhassarānaṃ ubbahaṇabhūtānaṃ yamakā yamakā vaṇṇā pavattanti. Bhagavā caṅkamati, nimmito tiṭṭhati vā nisīdati vā seyyaṃ vā kappeti. Bhagavā tiṭṭhati, nimmito caṅkamati vā nisīdati vā seyyaṃ vā kappeti. Bhagavā nisīdati, nimmito caṅkamati vā tiṭṭhati vā seyyaṃ vā kappeti. Bhagavā seyyaṃ kappeti, nimmito caṅkamati vā tiṭṭhati vā nisīdati vā. Nimmito caṅkamati, bhagavā tiṭṭhati vā nisīdati vā seyyaṃ vā kappeti. Nimmito tiṭṭhati, bhagavā caṅkamati vā nisīdati vā seyyaṃ vā kappeti. Nimmito nisīdati, bhagavā caṅkamati vā tiṭṭhati vā seyyaṃ vā kappeti. Nimmito seyyaṃ kappeti, bhagavā caṅkamati vā tiṭṭhati vā nisīdati vāti vividhaṃ yamakapāṭihāriyaṃ titthiyānaṃ maddanatthāya akāsīti. Ettha ca pana yo koci evarūpaṃ pāṭihāriyaṃ kātuṃ samattho ce. So āgacchatūti codanāsadisattā vuttaṃ atthādānaparidīpananti. Atthādānañhi anuyogo, paṭipakkhassa atthassa ādānaṃ gahaṇanti katvā, tassa paridīpanaṃ atthādānaparidīpanaṃ. Titthiyamaddananti pāṭihāriyaṃ karissāmāti kuhāyanavasena pubbe utṭhitānaṃ titthiyānaṃ maddanaṃ. Tañca tathā kātuṃ asamatthatā sampādanameva. Tadetaṃ padadvayaṃ yamakapāṭihāriyanti etena sambandhitabbanti.

Setṭhanti pasatthataṃ. Tassa vacanatto heṭṭhā vuttoyeva. **Paramaratijanti** devamanussānaṃ uttamaratiṃ janakaṃ. Paramānaṃ uttamasādhūnaṃ cittaramanaṃ janāpetam vā, ettha ca paṭhamavikappe paramasaddo uttamavācako anipphannaṃ pāṭipadiko nipāto. Dutiyavikappe sādhuvaṅcako nipphannaṃ pāṭipadiko. Devamanussānaṃ paramaṃ uttamaṃ ratim janetīti paramaratijo, munindo. Paramaratisaddūpapada janadhātu janane kvi. Atha vā pakārena saddhamme ramantīti paramā, sādhu labbhanti. Papubba ramudhātu kīlāyaṃ a. Tesam cittassa ratim ramaṇaṃ janetīti

paramaratijo, munindo. Taṃ paramaratijaṃ. So hi dhamma desanāya ca pāṭihāriyena iddhiyā sarīrasobhagga sampattiādīhi ca devamanussānaṃ cittassa abhiratiṃ abhikkantaṃ janetīti paramaratijanti thometi.

Iddhidhammehupetanti iddhidhammehi upetanti padacchedo. **Iddhi dhammehīti** acinteyyaappameyyehi buddhaiddhisaṅkhātaguṇehi. Dhammasaddo hi guṇe vattati buddhadhammātiādīsu viya. Ijjhanaṃ samijjanaṃ iddhi. Ijjhati samijjhatīti vā iddhi. Ijjhati samijjhati yathicchitatho etāyāti iddhi. Idhadhātu vuddhiyaṃ i, tipaccayo vā. Bhagavā etāya iddhiyā yathicchitatho iddho vuddho ukkaṃsagato hotīti attho. Dhāreti pakāseti taṃsamaṅgino dabbanti dhammo, guṇo. Iddhieva dhammo iddhidhammo, tehi dhammehi. **Upetanti** samannāgataṃ. Upagacchati sampajjatīti upeto, munindo. Upapubbaidhātu gatiyaṃ ta. Taṃ upetaṃ.

Iddhi pana adhiṭṭhānā iddhi, vikuppanā iddhi, manomayā iddhi, ñāṇavipphārā iddhi, samādhivipphārā iddhi, ariyā iddhi, kammavipākajā iddhi, puññavato iddhi, vijjāmayā iddhi, tattha tattha sammāpayogapaccayā ijjanaṭṭhena iddhi cāti dasavidhā hoti. Tattha pakatiyā eko bahukaṃ āpajjati. Satam vā sahasam vā āvajjitvā ñāṇena adhiṭṭhāti bahuko homīti evaṃ vibhajitvā dassitā iddhi adhiṭṭhāna vasena nipphannatā adhiṭṭhānā iddhi nāma. Pakativannaṃ vijahitvā kumāraṇṇam vā dasseti nāgavaṇṇam vā supaṇṇavaṇṇam vā yakkhavaṇṇam vā...pe... vividhampi senābyūhaṃ dassetīti evaṃ āgatā iddhi pakativannaṃvijahanavikārasena pavattatā vikuppanā iddhi nāma. Idha bhikkhu imamhā kāyā aññaṃ kāyaṃ abhinimmināti rūpaṃ manomayanti iminā nayena āgatā iddhi sarīrabhantare aññasseva manomayassa sarīrassa nipphattivaseṇa pavattatā manomayā iddhi nāma. Ñāṇuppattito pubbe vā pacchā vā taṅkhaṇe vā ñāṇānubhāvanibbattā visesā ñāṇavipphārā iddhi nāma. Ettha ca āyasmato bākulattherassa ca āyasmato saṃkiccatherassa ca āyasmato bhūtapālattherassa ca ñāṇavipphārā iddhi veditabbā. Samādhito pubbe vā pacchā vā taṅkhaṇe vā samathānubhāvena nibbattā visesā samādhivipphārā iddhi nāma. Ettha ca āyasmato sārīputtattherassa ca āyasmato sañjīvattherassa ca āyasmato khāṇuḥkoṇḍaññattherassa ca uttarāya upāsikāya ca sāmāvatīyā upāsikāya ca samādhivipphārā iddhi veditabbā.

Paṭikūlādīsu appaṭikūlasaññī vihārādīkā pana ariyā iddhi nāma. Pakkhidevādīnaṃ vehāsagamanādīkā kamma vipākajā iddhi nāma. Yathāha “katamā vipākajā iddhi. Sabbesaṃ pakkhīnaṃ sabbesaṃ devānaṃ ekaccānaṃ manussānaṃ ekaccā nañca vinipātikānaṃ ayaṃ kammavipākajā iddhi”tiādi. Cakkavattiādīnaṃ vehāsagamanādīkā pana puññavato iddhi nāma. Yathāha “katamā puññavato iddhi. Rājā cakkavatti vehāsaṃ gacchati saddhiṃ caturāṅginīyā senāya antamaso assabandhagobandhapurise upādāya. Jotikassa gahapatissa puññavato iddhi. Jaṭilassa gahapatissa puññavato iddhi. Ghosakassa gahapatissa puññavato iddhi. Meṇḍakassa gahapatissa puññavato iddhi. Pañcannaṃ mahāpuññānaṃ puññavato iddhi”ti. Vijjādhārādīnaṃ vehāsagamanādīkā pana vijjāmayā iddhi nāma. Ettha ca ādisaddena ākāse antalikkhe hatthimpi dasseti. Assampi...pe... vividhampi senābyūhaṃ dasseti tyādiṃ saṅgaṇhāti. Tena tena sammāpayogena tassa tassa kamma ijjhanaṃ tattha tattha sammā payogapaccayā ijjanaṭṭhena iddhi nāma.

Ayaṃ panettha saṅkhepo. Vitthāro pana **paṭisambhidāmagge** iddhikathāya ca **visuddhimaggaṭṭhakathāya** ca gahetabbo. Tāsu pana iddhīsu bhagavato ṭhapetvā vijjāmayiddhiṃ avasesā atthīti veditabbā. Atha vā bhagavato tīhi vijjāhi ca aṭṭhahi vijjāhi ca samannāgatattā sabbā buddhaiddhiyo santīti vijjāmayiddhipi labbhatīti daṭṭhabbā. Taṃ munindaṃ ahaṃ vande vandāmīti sambandho.

Ayaṃ panettha **saṅkhepatthayojanā**. Parahitakaro attanā paresaṃ sabbasattānaṃ atthaṃ payojanaṃ karonto, yo munindo yo yādiso buddho, kaṇḍambaṃmūle kaṇḍanāmikena pasenadikosalarañño uyyānapālena ropitassa setambarukkhassa samīpe sannisinno vasamāno accheraṃ vimhāpanīyaṃ nayanasubhagaṃ devamanussānaṃ pasāda cakkhussa sobhanapattam ākulaṇṇaggiyālaṃ parikiṇṇaudaka dhāraaggisikhavantaṃ parisamantato kulaṃ parikiṇṇam aññamañña missakaṃ yamakaṃ yamakaṃ udakajālaaggijālavantaṃ vā, dujjāladdhaṃsaṃ duṭṭhum micchādīṭṭhivādasāṅkhātāṃ jālaṃ viddhaṃsitāṃ, munibhijahitaṃ sabbasammāsambuddhehi avijahitaṃ, pāṭiheraṃ paccanīka pāṭihāraṃ pāṭihāriyaṃ udakaggiyamakāmyamakaṃ pāṭihāriyaṃ

vā, sīghaṃ khippaṃ akāsi akari, seṭṭhaṃ pasatthataṃ, paramaratijaṃ devamanussānaṃ uttamaratiṃ janakaṃ uttamānaṃ sādhuṇaṃ cittaramanaṃ janāpetāṃ vā, iddhidhammehi acinteyyaappameyyehi buddhaiddhi guṇehi upetaṃ samannāgataṃ, taṃ munindaṃ ahaṃ sirasā vande vandāmi.

Ekūnavīsativandanaḡāthāvaṇṇanā samattā.

20. Munindakko yveko dayudayaṛuṇo ṇāṇavitthiṇṇabimbo, vineyyappāṇoghaṃ kamalakathitaṃ dhammaraṃsīvarehi. Subodhesī suddhe tibhavakuhare byāpitakkittinaṇca, tilokekaccakkhuṃ dukhamasahanaṃ taṃ mahesiṃ namāmi.

20. Evaṃ ekūnavīsativāya ḡāthāya munindaṃ vanditvā idāni vineyyappāṇoghaṃ dhammadesanāya catusaccadhammaṃ bodhaneyyādīhi navahi guṇehi thomitvā munindakkaṃ vanditukāmo **munindakkotyādigāthamāha**. Ayaṃ pana ya ma na sa ra ragaṇehi ca ekagaruṇā ca chayatihi ca sattayatihi ca racitattā ekūnavīsatakkharā meghavipphujjitāḡāthāti daṭṭhabbā. Vuttaṇhi **vuttodaye** “rasutvassehi ymā na sa ra ra garū meghavipphujjitā sā”ti. Ayaṃ panettha yojanā. Yassaṃ paṭipādaṃ rasutvassehi cha cha satta yatihi ymā yagaṇamagaṇā ca na sa rara garū nagaṇa sagaṇa ragaṇa ragaṇa ekagaru ca ce yuttā, sā ḡāthā meghavipphujjitā megha vipphujjitā ḡāthā nāmāti. Ettha ca rasānaṃ kasāva titta madhuralavaṇa ambila kaṭukavasena chabbidhattā rāsasaddo chasaṅkhyāvācakoti daṭṭhabbo. Utūnaṃ hemanta sisīra vasanta gimhavassānasaradavasena chabbidhattā utusaddo chasaṅkhyāvācakoti. Assasaddo sattasaṅkhyāvācakoti daṭṭhabbo. Assasaddassa hi sattasaṅkhyāvācakabhāvo **chandaṭṭikāsu** vuttoti.

Tattha pana dayudayaṛuṇo ṇāṇavitthiṇṇabimbo eko yo munindakko suddhe tibhavakuhare kamalakathitaṃ vineyyappāṇoghaṃ dhammaraṃsīvarehi subodhesi byāpitakkitti naṇca tilokekaccakkhuṃ dukhamasahanaṃ mahesiṃ taṃ munindakkaṃ namāmi yojanā.

Imissā ḡāthāya ca atthakkameneva sukhajānanatthaṃ vaṇṇayissāma, na saddakkamena.

Dayudayaṛuṇoti padassa dayāudayaṛuṇoti padavibhāgo kātabbo.

Mahākaruṇāsāṅkhātaudayaṛuṇoti padavibhāgo kātabbo. Atha vā udayapabbato uggatasūriyāṛuṇo viya mahākaruṇā vāti attho. Ettha ca dayāsaddo karuṇāmettāsu vattati. Adayāti vuccati nikkaruṇatanti ettha hi karuṇāyaṃ. Dayāpannoti ettha mettāyaṃ vattati. Mettācittataṃ āpannoti attho. Idha pana karuṇā adhippetā.

Ayaṃ pana vacanatto. Dayati hiṃsati kāruṇikaṃ yāva yathādhippetaṃ parassa hitanibbattiṃ na pāpuṇāti tāvāti dayā, mahākaruṇā. Dayadhātu hiṃsāyaṃ a. Dayati anuggaṇhāti pāpajanampi etāyāti vā dayā. Dayadhātu anuggaṇhe. Dayati attano sukhampi pahāya khedaṃ gaṇhātīti vā dayā. Dayadhātu gahaṇe. Atha vā dayanti gaṇhanti etāya bodhisattā saṃsāradukkhaṇca sabbaññutaññaṇcāti dayā, mahākaruṇā. Mahābodhisattā hi buddhabhāvāya abhinīhāraṇakāle hatthagatampi arahatta phalaṃ chaṭṭetvā saṃsārasāgarato satte samuddharitukāmā anassāsakaraṃ atibhāyānaṃ saṃsāradukkhaṃ pacchimabhava ca saha amatadhātupaṭilābhena anekaguṇasamalaṅkataṃ sabbaññutaññaṇca gaṇhantīti attho. Karuṇāmūlakā hi sabbe buddhaguṇā. Tena vuttaṃ **aṅguttaraṭṭikāyaṃ** “sabbesaṇca buddhaguṇānaṃ karuṇā ādi, tannidānabhāvato”ti.

Api ca dayanti anurakkhanti satte etāya, sayāṃ vā anuddayati anudayamattameva vā etanti dayā. Dayadhātu anurakkhaṇe apaccayo. Udeti vaḡḡhetīti udayo, pabbato. Udidhātu pasavane ṇa. Āsamantato ālokaṃ karonto uṇati gacchatīti aruṇo, sūriyaraṃsī viseso. Āpubbaṇadhātu gatiyaṃ ṇa. Dayāsāṅkhātato udayapabbato uggatasūriyassa aruṇo yassāti dayudayaṛuṇo. Atha vā udayapabbato uggatasūriyāṛuṇo viya dayā mahākaruṇā yassāti dayudayaṛuṇo, munindakko. Yathā hi uggatasūriyassa aruṇo ālokassa ādi hoti, evaṃ bodhisatto dīpaṅkarabuddhassa pādāmūle karopayātaṃ nibbānasukhamosajja mahākaruṇāya saṃsārasamuddato satte samuddharitukāmo buddhabhāvāya sudukkarā dānādayo dasa pāramiyo ca paṇca mahāpariccāge ca kappasatasahassādhikāni cattāri asaṅkhyeyyāni akāsīti karuṇā buddhabhāvāya ādi. Tasmā buddhasseva dayudayaṛuṇoti abhitthavitūṃ arahatīti vuttaṃ hoti.

Ñāṇavitthiṇṇabimboti sabbaññutañāṇasaṅkhāto vitthāra parimaṇḍalo.

Vitthāracakkavāḷamaṇḍalaṃ viya vipulārammaṇa sabbaññutañāṇavā. Saṅkhatāsaṅkhatābhedaṃ sabbeñeyyadhammaṃ jānātīti ñāṇaṃ, sabbaññutañāṇaṃ. Ñādhātu avabodhaneyu. Visesena tanoti vitthāretīti vitthiṇṇaṃ, ñāṇaṃ. Vipubbatanudhātu vitthāre tapaccayo. Tassa iṇṇādeso. Dhātvantassa lopo, asarūpadvittaṃ. Atha vā vittharati pattharatīti vitthiṇṇaṃ. Tharadhātumevettha viseso. Vamati parimaṇḍalākārena gacchati pavattatīti bimbaṃ, ñāṇamaṇḍalaṃ. Vamadhātu gatiyaṃ bo. Assi. Vassa bo.

Nvādimoggallāne pana “vama uggiraṇe ba. Vamissa vassa bittaṃ. Vamati uggiratīti bimbaṃ, sarīra’nti vuttaṃ. Taṃ pana bimbasaddassa sarīravācāke yuttameva. Na parimaṇḍalavācāke. Idha pana bimbasaddassa parimaṇḍalavācākatā. Ācariyā pana idha bimbasaddassa atthaṃ cakkamaṇḍalanti vadanti. Taṃ pana vicāretabbaṃ. Kasmā, **abhidhānappadīpikāyaṃ** “bimbaṃ tu paṭibimbe ca, maṇḍale bimbikāphale”ti ca. **Taṭṭikāyaṇca** “maṇḍale paṭimaṇḍale”ti ca vuttatā. Ñāṇaṃ sabbaññutañāṇasaṅkhātaṃ vitthiṇṇaṃ vitthāraṃ bimbaṃ parimaṇḍalaṃ assāti ñāṇavitthiṇṇabimbo. Atha vā vitthiṇṇaṃ vitthāraṃ bimbaṃ cakkavāḷaparimaṇḍalaṃ viya vipulārammaṇaṃ ñāṇaṃ sabbaññutañāṇaṃ assāti ñāṇavitthiṇṇabimbo, munindakko. Yathā hi cakkavāḷassa anantattā cakkavāḷamaṇḍalaṃ vipulaṃ mahantaṃ hoti, eva meva buddhassa sabbaññutañāṇaṃ anantārammaṇattā vipulaṃ mahantaṃ. Tasmā tassa ñāṇavitthiṇṇabimboti thometīti. **Yvekoti** yo ekoti padacchedo. Yekotipi katthaci pāṭho. Tassa pana yo ekoti padacchedo kātabbo. Taṃ pana pāṭhadvayaṃ yuttameva. Yvekoti hi pāṭhe ādesasandhi hoti. Yekoti pāṭhe pana lopsandhīti ayametesam viseso. Yo munindakkoti sambandho.

Ekoti asahāyo, adutiyako eka buddhabhūtoti attho. Ettha ca ekasaddo aññaseṭṭhāsahāya saṅkhyādīsu dissati. Tathāhesa sassato attā ca loko ca, idameva saccaṃ moghamaññanti ittheke abhivadantītiādīsu aññatthe dissati. Cetaso ekodibhāvantiādīsu seṭṭhe. Eko vūpakaṭṭhotiādīsu asahāye. Ekova kho bhikkhave khaṇo ca samayo ca brahmacariyāyātiādīsu saṅkhyāyaṃ. Idha pana asahāye adhippeto. Ayaṃ panassa vacanatto. Asahāyo hutvā eti gacchati pavattatīti eko, adutiyako hutvā anuttaraṃ sammāsambodhiṃ eti jānāti paṭivijjhatīti vā eko, munindakko. Edhātu idhātu vā ñāṇagatīsu ṇvu. Atha vā eko bhagavā pabbajjasaṅkhātena eko. Adutiyaṭṭhena eko, taṇhāya pahānaṭṭhena eko, ekantavītarāgoti eko, ekantavītadosoti eko, ekantavītamohoti eko, ekantanikkilesoti eko, ekāya maggaṃ gatoti eko, anuttaraṃ sammāsambodhiṃ abhisambuddhoti ekotiādīnā āgatena mahāniddeśanayenapettha attho veditabbo.

Api ca anantacakkavāḷesuyeva ekova buddho eti uppajjati vikaṣati vāti eko. Vuttañhi ekanipāta **añguttara pāḷiyaṃ** “aṭṭhānametaṃ bhikkhave anavakāso, yaṃ ekissā lokadhātuyā dve arahanto sammāsambuddhā apubbaṃ acarimaṃ uppajjeyyūṃ, netam ṭhānaṃ vijjati. ṭhānaṇca kho etaṃ bhikkhave vijjati, yaṃ ekissā lokadhātuyā ekova arahaṃ sammāsambuddho uppajjeyya, ṭhānametaṃ vijjati”ti. **Tadaṭṭhakathāyaṇca** “ekissā lokadhātuyāti dasasahassilokadhātuyā. Tīṇi hi khetṭāni jātikkhetaṃ āṇakkhettaṃ visayakkhetṭanti. Tattha jātikkhetaṃ nāma dasasahassilokadhātu. Sā hi tathāgatassa mātukucchiṃ okkamanakāle nikkhamanakāle sambodhikāle dhammacakkappavattane āyu saṅkhāravossajjane parinibbāne ca kampati, koṭisatasahassa cakkavāḷaṃ pana āṇakkhettaṃ nāma. Āṭṭhāyaparitta moraparittadhajaggaparitta ratanaparittādīnañhi ettha āṇā pavattati. Visayakkhetṭassa pana parimāṇaṃ natthi. Buddhānañhi yāvatakaṃ ñāṇaṃ, tāvatakaṃ ñeyyaṃ. Yāvatakaṃ ñeyyaṃ, tāvatakaṃ ñāṇaṃ. Ñāṇapariyantikaṃ ñeyyaṃ, ñeyyapariyantikaṃ ñāṇanti vacanato avisayo nāma natthi. Imesu pana tīsu khettesu ṭhapetvā imaṃ cakkavāḷaṃ aññasmim cakkavāḷe buddhā uppajjantīti suttaṃ natthi. Na uppajjantīti pana atthi. Tīṇi hi piṭakāni vinayaṭṭhakaṃ, suttantaṭṭhakaṃ, abhidhammaṭṭhakaṃ. Tisso saṃgītiyo mahākassapattherassa saṃgīti, yasattherassa saṃgīti, moggaliputtattherassa saṃgīti, imā tisso saṃgītiyo āruḷhe teṭṭhake buddhavacane imaṃ cakkavāḷaṃ muñcitvā aññattha buddhā uppajjantīti suttaṃ natthi. Na uppajjantīti pana atthi”ti.

Ettha ca ekissā lokadhātuyāti dasasahassi lokadhātuyāti idaṃ jātikkhetaṃ sandhāya vuttaṃ. Dasasahassilokadhātu hi imaṃ lokadhātuṃ parivāretvā ṭhitā hoti. Tattakānaṃyeva jātikkhetaṃbhāvo dhammatā vasena veditabbo. Imesu pana tīsu khettesūti iminā dasasahassilokadhātusaṅkhāte jātikkhette koṭisatasahassacakkavāḷasaṅkhāte āṇakkhetṭe anantacakkavāḷa saṅkhāte visayakkhetṭe

cāti imesu tīsu buddhakkhettesu ito cakkavāḷato aññesu anantacakkavāḷesu buddhā nuppajjantīti dasseti. Tividhañhi buddhakkhettaṃ dassetvā imesu pana tīsu khettesūti ādhārabhāvena vuttaṃ, na niddhāraṇabhāvena. Kasmā, aṭṭhakathāyaṃ niddhāraṇīyapadassa abhāvato. Sati hi aṭṭhakathācariyo tassa padassa niddhāraṇatthe adhippete imesu tīsu khettesu āṇakkhette ṭhapetvā imaṃ cakkavāḷantiādi vucceyya. Na. Tasmā tassa padassa ādhāratthoyeva gahetabbo. Pubbanissayā cariyehi ca tassa padassa ādhārabhāvena atthayojanā katāti. Tatheva pana **abhidhammañāṇavibhaṅgapāliyañca**, tadaṭṭhakathāyañca uparipañṇāse **bahudhātusuttapāliyañca**, tadaṭṭhakathāyañca **nettipāliyañca** tadaṭṭhakathāyañca taṃ kāraṇaṃ āgatamevāti. Taṃ **aṅguttaraṭṭhikāyaṃ** pana “na uppajjantīti pana atthīti na me ācariyo atthi, sadiso me navijjatītiādi. Imissā lokadhātuyā ṭhatvā vadantena bhagavatā kiṃpanāvuso sārīputta atthetarahi añño samaṇo vā brāhmaṇo vā bhagavatā samasamo sambodhiyanti evaṃ puṭṭhoḃhaṃ bhante noti vadeyyanti vatvā tassa kāraṇaṃ dassetuṃ aṭṭhānametaṃ anavakāso, yaṃ ekissā lokadhātuyā dve arahanto sammāsambuddhā apubbaṃ acarimaṃ uppajjeyyunti imaṃ suttaṃ āharantena dhamma senāpatinā ca buddhakkhettabhūtaṃ imaṃ lokadhātuṃ ṭhapetvā aññattha anuppatti vuttā hotīti adhippāyo”ti vuttaṃ. Tatheva pana **ñāṇavibhaṅgamūlaṭṭhikāyaṃ**, **uparipañṇāsabahudhātu suttaṭṭhikāyañca** vuttaṃ. Ettha ca imaṃ lokadhātuṃ ṭhapetvā aññattha anuppatti vuttā hotīti iminā buddhakkhettabhūtato ito cakkavāḷato aññesu anantacakkavāḷesu buddhānaṃ anuppatti dassitā hoti. Aññatthāti hi sāmāññena vuttepi aṭṭhakathāyaṃ vuttana imesu tīsu khettesūti saddantarāsannidhānena anantacakkavāḷabhūto visesattho gahetabbo. Sāmāññavacanopi hi saddo saddantarāsannidhānena visesavisayoti.

Ayaṃ panettha aparo nayo. Aṭṭhakathāyaṃ vutte buddhā hi uppajjamānā imasmimyeva cakkavāḷe uppajjanti. Uppajjanatthāne pana vārite ito aññesu cakkavāḷesu nuppajjantīti vāritameva hotītiattha vākye imasmim yevātipade samabhinivīṭṭho evasaddo nivattāpanāvadhāraṇattho. Etena aññesu anantacakkavāḷesu aññesaṃ buddhānaṃ uppattiṃ nivatteti. Yādipi hi aññesu anantacakkavāḷesu aññe buddhā uppajjeyyūṃ. Evaṃ santesu saṅkhatāsaṅkhatābhedaṃ sabbadhammaṃ jānanto passanto amhākaṃ bhagavā aññacakkavāḷesu aññe buddhā uppajjantīti evaṃ vucceyya. Na. Taṇhākarādayo hi aṭṭhavīsati sambuddhā ito cakkavāḷato aññesu cakkavāḷesu uppajjantītivacanaṃ tepiṭake buddhavacane natthi, tathā aṭṭhakathā ṭṭhikāsu ca. Tasmā ito cakkavāḷato aññesu ananta cakkavāḷesu aññe buddhā nuppajjantīti daṭṭhabbā. Vuttañhettaṃ suttantamahāvaggaṭṭhakathāyaṃ **mahāsamayasuttavaṇṇanāyaṃ** –

“Athassa etadahosi mādiso buddhoyeva sakkuṇeyya. Atthi pana katthaci añño buddhoti anantāsu lokadhātūsu anantaññāṇaṃ pattharivā olokeno aññaṃ buddhaṃ na addasa. Anacchariyañcetamaṃ, yaṃ idāni attanā samaṃ na passeyya. Yo jātadivasepi brahmajālasuttavaṇṇanāyaṃ vuttanayena attanā samaṃ apassanto aggohamasmi lokassāti appaṭivattiyamaṃ sīhanādaṃ nadi. Evaṃ aññaṃ attanā samaṃ apassitvā cintesī”ti. Tathevetamaṃ. Purābhedasutta **mahāniddesaṭṭhakathāyañca**, taṃ **mahāsamayasuttaṭṭhikāyañca** ekissā lokadhātuyāti sutte āgatanayena sabbattheva pana apubbaṃ acarimaṃ dve buddhā nāma na honteva. Tenevāha “anantāsu loka dhātūsu...pe... na addasā”ti saṃvaṇṇeti.

Apaṇṇakajātakaṭṭhakathāyañca “sattā upāsakā heṭṭhā avīciṃ upari bhavaggaṃ paricchedaṃ katvā aparimāṇāsu lokadhātūsu sīlādīhi guṇehi buddhena sadiso nāma natthi. Kuto adhikataro...pe... āhā”ti vuttaṃ. Imāsu dvīsu aṭṭhakathāsu ca anantāsu lokadhātūsūti ca aparimāṇāsu lokadhātūsūti ca anantaaparimāṇa saddena vuttaṃ. Tehi dvīhi saddehi ṭṭhikāvācānena ca anantāsu lokadhātūsu aññesaṃ buddhānaṃ anuppattiṃ dasseti.

Sammohavinodanīaṭṭhakathāya yojanāyaṃ pana imesu panātiādinā koṭisatasahassa cakkavāḷato aññasmim cakkavāḷe buddhā na uppajjantīti ñāpeti. Mayaṃ pana evaṃ vitakkayāma. Aññasmim cakkavāḷeti ito cakkavāḷato aññesu sabbesupi tīsu buddhakkhettesūti atthe gayhamāne sati koṭisatasahassacakkavāḷato aññasmim cakkavāḷe buddhā na uppajjantīti viññāyati. Yadi pana aññasmim cakkavāḷeti ito aññasmim jātiāṇākhettabhūte cakkavāḷeti atthe gahite koṭisatasahassacakkavāḷato aññasmim cakkavāḷe buddhānaṃ uppatti bhavyeyyāti viññāyati. “Aṭṭhānametaṃ anavakāso, yaṃ ekissā lokadhātuyā dve arahanto sammāsambuddhā”tiādiṭṭhāya ca. “Aṭṭhānametaṃ anavakāso, yaṃ ekissā lokadhātuyā dve rājāno cakkavattī”tiādiṭṭhāya saddhim

kathanato koṭisatasahassacakkavāḷato buddhānaṃ anuppatti viya aññissā lokadhātuyā cakkavattirañño anuppatti bhaveyya. **Kathāvatthupparakaṇe** ca koṭisatasahassacakkavāḷato aññasmim cakkavāḷe buddhānaṃ uppatti na paṭisedhitā. Tasmā āṇakkhettabhūto koṭisatasahassacakkavāḷato aññasmim cakkavāḷe buddhassa bhaveyyāti ayaṃ amhākaṃ khanti. Vīmaṃsetvā gahettabbanti vuttaṃ.

Ettha ca yaṃ kathāvatthupparakaṇe ca...pe... na paṭisedhitāti vuttaṃ. Taṃ pana kathāvatthupāḷiyaṃ nattheva. Imissā pana sabbadisākathāyaṃ paravādīnaṃ parikkappavacanamatameva atthi. Tena vuttaṃ tassaṃ pāḷiyaṃ “sabbadisā buddhā tiṭṭhantīti. Āmantā. Puratthimāya disāya buddho tiṭṭhatīti. Nahevaṃ vattabbe...pe... puratthimāya disāya buddho tiṭṭhatīti. Āmantā. Kinnāmo so bhagavā kiṃjacco kiṃgotto, kinnāmā tassa bhagavato mātāpitaro, kinnāmaṃ tassa bhagavato sāvakaṃyugaṃ, ko nāmo tassa bhagavato upaṭṭhako, kiṃdisaṃ cīvaraṃ dhāreti, kiṃdisaṃ pattaṃ dhāreti. Katarasmim gāme vā nigame vā nagare vā raṭṭhe vā janapade vāti. Nahevaṃ vattabbe”tyādi.

Tadaṭṭhakathāyaṃ pana “idāni sabbadisākathā nāma hoti. Tattha catūsu disāsu heṭṭhā uparīti samantato lokadhātusannivesaṃ sabbalokadhātūsu ca buddho atthīti attano vikappasippaṃ uppādetvā sabbadisāsu buddhā tiṭṭhantīti yesaṃ...pe... seyyathāpi mahāsaṅghikānaṃ, te sandhāya pucchā sakavādissa. Paṭiññā itarassa. Puratthimāyāti puṭṭho sakyamuniṃ sandhāya paṭikkhipati. Puna puṭṭho laddhivasena aññalokadhātuyāṃ ṭhitāṃ sandhāya paṭijānāti. Kinnāmo so bhagavātiādi sace tvāṃ jānāsi. Nāmādivasena naṃ kathehīti codanattaṃ vuttaṃ. Iminā upāyena sabbattha attho veditabbo”ti vuttaṃ. Ettha ca catūsu disāsu...pe... seyyathāpi mahāsaṅghikānanti iminā paravādīnaṃ laddhiṃ dasseti. Tattha pana catūsu disāsu ca heṭṭhā ca upari ca iti evaṃ samantato lokadhātusannivesaṃ atthīti yojanā. Yesaṃ...pe... mahāsaṅghikānanti yesaṃ paravādīnaṃ laddhi hoti. Kesaṃ laddhi viya. Mahāsaṅghikānaṃ laddhi seyyathāpīti attho. Te sandhāyāti te paravādīpuggale sandhāya nānena dhāretvā sallakkhetvāti attho. Pucchā sakavādissāti sakavādissa sabbadisāsu buddhā tiṭṭhantīti pucchā hoti. Paṭiññā itarassāti paravādissa paṭijānanā hoti. Puratthimāyāti puṭṭhoti sakavādinā puratthi māyātiādinā pucchite sati. Sakyamuninti sakyavaṃsa khattiyajātībhūtaṃ amhākaṃ gotamabuddhaṃ sandhāya. Paṭikkhipatīti paravādīpuggalo apaneti. Puna puṭṭhoti sakavādinā puna puratthimāya buddho tiṭṭhatīti pucchite sati. Laddhivasenāti attano aññalokadhātuyāṃ buddho atthi ca uppajjati cāti micchāladdhivasena paṭijānātīti paravādī puggalo paṭijānāti. Yadi pana aññalokadhātuyāṃ buddho tiṭṭhati. Evaṃ sati tassa nāmagottādiṃ tvāṃ kathehīti sakavādissa codanāvacaṇaṃ dassetuṃ kinnāmo so bhagavātiādimāha. Iminā ca ito cakkavāḷato aññesu anantacakkavāḷesu aññesaṃ buddhānaṃ abhāvaṃ dasseti. Tena vuttaṃ **kathāvatthupāḷiyaṃ** “kinnāmo so bhagavā kiṃjacco...pe... janapadevāti. Nahevaṃ vattabbe”ti.

Ettha ca pana sakavādinā kinnāmotyādinā pucchite paravādīpuggalo attano laddhiyā sabbalokadhātūsu uppajjamānānaṃ buddhānaṃ nāmādiṃ ajānanto apassanto na hevaṃ vattabheti paṭikkhipati. Tasmā panettha sakavādī puggalassa laddhiyā aññesu anantacakkavāḷesu aññesaṃ buddhānaṃ uppajjanābhāvo viññāyati. Yādipi hi aññānantacakkavāḷesu aññabuddhā uppajjeyyūṃ. Evaṃ santesu buddhassa matim yathābhūto jānanto passanto mahāpañño iddhiṃ dibbacakkhuādīhi chaḷabhiññehi sampanno paṭisambhidā patto satthārā dinnamātikāyena kathāvatthupāḷim desento āyasmā mahāmoggaliputtatthero aññānantacakkavāḷesu aññabuddhānaṃ uppattim katheyya ca. Nāti. Tasmā ayaṃ kathāvatthupāḷi ca tadaṭṭhakathāvacaṇaṃ aññānantacakkavāḷesu aññabuddhānaṃ abhāvādīpane sabbatṭhakathāṭikāsu vuttavacaṇehi daḷhataraṃ padhānavacaṇameva hotīti daṭṭhabbaṃ.

Na pana buddhāeva aññānantacakkavāḷesu na uppajjeyyūṃ, atha kho laddhabyākaraṇā mahābodhisattā ca paccekabodhi sattā aggasāvakaṃmahāsāvakaṃbodhisattā paripākandriyā sāvakaṃbodhisattā ca buddhakkhettabhūte imasmimyeva cakkavāḷe uppajjanti, na aññattha. Kasmā, tesu buddhānaṃ anuppannattā, tesam pana abhinīhāro pāramīsambharaṇaṃ nānaparipācanaṃca tasmimeva samijjhati, na aññattha. Tena vuttaṃ **mahāpadāna suttaṭṭikāyaṃ** –

“Purimabuddhānaṃ mahābodhisattānaṃ paccekabuddhānaṃca nibbattiyā sāvakaṃbodhisattānaṃ sāvakaṃbodhiyā abhinīhāro sāvakaṃpāramiyā sambharaṇaṃ paripācanaṃca buddhakkhettabhūte

imasmim cakkavāle jambudīpeeva ijjhati, na aññatthā’’ti. Tatthevetam
ekaniṭṭānaṅguttaraṭṭikāyañcāti.

Etarahi pana apare ācariyā ‘‘āṅakkhettabhūtaṭo koṭisatasahassacakkavāḷato aññesu cakkavāḷesu buddhā uppajjantī’’ti vadanti. Tesam pana vacanam ayuttameva. Kasmā, aṭṭhakathāyam vutte aññasmim cakkavāḷeti ettha aññasaddassa ṭhapetvā imam cakkavāḷantipadato aññassa apādānassa asambhavato ca anantacakkavāḷesu bahūsu buddhesu uppannesu buddhassa anacchariyattā ca. Acchariyamanusso hi sammāsambuddho. Vuttañhi ekaniṭṭāna **āṅguttarapāḷiyam**

‘‘Ekapuggalo bhikkhave loke uppajjamāno uppajjati acchariyamanusso. Katamo ekapuggalo, tathāgato araham sammāsambuddho. Ayam kho bhikkhave ekapuggalo loke uppajjati acchariyamanusso’’ti. Aññam pana kāraṇam mayā heṭṭhā vuttanayenapi viññūhi viññātabbanti. Aññe pana ācariyā **buddhaapadānapāḷiyam** –

‘‘Disā dasavidhā loke, yāyato natthi antakam;
Tasmiṅca disābhāgamhi, buddhakkhetta asaṅkhayā;
Pabhā pakittitā mayham, yamakā raṃsivāhanā;
Etthantare raṃsijālam, āloko vipulo bhavē’’ti.

Vuttāsu dvīsu gāthāsu paṭhamagāthāya attham buddhassa anādhippāyena gahetvā micchāñāṇena aññānantacakkavāḷesu uppajjamānā buddhā asaṅkhayāti vadanti. Tesam panetam ayuttameva asundameva. Kasmā, pāḷiyā ca aṭṭhakathāṭṭikāvacanehi ca viruddhattā ca tassā gāthāya atthaggaṇassa micchattā ca. Imāya hi pāḷiyā gāthāya vā aññānantacakkavāḷesu aññe buddhā uppajjantīti atthe gayhamāne aṭṭhakathāsu imesu pana tīsu khettesu ṭhapetvā imam cakkavāḷam aññasmim cakkavāḷe buddhā uppajjantīti suttam natthi, na uppajjantīti pana atthīti vuttavacanena ca, tīni hi piṭakāni...pe... imā tisso saṃgītiyo āruḷhe teṭṭake buddhavacane...pe... suttam natthi. Na uppajjantīti pana atthīti vuttavacanena ca ujukam virujjhati ca. Bhaddantamahā buddhaghosādayo aṭṭhakathācariyā tam pāḷim na passantīti attano duggahitena aṭṭhakathācariyānam abbhakkhānam āpajjati ca. Kim panete tiṭṭakadharā tikkhavisadajavana gambhīrādīñāṇikā aṭṭhakathācariyā na passeyyum. Passeyyum eva. Tasmā ayuttameva. Aṭṭhakathāsu pana āgatam suttam natthītiādivacanameva yuttataram hotīti daṭṭhabbam.

Ettha ca buddhakkhettipadam tasmiṅca disābhāgamhītipade visesanam, asaṅkhayātipadam dutiyagāthāya pabhātipadassa visesananti daṭṭhabbam. Ayam panettha yojanā. Loke cakkavāḷaloke dasavidhā dasa koṭṭhāsā disā honti. Tattha koṭṭhāse yāyato yāyantassa gacchantassa me antakam pariyoṣānam natthi. Buddhakkhetta buddhassa dasahassisaṅkhātājātikkhettabhūte tasmiṅca disābhāgamhi mayham asaṅkhayā saṅkhārahitā yamakā yugaḷā yugaḷā hutvā raṃsivāhanā raṃsivahantā raṃsimuṅcamānā vā pabhā cakkaratanaṃiratanādīnam ālokā pakittitā pākāṭā pattharītā vā. Etthantare dasahassacakkavāḷantare raṃsijālam raṃsisamūhena vipulo bahutaro āloko bhavē ahosinti. Ayamatto cakkindābhisirīsaddhamma dhajamahādhammarājādhirājagurūtiladdhalañchitena ācariyabudhena likhitoti daṭṭhabbo.

Bhagavā hi imāhi gāthāhi cakkavattirājakāle mayhamcakkaratanaṃiratanādīnam asaṅkhayā pabhā buddhakkhettabhūte dasahassacakkavāḷe pākāṭā pattharītāti dasseti. Na anantacakkavāḷesu uppajjanabuddhānam asaṅkhayabhāvanti.

Vuttañhetam **buddhaapadānaṭṭhakathāyam** ‘‘disā dasavidhā loketi cakkavāḷaloke dasavidhā dasakoṭṭhāsā disā honti. Tattha koṭṭhāse yāyato yāyantassa gacchantassa antakam natthīti attho. Cakkavattikāle tasmiṅ mayā gataṭṭhāne disābhāge vā buddhakkhetta buddhavisayā asaṅkhayā saṅkhārahitā. Pabhā pakittitāti tadā cakkavattī rājakāle mayham pabhā cakkaratanaṃiratanādīnam pabhā ālokā yamakā yugaḷā yugaḷā hutvā raṃsivāhanā raṃsimuṅcamānā pakittitā pākāṭā. Etthantare dasahassacakkavāḷantare raṃsijālam raṃsisamūham āloko vipulo bahutaro bhavē ahosinti attho’’ti. Ettha ca paṭhamagāthāya pubbaḍḍhassa ekavākyabhāvato disā dasavidhā loketi cakkavāḷaloke... pe... antakam natthīti atthoti vuttam. Aparāḍḍhassa dutiyagāthāyam antogadhattā cakkavattikāle... pe... asaṅkhayā saṅkhārahitā pabhā pakittitāti tadā cakkavattikāle...pe... bhavē ahosinti atthoti

vuttaṃ. Tasmā asaṅkhayātipadaṃ dutiyagāthāya pabhātipadassa visesananti daṭṭhabbaṃ.

Jinālaṅkāraṭīkāyaṃ pana evamassa sabbadhammesu appaṭihata ñāṇācāraṃ dassetvā idāni loke tādisassa aññassa abhāvaṃ dassento āha.

“Anantasattesu ca lokadhātusu,
Ekova sabbepi samā na tenā”ti.

Tattha anantalokadhātūsu ekekissaṃ lokadhātuyā anantasattesu tena tathāgatena samo ekopi natthi. Sace eko pana samo na bhaveyya. Sabbe sattā ekajjhaṃ hutvā samā bhaveyyunti ce. Tathāpi natthi, sabbe ekajjhaṃ hutvāpi iminā ekakena samā na hontīti adhippāyoti vuttaṃ. Ettha ca anantalokadhātusūtiādinā ito cakkavāḷato aññesu anantacakkavāḷesu aññesaṃ buddhānaṃ abhāvaṃ dasseti. Evaṃ pana mayā pathavojaṃ uddharitvā dassito viya dassitehi atidaḷhatarehi sādhakavacanehi ito cakkavāḷato aññacakkavāḷesu buddhā uppajjantīti micchāvādo sūriyo andhakāraṃ paṭihanati viya paṭihaniyati apaniyatīti saddhahakaṃ daṭṭhabboti.

Munindakkoti muninda akkoti padacchedo. Buddhādiccoti attho. Sabbadhamme manati jānātīti muni. Manadhātu ñāṇe i. Makāre assuttaṃ. Atha vā munāti sabbadhamme saka sāmāññalakkhaṇādinā paṭivijjhatīti muni. Munati hitāhitam paricchindatīti vā muni, bhagavā. Munadhātu paṭivijjhane, catusaccadhamme munāti jānātīti vā monaṃ. Catumaggañāṇaṃ. Vuttañhi **saṃyuttaṭṭhakaṭhāyaṃ** “monanti catumaggañāṇaṃ. Tañhi munātīti monaṃ, catusaccadhamme jānātīti attho”ti. Monaṃ assa atthīti muni, bhagavā. Muni ca so indati veneyyasatte dhammena abhibhavati indo cāti munindo, bhagavā. Atha vā munīnaṃ pañcamunīnaṃ indoti munindo, bhagavā. Na kamati na gacchati pādena attano puññajavimānena gacchatīti akko, ādicco. Napubba kamudhātu gatiyaṃ kvi. Dhātvantalopo. Kassa dvittaṃ. Atha vā yugandharubbedhappamaṇe ākāse arati gacchatīti akko. Aradhātu gamane kapaccayo. Kassa dvittaṃ. Taṃ taṃ rāsito taṃ taṃ rāsiṃ arati yātīti vā akko. Atha vā mahantajutatāya akkiyati abhitthaviyati tappasannehi janehīti akko, ādicco. Akkadhātu thavane a. Munindo ca so akko cāti munindakko, akko ādicco viya vā munindoti munindakko, buddho. Yathā hi sūriyo attano sahasaramsiyā ekacakkavāḷe timirandhakāraṃ vidhametvā dine dine navayojanasatasahasappadesaṃ koṭisahasappadesaṃ vā dasadisaṃ vā obhāsetvā virocamaṇo carati, evameva bhagavāpi attano saddhammaraṃ siyā buddhakkhettabhūtesu dasasahasacakkavāḷesu vineyyānaṃ avijjandhakāraṃ vidhametvā dine dine tasmim tasmim disābhāge veneyyasattasamūhaṃ catusaccadhammobhāseṇa jotayamaṇo virocanaṃ caratīti ṭhānānurūpaṃ munindakkoti thometi. Ayaṃ samāsopamā hīnūpamāti daṭṭhabbā.

Suddheti rāgādimalēhi visuddhe. Sujjhati visujjhatīti suddho, tibhavo. Sudhadhātu soceyyeti. **Tibhava kuhareti** tibhavaṅkhātakamalāsare. Kamalāsaraṃ viya tibhavasmiṃ vā bhavanti sattā etthāti bhavo. Bhūdhātu sattāyaṃ ṇa. Tayo bhavā tibhavā, kāmarūpārūpabhūmi labbhati. Kuṃ vuccati udakaṃ, taṃ haratīti kuharo. Kupubbaharadhātu haraṇe a. Tayo bhavā ca te kuharo cāti tibhavakuharo, kuharo viya tayo bhavāti vā tathā. Tasmim tibhavakuhare. **Kamala kathitanti** uppalanti kathetabbaṃ kaṃ jalaṃ alayati vibhūsayatīti kamalaṃ, uppalaṃ. Kaṃsaddūpapada aladhātu vibhūsaṇe a. Atha vā kamiyati icchiatīti kamalaṃ. Kamudhātu icchāyaṃ alapaccayo. Kamalanti uppalanti kathiyatīti kamalakathitaṃ. **Vineyyappāṇoghanti** vineyyapāṇaoghanti padavibhāgo. Vinetabbasattasamūhanti attho. Vinetabbo dametabbo satthārāti vineyyo, satto. Vipubbanidhātu damane ṇyo. Paṇanti jīvanti sattā anenāti pāṇaṃ, jīvitindriyaṃ. Paṇadhātu jīvāyaṃ ṇa. Taṃ assa atthi tasmim vā vijjatīti pāṇo, satto. Assatthitaddhite ṇapaccayo. Vineyyo ca so pāṇo cāti vineyyappāṇo. Avayavena saha hanati gacchati pavattatīti ogho, samūho. Avapubba hanadhātu gatiyaṃ ṇo. Avassa o. Hanassa gho. Vineyyappāṇaṃ ogho samūhoti vineyyappāṇogho, taṃ.

Dhammaraṃsivarehīti uttamadhammasaṅkhātaraṃsīhi. Ettha ca dhammoti yathānusiṭṭhaṃ paṭipajjamāne satte catūsu apāyesu vaṭṭadukkhesu ca apatamāne katvā dhāretīti dhammo. Dharadhātu dhāraṇe rammaṇapaccayo. Dhāreti ca apāyādinibbattakakilesaṃ viddhamsetīti attho. Caturiyamaggo ca nibbānaṅca nippariyāyato labbhati. Kasmā, ariyamaggassa kilesānaṃ samucchedappahānavasena samucchedakattā, nibbānassa ca nissaraṇappahānavasena tassa ārammaṇabhāvaṃ patvā tadatthasiddhihetuttā. Caturiyaphalaṅca pariyattidhammo ca pariyāyato labbhati. Kasmā, phalassa

maggena viddhamsi tabbānaṃ kilesānaṃ paṭippassambhanappahānavasena maggānukūlappa vattattā. Pariyattidhammassa ca tadaṅgappahānavasena tadadhigama hetuttā. Atha vā kilese dhunāti kampati calati viddhamsetīti dhammo, caturiyamaggo. Dhunadhātu kampane rammo. Ariyehi dhāriyati paṭivijjhiyati sacchikariyati ārammaṇa karaṇavasenāti dhammo, nibbānaṃ. Dharadhātu ñāṇe. Dhamseti paṭippassambheti maggappahānakilesavāsananti dhammo, ariyaphalaṃ. Dhamsadhātu viddhamsane. Attano sabhāvaṃ dhāreti ca dhāriyati ca paṇḍitehi na bālehīti dhammo, pariyattidhammo. Dhammo ca dhammo ca dhammo ca dhammo cāti dhammo eka sesanayena, dasavidho dhammo labbhati. Vuttañhetam **chattavimāne** –

“Rāgavirāgamanejamasokaṃ,
Dhammasaṅkhatamappaṭikūlaṃ;
Madhuramimaṃ paguṇaṃ suvibhattaṃ,
Dhammamimaṃ saraṇattamupehī”’ti.

Ayaṃ panettha yojanā. Māṇava rāgavirāgaṃ rāgavigataṃ imaṃ dhammaṃ maggadhammañca anejaṃ ejāsaṅkhātataṇhāviraḥitaṃ asokaṃ sokaviraḥitaṃ imaṃ dhammaṃ phaladhammañca, asaṅkhatam saṅkhataviraḥitaṃ imaṃ dhammaṃ nibbānadhammañca. Appaṭikūlaṃ avirodhanam madhuraṃ atthabyañjana sampannattā madhuraṃ, paguṇaṃ pakaṭṭhaguṇaṃ suvibhattaṃ suṭṭhu vibhajitabbaṃ, imaṃ dhammaṃ pariyattidhammañca saraṇattaṃ saraṇabhāvaṃ upehi upagacchāhīti.

Ettha hi kāmarāgādibhedo sabbopi rāgo virajjati pahiyati etenāti rāgavirāgoti maggo kathito. Ejāsaṅkhātāya taṇhāya antonijjhānalakkhaṇassa ca sokassa taduppattiyā sabbaso parikkhīnattā anejama sokanti phalaṃ kathitaṃ. Kenaci paccayena asaṅkhatattā dhammasaṅkhatanti nibbānaṃ kathitaṃ. Avirodhadīpanato pana atthabyañjanassa sampannatāya pakaṭṭhaguṇavibhāvanato suṭṭhu vibhajitattā ca appaṭikūlantiādīnā sabbopi pariyatti dhammo kathito. Vuttañhi **tadatthakathāyaṃ** “ettha hi rāgavirāganti maggo kathito. Anejamasokanti phalaṃ. Dhammasaṅkhatanti nibbānaṃ. Appaṭikūlaṃ madhuramimaṃ paguṇaṃ suvibhattanti piṭakattayena vibhattā sabbadhammakhandhā”’ti. Idha pana sāmāññato dasavidho dhammo. Visesato pana pariyatti dhammo adhippeto. Kasmā, subodhesīti vuccamānattā. Raṃsīti rasiyanti assādiyantīti raṃsī, rasanti assādentī sattā etāyāti vā raṃsī, rasadhātu assādane a ca ī ca. Atha vā rasiyati sinehiyati taṃ janehīti raṃsī. Rasadhātu sinehe. Niggahītāgamo.

Varoti uttamo, varitabbo patthitabboti varo, varati nivāreti hīnanti vā varo. Varadhātu patthane nivāraṇe vā a. Dhammo ca so raṃsi cāti dhammaraṃsi, dhammassa vā raṃsi dhammaraṃsi. Ayaṃ pana samāso abhedūpacārena vutto. Varo ca so dhammaraṃsi cāti dhammaraṃsivaro, tehi dhammaraṃsivarehi. **Subodhesīti** catusaccadhammaṃ paṭivijjhayamānena suṭṭhu pabodhesi vikāsetīti attho. Yathā hi sūriyo attano raṃsiyā phusayitvā kuhara saṅkhāte sare jātaṃ uppalam vikāseti, evameva bhagavāpi attano dhammadesanāsaṅkhātaraṃsiyā kamalasarasaṅkhāte bhavattaye vasantaṃ puññūpanissayaṃ paṭivijjhārahaṃ kamala saṅkhātaṃ vineyyappāṇogaṃ catusaccadhammaṃ paṭivijjhayamāno phaladhammena pabodhesi vikāsetīti vuttaṃ hoti.

Byāpitakkittinañcāti tiloke patthaṭaparikkittanaṃ. Sīlādiguṇehi patthaṭathutighosikanti attho. Casaddo cettha padapūraṇamattoyeva. Visesena vividhaṃ vā āpati vaḍḍhatīti byāpito. Vipubbaāpadhātu byāpane vaḍḍhane vā ta. Byāpanaṃ vā byāpitaṃ. Kittiyate abhithaviyate kittinaṃ. Bhāvasāadhanoyaṃ. Thutikriyā labbhati. Kittiyati abhithaviyati devamanussehīti kittinaṃ, thutighoso. Kittadhātu abhithavane yu. Byāpito patthaṭo kittano thutighoso yassa soti byāpitakkittino, munindakko. Taṃ. Bhagavato hi tiloke devamanussehi sīlādiguṇehi ca arahaṃ sammāsambuddhotyādīhi guṇehi ca thomito kittisaddo yāva bhavaggaṃ abhuggacchatīti byāpitakkittinanti thomefīti vuttaṃ hoti.

Tilokekaccakkhūti tiloke ekacakkhūti padacchedo. Kāmarūpa arūpasāṅkhātānaṃ tilokānaṃ ekaṃ paññācakkhubhūtanti attho. Tayo lokā tilokaṃ. Tassa cakkhu viya eka bhūtaṃpaññācakkhu yassa soti tilokekaccakkhu, munindakko. Ettha ca ekacakkhusaddassa lopo hoti brahmassarotiādīsū viya. Atha vā tilokassa ekaṃ paññācakkhuṃ bhūto pattoti tilokekaccakkhu, munindakko. Tilokekaccakkhubhūtanti vattabbe chandānurakkhaṇatthaṃ bhūtasaddalopaṃ katvā

tilokekaccakkhanti vuttaṃ. Atha vā tilokassa ekabhūto paññācakkhu hutvā sabbadhamme cakkhati passatīti tilokekaccakkhu, munindakko. Taṃ. Bhagavā hi paññācakkhu mayattā sattesu ca taduppādanato tilokassa cakkhubhūto ñāṇabhūto dhammabhūto brahmabhūto hoti. Vuttañhi **madhupiṇḍikasutte** “so hāvuso bhagavā jānaṃ jānāti, passaṃ passati cakkhubhūto ñāṇabhūto dhammabhūto brahmabhūto vattā pavattā atthassa ninnetā amatassa dātā dhammassāmī tathāgato”ti. Tasmā tilokekaccakkhanti thometi.

Dukhamasahananti puthujjanehi atidukkhamitaṭṭhānaṃ khamanaṃ. Puthujjanehi dukkhena kasirena khamitabbanti dukhamaṃ, iṭṭhāniṭṭhādi ārammaṇaṃ. Dukkhamanti vattabbe gajjabandhattā chandānurakkhaṇatthaṃ kakāralopaṃ katvā dukhamanti vuttaṃ. Taṃ sahati khamatīti dukhamasahano, munindakko. Sahadhātu parisahane yu. Taṃ dukhamasahanaṃ. Bhagavā hi puthujjanehi sudukkhamitaṃ iṭṭhā niṭṭhādiārammaṇaṃ sītuṇhādiṃ lābhālābhayasāyasa nindapasamsasukhadukkhasankhātamaṃ lokadhammañca ativiya khamati adhivāseti, tasmā dukhamasahananti thometi.

Mahesinti mahantaṃ sīlakkhandhādiṃ pariyesamānaṃ mahantaṃ nibbānaṃ gavesamānaṃ vā mahante sīlakkhandhādike esati gavesati pariyesatīti mahesī, munindakko. Mahantasaddūpa pada esadhātu gavesane ī. Vuttañhi **mahāniddese** “mahesīti mahesī. Bhagavā mahantaṃ sīlakkhandhaṃ esi gavesi pariyesīti mahesī. Mahantaṃ samādhikkhandhaṃ mahantaṃ paññākkhandhaṃ mahantaṃ vimuttikkhandhaṃ mahantaṃ vimuttiñānadassanakkhandhaṃ esī gavesi pariyesīti mahesī”ti. Mahante sattatimsabodhipakkhiya dhamme esati gavesatīti vā mahesī, mahantaṃ nibbānaṃ esati gavesatīti vā mahesī. Vuttañhi **mahāniddese** “mahante satipaṭṭhāne mahante sammappadhāne mahante iddhipāde mahantāni indriyāni mahantāni balāni mahante bojjhaṅge mahantaṃ ariyaṃ aṭṭhaṅgikaṃ maggaṃ mahantaṃ paramatthaṃ amataṃ nibbānaṃ esī gavesi pariyesīti mahesī”ti. Atha vā mahesakkhehi sattehi esiyati gavesiyati pariyesiyati amhākaṃ kahaṃ buddhoti mahesī. Vuttañhi **mahāniddese** “mahesakkhehi vā sattehi esito gavesito kahaṃ buddho”tyādi. Taṃ mahesiṃ. Tanti munindakkaṃ. Ahaṃ sirasā namāmīti sambandho.

Ayaṃ panettha **saṅkhepayojanā**. Dayudayaruṇo mahākaruṇāsaṅkhātaudayapabbatuggatasūriyāruṇo, udayapabba tato uggatasūriyāruṇo viya mahākaruṇā vā, ñāṇa vitthiṇṇabimbo sabbaññutañāṇasaṅkhāto vitthāraparimaṇḍalo, vitthāracakkavāḷamaṇḍalaṃ viya vipulārammaṇasabbaññutañāṇavā, eko asahāyo ekabuddhabhūto, yo yādiso munindakko buddhādicco suddhe rāgādimalēhi visuddhe tībhava kuhare tībhavasāṅkhātakamalasare, kamalakathitaṃ uppalanti kathetabbaṃ, vineyyappāṇoghaṃ vinetabbasattasamūhaṃ, dhammaraṃ sīvarehi uttamadhammasāṅkhātaraṃsīhi, subodhesi catusaccadhammaṃ paṭivedhayamānena suṭṭhu pabodhesi vikāsesi, byāpitakkittinaṃ tiloke patthaṭaparikittanaṃ, sīlādiguṇehi patthaṭatutighosikaṃ vā, tilokekaccakkhuṃ kāmarūpaarūpa saṅkhātānaṃ tilokānaṃ ekaṃ paññācakkhubhūtaṃ, dukhamasahanaṃ puthujjanehi atidukkhamitaṭṭhānaṃ khamanaṃ, mahesiṃ mahantaṃ sīlakkhandhādiṃ pariyesamānaṃ mahantaṃ nibbānaṃ gavesamānaṃ vā, taṃ munindakkaṃ ahaṃ sirasā namāmi vandāmīti.

Vīsativandanaḡāthāvaṇṇanā samattā.

21. Yo jino anakajātiyaṃ saputtadāramaṅgajīvitampi;
Bodhipemato alaggamānaso adāsiyeva atthi kassa;
Dānapāramiṃ tato paraṃ apūri sīlapāramādikampi;
Tāsamidhiyopayātamaggataṃ tamedadīpakaṃ namāmi.

21. Evaṃ vīsativāyā gāthāya munindakkaṃ vanditvā idāni pubbe anakajātiyaṃ bodhisattakāle jīvitapariccāgādīhi ca dānādidasapāramiyo pūrentehi guṇehi ca thometvā jinaṃ vanditukāmo **yo jino** tyādimāha. Ayaṃ pana raja raja raja gaṇehi ca garulāhūhi ca racitattā vīsatakkharehi lakkhitā vuttagāthāti daṭṭhabbā. Vuttañhi **vuttodaye** “vutta mīdisantu nāmato rajā rajā rajā garullāhū cā”ti.

Ayaṃ panettha yojanā. Yassaṃ paṭipādaṃ rajā rajagaṇā ca rajā rajagaṇā ca rajā rajagaṇā ca garullāhū ca ce siyyuṃ, īdisantu īdisaṃ pana gāthā nāmato nāmēna vuttaṃ vutta gāthā nāmāti.

Tattha pana **yo jinoti** yo buddho. So hi devaputtakilesābhisānkhārakhandhamaccuvasena pañcamāre ajini jināti jinissatīti jinoti vuccati. Nanu ca buddhasāvakāpi pañcamāre jinattā jinā nāmāti ce. Na bhagavato parūpa nissayavirahaniratisayavasena pañcamārajinnattā bhagavāyeva jino nāmāti. Vuttañhi **dhātukathāmūlaṭṭikāyaṃ** –

“Tattha balavidhamana visayātikkamavasena devaputtamārassa, apavattikaraṇavasena kilesābhisānkhāramārānaṃ, samudayappahānapariññāvasena khandhamārassa, maccumārassa, ca bodhimūle eva bhañjitattā parūpanissayarahitaṃ niratisayaṃ taṃ bhañjanaṃ upādāya bhagavāeva mārabhañjanoti thomito”ti.

Anekajātiyanti anekasaṃsārabhāve. Ettha hi ayaṃ jātisaddo anekattho. Tathā hesa ekampi jātiṃ dvepi jātiyoti ettha bhāve āgato. Atthi visāke nigaṇṭhā nāma samañajātīti ettha nikāye. Tiri nāma tiṇajāti nābhiyā uggantvā nabhaṃ āhacca ṭhitā ahoṣīti ettha paññattiyāṃ. Jāti dvīhi khandhehi saṅgahitāti ettha saṅkhatallakkaṇe. Yaṃ mātukucchiyaṃ paṭhamaṃ cittaṃ uppannaṃ paṭhamaṃ viññānaṃ pātubhūtaṃ. Tadupādāya sāvassa jātiṃ ettha paṭisandhiyaṃ. Sampatijāto ānanda bodhisattoti ettha pasūtiyaṃ. Anupakuṭṭho jātivādenāti ettha kule. Yatohaṃ bhagini ariyāya jātiyā jātoti ettha ariyasīle. Idha pañāyaṃ bhāve vattati. Tasmā anekasaṃsārabhāveti attho viññātabbo. So hi jāyati yoni gatiādi vibhāgoti jātiṃ vuccati. Atha vā jāyanti nibbattanti ettha khandhādayoti jāti, bhāvo. Janidhātu nibbattaneti. Na ekā anekā, anekā ca sā jāti cāti anekā jāti. Tassaṃ anekajātiyaṃ.

Saputtadāranti puttana ca bhariyāya ca sahitaṃ. Attano kulaṃ punāti pavati sodhetīti vā putto. Pudhātu pavane ta. Mātāpitūnaṃ manāṃ pūretīti vā putto. Pūrādhatu pūraṇe ta. Putto ca dhītā ca putto. Virūpeka sesoyaṃ. Sāmikena dhariyateti dāro. Dharadhātu dhāraṇe ṇo. Dhassa do. Atha vā purisena bhogaṃ dīyatīti dāro. Dādhatu dāne rapaccayo. Dākucchitā kārena purisena ramiyati etthāti vā dāro, bhariyā. Dāpubbaramudhātu ramane kvi. Dāsaddo kucchitatho. **Abhidhānaṭṭikāyaṃ** pana “dārayante yenāti dāro, dara vidāraṇe. Akattari ca kārake saññāyaṃ ṇo”ti vuttaṃ. Putto ca dāro ca puttadāro. Samāhāradvandepe hi pulliṅgaṃ icchanti ācariyā. Tena saha vattati yassāti saputtadāro, puttadārapariccāgo. Taṃ saputtadāraṃ. **Āṅgajīvitampīti** hatthapādakaṇṇanāsacakkhādīsārīrāvayavañca jīvitindriya paṭibaddhasakalasarīrañca āṅgati gacchati kāyete āṅgo, cakkhādīsārīrāvayavo. Agidhātu gatiyaṃ a. Jīvanti sattā etenāti jīvitaṃ, jīvitindriyaṃ. Jīvadhātu pāṇadhāraṇe ta. Āṅgo ca jīvitañca āṅgajīvitaṃ. Ettha ca pisaddo sampiṇḍanatho. Tena dhanaraṭṭhapariccāgaṃ sampiṇḍeti. Vuttañhi **sīlakkhandhaṭṭha kathāyaṃ** –

“Āṅgapariccāgaṃ jīvitadhanarajjaputtadārapariccāgantī ime pañca mahāpariccāge pariccājivā”ti. Atha vā sambhāvanatho. Tena bhagavā sabbaññutaññāhetupi puttadāraāṅgajīvitampi alaggamānaso pariccājeti, pageva dhanādibāhiravatthu pariccāgepīti sambhāveti.

Bodhipematoti arahattamaggasabbaññutaññāsaṅkhātāya bodhiyā piyamānattā, hetvatthe hi topaccayo. Cattāri saccāni bujjhatīti bodhi, arahattamaggañānaṃ. Sabba ñeyyadhamme bujjhatīti bodhi, sabbaññutaññānaṃ. Budhadhātu ñāṇe ṇa. Itthilingajotako ipaccayo ca. Vuttañhi **abhidhānappadīpikāyaṃ** – “bodhi sabbaññutaññāṇe, ariyamagge ca nāriya”nti. Bodhi ca bodhi ca bodhi sarūpekase savasena. Piyaṃ pemo, piyāyitabboti vā pemo. Pīdhātu tappanakantīsu manipaccayo. Bodhiyā pemo bodhipemo, tato bodhipemato. Bhagavatā hi puttadāraāṅgajīvitehipi sataguṇena saḥassaguṇena sata saḥassaguṇenapi bodhiññānameva piyanti vuttaṃ hoti. Vuttañhi **vessantarajātaka** –

“Na me dessā ubho puttā, maddī devī na dessiyā;
Sabbaññutaṃ piyaṃ mayhaṃ, tasmā piye adāsaha”nti.

Alaggamānasoti puttadāraāṅgajīvitādīsū anallīyana citto hutvā laganaṃ saṅganaṃ laggo, lagati saṅgati allayati vāti laggo. Lagadhātu saṅge allīyane vā gapaccayo. Na laggo alaggo, natthi laggo ettha puttadāra āṅgajīvitādīsūti vā alaggo. Manati jānāti ārammaṇanti mano. Soyeva mānaso. Alaggo mānaso yassa soti alaggamānaso, jino. **Atthikassāti** putta dārādīṃ kāmikassa, yācakassa paṭiggāhakassa vāti attho. Attho kāmo assa atthīti atthiko, ṇiko. Tassa atthikassa. **Adāsiyevāti**

pūjanuggahakāmatāya ñānasampayuttapariccāgacetanāya adāsievāti attho. Bodhisatto hi pāramīpūraṇa kāle sarāgasadosasamohasseva sato āgatā gatānaṃ yācakānaṃ alaṅkatapaṭiyattaṃ sīsaṃ kantitvā galalohitaṃ nīharitvā suañjitāni akkhīni uppāṭetvā kulavaṃsappadīpaṃ puttāṃ manāpacāriṇiṃ bhariyaṅca kheḷapiṇḍamiva anapekkho pariccajivā dīyamānava sammāsambodhiñānaṃ laddhuṃ sakkā, na puttadāraaṅgajīvitampi apariccajivā. Pañca hi mahāpariccāge apariccajivā buddhabhūtapubbā nāma natthi. Paccekabuddhāriyasāvakaṃ pana puttadāraaṅgajīvitaṃ apariccajantāpi paccekabuddhāriyasāvakabodhiñānaṃ laddhuṃ samatthāva. Tasmāyeva bhagavantaṃyeva saputtadāraaṅgajīvitampi bodhipemato alaggamānaso adāsīyeva atthi kassāti thometi. Vuttañhetam **vessantarajātakaṭṭha kathāyaṃ** “sabbabodhisattā dhanapariccāgaṃ, puttapariccāgaṃ, bhariyapariccāgaṃ, aṅgapariccāgaṃ, jīvitapariccāganti ime pañca mahāpariccāge apariccajivā buddhabhūtapubbā nāma natthī”ti.

Evam pañcahi mahāpariccāgaguṇehi bhagavato thomaṇaṃ katvā idāni dānādīpāramīpūraṇaguṇena thomaṇaṃ kattu kāmo dānapāramintiādīmāha. Tattha **dānanti** tividhaṃ hoti cāgacetanā ca, virati ca, deyyadhammo cāti. Saddhā hiriyāṃ kusalaṅca dānanti āgataṭṭhāne hi cāgacetanā dānaṃ nāma. Abhayaṃ detīti āgataṭṭhāne viratī dānaṃ nāma. Dānaṃ deti annaṃ pānanti āgataṭṭhāne deyyadhammo dānaṃ nāma. Tattha cāgacetanā deti vā deyyadhammaṃ deti vā etāya deyyadhammanti dānaṃ. Virati avakhaṇḍanaṭṭhena lavanaṭṭhena vā dānaṃ. Sā hi uppajjamānā bhayabheravasaṅkhātāṃ dussilyāṃ cetanaṃ dāti lunāti cāti dānaṃ, deyyadhammo diyyatīti dānaṃ. Idha pana tividhaṃ dānaṃ adhippetāṃ. Pāramīsaddassa vacanatto heṭṭhā vuttoyeva. Atha vā pāraṃ nibbānaṃ eti gacchati etāyāti pāramī. Pārasaddūpapada idhātu gatiyaṃ kvi. Pāraṃ itīti padacchedo kātabbo. Dānameva pāramī dānapāramī, taṃ dānapāramiṃ. **Tatoti** dānapāramito. **Paranti** aññaṃ. **Sīlapāramādīkampi** sīlatīti sīlaṃ. Sīla dhātu samādhimhi a. Kāyavacīkammāni samādahati samādhapetīti attho. Sīlati samādhīyati kāyakammādīnaṃ susilyavasena na vippakiratīti vā sīlaṃ, sīlanti samādahanti cittaṃ etenāti vā sīlaṃ. Atha vā sīlayati upadhāretīti sīlaṃ, sīladhātu upadhāraṇa a. Kusala dhammānaṃ patiṭṭhānabhāvena ābhūso dhāretīti attho. Sīlanti vā etena kusale dhamme upadhārenti sādhaṃvoti sīlaṃ, sīliyati upadhāriyati sappurisehi hadayamaṃsantaraṃ upanetvāti vā sīlaṃ, sīleti upadhāreti taṃ samaṅgī puggalaṃ apāyesu uppattinīvāraṇavasena suggati nibbānanti vā sīlaṃ, sīlameva pāramī sīlapāramī, sā ādi yāsanteti sīlapāramādīkā. Ettha ca ādisaddena nekkhammapaññā vīriyakhantisaccaadhiṭṭhānamettāupekkhāpāramiṃ saṅgaṇhāti. Vuttañhetam **buddhavaṃsapāliyaṃ** –

“Dānaṃ sīlaṅca nekkhammaṃ, paññā vīriyena pañcamaṃ;
Khantisaccamadhiṭṭhānaṃ, mettupekkhā imā dasā”ti.

Pisaddo cettha sampiṇḍanatto. Tena pañca mahāpariccāge sampiṇḍeti.

Apūriti sammāsambodhatthāya pūraṇaṃ akāsīti attho. Bhagavato hi dīpaṅkarapādamūle aṭṭha dhamme samodhānetvā buddhatthāya abhinīhārato paṭṭhāya anekajātīsu sammāsambodhiṃ paṭivijjhitaṃ vāyamanto adinnadānaṃ nāma natthi, arakkhitasīlaṃ nāma natthi. Apūritā pāramī nāma natthi. Atibahumpi pūraṇaṃ akāsīyeva. Bhagavā hi bodhisatta bhūto catūsu mahāsamuddesu udakaṃ parājetvā adhikaṃ lohitadānamakāsi. Sakalapathaviyā paṃsuṃ parājetvā adhikaṃ maṃsamadāsi. Sinerupabbatarājaṃ parājetvā adhikaṃ sīsadānamadāsi. Ākāse tārakasamūhaṃ parājetvā adhikaṃ nayanamadāsi.

Tena vuttaṃ **jinālaṅkāre** –

“So sāgare jaladhikaṃ rudhiraṃ adāsi,
Bhūmiṃ parājiya samaṃsamadāsi dānaṃ;
Meruppamāṇamadhikaṅca samoḷisīsaṃ,
Khe tārakādhikatarāṃ nayanam adāsi”ti.

Vasantatilakagāthā.

Tattha ca soti so evaṃvidho bodhisatto. Sāgareti catūsu mahāsamuddesu. Jaladhikanti udakato

adhikaṃ katvā. Rudhiraṃ adāsīti lohitaḍānamadāsī. Bhūmiṃ parājiyāti paṃsupathaviyā paṃsuṃ parājetvā attano sarīramāṃsaṃ adhikaṃ adāsī. Meruppamāṇamadhikanti yojana aṭṭhasaṭṭhisatasahasubbedhassa girirājassa paṃṇatopi adhikaṃ katvā. Samoḷisīsanti moḷiyā saha abhisittasīsaṃ adāsī. Kheti cakkavāḷapabbataparīyante ākāse. Tārakādhikataranti nakkhattādītārakarūpatopi adhikaṃ katvā. Nayanāṃ adāsīti nettadānaṃ adāsīti evamettha attho daṭṭhabbo.

Tāsamidhiyopayātamaggatanti tāsāṃ iddhiyā upayātaṃ aggatanti padacchedo. Tāsanti tāsāṃ pāramīnaṃ. Iddhiyāti samiddhiyā, hetvatthe cetāṃ karaṇavacanaṃ. Upayātanti upagataṃ. Aggatanti sabbasattānaṃ uttamabhāvaṃ, seṭṭhabhūtaṃ buddhattanti attho. Taṃ pana padaṃ upayātantipade kammaṃ. Aggasaddo cettha uttamavācako anipphannaṃpāṭipadiko. Atha vā aggati uttamabhāvaṃ seṭṭhabhūtaṃ vā buddhabhāvaṃ pāpuṇātīti aggo, jino. Aggadhātu gatiyaṃ a. Aggassa bhāvo aggataṃ. Bhagavā hi anantalokadhātūsu sabba sattānaṃ aggo uttamataro seṭṭhataroti attho. Vuttañhetāṃ dasanipāta **aṅguttarapāḷiyā** –

“Yāvata bhikkhave sattā apadā vā dvipadā vā catuppadā vā bahuppadā vā rūpino vā arūpino vā saññino vā asaññino vā nevasaññināsaññino vā, tathāgato tesāṃ aggamakkhāyati arahāṃ sammāsambuddho”’ti.

Tamekadīpakanti taṃ ekadīpakanti padacchedo. Tanti jinaṃ. Ekadīpakanti sabbasattānaṃ ekapaṭisaraṇabhūtaṃ paṭiṭṭhabhūtaṃ vā. Dīpakasaddo hi paṭisaraṇapaṭiṭṭhavācako nipphannaṃpāṭipadiko. Vuttañhi **saṃyuttaṭṭhakathāyaṃ** “paṭiṭṭhāpanaṭṭhena dīpa”’nti. Dīpanti paṭiṭṭhahanti paṭisaraṇabhāvena sattā etthāti vā dīpako, jino. Dīpadhātu paṭiṭṭhāyaṃ ako. Ekasaddo saṅkhyāvācako. Eko ekabhūto dīpakoti ekadīpako, jino. Atha vā ekadīpakanti manussānaṃ paṭisaraṇabhūtaṃ paṭiṭṭhānabhūtaṃ samuddadīpakamiva sabbasattānaṃ paṭisaraṇabhūtaṃ paṭiṭṭhānabhūtaṃ ekabuddhabhūtaṃ.

Ayaṃ panettha vacanatto. Jalamajjhe dipatīti dīpo. Dvidhā āposandati etthāti vā dīpo. Soyeva dīpako. Soviya eko buddho hutvā eti gacchati pavattatīti ekadīpako, jino. Yathā hi mahāsamudde bhinnanāvānaṃ manussānaṃ samuddadīpo paṭisaraṇo paṭiṭṭho hoti, evaṃ jino saṃsārasāgare alabbhaneyyapaṭiṭṭhe osīdantānaṃ sabbasattānaṃ ekabuddhabhūto paṭisaraṇo paṭiṭṭho hotīti ekadīpakanti thometi. Taṃ jinaṃ ahaṃ namāmīti sambandhoti.

Ayaṃ panettha **saṅkhepayojanā**. Yo jino aneka jātiyaṃ anekasaṃsārabhave, saputtadāraṃ puttana ca bhariyāya ca sahitaṃ, aṅgajīvitampi aṅgapaccāṅgajīvitindriyampi. Atha vā hatthapādakaṇṇanāsacakkhādisarīrāvayavañca jīvitindriya paṭibaddhasakalasarīrañca, bodhipemato arahattamagga sabbaññutaññasaṅkhātāya bodhiyā piyamānattā, alagga mānasoti puttadāraaṅgajīvitādīsu anallīyanacitto hutvā, atthikassa puttadārādīṃ kāmikassa yācakassa adāsīyeva pariccāgacetaṇāya adāsīeva. Dānapāramimpi tato dānapāramito paraṃ aṅṇaṃ sīlapāramādīkampi sīlapāramādīkampi, apūri sammāsambodhatthāya pūraṇaṃ akāsi, tāsāṃ pāramīnaṃ iddhiyā samiddhiyā aggataṃ uttama bhāvaṃ seṭṭhabuddhattaṃ vā, upayātaṃ upagataṃ, ekadīpakaṃ sabbasattānaṃ ekapaṭisaraṇabhūtaṃ ekapaṭiṭṭhānabhūtaṃ vā, dīpakamiva ekapaṭisaraṇabhūtaṃ paṭiṭṭhānabhūtaṃ vā taṃ jinaṃ tīhi dvārehi namāmīti.

Ekavīsativandanaḡāthāvaṇṇanā samattā.

22. Devādevātidevaṃ nidhanavapudharaṃ mārabhaṅgaṃ abhaṅgaṃ,
Dīpaṃ dīpaṃ pajānaṃ jayavarasayane bodhipattaṃdhipattaṃ;
Brahmābrahmāgatānaṃ varagirakathikaṃ pāpahīnaṃ pahīnaṃ,
Lokālokābhirāmaṃ satatamabhinaṃ taṃ munindaṃ munindaṃ.

22. Evaṃ ekavīsativandanaḡāthāya jinaṃ vanditvā idāni devādevātidevantiyādīhi dasahi gaṇehi thometvā munindaṃ vanditukāmo **devādevātidevantiyādīmāha**. Ayaṃ pana ma ra bha na ya ya gaṇehi ca timuniyatīhi ca racitattā ekavīsatakkharehi yuttā ādyantayamakā saddharā ḡāthāti daṭṭhabbā. Vuttañhi **vuttodaye** “mrā bhnā yo yotra yena timuniyatiyutā saddharā kittitāya”’nti.

Ayaṃ panettha yojanā. Yassaṃ paṭipādaṃ mrā maragaṇā ca bhñā bhanagaṇā ca yogaṇo ca yena yagaṇena saha yogaṇo ca timuniyatiyutā sattamakkarantetihi yatīhi yuttā ca ce siyuṃ. Atra imasmiṃ pakati chande ayaṃ gāthā saddharāgāthāti kittitāti. Ettha ca munisaddo sattasaṅkhyāvācakoti daṭṭhabbo. Ekasmiṃ pāde sattamakkarante sattamakkarante yatīnaṃ tiparivattattā timuniyatiyutāti vuttaṃ. Ekavīsatakkharavantoti vuttaṃ hoti.

Tattha ca **devādevātidevanti** rājasankhātasammutideva catumahārājādikaupapattidevānaṃ atiuttamaṃ atiseṭṭhaṃ visuddhidevabhūtaṃ. Ettha hi devāti sammutidevā. Te hi mānussaissariyasampattīhi dibbantīti manussarājadevī kumārā devāti vuccanti. Puna devāti upapattidevā. Te hi dibbaissariyasampattīhi dibbantīti catumahārājikā devā vuccanti, dibbanti kāmagaṇādīhi kīlanti laṅanti, tesu vā viharanti, vijayasamatthatāyogena paccatthike vijetuṃ icchanti, issariyadhanādisakkārādānaggahaṇaṃ taṃ taṃ atthānusāsanaṅca karontā voharanti. Puññātisayayogānubhāvappattāya jutiyā jotanti. Yathādhippetāṅca visayaṃ appaṭighātena gacchanti. Yathicchitanipphādane ca sakkontīti devāti **visuddhimaggamahāṭikāyaṃ** āgatanayenapi veditabbo. Atidevanti tesam devānaṃ atiuttamaṃ atiseṭṭhaṃ vā visuddhi devabhūtaṃ bhagavantanti attho. So hi tesam sammuti upapattidevānaṃ silādiguṇehi atirekattā atireko devoti bhagavā atidevoti vuccati. Devo devānaṃ atireko atiuttamo atiseṭṭho ativisiṭṭho devo devādevātidevo, visuddhidevabhūto munindo labbhati. Taṃ devādevātidevaṃ.

Vuttañhi **dhammahadayavibhaṅge** “devāti tayo devā sammuti devā, upapattidevā, visuddhidevā. Sammutidevā nāma rājāno deviyo rājakumārā. Upapattidevā nāma catumahārājike deve upādāya tadupari devā. Visuddhidevā nāma arahanto vuccanti”ti.

Bhagavā pana nirātisayāya abhiññākīlāya uttamehi dibbabrahmaariyavivārehi saparasantānagatapañcavidhamāravija yicchānipphattiyācittissariya sattadhanādi sammāpaṭipatti aveccappasādasakkārādānaggahaṇasaṅkhātena dhammasabhāvapuggalajjhāsayanurūpānusāsanaṅsankhātena ca vohārātisayena paramāya paññasarīrappabhāsaṅkhātāya jutiyā anaññasādhāraṇāya ñāṇasarīragatīyā māravijaya sabbaññugūṇaparāhita nipphādanesu appaṭihatāya sattiyā ca samannāgatattā sadevakena lokena saraṇanti gamanīyato abhiṭṭhavanīyato bhattivāsena kamanīyato ca sabbe te deve tehi guṇehi abhibhuyya ṭhitattā tesam devānaṃ atiseṭṭho atiuttamo devoti devādevātidevoti **visuddhimagga mahāṭikāyaṃ** āgatanayenapi veditabbo.

Nidhanavapudharanti antimakāyadhāraṇaṃ. Ettha ca nidhanasaddo pariyoṣānavācako anipphannapāṭipadiko. Atha vā nidheti pariyoṣānaṃ karoti etenāti nidhanaṃ. Nidheti vināseti bhavanti vā nidhanaṃ, antimakāyo labbhati. Nipubba dhā dhātu nāse yu. Vapati kusalākusalabījāmetthāti vāpu, kāyo. Vapadhātu bījasantāne u. Nidhanaṅca taṃ vāpu cāti nidhanavāpu, taṃ dhāretīti nidhanavapudharo, munindo. Taṃ nidhanavapudharaṃ. So hi anamataggasamsārabhavesu nibbattentānaṃ sabbakilesānaṃ bodhimaṇḍe aggamaggañāṇasatthena samucchindi tattā punabbhavābhiniṅgati natthi. Ayañhi buddhabhāvajāti antima bhavo hoti, tasmā visesena munindameva nidhanavapudharanti thometi. Vuttañhetam **ānguttarapāṭiyam** “buddho antima dharo”ti.

Mārabhaṅganti devaputtādipaṅcamāre viddhamsanaṃ. Mārasaddattho heṭṭhā vutttoyeva. Pañcamāre bhañjati abhañji bhañjissatīti mārabhaṅgo, munindo. Mārasaddūpapada bhanjadhātu avamaddane tapaccayo. Tassa saha dhātventena goādeso. Nakārassa niggahitādeso. Tassa kavaggantādeso. Taṃ mārabhaṅgaṃ. **Abhaṅganti** mārasenāya bhañjituṃ viddhamsituṃ asamatthaṃ, bhañjiyate bhaṅgo. Nabhaṅgo abhaṅgo. Atha vā mārasenāya na bhañjiyatīti abhaṅgo. Mārasenāya bhañjituṃ na arahatīti attho. Mārasenā bhañjituṃ na samatthoti vā abhaṅgo, munindo. Taṃ abhaṅgaṃ.

Dīpaṃdīpaṃ pajānanti ettha pajānaṃ dīpaṃ dīpanti sambandho. Tattha pajānanti sattānaṃ. Tehi kammakilesehi pajāyanti nibbattiyanti, pakārena vā jāyanti nibbattanti paṭisandhicutivasenāti pajāti vuccanti. Dīpanti paññāpadīpaṃ. Tañhi kusalākusale dhamme vibhajitvā dīpeti pakāseti jotetīti dīpanti vuccati. Atha vā dīpanti jotetīti dīpo. Andhakāraṃ vidhametvā ālokaṃ pakāsetīti attho.

Dīpadhātu dittiyaṃ a. Dīpamivāti dīpā, paññā. Yathā hi padīpo andhakāraṃ vidhamitvā ālokaṃ pakāseti, evaṃ paññā avijjandhakāraṃ hantvā dhammalokaṃ pakāsetīti vuttaṃ hoti. Taṃ dīpaṃ. Puna dīpanti dīpakaṃ pakāsentanti attho. So hi dīpeti pakāsetīti dīpoti vuccati. Munindo hi payirupāsanavasena gatāgatānaṃ vineyyasattānaṃ dhammadesanāya catumaggañāṇādīpaññāpadīpaṃ pakāsetīti vuttaṃ hoti. Taṃ dīpaṃ.

Jayavarasayaneti pañcamāravijayantaṭṭhānabhūte uttama bodhipallānkāsane. Pañcamāre jināti etthāti jayo, bodhirukkhapallānko. Jidhātu jaye ṇa. Varitabbo patthi tabboti varo, varadhātu patthane a. Varati nivāreti hīnanti vā varo. Varadhātu nivāraṇe a. Buddhena sevyati bhajiyati etthāti sayano. Sidhātu sevāyaṃyu. Varo uttamo sayano varasayano, jayoeva varasayano jayavarasayano, bodhirukkhapallānko. Tasmim.

Bodhipattaṃdhipattanti bodhipattaṃ adhipattanti padacchedo. Bodhipattanti arahattamaggasabbaññūtañāṇaṃ gataṃ. Ettha ca bodhisaddo rukkhamaggañāṇasabbaññūtañāṇanibbānesupi vattati. Tathā hesa bodhirukkhamūle paṭhamābhisambuddhotiādīsu rukkhe vattati. Bodhi vuccati catūsu maggesu ñāṇantiādīsu magge. Pappoti bodhiṃ varabhūrī medhasotiādīsu sabbaññūtañāṇe. Patvāna bodhiṃ amataṃ asaṅkhatantiādīsu nibbāne. Idha pana bhagavato arahattamaggasabbaññūtañāṇaṃ adhippettaṃ. Cattāri saccāni bujjhatīti bodhi, arahatta maggañāṇaṃ. Sabbaññeyyadhamme bujjhatīti bodhi, sabbaññūtañāṇaṃ. Budhadhātu ñāṇe ṇa ī ca. Bodhi ca bodhi ca bodhi sarūpekasesavasena. Taṃ apajjimaṃ agaminti bodhi patto, munindo. Taṃ bodhipattaṃ. Adhipattanti sadevake loke sabbadevamanussānaṃ jeṭṭhabhāvaṃ gatanti attho. Sabbadevamanussānaṃ adhikaṃ jeṭṭhabhāvaṃ vuḍḍhatarabhāvaṃ patto gatoti adhipatto, munindo. Taṃ adhipattaṃ. Yathā hi kukkuṭapotaṅkaṃ yo kukkuṭapotaṅko aṇḍakosaṃ padāletvā abhinibbhido, so tesam jeṭṭhabhāvaṃ vuḍḍhatarabhāvaṃ gato, evameva bhagavā sadevake loke avijjā gatāya pajāya taṃ avijjaṇḍakosaṃ padāletvā paṭhamataraṃ ariyāya jātiyā jātattā ca sīlasamādhīpaññādi sabbaguṇehi adhikattā ca appaṭṭisamattā ca sabbadevamanussānaṃ jeṭṭhabhāvaṃ vuḍḍhatarabhāvaṃ seṭṭhabhāvaṃ appaṭṭisamabhāvaṃca patto gatoti vuttaṃ hoti. Tasmā adhipattanti thometi.

Brahmābrahmāgatānanti brahma abrahma āgatānanti padacchedo. Āgatānaṃ payirupāsanavasena āgatānaṃ brahma devamanussaparisānanti attho. Tattha brahmāti brahmapārisajjādi brahmā. Te hi jhānādiguṇehi brūhanti vaḍḍhantīti brahmāti vuccanti, abrahmāti devamanussā. Te hi na brahmā abrahmāti vuccanti, āgacchanti payirupāsanavasenāti āgatā, brahmā brahmāno labbhanti. Āpubbagamudhātu gatiyaṃ ta. Āgatā brahmā ca abrahmā cāti brahmābrahmāgatā, tesam. Visesana paranipātapadametaṃ agyāhitotiādīsu viya. Taṃ pana padaṃ varagīrakathikantipade sampadānaṃ. Payirupāsanānaṃ brahma devamanussaparisānanti attho.

Varagīrakathikanti uttamaṃ dhammavācaṃ desentaṃ. Seṭṭhavācāya dhammaṃ desanānaṃ vā, gāyati kathiyatīti girā, vācā. Gādhātu sadde īro. Varā seṭṭhā girā vācā varagīrā. Tāya dhammaṃ kathetīti varagīrakathiko, munindo. Uttamāya manāpabhūtavācāya dhammaṃ desetīti attho. Taṃ.

Pāpahīnanti lāmakaakusalakilesaṃ. Tañhi apāyādi dukkhaṃ pāpetīti pāpoti vuccati. Akusalakilesa. Papubbaapadhātu pāpuṇane. Kusaladhammena hātabbaṃ caji tabbanti hīnanti vuccati. Lāmakadhammo. Hādhātu cāge tapaccayo, tassino. Pāpoeva hīnaṃ pāpahīnaṃ. **Pahīnanti** arahattamaggañāṇena susamucchinnam. Pajahatīti pahīno, munindo. Papubbahādhātu cāge ino. Sabbe akusaladhamme aggamaggañāṇena samucchindatīti attho.

Lokālokābhirāmanti lokaalokaabhirāmanti padacchedo. Manussalokadevabrahmalokānaṃ abhirāmaṭṭhānabhūtanti attho. Lokoti manussa loko, so hi lokayati patiṭṭhahati pavattati vā ettha puññāpuññaṃ tabbipāko cāti loko, manussa loko. Lokadhātu patiṭṭhāyaṃ a. Na loko aloko. Devabrahmaloko. Loko ca aloko ca lokālokā, tesam sattalokānaṃ abhiadhikaṃ ramanti etthāti lokālokābhirāmo. Munindo, taṃ. So hi tilokānaṃ pūjānuggahādīkaraṇavasena abhirāmaṭṭhānaṃ hotīti lokālokābhirāmanti thometi. **Satatanti** niccaṃ. Rattidivaṃ abhiñhanti attho. **Munindanti** pañcamunissaraṃ, taṃ munindaṃ. **Abhinameti** ahaṃ abhisakkaccaṃ namāmīti sambandhoti.

Ayaṃ panettha **saṅkhepayojanā**. Devādevātidevaṃ sammutidevaupapattidevānaṃ atiuttamaṃ visuddhidevabhūtaṃ nidhanavapudharaṃ antimakāyadhāraṇaṃ, mārabhaṅgaṃ devaputtādipañcamāre viddhamaṇaṃ abhaṅgaṃ mārasenāya bhañjituṃ asamatthaṃ, mārasenā bhañjanārahaṃ vā, pajānaṃ sattānaṃ dīpaṃ paññāpadīpaṃ, kammabhūtaṃ dīpaṃ dīpaṃ pakāsentam, jayavarasayane pañcamāravijayantaṭṭhānabhūte uttamabodhipallānkāsane ādhārabhūte, bodhipattaṃ arahattamaggasabbaññutaññānaṃ gataṃ adhipattaṃ sadevake loke sabbadevamanussānaṃ jeṭṭhabhāvaṃ gataṃ, brahmā brahmāgatānaṃ payirupāsanaṃ āgatānaṃ brahmadeva manussaparisaṇaṃ varagirakathikaṃ seṭṭhavācāya dhammaṃ desamaṇaṃ pāpahīnaṃ lāmakaakusalakilesaṃ pahīnaṃ arahattamaggaññānaṃ susamucchinnaṃ lokālokābhirāmaṃ manussa lokadevabrahmalokānaṃ abhirāmaṃ bhūtaṃ, munindaṃ pañcamunissaraṃ taṃ munindaṃ satataṃ niccaṃ abhiṇhaṃ ahaṃ abhinaṃ abhisakkaccaṃ namāmi.

Dvāvīsatisavandanaḡāthāvāṇṇanā samattā.

23. Buddho nigrodhabimbo mudukaracaraṇo brahmaghoseṇijaṅgho,
Kosacchādaṅgaḡāto punarapi sugato suppatiṭṭhitapādo;
Mūdodātuṇṇalomo ahamapi sugato brahmujuggatābhāvo,
Nīlakkhī dīghapaṇhī sukhumamalachavī thomyarasaggasaggī.
24. Cattālīsaggadanto samakalapanaḡo antaraṃsappaḡīno,
Cakkenaṅkitapādo aviraḡadaḡano māraḡussāṅkhapādo;
Tiṭṭhanto nonamantobhayakaramudunā jaṇṇukāññamasanto,
Vaṭṭakkhandho jino gotaraṇapakhumako sīhapubbaḡḡhakāyo.
25. Sattappīno ca dīghaṅguli matha sugato lomakūpekaloḡo,
Sampannodātadāḡho kanakasamataco nīlamuddhaggaḡo;
Sambuddho thūlajivho atha sīhahanuko jālikappādahatto,
Nātho uḡhīsasīso itiguṇasahitaṃ taṃ mahesiṃ namāmi.

23. Evaṃ dvāvīsatisavāḡyā ḡāthāya munindassa paṇāmaṃ katvā idāni buddho nigrodhabimbotaḡīhi tihi ḡāthāhi buddhassa dvattisaḡamahāpurisalakkhaṇasampannehi guṇehi thomitvā mahesiṃ vanditukāmo **buddho nigrodhabimbotaḡīgāthāttayamāha**. Taṃ pana ḡāthāttayaṃ saddharāḡāthāti daṭṭhabbaṃ. Sādhakaṃ pana heṭṭhā vuttameva.

Tattha paṭhamagāthāyaṃ **buddhoti** paṭividdhacatusaccadhammo paṭividdhaniravasesasabbadhammo vā. Taṃ pana padaṃ nigrodhabimbo tyāḡīsu padesu tulyalingatābhāvena sambandhitabbaṃ. So hi cattāri saccāni bujjhāti abujjhi bujjhissatīti ca, niravasesasabbadhamme bujjhāti abujjhi bujjhissatīti ca buddhoti vuccati. Tesu pana dvīsū vikappesu paṭhamavikappe budhadhātussa vāccaṃ catusaccadhammapaṭivijjhanam arahattamaggaññānaṃ mukhyena labbhati. Heṭṭhā maggaḡhalaññāṇaṃ vipassanāññāṇaṃ pāramīññāṇaṃ phalūpacārena. Arahattaphalaññāṇaṃ sabbaññutaññāḡāḡīpacchimapaḡchimaññāḡīni ca kāraṇūpacārena. Tapaccayassa vāccaṃ tena mukhyopacārena upalakkhito aparimitaguṇagaḡālaṅkāram khandhapaḡcakaṃ paṭicca buddhobuddhoti paññatto sattaviseso labbhati. Dutiya vikappe budhadhātussa vāccaṃ sabbaññeyyadhammapaṭivijjhanasamattham sabbaññutaññānaṃ mukhyena labbhati. Catumaggaḡhalaññāṇaṃ vipassanā pāramīññāṇaṃ phalūpacārena. Āsayānusayaññāḡāḡīpacchima paḡchimaññāḡīni kāraṇūpacārena. Tapaccayassa vāccaṃ tena mukhyopacārena upalakkhito aparimāḡaguṇoghālaṅkataṃ khandhapaḡcakaṃ paṭicca buddhobuddhoti paññatto sattaviseso labbhati. Kiṃpanettha budhadhātussa vāccabhūtaṃ ñāḡameva buddho nāma hoti. Udāhu tapaccayassa vāccabhūto khandhasantāno buddho nāmāti. Ñāḡena pana malakara kilesānaṃ savāsānaṃ niravasesaṃ pahīnattā citta santāno suddho hoti. Tassa pana suddhattā tassa nissayabhūto rūpakāyopi suddho hoti. Tasmā tapaccayassa vāccabhūto arahattamaggaññāḡāḡīnaṃ ādhārabhūto khandhasantāno nāmapaññattivohārena buddho nāmāti. Tena vuttaṃ **paṭisambhidāmaggatṭhakathāyaṃ** –

“Sabbesu dhammesu appaṭihataññāna nimitṭānuttaravimokkadhigamaparibhāvitaṃ

khandhasantānaṃ upādāya paṇṇattiko sabbaññutapadaṭṭhānaṃ vā saccābhisambodhimupādāya paṇṇattiko sattaviseso buddho’’ti.

Paramatthabhūte hi khandhasantāne vohārasukhatthaṃ satta puggalādivohāro āropito. Evaṃ vohārappatto satto yāva bodhiñāṇatthāya na vāyamati, paṇidhānaṃ na karoti. Tāva sattotveva saṅkhaṃ gacchati. Yato pana paṭṭhāya bodhiñāṇatthāya vāyamati, paṇidhānaṃ karoti, tadā bodhisatto nāma vohāro hoti. So pana yadā bodhiñāṇaṃ labhati, tadā buddho nāma vohāro hoti. Tasmā paññattisaṅkhāto khandhasantāno buddho nāmāti daṭṭhabbo. Vuttañhi **mahāniddese** ‘‘buddhoti netam nāmaṃ mātārā kataṃ, na pitarā kataṃ, na bhātārā kataṃ, na bhaginiyā kataṃ, na mittāmaccehi kataṃ, na ñātisā lohitehi kataṃ, na samaṇabrāhmaṇehi kataṃ, na devatāhi kataṃ, vimokkantikametaṃ buddhānaṃ bhagavantānaṃ bodhiyā mūle saha sabbaññutañāṇassa paṭilābhā sacchikā paññatti yadidaṃ buddhoti taṃ buddha’’nti. Atha vā paṭṭhānanayena vā nānantarikanayena vā ñāṇappadhāno suvisuddhakhandhasantāno buddho nāmāti atthopi yujjatevāti.

Nigrodhabimboti nigrodharukkhaṃ parimaṇḍalo viya parimaṇḍalasarīro. Adhobhāgaṃ rundhatīti nigrodho, vaṭarukkho. Nipubbarudhadhātu āvaraṇe ṇa, usso gāgamo. Vamati uggiratīti bimbo, sarīro. Vamudhātu uggiraṇe bo. Vamissa vassa bittam. Nigrodhassa parimaṇḍalo viya parimaṇḍalo bimbo sarīro yassāti nigrodhabimbo, buddho. Nigrodhaparimaṇḍalabimboti vattabbe parimaṇḍalasaddalope nevaṃ vuttam. Yathā hi paṇṇāsahatthātāya vā satahatthātāya vā samakkhandhasākho nigrodho dīghatopi vitthāratopi ekappamāṇova hoti, evaṃ kāyatopi byāmatopi ekappamāṇo. Yathā aññesaṃ kāyo vā dīgho hoti, byāmo vā na evaṃ visamappamāṇoti attho. Vuttañhi **brahmāyusutte** ‘‘nigrodhaparimaṇḍalo kho pana bhavaṃ gotamo. Yāvatakvāssa kāyo, tāva takvāssa byāmo. Yāvatakvāssa byāmo, tāva takvāssa kāyo’’ti.

Mudukaracaraṇoti saṅhahatthapādo. Ettha ca mudusaddo saṅhasukhumavācako anipphannapāṭipadiko. Atha vā mudeti modayati satteti mudu, saṅhahatthapādo. Mudadhātu modane hāse vā u. Taṃ taṃ kammaṃ karoti etenāti karo, hattho carati gacchati etena taṃ taṃ ṭhānanti caraṇo, pādo. Caradhātu gatiyaṃ yu. Mudukaro ca caraṇo ca yassāti mudukaracaraṇo, buddho. Sappi maṇḍe osāritvā ṭhapitaṃ satavāraṃ vihatakkappāsapaṭalaṃ viya mudujātamattakumārassa viya ca niccakālaṃ muduhattha pādoti attho.

Brahmaghoseṇijaṅghoti brahmaghoso eṇijaṅghoti padacchedo. Brahmaghosoti brahmuno saro viya aṭṭhaṅga sampannasaravantoti attho. Jhānādiguṇehi brūhati vaḍḍhatītibrahmā. Brūhadhātu manipaccayo. Ghusiyati saddiyati kathiyatīti ghoso, saro. Ghusadhātu sadde ṇa. Brahmuno ghoso saro brahmaghoso, so viya ghoso saro yassāti brahmaghoso, buddho. Yathā hi mahābrahmuno pittasemhehi apalibuddhattā saro visuddho hoti, evameva tathāgatenapi kataṃ kammaṃ vatthum sodheti, vatthussa suddhattā nābhito paṭṭhāya samuṭṭhahanto saro visuddho aṭṭhaṅgasamannāgatoti attho. Tasmā brahmaghoso viya aṭṭhaṅgasamannāgatasaravantoti thometi.

Eṇijaṅghoti eṇimigassa jaṅghā viya suvaṭṭajāṇuko. Eti gacchatīti eṇi, migo. Idhātu gatiyaṃ ṇi. Jāyati kamanametāyāti jaṅgho, jāṇu. Janadhātu janane gho. Nassa niggahitādeso. Eṇimigassa jaṅgho viya jaṅgho yassa soti eṇijaṅgho, buddho. Yathā hi eṇimigassa jaṅgho suvaṭṭo hoti, evameva buddhassa maṃsussadena paripuṇṇajaṅgho. Na ekato bandhapiṇḍikamaṃso. Samantato samasaṅghitena maṃsena parikkhattāhi suvaṭṭitāhi sāli gabbhayavagabbhasadisāhi jaṅghāhi samannāgatoti attho. Tasmā eṇimigajaṅghasadisō suvaṭṭajāṇukoti thometi.

Kosacchādaṅgajātoti kosacchādaṅgajātoti padacchedo. Usabhavāraṇādīnaṃ aṅgajāto viya suvaṇṇapaduma kaṇṇikasadisena vatthakosena paṭicchannena guyhaṅgajātena samannāgatoti attho. Kusati tiṭṭhati etthāti koso. Kusadhātu gatiyaṃ ṇa. Chādiyatīti chādo. Chadadhātu paṭicchanne ṇa. Kosena chādo kosacchādo. Aṅge sarīrāvayave jātanti aṅgajātaṃ. Kosacchādaṃ aṅgajātaṃ byañjanaṃ yassāti kosacchādaṅgajāto, buddho. Bhagavato hi usabhavāraṇādīnaṃ aṅgajāto viya suvaṇṇapadumakaṇṇi kasadisena kosohitavatthaguyhena byañjanena samannāgatoti attho. Tasmā kosacchādaṅgajātasampannoti thometi. **Punarapīti** puna apīti padacchedo. Rakārā gamo. Punāti eso atthantaratthe nipāto. Apisaddo sampiṇḍanatto. **Sugatoti** buddho. So hi sundaraṃ nibbānaṃ gacchatīti sugatoti vuccati.

Suppatitthitapādoti suvaṇṇapādukatalamiva bhūmiyaṃ samaṃ suṭṭhu patitthitapādo. Samaṃ suṭṭhu bhūmiyaṃ patitthitāti suppatitthito, pādo. Su pati pubbo ṭhā dhātu gatinivattiyāṃ ta. Pajjati gacchati etenāti pādo. Padadhātu gatimhi ṇa. Suppatitthito pādo yassāti suppatitthitapādo, sugato. Yathā hi aññesaṃ bhūmiyaṃ pādaṃ ṭhapentānaṃ aggatalaṃ vā paṇhiṃ vā passaṃ vā paṭhamaṃ phusati vemajjhaṃ vā pana chiddaṃ hoti, ukkhipantānampi aggatalādīsu ekakoṭṭhāsova paṭhamaṃ uṭṭhahati, na evaṃ tassa. Tassa pana suvaṇṇapādukatalaṃ viya ekappahārenea sakalapādatalaṃ bhūmiṃ phusati, bhūmito uṭṭhahati. Sacepi hi bhagavā anekasataporisaṃ narakāṃ akkamissāmīti pādaṃ nīharati, tāvadeva ninnatthānaṃ vātapūritaṃ viya kammārabhastāṃ unnamitvā pathavīsamaṃ hoti, unnatatthānampi anto pavisati, dūre akkamissāmīti abhinīharantassa sineruppamāṇopi pabbato seditavetthaṅkuro viya namitvā pādasamīpaṃ āgacchati. Tathā hissa yamakapāṭihāriyaṃ katvā yugandharapabbataṃ akkamissāmīti pāde abhinīharato pabbato namitvā pādasamīpaṃ āgato. So taṃ akkamitvā dutiyapādena tāvatimsabhavanaṃ akkami. Na hi cakkalakkhaṇena patitthātābbaṭṭhānaṃ visamaṃ bhavituṃ sakkoti. Khāṇu vā kaṇḍako vā sakkharakathalā vā uccārapassāvo vā kheḷasiṅghaṇikādīni vā purimatarāva apagacchanti. Tattha tattheva pathaviṃ pavisanti. Tathāgataṃ hi sīlatejena paññātejena dhammatejena dasannaṃ pāramīnaṃ ānubhāvena ayaṃ mahāpathavī samā mudu pupphākiṇṇā honti. Tatra tathāgato samaṃ pādaṃ nikkhipati. Samaṃ uddharati, sabbāvantehi pādālehi bhūmiṃ phusati, tasmā suppatitthitapādoti thometi.

Mūdo dātuṇṇalomoti muda odāta uṇṇalomoti padacchedo. Bhamukantare jāto saṅhasukhumo seto suddho uṇṇalomavantoti attho. Ettha ca mudasaddo saṅhasukhumavācako anipphannaṃpāṭipadiko. Atha vā mudeti mudayati satteti mudo, sukhumo. Mudadhātu modane a. Avadāyati khaṇḍiyatīti odāto. Avapubba dādhātu avakhaṇḍane ta. Atha vā avadāyati sujhatīti odāto, yathā vodānanti. Mudo ca odāto ca mudodāto, uṇṇati uddhaṃ gacchatīti uṇṇā, lomo. Uṇṇasaddo hi loke lomasaddapariyāyoti vadanti ācariyā. Maṃsassa upari pavattatīti attho. Uṇṇadhātu gatiyaṃ ṇa. Maṃsacammāni lunāti chindatīti lomo. Ludhātu chindane manipaccayo. Lunitabboti vā lomo, uṇṇā ca sā lomo cāti uṇṇalomo, lomaviseso. Mudo dāto uṇṇalomo yassa soti mudodātuṇṇa lomo, sugato. Uṇṇālomam pana bhagavato dvinnāṃ bhamukānaṃ vemajjhe nāsimaṭṭhakeyeva jātaṃ. Uggantvā pana nalātamajjhe jātaṃ. Sappimaṇḍe osāretvā ṭhapitasata vitatakappāsapaṭalaṃ viya mudam. Parisuddhaosadhitārakavaṇṇaṃ viya ca sippalitūlalātūlaṃ viya ca vigatamalena odātaṃ uṇṇālomam atthi, na aññesanti attho. Vuttañhetam **brahmāyusutte** –

“Uṇṇā kho panassa bhoto gotamassa bhamukantare jātā odātā mudu tūlasannibhā”ti.

Taṃ panetaṃ koṭiyaṃ gahetvā ākaḍḍhiyamānaṃ upaḍḍha bāhuppamāṇaṃ hoti. Vissattham dakkhiṇāvattavasena āvaṭṭitvā uddhaggā hutvā santiṭṭhati. Suvaṇṇaphalakamajjhe ṭhapitarajata pupphūlakaṃ viya, suvaṇṇaghaṭato nikkhammānaṃ khīradhāraṃ viya aruṇappabhārañjite gaganatale osadhitārakaṃ viya ca atimanoharāya siriya virocāti, tasmā mūdodātuṇṇalomoti thometi.

Athamapīti tadaññaṃ api. **Sugatoti** buddho. So hi sundaravācaṃ gadati vadatīti sugatoti vuccati. **Brahmujuggattabhāvoti** brahmaujuuggataattabhāvoti padavibhāgo. Brahmuno uju uggataattabhāvo viya ujumeva uggataattabhāvo dīghasarīroti attho. **Brahmāyusutte** pana “brahmujugatto”tipāṭho. Tadaṭṭhakathāyañca brahmujugattoti brahmā viya ujugatto ujumeva uggatadīghasarīroti vivarati. Taṃ pana sandhāya brahmujuggattabhāvoti vuttaṃ.

Ayaṃ panettha vacanattho. Jhānādiguṇehi uparūparibrūhati vaḍḍhatīti brahmā. Brūhadhātu vaḍḍhane ma, arati avāṅkabhāvena pavattatīti uju, avāṅko. Aradhātu gatiyaṃ jupaccayo. Arissa uādeso. Uddhaṃ gacchati pāpuṇatīti uggato. Upubba gamudhātu gatiyaṃ to. Āhito āropito aham māno etthāti attā, sarīro. Āpubba dhā dhātu ropane manipaccayo tupaccayo vā. Dhassa to. Massa to. Atha vā sukhadukkhaṃ adati anubhavatīti attā. Adadhātu anubhavane manipaccayo.

Kaccāyanasaddasatthe pana “sukhadukkhaṃ adati bhakkhatīti attā, jātijarāmarañādīhi adiyate bhakkhiyateti vā attā. Ātumā”ti vuttaṃ. Khyādīhi manimaca tovāti suttana padasiddhi veditabbā. Attāti abhidhānaṃ buddhi ca bhavanti etasmāti attabhāvo, rūpakāyo. **Anuṭikāyaṃ** pana “āhito aham māno etthāti attā, soeva bhavati uppajjati na paraparikappito viya niccoti attabhāvo. Attāti vā dīṭṭhigatikehi gahetabbākarena bhavati pavattatīti attabhāvo”ti vuttaṃ. Brahmuno ujumeva uggato attabhāvo viya ujumeva uggato attabhāvo yassa soti brahmujuggattabhāvo, sugato. Yebhuyyena hi

sattā khandhe kaṭṭiyam jāṇusūti tīsu thānesu namanti. Thokam kaṭṭiyam namantā pacchato namanti. Itaresu dvīsu thānesu purato. Dīghasarīrā paneke passā vaṅkā honti, eke mukham unnametvā nakkhattāni gaṇayantā viya caranti, eke appamaṃsalohitā sūlasadisā honti, pavedhamānā gacchanti, tathāgato pana ujumeva uggantvā dīghappamaṇo devanagare ussitasuvaṇṇa toraṇam viya hoti. Tasmā brahmujuggattabhāvoti thometi.

Nīlakkhīti nīlaakkhīti padacchedo. Atinīlanetena samannāgatoti attho. Ikkhati passati anena rūpārammaṇam samavisamaṃ vāti akkhi, nettam. Ikkhadhātu dassane i. Issa attam. Nīlā atinīlā akkhi nettā yassāti nīlakkhi, sugato. Bhagavato hi na sakalanīlakkhiva hoti. Nīlayuttaṭṭhāne panassa ummārapupphasadisena ativisuddhena nīlavaṇṇena samannāgatāni akkhīni honti. Pītayuttaṭṭhāne kaṇikārapupphasadisena lohitavaṇṇena. Lohitayuttaṭṭhāne bandhujīvakaṇṇapupphasadisena lohitavaṇṇena. Seta yuttaṭṭhāne osadhitarakasadisena setavaṇṇena. Kāla yuttaṭṭhāne addārīṭṭhakasadisena kālavaṇṇena samannāgatāni suvaṇṇavimāne ugghāṭitamaṇisīhapaṇjarasadisāni khāyanti. Vuttañhi **mahāniddese** “maṃsacakkhumhi bhagavato pañcavaṇṇā saṃvijjanti. Nīlo ca vaṇṇo, pītako ca vaṇṇo, lohitako ca vaṇṇo, kaṇho ca vaṇṇo, odāto ca vaṇṇo akkhilomāni ca bhagavato, yattha ca akkhi lomāni patiṭṭhitāni. Tam nīlam hoti sunīlam pāsādikaṃ dassaneyyam ummārapupphasamānam. Tassa parato pītakaṃ hoti supītakaṃ suvaṇṇavaṇṇam pāsādikaṃ dassaneyyam kaṇikārapupphasamānam. Ubhato akkhikuṭṭāni bhagavato lohitakāni honti sulohikāni pāsādikāni dassaneyyāni indagopakasamānāni. Majjhe kaṇham hoti sukaṇham alūkaṃ suddham pāsādikaṃ dassaneyyam addārīṭṭhaka samānam. Tassa parato odātam hoti suodātam setam paṇḍaram pāsādikaṃ dassaneyyam osadhitarakasamāna”nti. Bhagavā pana tena maṃsacakkhunā caturaṅgasamannāgate andhakārepi samantā yojanam passati divā ceva rattiṇca.

Vuttañhi **mahāniddese** –

“Tena bhagavā pākatikena maṃsacakkhunā attabhāva pariyāpannena purimasucaritakammābhiniabbattena samantā yojanam passati divā ceva rattiṇca. Yādāpi caturaṅgasamannāgato andhakāro hoti, sūriyo ca atthaṅgāmito hoti, kālapakkho ca uposatho hoti, tibbo ca vanasaṇḍo hoti, mahā ca kālamegho abbuṭṭhito hoti, evarūpepi caturaṅgasamannāgate andhakāre samantā yojanam passati. Natthi so kuṭṭo vā kavāṭam vā pākāro vā pabbato vā gaccho vā latā vā āvaraṇam rūpānam dassanāyā”ti. Tasmā upalakkhaṇanayena nīlakkhīti thometi.

Dīghapaṇhīti āyatapaṇhi. Paripuṇṇapaṇhīti attho. Pasati bādhati anena paresanti paṇhi, pādassa pacchābhāgo. Pasadhātu bādthane ṇi. Sassa ho. **Nvādimoggallāne** pana “paṇa byavahārathutīsu hi paṇiyati vohāriyatīti paṇhi, pādassa pacchābhāgo”ti vuttam. Dīghā paṇhi yassa soti dīghapaṇhi, sugato. Yathā hi aññesaṃ agga pādo dīgho hoti. Paṇhimatthake jaṅghā patiṭṭhāti paṇhim tacchetvā ṭhapitā viya hoti. Na evaṃ tathāgatassa. Tathāgatassa pana catūsu koṭṭhāsesu dve koṭṭhāsā aggapādā honti. Tatiye koṭṭhāse jaṅghā patiṭṭhāti. Catutthe koṭṭhāse āraggena vaṭṭetvā ṭhapitā viya rattakambale geṇḍukasadisā paṇhi hoti. Tasmā dīghapaṇhīti thometi.

Sukhumamalachavīti sukhuma amala chavīti padacchedo. Saṇhamalavisuddhataco saṇhamalavirahitataco vāti attho. Ettha ca sukhumasaddo saṇhavācako anipphannaṇapāṭipadiko. Atha vā sukhayati saṇhabhāvenāti sukhumaṃ, saṇham. Sukhadhātu takkariyam umapaccayo. Taṃsamaṅgīpuggalaṃ kiliṭṭham malati dhāretīti malaṃ, rajādimalaṃ. Maladhātu dhāraṇe a, natthi malametissāti amalā, chavī. Maṃsaṃ chādetīti chavī. Chada dhātu saṃvaraṇe ravapaccayo ipaccayo ca. Sukhumā saṇhā amalā malavirahitā chavī yassāti sukhumamalachavī, sugato. Bhagavato hi suvaṇṇasiniddhasaṇhasarīratā kañcanasannibha tacattā ca rūpakāye padumapalāse udakabindhu viya rajojallaṃ vā malaṃ vā na limpati. Vuttañhi majjhimapaṇṇāse **brahmāyusutte** –

“Sukhumacchavī kho pana bhavaṃ gotamo sukhumattā chaviyā rajojallaṃ kāye na upalimpati”ti. Tasmā sukhuma malachavīti thometi.

Thomyarasaggasaggīti thomyarasa gasa aggīti padacchedo. Thomitabba rasaharaṇasattasahassanārū uddhaggikāti attho. Thomiyatīti thomyo, nārū. Thomadhātu silāghāyam ṇyo. Madhurādibhedam rasam gasenti anto pavesentīti rasaggasā, nārū.

Rasasaddūpapadagasadhātu adane a. Atha vā rasam gasati harati etehīti rasaggasā, nhāru. Gasadhātu haraṇe a. Dhātusaddo hi anekattho. Rasaggasānam aggāti rasaggasaggā, te ettha santīti rasaggasaggī, nhāru. Assathyatthe ipaccayo. Thomyo rasaggasaggī yassa soti thomyarasaggasaggī, sugato. Tathāgatassa hi sattarasaharaṇisahassāni uddhaggāni hutvā gīvāyameva paṭimukkāni. Tilaphalamattopi āhāro jivhagge ṭhapito sabbam kāyam anupharati. Teneva mahāpadhānam padahantassa ekatanḍulādīhipi kaḷāyayūsapasatenapi kāyassa yāpanam hoti. Aññesaṃ pana tathā abhāvā na sakalakāyam oḷā pharati. Tena te bahvābādā honti. Idam lakkhaṇam appābādhatāsankhātassa nissandaphalassavasena pākāṭam hoti, tasmā thomyarasaggasaggīti thometi.

Tevīsativandana gāthāvaṇṇanā samattā.

24. Dutiya gāthāyaṃ jīnoti pañcamārajitavā buddho. Tassa pana padassa samacattālīsaggadantotyādīhi padehi tulyalingattabhāvena sambandho. **Cattālīsaggadantoti** cattālīsaggadantoti padacchedo. Samacattālīsa uttamadantoti attho. Ettha ca aggasaddo uttamavācako anipphannapāṭipadiko. Atha vā uttamabhāvaṃ ajati gacchatīti aggo, danto. Daṃsati vidāmsati bhojjamanenāti danto. Daṃsadhātu daṃsane ta. Tassa nto dhātvantalopo. Samacattālīsam aggo uttamo danto yassāti cattālīsaggadanto, jīno. Uparimahanuke paṭiṭṭhitā dantā vīsati heṭṭhime vīsātīti samacattālīsadantā hontīti attho. Aññesañhi paripuṇṇadantānampi dvattiṃsadantā honti. Tathā gatassa pana cattālīsam. Tasmā cattālīsaggadantoti thometi.

Samakalapanajoti kakacena chinditvā ṭhapito viya samadantoti attho. Lapati vadati etenāti lapanam, mukham. Lapadhātu vadane yu. Tasmim lapanam mukhe jātoti lapanajo, danto. Tappurisasamāsoyam, samako lapanajo danto yassāti samakalapanajo, jīno. **Pāliyam** pana “samadanto”ti pāṭho atthi. Ayamevattho. Aññesañhi keci dantā uccā, keci nīcāti visamā honti. Tathāgatassa pana ayapaṭṭachinnasankhapaṭalam viya samā honti. Tasmā samakalapanajoti thometi.

Antaraṃsappapīnoti antaraṃsapīnoti padavibhāgo. Gāthābandhavasena chandānurakkhaṇattham pakāragamaṃ katvā evaṃ vuttam. Dvinnaṃ aṃsānam khandhānam antaraṃ vemajjhe paripuṇṇapīṭhitaloti attho. Ettha ca aṃsasaddo khandhatthe vattati. Vuttañhetam **abhidhānappadīpikāyam** “aṃso nitthi bhujasiro, khandho tassandhi jattu ta”nti.

Anati jīvati etenāti aṃso, khandho. Anadhātu pāṇe sopaccayo. Nassa niggahitādeso. Sarīrassa avayavabhāvena anati gacchati pavattatīti vā aṃso, dvinnaṃ aṃsānam khandhānam antaraṃ vemajjhanti antaraṃso, piṇati pūratīti pīno, piṭṭhitalam. Piṇadhātu pinane pūraṇe vā ṇa. Nassa no. Dvinnaṃ aṃsānam khandhānam antaraṃ vemajjhe pīnam paripuṇṇam piṭṭhitalam yassāti antaraṃsappapīno, jīno. Uttarapadalopabahubbīhisamāsoyam. Aññesañhi tam ṭhānam ninnam hoti, dve piṭṭhikoṭṭā pāṭiekkam paññāyanti. Tathāgatassa pana kaṭito paṭṭhāya maṃsapaṭalam yāva khandhā uggamma samussitasuvaṇṇaphalakaṃ viya piṭṭhim chādetvā paṭiṭṭhitam. Tasmā antaraṃsappapīnoti thometi. **Pāliyam** pana “citantaraṃso”ti pāṭho. **Tadaṭṭhakathāyañca** “citantaraṃ soti antaraṃsam vuccati dvinnaṃ koṭṭānam antaraṃ. Tam paripuṇṇa massāti antaraṃso”ti vuttam.

Cakkenāṅkitapādoti cakkena āṅkitapādoti padacchedo. Aṭṭhasatapādacakkalakkhaṇena lakkhitapādotaloti attho. Cakkena aṭṭhasatapādacakkena āṅkito lakkhito pādo yena soti cakkenāṅkitapādo, jīno. Tatiyābahubbīhi samāsoyam. Aññesañhi pādatale aṭṭhasatapādacakka lakkhaṇam natthi. Tathāgatassa pādataleeva vicitraṃ aṭṭhasata pādacakkalakkhaṇam atthi. Tasmā cakkenāṅkitapādoti thometi.

Vuttañhi **brahmāyusutte** “heṭṭhā kho pana tassa bhoto gotamassa pādatalesu cakkāni jātāni sahasārāni sanemikāni sanābhikāni sabbākāraparipūrāni”ti. Aṭṭhasatapādacakkalakkhaṇasarūpaṃ pana yo pādapaṅkajamuduttalarā jikehīti gāthāvaṇṇanāyaṃ vuttamevāti.

Aviraḷadasanoti avivaradanto. Avivaradantena sampannoti attho. Vivarati phullatīti viraḷo. Varadhātu phullaneḷo. Assi. Na viraḷo aviraḷo, natthi viraḷo etassāti aviraḷo, danto. Daṃsati vidāmsati khādanīyam vā bhojanīyam vā etenāti dasano, danto. Daṃsadhātu daṃsane yu. Niggahitalopo.

Aviraḷo dasano danto yassāti aviraḷadasano, jino. Aññesañhi kumbhilānaṃ viya dantā viraḷā honti. Macchamaṃsādini khādantānaṃ dantantaraṃ pūrati. Tathāgatassa pana kanakalatāya samussāpitavajira panti viya aviraḷā tulikāya dassitaparicchedā viya dantā honti, tasmā aviraḷadasanoti thometi.

Mārajussaṅkhapādoti māraji ussaṅkhapādoti padacchedo. Ettha ca mārajīti pañcamārajitavā buddho kattubhūto. So hi pañcamāre jitavāti mārajīti vuccati. Ussaṅkhapādoti pādassa upari t̥hitena saṅkhasadisattā saṅkhanāmikena gopphakena samannāgatoti attho. Saṃsuṭṭhuṃ pathaviṃ khanatīti saṅkhe. Saṃpubbakhanudhātu avadāraṇe kvi. **Apadānaṭṭhakathāyaṃ** pana “saṃsuṭṭhuṃ khādanto khaṇanto gacchatīti saṅkhe. Samuddajalapariyante caramāno gacchati caratīti attho” ti vuttaṃ. Saṅkhe viyāti saṅkhe, gopphako. Pādassa uddhaṃ upari t̥hitam saṅkhasadisam gopphaka massāti ussaṅkhapādo, jino. Vuttañhi **brahmāyusuttaṭṭhakathāyaṃ** “uddhaṃ patiṭṭhitagopphakattā ussaṅkhā pādā assāti ussaṅkhapādo” ti. Aññesañhi piṭṭhipāde gopphakā honti. Tena tesam pādā añibaddhā viya baddhā honti. Na yathāsukhaṃ parivattanti. Gacchantānaṃ pādatalāni na dissanti. Tathāgatassa pana abhirūhitvā upari gopphakā patiṭṭhahanti. Tenassa nābhito paṭṭhāya uparimakāyo nāvāya t̥hapita suvaṇṇapaṭimā viya niccalo hoti. Adhokāyova iñjati. Sukhena pādā parivattanti. Puratopi pacchato ubhayapassesupi t̥hatvā passantānaṃ pādatalāni paññāyanti. Na hatthīnaṃ viya pacchatoyevāti. Tasmā ussaṅkhapādoti thometi.

Tiṭṭhanto nonamantobhayakaramudunā jaṇṇukānāma santoti ettha tiṭṭhanto no namanto ubhaya karamudunā jaṇṇukāni āmasantoti padavibhāgo. **Tiṭṭhantoti** t̥hitakova. **Nonamantoti** anamamāno hutvā. **Ubhaya karamudunāti** sukhumena hatthadvayena. **Jaṇṇukānīti** jaṅghāni. Jāyati gamanāgamaṇaṃ anenāti jaṇṇu, janadhātu janane ṇu. Soeva jaṇṇukā, jaṅghorūnaṃ sandhi labbhati. Tāni. **Āmasantoti** parimajjitum sakkonto. Ettha ca tiṭṭhanto nonamantoti iminā tathāgatassa akhujjaavāmanabhāvo dīpito. Avasesajānā hi khujjā vā honti vāmanā vā. Khujjānaṃ uparimakāyo aparipuṇṇo hoti vāmanānaṃ heṭṭhimakāyo. Te aparipuṇṇakāyattā na sakkonti nonamanto jaṇṇukāni parimajjitum. Tathāgato pana paripuṇṇaubhayakāyattā sakkoti, tasmā tiṭṭhanto...pe... jaṇṇukā nāmasantoti thometi.

Vaṭṭakkhandhoti suvaṇṇāliṅgo viya samavaṭṭitagaliko. Vuttañhi **brahmāyusutte** “samavaṭṭakkhandho” ti. Parimaṇḍalā kārena vaṭṭati pavattatīti vaṭṭo, parimaṇḍalo. Vaṭṭadhātu vaṭṭane a. Bhojanaṃ khādati etena galenāti khandho, galo. Khādadhātu khādane bhakkhane vā kvipaccayo. Khādāmagamānaṃ khandhandhagandhāti suttena padasiddhi veditabbā. **Abhidhānaṭṭikāyaṃ** pana “kaṃ matthakaṃ dadhātīti kandho. Soeva kakārassa khakārakaraṇavasena” ti vuttaṃ. Vaṭṭo samaparimaṇḍalo khandho galo yassāti vaṭṭakkhandho, jino. Yathā hi eke koñcā viya bakā viya varāhā viya ca dīghagalā vaṅkagalā puthugalā ca honti. Kathanakāle sirājalaṃ paññāyati. Mando saro nikkhamati, na evaṃ tassa. Tathāgatassa pana suvaṭṭitasuvaṇṇāliṅgasadiso khandho galo hoti. Kathanakāle sirājalaṃ na paññāyati. Meghassa viya gajjato saro mahā hoti. Tasmā vaṭṭakkhandhoti thometi.

Puna jinoti buddho kattubhūto. Tassa pana padassa gotaruṇapakhumakotyādīhi padehi tulyaliṅgattabhāvena sambandho. **Gotaruṇapakhumakoti** taṃmuhuttajātaratta vacchassa cakkhubhaṇḍo viya vipasannacakkhubhaṇḍo, vipasannacakkhubhaṇḍena samannāgato vā. Ettha ca pakhumakoti sakalaṃ cakkhubhaṇḍaṃ adhippetam. Cakkhubhaṇḍanti cakkhuparivāram. Cakkhubhaṇḍanti akkhidalanti keci. Akkhidalapattanti vadanti aññe. Akkhidale hi pana saddhim akkhibimbanti veditabbaṃ. Ayaṃ panettha vacanattho. Patati cakkhuṃ parivāreti etenāti pakhumaṃ, pamhādiparivāram. Patadhātu parivāre umo. Takārassa kho. Atha vā akkhino pakkhadvaye jātanti pakhumaṃ, pamhaṃ. Jātadadhite umo. Pakkhumanti vattabbe kakāralopavasena pakhumanti vuccati. Pakhumaṃyeva pakhumako. Gotaruṇassa taṃmuhuttajātarattavacchassa pakhumaṃ viya pakhumaṃ yassa sotī gotaruṇapakhumako, jino. Gotaruṇassa taṃmuhuttajātarattavacchassa pakhumasadisam vipasannacakkhubhaṇḍaṃ atthīti attho. Aññesañhi akkhibhaṇḍo aparipuṇṇo hoti. Hatthimūsikakādīnaṃ akkhisadisehi viniggethehi gambhīrehipi akkhīhi samannāgatā. Tathāgatassa pana dhovitvā majjitvā t̥hapitamaṇigulikā viya mudusiniddhanīla sukhumapakhumācitāni akkhīni honti. Tasmā gotaruṇapakhumakoti thometi.

Sīhapubbaḍḍhakāyoti sīhassa pubbaḍḍhakāyo viya paripuṇṇakāyo. Vātātapādi-parissayaṃ sahati khamatīti sīho, sahadhātu khamane a. Īkārāgamo. Atha vā sūkaramahimsādayo satte himsatīti sīho. Himśadhātu hanane ṇa. Himśoti vattabbe akkharavipariyāyena sīhoti vuccati. Atha vā sabbiriyāpathesu daḷhavīriyattā suṭṭhu īhati vāyamatīti sīho, kesarasīho. Supubba īhadhātu cetāyaṃ a. Tena vuttaṃ **saddanītiyaṃ** “sahaḥimsa īhāvāsā, sīhasaddagatiṃ vade”ti. Sīhassa pubbaḍḍhe jāto kāyo viya paripuṇṇakāyo yassāti sīhapubbaḍḍhakāyo, jino. Yathā hi sīhassa pubbaḍḍhakāyova paripuṇṇo hoti, na evaṃ tassa. Tathāgatassa pana kāyo sabbaparipuṇṇoti attho. Sīhassa pana purimakāyova paripuṇṇo hoti, pacchima kāyo aparipuṇṇo. Tathāgatassa pana sīhassa pubbaḍḍhakāyova sabbo kāyo paripuṇṇo. Sopi sīhasseva na tattha tattha vinatunnatādivasena dussaññhita viññhito. Dīghayuttaṭṭhāne pana dīgho. Rassakisathūla anuvaṭṭitayuttaṭṭhānesu tathāvidhova hoti. Vuttaññhetam “manāpiye ca kho bhikkhave kammavipāke paccupaṭṭhite yehi aṅgehi dīghehi sobhati, tāni aṅgāni thūlāni saññhahanti. Yehi aṅgehi kisehi sobhati, tāni aṅgāni kisāni saññhahanti. Yehi aṅgehi vaṭṭehi sobhati, tāni aṅgāni vaṭṭāni saññhahanti”ti. Iti nānācittena puññacittena cittito dasahi pāramīhi sajjito tathāgatassa attabhāvo tassa loke sabbasippino vā iddhimanto vā patirūpakampi kātuṃ na sakkonti. Tasmā sīhapubbaḍḍhakāyoti thometi.

Catuvīsativandanaḡāthāvaṇṇanā samattā.

25. Tatiya ḡāthāyaṃ **sugatoti** buddho kattubhūto. Tassa pana padassa sattappīnotyādīhi padehi tulyaliṅgattabhāvena sambandho. **Sattappīnoti** dvihatthapāda aṃsakūṭa ekagalavasena sattuṣu ṭhānesu paripuṇṇamaṃsikoti attho. Ācariyā pana paripuṇṇadvihatthapāda aṃsakūṭa khandhasaṅkhātasattaṭṭhānoti atthaṃ vadanti. Maṃsena pīṇati paripūrātīti pīno. Pīṇate paripūrāte vā pīno. Pīṇadhātu pīṇane, pūrāṇe vā ṇa. Ṇassa no. Dve hatthapiṭṭhiyo dve pādapiṭṭhiyo dve aṃsakūṭāni ekagalo cāti sattuṣu ṭhānesu pīno paripuṇṇo maṃso assāti sattapīno, sugato labbhati. Aññesaññi hatthapādapiṭṭhisu nhārujālā paññāyanti aṃsakūṭagalesu aṭṭhikoṭiyo. Te manussā petā viya khāyanti. Na tathāgato. Tathāgato pana sattuṣu ṭhānesu paripuṇṇamaṃsussadattā nigulānhārujālehi hatthapiṭṭhādīhi vaṭṭetvā ṭhapitasuvaṇṇavaṇṇālīṅgasadisena galena sīlārūpakam viya cittakammārūpakam viya ca khāyati, tasmā sattappīnoti thometi.

Brahmāyusutte pana “sattussado”ti pāṭho. Tassa pana sattuṣu ṭhānesu paripuṇṇamaṃsussadoti attho daṭṭhabbo.

Dīghaṅgulīti dīghaṅgulīti padacchedo. Samaāyatahattha pādaṅgulīti attho. Aṅgati uddham gacchatīti aṅguli. Aṅgati taṃ taṃ kāyaṅgaṃ parāmasati etāyāti vā aṅguli, karasākhā. Agidhātu gatiyaṃ ulipaccayo. Atha vā aṅgaṃ kāyaṅgaṃ ulati gacchati parāmasati etāyāti aṅguli, karasākhā. Aṅga saddūpapadauladhātu gatiyaṃ i. Samadīghā aṅguli hattha pādaṅguli yassa soti dīghaṅguli, sugato. Samadīghā hatthapādaṅguli atthīti attho. Yathā hi aññesaṃ kāci aṅguli dīghā hoti kāci rassā, na evaṃ tathāgatassa. Tathāgatassa pana makkaṭasseva dīghahatthapādaṅguliyo mūle thūlā anupubbena gantvā agge tanukā niyyāsatelena madditvā vaṭṭitaharītālavattasadisā honti. Tasmā dīghaṅgulīti thometi. **Mathāti** maathāti padacchedo. Makāro hi padasandhikaro. Athāti atthantare nipāto. Tadaññanti attho.

Lomakūpekalomoti lomakūpekalomoti padacchedo. Ekekalomakūpe ekekajātalomoti attho. Cammamamaṃsam lunāti chindatīti lomo, vaḍḍhamānaṃ lunitabbanti vā lomo, lūdhātu chedane manipaccayo. Kuvuccati udakaṃ, taṃ pāti rakkhatīti kūpo. Kupubbapādhātu rakkhane kvi. Ussa dīgho. Kūpo viyāti kūpo, atha vā kuvuccati lomaṃ, taṃ pāti rakkhatīti kūpo. **Abhidhānaṭikāyaṃ** pana “kusadde po. Dīghādi. Kūpo. Kena ubhatīti vā kūpo. Bhassa po”ti vuttaṃ. Lomassa kūpo lomakūpo. Tasmim tasmim jāto ekeka lomo yassāti lomakūpekalomo, sugato. Yathā hi aññesaṃ ekekasmim lomakūpe anekāni lomāni jāyanti, na evaṃ tathāgatassa. Tathāgatassa pana ekekasmim lomakūpe ekekalomo jāyati. Vuttaññi **brahmāyusutte** “ekekalomo kho pana bhavaṃ gotamo. Ekekāni lomāni lomakūpesu jātā nī”ti. Tasmā lomakūpekalomoti thometi.

Sampannodātadāṭhoti sampannoodātadāṭhoti padacchedo. Sampannasukkadāṭhoti attho. Sampajjatīti sampanno. Saṃpubbapadadhātu gatiyaṃ ta. Tassa anno. Avadāyati avakhaṇḍiyati aññavaṇṇobhāsanti odāto. Avapubba dādadhātu avakhaṇḍane ta. Daṃsati odanādiṃ etāyāti dāṭho,

dantaviseso. Daṃsadhātu daṃsane ṭho. Daṃsissa dā. Sampanno ca odāto ca dāṭho yassāti sampanno dātadāṭho, sugato. Aññesañhi pūtidantā utṭhahanti. Tena kāci dāṭhā kālāpi vivaṇṇāpi hontī. Tathāgato pana sukkadāṭho osadhītārakampi atikkamma virocāmānāya pabhāya samannāgatadāṭho hoti. **Pāliyaṃ** pana “susukkadāṭho”ti pāṭho. Ayamevattho. Tasmā sampannodātadāṭhoti thometi.

Kanakasamatacoti suvaṇṇena sadisacammo. Kanati dibbati obhāsenāti kanakaṃ. Kaniyati icchiyati manusse hīti vā kanakaṃ, suvaṇṇaṃ. Kanadhātu dittigantikantīsu akapaccayo, saṃsadisena amati gacchati pavattatīti samaṃ. Saṃpubbaamadhātu gatiyaṃ a. Tacati maṃsaṃ chādeti saṃvarati vāti taco, tacati dibbati suvaṇṇobhāsenāti vā taco, cammaṃ. Tacadhātu saṃvaraṇadittīsu a. Kanakena suvaṇṇena samo sadiso taco yassāti kanaka samataco, sugato. Yathā hi aññesaṃ taco koci nīlataco setataco pītataco hoti, na evaṃ tathāgatassa. Tathāgatassa pana jātihiṅgulakena majjivā nisadāya ghaṃsitvā gerukaparikkammaṃ katvā ṭhapita ghanasuvaṇṇarūpakaṃ viya kañcanasadisataco hoti. **Pāliyaṃ** pana “suvaṇṇavaṇṇo kañcanasannibhattaco”ti vutto. Ettha ca suvaṇṇavaṇṇo viya vaṇṇo yassāti suvaṇṇavaṇṇo, kañcanena sannibhaṃ sadisaṃ tacamassāti kañcanasannibhattacoti vacanatto kātabbo. Ettha ca suvaṇṇavaṇṇanti iminā tathāgatassa ghanasiniddhasaṅghasārīratam dasseti. Kañcanasannibhattacoti iminā chavivaṇṇaṃ dasseti. Atha vā vevacanametam padadvayaṃ. Tasmā kanakasamatacoti thometi.

Nīlamuddhaggalomoti nīlam uddham aggalomoti padacchedo. Nīlam uddham aggā koṭi hutvā mukhasobham ullokayamāno viya ṭhitalomo, nīlāni uddham aggāni koṭīni hutvā ṭhitāni lomāni yassāti nīlamuddhaggalomo, sugato. Yathā hi aññesaṃ lomāni heṭṭhā aggāni hutvā tiṭṭhanti, na evaṃ tathāgatassa. Tathāgatassa pana lomāni āvaṭṭapariyosāne uddham aggāni hutvā mukhasobham ullokayamānāni viya tiṭṭhanti. Vuttañhetam **brahmāyusutte** “uddhaggalomo bhavaṃ gotamo. Uddhaggāni lomāni jātāni nīlāni añjanavaṇṇāni kuṇḍalāvaṭṭāni padakkhiṇāvaṭṭakajātāni”ti. Tasmā nīlamuddhaggalomoti thometi.

Sambuddhoti tathāgato. So hi anaññabuddho hutvā sāmānyeva cattāri saccāni bujjhatīti sambuddhoti vuccati. Tassa pana padassa thūlajivhotyādīhi tīhi padehi tulyaliṅgatabhāvena sambandho.

Thūlajivhoti mududīghaputhula jivhāya sampannoti attho. Gāthābandhavasena hi mududīghasaddalopaṃ katvā evaṃ vuttaṃ. Tena vuttaṃ **aṭṭhakathāyaṃ** “mudujivhā dīghā thūlā vaṇṇa sampannā”ti. Thūlati brūhatīti thūlā, jivhā. Thūladhātu buddhiyaṃ a. Jīvati pāṇaṃ dhāretīti jivhā, rasanā. Jīvadhātu pāṇadhāraṇe hapaccayo. Jīvanti sattā etena rasenāti jīvitam, chabbidharaso. Tam avhāyatīti jivhā, jivhāpasādarūpaṃ. Sambhārajivhā ṭhānūpacārena labbhati. Jīvitasaddūpapada avhadhātu avhāyane a. Jīvitaavhāti vattabbe niruttinayena vitasaddalopaṃ katvā jivhāti vuttaṃ. Thūlā mahantā dīghā mudukā jivhā yassāti thūlajivho, sambuddho. Aññesañhi jivhā thūlāpi hoti kisāpi rassāpi thaddhāpi visamāpi. Tathāgatassa pana mudujivhā dīghā puthulā vaṇṇa sampannā hoti. So tam lakkhaṇaṃ pariyesitum āgatānaṃ brahmāyubrāhmaṇādīnaṃ kañkhāvinodanattam jivhāya mudukattā tam jivham kathinasūci viya vaṭṭetvā ubhopi nāsikāsotāni parāmasati, dīghattā ubho kaṇṇasotāni parāmasati, puthulattā kesantapariyosānaṃ kevalampi nalātam paṭicchādeti, evaṃ tassā mududīghaputhulabhāvaṃ pakāsento kañkhāvinodeti, evaṃ tilakkhaṇasampannaṃ jivham sandhāya thūla jivhoti thometi. **Pāliyaṃ** pana “pahūtajivho”ti pāṭho. Ayamevattho.

Athāti atthantaratthe nipāto. Tadaññanti attho. **Sīhahanukoti** sīhassa heṭṭhā hanu viya paripuṇṇa hanuko. Sīhasaddattho heṭṭhā vuttoyeva. Hanati odanādīnaṃ vaṇṇavisesaṃ nāsetīti hanu. Hanadhātu hiṃsāyaṃ u. Sīhassa heṭṭhā hanu viya hanu yassāti sīhahanuko, sambuddho. Samāsante ko. Sīhassa hi heṭṭhimahanumeva paripuṇṇaṃ hoti, na uparimaṃ. Tathāgatassa pana sīhassa heṭṭhimaṃ viya dvepi paripuṇṇāni dvādasiyaṃ pakkhassa candasadisāni hontī. Tasmā sīhahanukoti thometi.

Jālikappādahatthoti kusalena vadḍhakinā vātapāne sammāyojijālaṃ viya cammena appaṭibaddhatthapādaṅgulantaro. Jalati dibbatīti jālaṃ, jaladhātu dittiyaṃ ṇa. Jālaṃ assa atthi tasmim vā vijjatīti jālikaṃ, vātapānaṃ. Assathyatthe ṇiko. Atha vā jālaṃ eva jālikaṃ. Pajjati

gacchati etenāti pādo, caraṇo. Padadhātu gamane ṇa. Taṃ taṃ bhāraṃ haratīti hattho, karo. Haradhātu haraṇe tho. Jālikam viya hatthapādaṅgulantaraṃ yassāti jālikappādahattho, sambuddho. Kusaleṇa vaḍḍhakinā vātapāṇe sammāyojitāni jālasadisāni hatthapādaṅgulantarāni honti. Na ca cammena paṭibaddhaṅgulantarānīti attho. Ettha jālikappādahatthaṅgulantaranti vattabbe uttarapadalopena evaṃ vuttaṃ. Cammena paṭibaddhahatthapādaṅgulantaro hi phaṇahatthako purisadosena upahato pabbajjampi na labhati. Tathāgatassa pana catasso hatthaṅguliyo pañcapi pādaṅguliyo ekappamāṇā honti. Tāsaṃ ekappamāṇa tāya yavalakkhaṇaṃ aññamaññaṃ paṭivijjhivā tiṭṭhati. Athassa hatthapādā kusaleṇa vaḍḍhakinā sammāyojitajālāvāta pānasadisā honti, tasmā jālikappādahattho thometi. **Pāliyaṃ** pana “jālahatthapādo”ti pāṭho. Ayamevattho.

Nāthoti buddho kattuvaseṇa. So hi nātho vineyyānaṃ hitapaṭipattiṃ yāceti, parasantānagataṃ vā kilesabyasaṃ upatāpeti, paramena cittissariyena samannā gato. Sabbasatte vā guṇehi īsati abhibhavati, veneyyānaṃ hitasukhaṃ vā āsīsātīti nātho ti vuccati. Vuttañhi **saddanītiyaṃ** “nāthadhātu yācane upatāpe issariye āsisane cāti catūsvatthesu pavattati”ti.

Tassa pana padassa uṇhīsasīsotipadena tulyalingattabhāvena sambandho. **Uṇhīsasīsoti** rañño baddhaṇhīsa paṭṭo viya virocamaṇo pakatimaṃsapaṇḍasaṅkhāto uṇhīsapattasīso. Nalāṭe nahiyati bandhiyatīti uṇhīso. Upubbanahadhātu bandhane, īso. Vaṇṇavikāro. Vuttañhi **jāliniyaṃ** –

“Vaṇṇāgamo vaṇṇavipariyāyo,
Dve cāpare vaṇṇavikāranāsā;
Dhātūnamatthāsisayena yogo,
Taduccate pañcavidhaṃ nirutti”nti.

Tattha ca avijjamānassa āgamā vaṇṇāgamo nāma. Vijjamānaakkharānaṃ heṭṭhupariyāyavaseṇa vaṇṇavipariyāyo nāma. Aññakkharassa aññakkharāpajjanatā vaṇṇavikāro nāma. Vijjamānakkharavināso vaṇṇavināso nāma. Tattha tattha yathāyogaṃ visesatthayogo dhātūnaṃ atthāsisaya yogo nāmāti adhippāyo. Ettha pana nakārassa ṇakāraṃ katattā vaṇṇavikāroti daṭṭhabbo. Mālādiṃ siyati bandhiyatīti sīso, uttamaṅgo. Sidhātu bandhane īso. Rājūnaṃ uṇhīsapattena veṭṭhitasīso viya sīso yassāti uṇhīsasīso. Atha vā rājūnaṃ uṇhīsaṃ viya sabbattha parimaṇḍalasīso yassāti uṇhīsasīso, nātho.

Vuttañhi **brahmāyusuttaṭṭhakathāyaṃ** “uṇhīsasīsoti idaṃ paripuṇṇanalāṭaṇceva paripuṇṇasīsācīti dve atthavase paṭicca vuttaṃ. Tathāgatassa hi dakkhiṇakāṇṇacūlikato paṭṭhāya maṃsapaṭaṃ utthahitvā sakalaṃ nalāṭaṃ chādayamānaṃ pūrayamānaṃ gantvā vāmakaṇṇacūlikāya paṭiṭṭhitam. Rañño baddhaṇhīsapattō viya virocati. Pacchimabhavikabodhisattānaṃ kira imaṃ lakkhaṇaṃ viditvā rājūnaṃ uṇhīsapattam akāṃsu. Ayaṃ tāva eko attho. Aññe pana janā aparipuṇṇasīsā honti. Keci kapisīsā, keci phalasīsā, keci aṭṭhisīsā, keci tumba sīsā, keci pabbhārasīsā. Tathāgatassa pana āraggena vaṭṭetvā ṭhapitam viya suparipuṇṇam udakapupphulasadisam sīsam hoti. Tattha purimanayena uṇhīsaveṭṭhitasīso viyāti uṇhīsasīso. Dutīyanayena uṇhīsaṃ viya sabbattha parimaṇḍala sīsoti uṇhīsasīso”ti. **Taṭṭikāyaṇca** “dve attha vase paṭicca vuttanti, yasmā buddhā cakkavattino ca paripuṇṇa nalāṭatāya paripuṇṇasīsabimbatāya uṇhīsasīsāti vuccanti. Tasmā te dve atthavase paṭicca uṇhīsasīsoti vutta”nti vaṇṇeti. Tasmā uṇhīsasīsoti thometi.

Itiguṇasahitanti iminā vuttappakāreṇa nigrodhabimbotyādinā dvattiṃsamahāpurisalakkhaṇaguṇeṇa sampannaṃ. Itievaṃ vuttappakāraṃ guṇaṃ itiguṇaṃ. Tena saha ito pattoti itiguṇasahito, mahesī. Aññe hi dvattiṃsa mahāpurisalakkhaṇehi sampannā na honti, cakkavattirājāno mahāpurisalakkhaṇehi sampannāpi ṭhapetvā kosohitavattha guyhalakkhaṇaṃ avasesehi sampannā honti. Tathāgatoyeva sabbamahāpurisalakkhaṇehi samannāgato. Tasmā bhagavantamyeva itiguṇasahitanti thomaṇaṃ arahatīti vuttaṃ hoti. **Taṃ mahesinti** sīlakkhandhādike ca nibbānaṇca esati gavesatīti mahesī. Taṃ mahesiṃ ahaṃ tīhi dvārehi namāmi vandāmīti sambandho.

Pañcavīsativandanaḡāthāvaṇṇanā samattā.

23. Ayaṃ pana imāsu tīsu gāthāsu **saṅkhepatthayojanā**. Buddho kattubhūto nigrodhabimbo nigrodhassa parimaṇḍalo viya parimaṇḍalasarīro mudukaracaraṇo saṅhahatthapādo, brahmaghoso brahmuno saro viya aṭṭhaṅgasampannasaravanto, eṇijaṅghā eṇimigassa jaṅghā viya suvaṭṭajāṇuko, kosacchādaṅgajāto usabhavāraṇā dīnaṃ aṅgajāto viya suvaṇṇapadumakaṇṇikasadisena vatthakosena paṭicchannena guyhaṅgajātena samannāgato, punarapi punaapi, sugato buddho suppatiṭṭhitapādo suvaṇṇa pādukatalamiva bhūmiyaṃ samaṃ suṭṭhu patiṭṭhitapādo, mūdo dātuṇṇalomo bhamukantare jāto saṅhasukhumo seto suddho uṇṇalomavanto, athamapi tadaññaṃapi, sugato buddho, brahmujuggatthabhāvo brahmuno ujuuggata attabhāvo viya ujumeva attabhāvo, nīlakkhī atinīlanettena samannāgato, dīghapaṇhi āyatapaṇhi paripuṇṇapaṇhi vā, sukhumamalachavī saṅhamalavisuddhataco saṅhamala virahitataco vā, thomyarasaggasaggī thomitabbasattara saharaṇasahassanāruuddhaggikā.

24. Jino pañcamārajitavā buddho, cattālīsaggadanto samacattālīsauttamadanto, samakalapanajo kakacena chinditvā ṭhapito viya samadanto, antaraṃsappapīno dvinnāṃ aṃsānaṃ khandhānaṃ antaraṃ vemajjhe paripuṇṇapiṭṭhitalo, cakkenaṅkitapādo aṭṭhasatapādacakkalakkhaṇena lakkhita pādalo, aviraḷadasano avivaradantena sampanno, māraji pañcamārajitavā buddho, ussaṅkhapādo pādassa upari ṭhitena saṅkhasadisattā saṅkhanāmikena goppakena samannāgato, tiṭṭhanto ṭhitakova nonamanto anamamāno hutvā ubhayakaramudunā sukhumena hatthadvayena jaṇṇukāni jaṅghāni āmasanto parimajjituṃ sakkonto, vaṭṭakkhandho suvaṇṇāliṅgo viya samavaṭṭitagaliko, gotaruṇa pakhumako taṃmuhuttajātarattavacchassa cakkhubhaṇḍo viya vipasannacakkhubhaṇḍo, vipasannacakkhubhaṇḍena samannāgato vā, sīhapubbaḍḍhakāyo sīhassa pubbaḍḍhakāyo viya paripuṇṇakāyo.

25. Sugato buddho, sattapīno dvihatthapādaaṃsakūṭaekagalavasena sattasu ṭhānesu paripuṇṇamaṃsiko, dīghaṅguli samaāyatahatthapādaṅguli, atha tadaññaṃ loma kūpekalomo ekekalomakūpe ekekaḷātalomo, sampannodātadāṭho sampannasukkadāṭho, kanaka samataco suvaṇṇena sadisacammo nīlamuddhaggalomo nīlaṃ uddhaṃ aggā koṭi hutvā mukhasobhaṃ ullokayamāno viya ṭhitalomo, sambuddho tathāgato, thūlajivho mududīghaputhulajivhāya sampanno, atha tadaññaṃ, sīhahanuko sīhassa heṭṭhāhanu viya paripuṇṇahanuko, jālikappāda hattho kusalena vaḍḍhakinā vātapāne sammāyojita jālaṃ viya cammena appaṭibaddhahatthapādaṅgulantaro, nātho buddho, uṇhīsāsīso rañño uṇhīsapaṭṭo viya virocāmāno pakatimaṃsapiṇḍasaṅkhāto uṇhīsapaṭṭasīso, iti guṇasahitaṃ evaṃ iminā vuttappakārena dvattiṃsamahāpurisalakkhaṇaguṇena samannāgataṃ taṃ mahesiṃ buddhaṃ tīhi dvārehi ahaṃ namāmi vandāmīti.

Tīsu gāthāsu saṅkhepatthayojanā samattā.

Imissaṃ pana namakkārapāliyaṃ dvattiṃsamahāpurisalakkhaṇaṃ buddhavacanapāliyaṃ āgatanayānukkamena na vuttaṃ. Gāthābandhavasena chandānurakkhaṇatthameva pana nigrodhabimbotyādinā akkamena vuttaṃ. Tasmā pātheyyavagge **lakkhaṇasutte** vuttaṃ dvattiṃsamahāpurisalakkhaṇakkamaṃ saṅkhepena dassayissāma bahussutapaññāvaḍḍhanatthaṃ.

1

. Buddho suppatiṭṭhitapādo 2. heṭṭhāpādātesu cakkajāto 3. āyatapaṇhi 4. dīghaṅguli 5. mudutaluna hatthapādo 6. jālahatthapādo 7. ussaṅkhapādo 8. eṇijaṅgho 9. ṭhitakova anonamanto ubhohi pāñitalehi jāṇukāni parimasati 10. kosohita vatthaguyho 11. suvaṇṇavaṇṇo kañcanasannibhattaco 12. sukhumacchavī 13. ekekalomakūpesu ekekalomo 14. nīlamuddhaggalomo 15. brahmujugatto 16. sattussado 17. sīhapubbaḍḍhakāyo 18. citantaraṃso 19. nigrodhparimaṇḍalo 20. samavaṭṭakkhandho 21. rasaggasaggī 22. sīhahanuko 23. cattālīsadanto 24. samadanto 25. aviraḷadanto 26. susukkadāṭho 27. pahuta jivho 28. brahmasaro 29. abhinīlanetto 30. gopa khumo 31. uṇṇā bhamukantare jātā odātā mudutūla sannibhā 32. uṇhīsāsīsoti dvattiṃsamahāpurisalakkhaṇassa kamo veditabbo. Imāni pana bhagavato dvattiṃsamahāpurisalakkhaṇāni pāramīpuññakammena yathārahaṃ kammaṃsarikkhaṃ labbhantīti veditabbāni. Tāni pana kammāni pātheyyavagge lakkhaṇasutte vuttāni, tāni panettha oloketvā gahetabbāni.

Tisso vandanagāthāvaṇṇanā samattā.

26. Buddhobuddhotighoso atidulabhataro kā kathā buddhabhāvo,
 Loke tasmā vibhāvī vividhahitasukhaṃ sādhavo patthayantā;
 Ittham attham vahantam suranaramahitam nibbhayam dakkhiṇeyyam,
 Lokānam nandivaḍḍham dasabalamasamam tam namassantu niccam.

26. Evaṃ sugatantiādīhi pañcaviśativandanagāthāhi buddhassa paṇāmaṃ katvā idāni tassa vandane uyyojanaṃ karonto āha **buddho buddhotighoso** tyādigātham. Ayaṃ pana saddharāgāthāti daṭṭhabbo.

Tattha pana loke buddho buddhoti ghoso atidulabhataro buddhabhāvo kā kathāti sambandho. Ettha ca **loketi** manussaloke tiloke vā anantacakkavāḷa loke vā. **Buddho buddhotighosoti** buddho buddho iti kittisaddo thutisaddo vā. Ghusanaṃ ghoso. Ghusiyati kathiyatīti vā ghoso, kittisaddo. Ghusadhātu sadde ṇa. Atha vā ghusiyati thaviyatīti ghoso, thutisaddo. Tena vuttam **pārājikaṇḍaṭṭhakathāyam** “kittisaddoti kittieva. Thutighoso vā”ti. Buddho buddho iti pavatto ghoso thutighosoti buddhobuddhotighoso. **Atidulabhataroti** ativiya dullabhatamo. Dullabhataroti hi vattabbe chandānurakkhaṇattham lakāralopena dulabhataroti vuttam. Dukkheṇa labhiyatīti dullabho. Dupubbalabhadhātu labhane a. Atha vā labhassa asamiddhanti dullabho, dubbhijāneyya abyayībhāvasamāsoyam. Dusaddo asamiddhattho, yathā dubbhikkhoti. Ati viya dullabhoti atidulabho. Tesam visesena atidullabhoti atidulabhataro. Buddhā hi loke kadāci karahaci uppajjanti. Tasmā buddho buddhoti ghoso atidulabhataroti vuttam. Vuttañhetam **cūlavaggakhandhake** “ghosopi kho eso gahapati dullabho lokasmiṃ, yadidaṃ buddho buddho”ti. Yathā ca hi loke udumbarikapupphaṃ dullabham. Candamhi sasakaṃ hatthena gaṇhituṃ. Vāyasānaṃ khīraṃ, evaṃ buddhabhāvo atidullabhataroti vuttam hoti. Ayaṃ pana hīnūpamāti daṭṭhabbā. Vuttañhetam **apadānapāliyam** –

“Udumbarikapupphaṃva, candamhi sasakaṃ yathā;
 Vāyasānaṃ yathā khīraṃ, dullabham lokanāyaka”nti ca;
 Dullabho buddhuppādo lokasmi”nti ca;

Kiñcāpi hi loke cakkavattirājūnaṃ uppajjamāno dullabho. Ekasmimpi pana kappe cakkavattirājāno anekā uppajjanti. Tathāgatā pana loke uppajjamānāpi ekasmiṃ kappe eka dviti catu pañca buddhāyeva uppajjanti, na taduttari. Yasmā hi asaṅkhyeyyepi kappe tathāgatasuñño hoti. Tasmā tathāgatasseva kadāci karahaci uppajjanato buddhobuddhotighoso atidulabhataro kā kathā buddhabhāvoti vutto. Vuttampi cetam bhagavatā mahāparinibbānasamaye “devatā ānanda ujjhāyanti. Durāvataṃhā āgatā tathāgatam dassanāya kadāci karahaci tathāgatā loke uppajjanti arahanto sammāsambuddhā. Ajja rattiyā paccūsasamaye tathāgatassa parinibbānaṃ bhavissati. Ayañca mahesakko bhikkhu bhagavato purato thito ovārento otarento vā na mayaṃ labhāma pacchime kāle tathāgatam dassanāya”ti.

Buddhabhāvoti buddhassa bhāvo. **Kā kathāti** kiṃ vattabboevāti attho. Kasmā pana buddho atidullabhataroti ca, buddho kadāci karahaci uppajjantīti ca vuttam. Nanu buddhā loke anekā uppajjantīti. Saccametaṃ. Buddho nāma pana anekāsaṅkhyeyyavārena vā anekāsaṅkhyeyyadivasamāsasamvaccharaṃ vā anekāsaṅkhyeyyakappaṃ vā dasapāramiyo ca pañcamahāpariccāge ca pūretvāva bhavituṃ sakkoti, na ekekavārādīnā. Atha kho pana antamaso kappasatasahassādhikāni cattāri asaṅkhyeyyāni dasapāramiyo ca pañca mahāpariccāge ca pūretvāva buddho bhavituṃ sakkoti. Tasmā buddho atidullabhataroti ca, buddhā kadāci karahaci uppajjantīti ca vuttanti.

Evaṃ buddhassa atidullabhatarattā ca kadāci karahaci uppannattā caeva buddhobuddhoti kittayantassa mahapphalaṃ hoti. Vuttañhetam **apadāne** –

“Buddhoti kittayantassa, kāye bhavati yā pīti;
 Varameva hi sā pīti, kaṣiṇenapi jambudīpassā”ti.

Tasmāti yasmā buddho buddhoti ghoso atidullabhataro, buddhabhāvo kā kathā. Tasmā. **Vibhāvīti** medhāvī. Te hi hitāhitam kāraṇākāraṇam vā visesena bhāveti pakāsetīti vibhāvā, paññā.

Vipubba bhūdhātu sattāyaṃ ṇa. Sā etesaṃ atthīti vibhāvīti vuccanti, sādhave labbhati. Taṃ pana sādhavoti pade visesaṃ.

Vividhahitasukhanti nānappakāraṃ lokiyalokuttara saṅkhātaṃ hitasukhaṃ. Tassa pana attho heṭṭhā vuttoyeva. Taṃ pana patthayantātipade kammaṃ. **Sādhavoti** sappurisā. Te hi sapaṛahitaṃ sādheti nibbattetīti sādhavoti vuccati. Sādhadhātu saṃsiddhiyaṃ avo. Tassa pana padassa namassantūti padena kattubhāvena sambandho. **Patthayantāti** yācantā. Vividhahitasukhaṃ patthayanti yācantīti patthayantā, sādhave. Patthadhātu yācane anto. Yakārāgamo. Taṃ pana sādhavotipade visesaṃ. **Iṭṭhanti** kāmayaṃānaṃ. Icchitabbaṃ kamitabbanti iṭṭhaṃ. Isudhātu icchā kantīsu tapaccayo. Tassa raṭṭho, dhātvantalopo. **Atthanti** diṭṭhadhammikasaṃparāyikādiatthaṃ. Atthiyati patthiyatīti attho, vipākānisaṃsaphalaṃ. Atthadhātu yācanāyaṃ a. Atha vā asati bhavati phalabhāvenāti attho. Asadhātu bhuvimhi tha. Taṃ pana padadvayaṃ vahantantipade kammaṃ. **Vahantanti** dhāraṃ. Vahati haratīti vahanto, buddho. Vahadhātu vahane pāpuṇane vā anto. Buddho hi sattānaṃ lokiyalokuttarahitasukhaṃ dhammadesanāya dhāretīti attho.

Suranaramahitanti devehi ca manussehi ca catupaccayādīhi pūjitaṃ. Idam panetta nibbacanaṃ. Issariyakīḷādīhi suranti dibbantīti surā, devā. Suradhātu ditiyaṃ. Atha vā suranti īsanti devissariyaṃ pāpuṇanti virocanti cāti surā, devā. Sundarā rā vācā etesanti vā surā, devā. Khandhasantānaṃ naranti nentīti narā, manussā. Naradhātu nayane a. Surā ca narā ca suranarā. Tehi mahitabbā pūjitabbāti suranaramahito, buddho. Mahadhātu pūjāyaṃ ta. Taṃ suranaramahitaṃ. **Nibbhayanti** abhayaṃ. Bhiyate bhayaṃ. Natthi bhayaṃ etassāti nibbhayo, buddho. Taṃ nibbhayaṃ. Tathāgatassa aṭṭhasu parisāsu kenaci kāraṇena bhayaṃ hadayacalanam kampanam natthīti attho.

Dakkhiṇeyyanti paralokaṃ saddahitvā dātabbauttamadānārahaṃ. Dātabbāti dakkhiṇā, deyyadhammavattu. Dādadhātu dānekkhiṇapaccayo. Atha vā dakkhanti vaḍḍhanti etāya sattā yathādhippetāhi sampattīhīti dakkhiṇā, paralokaṃ saddahitvā dātabbadānaṃ. Dakkhadhātu vaḍḍhaneyu, taṃ arahatīti dakkhiṇeyyo, buddho. Arahātittaddhite ṇeyyo. Atha vā dakkhiṇāya hitaṃ anurūpaṃ mahapphalakaraṇatāya visodhetīti dakkhiṇeyyo, buddho. Visodhetittaddhitāyaṃ. Buddhoyeva hi dakkhiṇāya mahapphalakaraṇavasena ca, visodhanavasena ca, devasakkabrahmehi ca, kosalarājādīhi ca, anāthapiṇḍikaseṭṭhādīhi ca paralokaṃ saddahitvā dātappaṃ uttamadānaṃ visesena arahati, tasmā dakkhiṇeyyanti thometi.

Lokānanti sattalokānaṃ. Tassa pana attho heṭṭhā vuttoyeva. **Nandivaḍḍhanti** pītiyā vaḍḍhāpentam. Nandiyate nandī. Bhāvasādhanoṃ. Nandadhātu samiddhiyaṃ nandane vā i. Pītiyā adhivacanametam. Sā vaḍḍheti buddhetīti nandivaḍḍho, buddho. Nandisaddūpapadavaḍḍhadhātu vaḍḍhane a. Buddho hi dvattiṃsamahāpurisalakkhaṇāsītānubyañjanalakkhaṇasaṃpannaena ca sabbaññutaññādiguṇasaṃpannaena dhammadesanāya ca loke sabbasattānaṃ pītiṃ vaḍḍhetīti attho. Sabbasattānañhi buddhadassane dhammasavane ca titto natthi, tasmā lokānaṃ nandivaḍḍhanti thometi. Vuttañhetam **apadānaṭṭhakathāyaṃ** “pakatiyāeva hi buddhadassane puṇṇacandasamuddarājadassane atitto lokoti. Katham pana sabbasattānaṃ buddhadassane atitto hotī”ti. Buddhassa pana bāttiṃsamahāpurisalakkhaṇādīhi sīlādiasādhāraṇaguṇehi ca adhika sampanno hutvā sabbadevamanussehi ativirocamāntā. Vuttañhetam bhagavatā tāvatimse –

“Na koci devo vaṇṇena, sambuddham atirocati;
Sabbe deve adhiggaṃya, sambuddhova virocati”ti.

Dasabalanti aññehi paccekabuddhāriyasāvakehi asādhāraṇena dasakāyabalena ca dasaññābalena saṃpannaṃ. Tañhi kehici viruddhehi kāraṇehi balanti na kampentīti balanti vuccati. Atha vā balanti jīvitam kappenti etenāti balaṃ, kāyabalaṃ. Baladhātu pāṇe a. Balanti bhāraṃ vahitum sakkuṇantīti vā balaṃ, balanti jānanti sabbadhammanti balaṃ, ñāṇa balaṃ. Dasabalañca dasabalañca dasabalāni ekasesanayena. Tāni yassa soti dasabalo, buddho. Idha pana sāmāññavasena vuttopi visesaṭṭhāniyattā bhagavato dasakāyabalāni ca, dasaññābalāni ca adhippetāni. Tesam pana sarū pattham nayanasaṃbhagakāyaṅgāntyaḍī gāthavaṇṇanāyaṃ vuttameva.

Asamanti sīlādiguṇehi kenaci asadisam. Natthi samo sadiso puggalo etassāti asamo, buddho.

Taṃ asamaṃ. **Tanti** tādisaṃ guṇasampannaṃ buddhaṃ. **Niccanti** satataṃ samitaṃ sabbakālaṃ nirantaranti attho. **Namassantūti** abhivandantūti.

Ayaṃ panettha **saṅkhepayojanā**. Loke tiloke manussaloke vā, buddhobuddhotighoso buddho buddhoitti kittisaddo thutisaddo vā, atidulabhataro ativiya dullabhatamo, buddhabhāvo buddhassa bhāvo, kā kathā kiṃvattabbo eva, tasmā buddhobuddhoti ghosassa atidullabharattā, vibhāvī medhāvī vividhahitasukhaṃ nānappakāraṃ lokiyalokuttarasaṅkhātāṃ hitasukhaṃ patthayantā yācantā, sādhave sappurisā iṭṭhaṃ kāmayaṃānaṃ, atthaṃ diṭṭhadhammikasamparāyikādiatthaṃ, vahantaṃ dhāraṃ, suranaramahitaṃ devamanussehi pūjitaṃ, nibbhayaṃ abhayaṃ asantāsaṃ vā, dakkhiṇeyyaṃ paralokaṃ saddahitvā dātabbauttamadānārahaṃ, lokānaṃ sattalokānaṃ nandivaḍḍhaṃ pītiyā vaḍḍhāpanentaṃ. Dasabalaṃ asādharmaṇena dasakāyāññabalena sampannaṃ, asamaṃ sīlādiguṇehi kenaci asadisamaṃ taṃ tādisaṃ guṇasampannaṃ buddhaṃ niccaṃ satataṃ samitaṃ sabbakālaṃ nirantaraṃ, namassantu abhivandantūti.

Chabbīsativandanaḡāthāvaṇṇanā samattā.

27. Puññenena sohaṃ nipuṇamati sato samparāye ca titto,
Dakkho diṭṭhujjupaṇṇo avikalavīriyo bhogavā saṃvibhāgī;
Tikkho sūro dhitatto saparahitadharo dīghajīvī arogo,
Dhañño vaṇṇo yasassī atibalavadharo kittimā khantupeto.
28. Saddho dātaṅgupeto paramasiridharo diṭṭhadhamme viratto,
Lajjī kalyāṇamitto abhiratakusalo pañcasīlādirakkho;
Appiccho appakodho ativujhadayo iddhimā appameyyo,
Pāsaṃso pemavāco sujanaguṇavidū māmako so bhavyeayaṃ.

27. Evaṃ buddho buddhoti ghosotyādigāthāya buddhavandane uyyojanaṃ katvā idāni sugatantyādīhi gāthāhi buddhaṃ vanditvā paṇidhiṃ karonto āha **puññenena sohan**tyādi gāthādvayaṃ. Ayaṃ pana gāthādvayampi saddharāgāthāti daṭṭhabbā. Tattha paṭhamagāthāyaṃ sohaṃ etena puññena samparāye nipuṇamati ca sato ca...pe... khantupeto ca bhavyeanti sambandho. **Sohanti** so ahaṃ. Buddhassa namakkāro sohanti attho. **Etena puññenā**ti iminā buddhavandanapuññakammaṃ attano kārakaṃ pavati sodhetīti puññaṃ. Pudhātu sodhane ñya. Puññanti ca idha pana buddhapaṇāmakriyābhiniṃpphādikā kusalacetanā adhippetā. Sā ca vandaneyyavandakānaṃ khettajjhāsayasampadāhi diṭṭhadhamma vedanīyabhūtā yathāladhasampattinimittakassa kammaṃ anubalappadānavasena tannibbattitavipākasantatiyā antarāyakaṃ upapīlakaupacchedakakammāni paṭibāhitvā tannidānaṃ yathādhippetasiddhivibandhakānaṃ rogādiantarāyānamappavattimsādheti cāti attho ca veditabbo. **Samparāye** cāti ettha casaddo aṭṭhānayo. So ca nipuṇamatiyādīsu padesu yojetabbo. **Samparāyeti** paraloke. So hi samparāyitabbā upagamitabbā ettha sattehitī ca, kammakilesavasena sattehi samparāyitabbā pāpuṇitabbāti vā etthāti ca samparāyoti vuccati. Saṃparipubba ayadhātu hi gatiyaṃ ña. Atha vā kammavasena abhimukho sampareti gacchati pavattatīti samparāyoti vuccati. Saṃpubbaparadhātu gatiyaṃ ñya. Iti kho ānanda kusalāni sīlāni anupubbena aggāya parentītiādīsu viya hi curādi gaṇavasena parasaddaṃ gatiyamicchanti saddavidū. Tasmīṃ samparāye.

Nipuṇamatīti saṅhasukhumapaññavā ca. Saṅhasukhumaṃ atthantaraṃ paṭivijjhanasamatthāya paññāya sampanno ca vā. Ettha ca nipuṇasaddo saṅhasukhumavācako anipphannaṃpātipadiko. Hitāhitaṃ manati jānātīti mati, paññā. Manadhātu ñāṇeti. Nipuṇā saṅhā mati paññā yassa meti nipuṇamati. **Satoti** satimā ca. Saratīti sati, saradhātu cintāyanti. Sā assa me atthīti sato. **Tittoti** tappano ca. Yathāladhavatthunā santuṭṭho cāti attho. Tisanaṃ tappanaṃ titto. Tisadhātu tappane tapaccayo. Sakārassa toādeso. Yathālabha santoso, yathābalasantoso, yathāsārappasanto so cāti tividhena santosena santuṭṭhoti vuttaṃ hoti.

Dakkhoti taṃ taṃ kicca cheko ca kusalo ca vā. So hi kusalakamma aññasmiṃca kiccākicca adandhatāya sīghaṃ gacchatīti dakkho. Dakkhadhātu sīghatthe a. **Diṭṭhujjupaṇṇoti** diṭṭhiujupaṇṇoti padacchedo. Uju diṭṭhipaññāya samannāgatoti attho. Kesuci potthakesu diṭṭhiuju paññoti pāṭho.

Diṭṭhiujupañṇoti padacchedo, soye vattho. Ujūti akuṭilabhāvena bhavatīti uju, ajjavo. Ujudhātu ajjave kvi. Atha vā arati akuṭilabhāvena pavattatīti uju, avaṅko. Aradhātu gatiyaṃ jupaccayo. Arissa uādeso. Sammā passatīti diṭṭhi, mati. Disadhātu passane tapaccayo. Tassa raṭṭhādeso. Dhātavantalo po ca ī ca. Uju ajjavā diṭṭhi mati diṭṭhuju visesanaparanipātavasena. Pakārena jānāti aniccādivasena avabujjhatīti pañṇā. Papubbañadhātu avabodhane a. Ujudiṭṭhi ca ujupañṇā ca yassa meti diṭṭhujjupañṇo, puggalo. **Avikalavīriyoti** anūnavīriyo ca paripuṇṇavīriyo cāti attho. Vihīnaṃ karotīti vikalo. Vipubbakaradhātu karaṇe a. Rassalo. Vīraṇaṃ kammaṃ vīriyaṃ. Avikalaṃ anūnaṃ vīriyaṃ assameti avikalavīriyo. Na sakkā kusīteneva navalokuttaradhammā laddhuṃ, āradhvavīriyeneva sakkā. Tasmā avikalavīriyoti patthetīti vuttaṃ hoti.

Bhogavāti bhuñjitabbasampattisukhena sampanno ca. Bhuñjitabboti bhogo, sampatti. Bhujadhātu pālanabyavaharaṇesu ṇa. Bhogo assa me atthīti bhogavā. **Samvibhāgīti** samvibhajanasīlo ca samvibhajanasampanno ca vā, samvibhajati sīlenāti samvibhāgī. Samvibhajanasīloti vā samvibhāgī, samvibhajitūṃ sīlamassāti vā samvibhāgī. Samvibhāge sīlamassāti samvibhāgī. Ayaṃ tassīlattho. Samvibhajati dhammenāti samvibhajanaadhammoti vā. Samvibhajitūṃ dhammo assāti vā, samvibhajane dhammo assāti vā samvibhāgī. Ayaṃ taddhammattho. Samvibhajanaṃ sādhuṅkāro assa atthi. Sādhuṅkārinā samvibhajati vā, samvibhajitūṃ sādhuṅkāriti vā, samvibhajane sādhuṅkāriti vā samvibhāgī. Ayaṃ tassā dhukārattho. Samvipubba bhajadhātu vibhāge ṇa. Jassa go. Atha vā samvibhajanaṃ samvibhāgo. So me assa atthīti samvibhāgī. Assathyatthe ī. Pesaṃ yācakānaṃ annādidānavatthūṃ niccaṃ pariccajanakārīti vuttaṃ hoti.

Tikkhoti tikkhapañṇavā ca nisānapañṇavā vā. Tijanaṃ nisaṇaṃ tikkhā, pañṇā. Tijadhātu nisāne kha. Jassa ko. Tikkhā pañṇā me assa atthīti tikkho. Assathyatthe ṇo. Tikkha pañṇāya sampanno cāti attho. Pañṇāya ca sabba kusalānaṃ dhammānaṃ seṭṭhattā mūlakāraṇattā ca tikkhoti patthanaṃ karoti. Vuttaṃhi **milindapañṇe** –

“Pañṇā pasatṭhā lokasmiṃ, katā saddhammatṭhitiyā;
Pañṇāya vimatiṃ hantvā, santiṃ pappoti paṇḍito”ti.

Sūroti catūsu parisāsu aṭṭhasu parisāsu ca vīro ca. Sattivanto nibbhayoti attho. Sūrayate virayate sūro. Bhāvasāadhanoyaṃ. Sūradhātu vikkantiyaṃ vīre vā a. Atha vā abhiruachambhianutrāsabhāvena sūrati gacchati pavattatīti sūro. Sūradhātu gatiyaṃ a. Sīho viya parisamajjhe sūravīrasampanno cāti attho. Sāsani kehi pana saddhammavidūhi sūrasaddassa nibbanaṃ na dassitaṃ. Kevalaṃ pana sūroti visiṭṭhasūroti atthavivaraṇamattameva dassitaṃ. **Dhitattoti** ettha dhita attoti padacchedo. Dhitoti samādhī. Attanti cittaṃ. Ekaggacittasampanno cāti attho. Dhāti tiṭṭhati ekārammaṇehi dhito, ekārammaṇe sampayuttadhamme dhāretīti vā dhito, samādhī. Dhādhātu dhāraṇe ta. Ārammaṇaṃ arati jānātīti attāṃ, cittaṃ. Aradhātu gatiyaṃ ta. Rassa to. Dhito samādhī attāṃ cittaṃ assa meti dhitatto.

Saparahitacaroti attahitaparahitacaro, attano ca parassa ca atthaṃ paṭipannako cāti attho. Attano ca parassa ca hitaṃ atthaṃ payojanaṃ carati paṭipajjatiṃ saparahitacaro. Saparahitasaddūpapada caradhātu caraṇe a. **Dīghajīvīti** dīghāyuko ca. Dīghena jīvitindriyena sampanno vā. Dīgho jīvo jīvitaṃ assa meti dīghajīvi. Āyukappampi dīghajīvitasampanno cāti attho. **Arogoti** rogaviraḥ ca ārogyaṃ vā. Rujjati bhañjati āṅgapaccāṅgānīti rogo, byādhi. Rujadhātu bhaṅge ṇa. Atha vā rujjati hiṃsatīti rogo. Rujadhātu hiṃsāyaṃ ṇa. Natthi rogo tassa meti arogo, channavutirogānaṃ abhāvo bhavēyanti attho. **Dhañṇoti** sirīpuñṇapañṇālakkaṇasampanno ca. Dhañṇasaddo hi sirīpuñṇapañṇālakkaṇavācakoti daṭṭhabbo. Vuttaṃhi **vessantarajātaka** “dhañṇaṃ maṅgala sammata”nti ca. **Temijājātaka** “dhañṇapuñṇālakkaṇasampannaṃ puttaṃ vijāyī”ti ca. Idaṃ pana nibbanaṃ. Dhananaṃ sampajjanaṃ dhañṇaṃ, sirīpañṇāpuñṇālakkaṇānaṃ sampannanti attho. Dhanadhātu sampanne. Dhātūnaṃ anekatthattā ṇyapaccayo. Naḥārānubandhe lope kate yapaccayena saddhiṃ naḥārassa ṇakāraṃ katvā dhañṇanti rūpasiddhi veditabbā. Atha vā dhanāṃ sirīpañṇā puñṇālakkaṇasampadaṃ assa me atthīti dhañṇo. Assathyatthe ṇyo.

Vaṇṇoti vaṇṇasampanno ca. Ettha ca vaṇṇo duvidho hoti sarīravaṇṇaṅṇaṅṇavasena. Tattha

sarīra vaṇṇo nāma rūpakāyassa pāsādikarūpasampannatā. Guṇa vaṇṇo nāma sīlasamādhipaṇṇādiguṇena ca dhutaṅgādipaṭipadāguṇena ca sampannatā. Idaṃ pana nibbacanaṃ. Vaṇṇeti vikāramāpannānaṃ hadayaṅgatabhāvaṃ pakāsetīti vaṇṇo, sarīrarūpaṃ. Vaṇṇeti attano dabbhaṃ pakāsetīti vaṇṇo, guṇo. Vaṇṇadhātu pakāsane a. Idha pana tadubhayampi yujjati. Vaṇṇaṃ assa me atthīti vaṇṇo. Assathyatthe a. **Yasassīti** parivārasampanno kittivanto vā. Ettha ca duvidho hoti yaso parivārakittiyasavasena. Tattha yajiyati pūjiyati etena parivārenāti yaso, parivāro. Yajadhātu pūjāyaṃ a. Jassa so. Atha vā yāti gacchati pāpuṇāti sāmikassa parivāranti yaso, parivāro. Yādhātu gatiyaṃ sopaccayo. Yajiyati pūjiyati etenāti yaso, kittisaddo. Yajadhātu devapūjāsaṅgahakaraṇādānadhāmmesu a. Jassa so. Atha vā yāti gacchati pāpuṇāti sabbattha byāpananti yaso, kittighoso thutisaddo vā. Yādhātu gatiyaṃ sopaccayo. Yaso ca yaso ca yaso ekasesanayena. So assa me atthīti yasassī, assathyatthe sīpaccayo.

Atibalavadharoti atibalavantadhārako ca ativiya kāyabalañāṇabalavantāṃ dhāretīti atibalavadharo. Ajātasatturājādayo viya pañcahatthi dasahatthibalassa dhāraṇasamattho ca, sārīputtattherādayo viya ñāṇabalassa dhāraṇasamattho ca bhavyeyanti attho. **Kittimāti** kittighosavanto ca. Kittiyate kathiyate guṇanti kitti, thutighoso. Kittadhātu sadde i. Kittighoso assa me atthīti kittimā. Assathyatthe mantupaccayo. **Khantupetoti** khantiyā upeto samupeto samannāgato ca. Khamanaṃ sahanaṃ khanti. Khamudhātu sahane tapaccayo. Tassanti tāya upeto samupeto samannāgatoti khantupeto. Khantivādatāpaso viya khantupeto ca bhavyeyanti attho. Khantiyā hi dukkarattā sabbakusala dhammānaṃ padhānattā seṭṭhatapattā ca khantupetoti patthanaṃ karoti. Vuttañhetāṃ bhagavatā “khantī paramaṃ tapo titikkhā”ti ca. “Khantiyā bhiyyo na vijjati”ti ca. “Khantūbalaṃ balānika”nti ca.

“Sīlasamādhipaṇṇānaṃ, khantipadhānakāraṇaṃ;
Sabbepi kusalā dhammā, khantiyāyattāva vaḍḍhare”ti ca.

Ayaṃ panettha **sankhēpayojanā**. Sohaṃ so ahaṃ, etena puññaena iminā buddhavandanapuññakammena samparāye paraloke, nipuṇamati ca saṅhasukhumapaññavā ca, sato satimā ca titto tappano yathāladhavadhūnā santuṭṭho ca, dakkho taṃtaṃkicce cheko ca, diṭṭhujjupaṇṇo ujudiṭṭhi paññāya sampanno ca avīkalavīriyo anūnavīriyo ca paripunṇavīriyo vā, bhogavābhūñjitabhasampattisukhena sampanno ca saṃvibhāgī saṃvibhājanasīlo ca tikkho tikkhapaññavā ca, sūroti sattivanto nibbhayo ca, dhitatto samāhita citto ca ekaggacitto vā, saparahitacaro attahita parahitapaṭipannako ca dīghajīvī dīghāyuko ca arogo rogaviraho ca dhañño sirīpuññapaññālakkhaṇasampanno ca vaṇṇo vaṇṇasampanno ca yasassī parivārasampanno ca atibalavadharo atibalavantadhārako ca kittimā kitti ghosavanto ca khantupeto khantiyā upeto samupeto samannāgato ca bhavyeyanti.

Sattavīsati magāthāvaṇṇanā samattā.

28. Evaṃ puññenetenatyādigāthāya samparāye paṇidhiṃ katvā idāni diṭṭhadhamme patthanaṃ kattukāmo **saddho dātaṅgupeto** tyādigāthamāha. Tattha **saddhoti** kammādi saddahanalakkhaṇāya saddhāya sampanno ca. Saddhanaṃ saddhā, saddhatīti vā saddhā. Saddahanti sampayuttadhammā etāyāti saddhā. Saṃpubbhadhādhatu dhāraṇe ta. Sā pana kammādīsu saddahanalakkhaṇā. Okappanalakkhaṇā vā. Pasādarasā. Udakappasādakamaṇi viya. Pakkhandanarasā vā. Oghuttaraṇo viya. Akālussiyapaccupaṭṭhānā adhimuttipaccupaṭṭhānā vā, saddheyyavatthupadaṭṭhānā sotāpattiyāṅgapaṭṭhānā vā. Sā hatthavittabījāni viya daṭṭhabbā. Bhagavatā hi sā saddhā “saddhāhattho mahānāgo”ti ca. “Saddhīdha vittaṃ purisassa seṭṭha”nti ca. “Saddhābījaṃ tapo vuṭṭhi”ti ca “saddhāya tarati ogha”nti ca “saddhā bandhati pātheyyaṃ, saddhā dutiyā purisassa hoti”ti ca, “saddhesiko bhikkhave ariyasāvako”ti ca, “saddhādhana”nti ca.

“Yesaṃ atthi saddhā buddhe, dhamme ca saṅgharatane;
Te maṃ ativirocanti, āyunā yasasā siriyā”ti.

Ca. “Saddhaṃ upanissāya dānaṃ deti, sīlaṃ samādiyati, uposathakammaṃ karoti, jhānaṃ uppādeti, vipassanaṃ uppādeti, maggaṃ uppādeti, abhiññaṃ uppādeti, samāpattiṃ uppādeti”ti ca.

“Dullabhā saddhāsampattī”ti ca vuttā. Tasmā saddho ca bhavyeyanti patthanam karoti.

Sā ca pana catubbidhā hoti āgamasaddhā, adhigamasaddhā, okappanasaddhā, pasādasaddhā cāti. Tattha sabbaññubodhisattānam abhinīhārato āgatattā āgamasaddhā nāma. Ariyasāvakanam saccapaṭivedhena adhigatattā adhigamasaddhā nāma. Buddho dhammo saṅghoti vutte acalabhāvena okappanam okappanasaddhā nāma. Buddhādīsu pasāduppattimattā pasādasaddhā nāma. Idha pana pañidhānaṭṭhānattā sabbasaddhā adhippetā. Saddhā assa me atthīti saddho. Assathyatthe ṇa.

Dātaṅgupetoti dātassa aṅgāya kāraṇabhūtāya dhanasampattiyā upeto samupeto samannāgato ca. Dātabbavatthu ca, tappaṭiggāhaka puggalo ca, saddhā cāti tīhi aṅgehi upeto samupeto samannāgato ca vā. Diyate dātam. Bhāvasādhanoyam. Dādhātu dāne a. Aṅgīyati fīyati etenāti aṅgo, dhanasampatti. Dātassa aṅgo dātaṅgo, tena upeto samupeto samannāgatoti dātaṅgupeto, atha vā diyatīti dātam, dānavatthu. Dātassa aṅgo dātaṅgo, tena upeto samupeto samannāgatoti dātaṅgupeto, dātabbavatthu ca, tappaṭiggāhaka puggalo ca, saddhā cāti tīhi aṅgehi sampajjāmīti patthanam karotīti vuttam hoti. Vuttañhi **itivuttaṭṭhakathāyam** “saddhā deyyadhammo paṭiggāhako cāti imesam tiṇṇam samukhībhūtakāleyeva hi dānam sambhavatī”ti.

Paramasiridharoti uttamasirīdhārako ca. Uttamasiriṃ dhāraṇasamattho ca vā. Ettha ca sirīti paññāpuññasarīrasobhaggasampattīnametaṃ adhivacanam. Katapuññehi sevyatīti sirī, katapuññe puggale sevati nissayatīti vā sirī, paññāpuññasarīrasobhaggasampatti labbhati. Sidhātu sevāyam iro ī ca. Paramā uttamā sirī paramasirī, tam dhāretīti paramasirīdharo, paramasiriyā dhāraṇasamatthoti attho.

Diṭṭhadhammeti paccakkhabhūte attabhāve. Ettha ca diṭṭhadhammo vuccati paccakkhabhūto attabhāvo. So hi passitabboti diṭṭho, attabhāvo. Diṭṭho passitabbo dhammo sabhāvo assāti diṭṭhadhammoti vuccati. Tasmim diṭṭhadhamme. **Virattoti** kāmaguṇesu vigataratto ca, rajjanam ratto. Ranjadhātu rāge. Vigato ratto assa meti viratto. **Lajjīti** pāpahirivanto ca, pāpajigucchanalakkhaṇāya lajjāya sampanno ca vā. Atha vā lajjīti hirottappasampanno ca. Lajjīsaddena hi lakkhaṇāhāranayena ottappampi gahetabbam. Kasmā, kusala lakkhaṇasabhāvena samānattā. Vuttañhetam **nettipāliyam** –

“Vuttamhi ekadhamme, ye dhammā ekalakkhaṇā keci;
Vuttā bhavanti sabbo, sohāro lakkhaṇo nāmā”ti.

Lajjatīti lajjā, hiri. Lajjadhātu hiriyam. Lajjā assa me atthīti lajjā, kāyaduccarītādito hirottappasamannāgato cāti attho. **Kalyāṇamittoti** sundaramitta sampanno ca. Kalyāṇasaddo hi sundaravācako anipphanna pāṭipadiko. Atha vā kalyam hitam aṇayati pāpayatīti kalyāṇo, sumitto. Kalyasaddūpapadaaṇadhātu gatiyam ṇa. Mijjati sinehatīti mitto, mijjīyati sinehiyatīti vā mitto, midadhātu sinehe ta. Kalyāṇo mitto assa meti kalyāṇamitto. Hitadharasumittasampanno ca bhavyeyanti attho. Idha pana saddhāsīlasutacāgavīriyasati samādhīpaññāguṇehi samannāgato kalyāṇamitto adhippeto. Tam pana sandhāya bhagavatā **siṅgālasutte** –

“Upakāro ca yo mitto, sukhadukkhe ca yo sakhā;
Atthakkhāyī ca yo mitto, yo ca mittānukampako;
Etepi mitte cattāro, iti viññāya paṇḍito; Sakkaccaṃ
Payīrupāseyya, mātā puttamva orasa”nti vutto.

Visuddhimagge ca –

“Piyo garu bhāvanīyo, vattā ca vacanakkhamo. Gambhīraṇca katham kattā, no cāṭṭhāne niyojaye”ti vutto. Iti evarūpassa ca kalyāṇamittassa dullabhattā kalyāṇamittena sampajjāmīti patthanam karotīti vuttam hoti.

Abhiratakusaloti dānādīpuññakusaladhammesu abhiramaṇo ca. Kucchitam apāyadvāram

salanti saṃvaranti pidahanti sādhave etenāti kusalaṃ, dānādipuññadhammā. Kupubba saladhātu saṃvaraṇe a. Tesu abhiatirekaṃ ramatīti abhiratakusalo, kitantasamāsoyaṃ. Kusalaḅhīratoti vattabbe chandānurakkhaṇatthaṃ padavipariyāyena evaṃ vuttanti. Atha vā abhiatirekaṃ ramaṇaṃ abhirato, kusalesu abhirato yassa meti abhiratakusalo, niccaṃ kusalapuññassa karaṇe abhiratacittasampanno cāti attho.

Pañcasīlādirakkhoti pañcasīlādīnaṃ rakkhituṃ samattho ca. Ettha ca ādisaddena gihīnaṃ aṭṭhaṅguposathasīlaṃ, sāmaṇerānaṃ dasaṅgasīlaṅca, bhikkhūnaṃ catupārisuddhisīlaṅca saṅgaṇhāti. Pañcasīlaṃ ādi yesaṃ teti pañcasīlādi, taṃ rakkhati rakkhituṃ samatthetīti pañcasīlādirakkho. Gahaṭṭhānaṃ niccasīlavasena pañcasīlaṃ sati ussāhasamatthe uposathaṅgavasena aṭṭhaṅgasīlaṃ dasaṅgasīlaṅca akhaṇḍaṃ acchiddaṃ asabalaṃ akammāsaṃ katvā rakkhituṃ sāmaṇerasīlavasena dasasīlaṅca, bhikkhusīlavasena catupārisuddhisīlaṅca rakkhituṃ samattho cāti attho. Bhagavatā hi “sīlavipattihetu vā bhikkhave sattā kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapajjantī”ti ca. “Sīlasampadāhetu vā bhikkhave sattā kāyassa bhedaṃ paraṃ maraṇā sugatiṃ saggāṃ lokaṃ upapajjantī”ti ca. “Sīlasampanno mahantaṃ bhogakkhandhaṃ adhigacchati kalyāṇo kittisaddo abbhuggacchati. Catupariṣaṃ visārado upasaṅkamati amaṅkubhūto. Asammūḷho kālaṃ karoti, kāyassa bhedaṃ paraṃ maraṇā sugatiṃ saggāṃ lokaṃ upapajjantī”ti ca vuttattā ca. **Aṭṭhakathāyaṅca** “sīlālaṅkārasadiso alaṅkāro natthi, sīlasadisāṃ pupphaṃ natthi, sīlagandhasadiso gandho natthī”ti ca. “Sīla sampattiṅhi nissāya tisso vijjā pāpuṇātī”ti ca. “Ādimhi sīlaṃ visodheyyā”ti ca. “Sattā sīlena visujjhantī”ti ca. “Sīlaṃ sāsanassa ādī”ti ca. “Sattasu visuddhīsu sīlavisuddhi sarīraṃ nāmā”ti ca. “Sīlaṃ nāmetaṃ avassayo patiṭṭhā ārammaṇaṃ tāṇaṃ leṇaṃ gati parāyana”nti ca vuttattā pañcasīlādirakkhoti patthanaṃ karotīti vuttaṃ hoti.

Appicchoti aniccho ca, rūpādikāmaguṇesu anicchantoti attho. Abhāvatthohettha appasaddo. Appaḍaṃsamakasaṃvā tātapātīādīsu viya icchanaṃ icchā, rūpādikāmaguṇaṃ icchatīti vā icchā, kāmataṇhā. Isudhātu icchākantīsu a. Dhātvantassaccho. Natthi icchā yassa meti appiccho, rūpādīsu kāmesu anicchanto cāti attho. Appiccho pana catubbidho hoti paccayaappiccho, pariyattiappiccho, dhutaṅgaappiccho, paṭivedhaappiccho cāti. Tattha catūsu paccayesu appiccho paccayaappiccho. Yo pana paccaye bahuṃ dente appaṃ gaṇhati, appaṃ dente appataraṃ vā gaṇhati na vā gaṇhati. Na anavasesagāhī hoti. Ayaṃ paccayaappiccho nāma. Yo pana tepiṭakopi samāno na bahussutabhāvaṃ jānāpetukāmo hoti, ayaṃ pariyattiappiccho nāma. Dhutaṅgasamādānassa pana dhutaṅgapariharaṇabhāvaṃ aññesaṃ jānituṃ na deti, ayaṃ dhutaṅgaappiccho nāma. Yo pana sotāpannādīsu aññataro hutvā sotāpannādibhāvaṃ jānāpetuṃ na icchati, ayaṃ adhigamaappiccho nāma. Imehi appicchaguṇehi sampanno ca ahaṃ bhavyanti vuttaṃ hoti.

Appakodhoti dussanalakkhaṇadosato virahito ca. So hi kujjhatīti kodhoti vuccati. Dosassetāṃ adhivacanaṃ. Natthi kodho assa meti appakodho.

Kuddho atthaṃ na jānāti, kuddho dhammaṃ na passati;
Andhatamaṃ tadā hoti, yaṃ kodho sahate naranti.

Vuttadesanaṃ manasikarivā appakodhoti patthanaṃ karotīti vuttaṃ hoti.

Ativujhadayoti atieva ujucittasamannāgato ca. Arati gacchati pavattati akuṭṭilabhāvenāti uju, ajjavaṃ. Aradhātu gatiyaṃ ju. Arissa u. Ārammaṇaṃ haratīti hadayaṃ, cittaṃ. Haradhātu haraṇe aya. Rassa do. Atha vā ārammaṇaṃ harantaṃ ayati gacchati pavattatīti hadayaṃ, cittaṃ. Harasaddūpapada ayadhātu gatiyaṃ a. Uju ca taṃ hadayañcāti uvujhadayaṃ. Atieva uju hadayaṃ assa meti ativujhadayo. Gomuttavaṅko ca candalekhāvaṅko ca naṅgalakoṭi vaṅko cāti tīhi vaṅkehi vigato hutvā ativiya ujucittasamannāgato ca bhavyanti attho. Tattha ca yo pāpaṃ katvā na karomīti bhāsati. So gantvā paccosakkanaṭāya gomuttavaṅko nāma. Yo pāpaṃ karontova bhāyāmaḥaṃ pāpassati bhāsati. So yebhuyyena kuṭṭilatāya candalekhā vaṅko nāma. Yo pāpaṃ karontova ko pāpassa na bhāyeyyātī bhāsati, so nātikūṭilatāya naṅgalakoṭivaṅko nāma hoti. Yassa vā tīṇi kammadvārāni asuddhāni. So gomuttavaṅko nāma hoti. Yassa yāni kānici dve. So candalekhā vaṅko nāma. Yassa yaṃkiñci ekaṃ. So naṅgalakoṭivaṅko nāmāti veditabbo.

Iddhimāti iddhiyā samannāgato ca, iddhisaddassa vacanattho heṭṭhā vuttoyeva. Iddhi assa me atthīti iddhimā. Assathyatthe mantupaccayo. Mānussikāle manussiddhiyā devuppattikāle deviddhiyā samaṇuppattikāle samaṇiddhiyā ca sampuṇṇeyyanti attho.

Appameyyoti appametabbehi sīlādiguṇehi sampanno ca. Pametabboti pameyyo. Papubbamādhātu pamāṇe ṇya. Na pameyyo appameyyo, appameyyo sīlādiguṇo me assa atthīti appameyyo. Assathyatthe ṇa. Appameyyehi sīlādiguṇehi ca bhogasampattīhi ca sampajjāmīti patthanaṃ karotīti vuttaṃ hoti.

Pāsamsoti sīlādiguṇehi buddhādisappurisānaṃ pasamsāraho ca, pasamsiyate thaviyate pasamsō. Bhāva sādhanoyam. Papubbasaṃsadhātu thutiyam, taṃ arahatīti pāsamsō. Arahātittaddhite ṇa. Buddhādisappurisehi pasamsi tabbehi dānasīlādiguṇehi sampanno ca bhaveyyanti vuttaṃ hoti.

Pemavācoti atthabyañjanamadhuratāya buddhādisappurisehi pemitabbavācāya sampanno ca. Piyateti pemā, vācā. Pīdhātu tappanakantīsu imo. Vacitabbāti vācā. Vacadhātu viyattiyam vācāyam ṇa. Pemā vācā assa meti pema vāco. Buddhādisappurisehi pemiya caturaṅgasamannāgata vācāya sampanno cāti attho. Sappurisānaṃ pana vācā caturaṅgasamannāgatā hoti. Subhāsītavācā ca dhammavācā piyavācā saccavācāti. Tathāhetam vuttaṃ **sagāthāvagga saṃyutte** –

Subhāsitaṃ uttamamāhu santo,
Dhammaṃ bhaṇe nādhammaṃ taṃ dutiyaṃ;
Piyam bhaṇe nāpiyam taṃ tatiyam,
Saccam bhaṇe nālikam taṃ catutthanti.

Ayam panettha yojanā. Santo sappurisā uttamam subhāsitaṃ suṭṭhu bhāsitaṃ vācam āhu, dhammaṃ bhaṇe bhaṇeyya adhammaṃ na bhaṇe na bhaṇeyya, dutiyaṃ taṃ vācam āhu, piyam bhaṇe bhaṇeyya, appiyam na bhaṇe na bhaṇeyya, tatiyam taṃ vācam āhu, saccam bhaṇe bhaṇeyya alikam na bhaṇe na bhaṇeyya, catuttham taṃ vācam āhūti.

Sujanaguṇavidūti buddhādisappurisānaṃ sīlādiguṇam vijānako ca. Sundaro jano sujano. Guṇati pakāseti sīlādiguṇasamaṅgitaṃ puggalanti guṇam, sīlādiguṇam. Guṇadhātu pakāsane a. Sujanaṇam buddhādisappurisānaṃ guṇo sujanaguṇo, taṃ vidati jānātīti sujanaguṇavidū. Sujana guṇasaddūpapadavidadhātu ṇāṇe ū. Buddhādisappurisānaṃ sīlasamādhīpaññādiguṇam jānituṃ samattho ca bhaveyyanti attho.

Māmakoti buddhādisajjanānaṃ māmako ca. Mamāyatīti māmako. Mamadhātu mānane peme vā ṇvu. Tassa ako. Buddhādiratanattayaṇca saddhammaṇca mānanto ca bhaveyyanti attho. **Soti** so aham. **Bhaveyyanti** bhavāmīti.

Ayam panettha **saṅkhepayojanā**. So aham diṭṭhadhamme paccakkhabhūte attabhāve, saddho saddhāya samannāgato ca, dātaṅgupeto dātassa aṅgāya kāraṇabhūtāya dhana sampattiyā upeto samupeto samannāgato ca, dātabba vatthu ca, tappatiggāhakapuggalo ca, saddhā cāti tīhi aṅgehi upeto samupeto samannāgato ca vā, paramasiridharo uttamasirīdhārako ca, uttamasiriṃ dhāraṇasamattho ca vā, viratto kāmaguṇesu vigataratto ca, lajjī pāpahirivanto ca, pāpajigucchanalakkhaṇāya lajjāya sampanno ca vā, hirottappasamannāgato ca vā, kalyāṇamitto sundaramitta sampanno ca, abhiratakusalo dānādīpuññakusaladhammesu abhiramaṇo ca, pañcasīlādirakkho pañcasīlādīni rakkhituṃ samattho ca, appiccho aniccho ca, rūpādīkāmaguṇesu anicchanto ca vā, appakodho dussanalakkhaṇadosato virahito ca, ativujhadayo atieva ujucittasamannāgato ca, iddhiyā samannāgato ca, appameyyo appameyyehi sīlādiguṇehi sampanno ca, pāsamsō sīlādiguṇehi buddhādisappurisānaṃ pasamsāraho ca, pemavāco atthabyañjanamadhuratāya buddhādisappurisehi pemitabbavācāya sampanno ca, sujanaguṇavidū buddhādisappurisānaṃ sīlādiguṇam vijānako ca, māmako buddhādisajjanānaṃ māmako ca, buddhādiratanattayaṇca saddhammaṇca mānanto ca vā, bhaveyyam bhavāmīti.

Atṭhavīsatimagāthāvaṇṇanā samattā.

29. Itthaṃ asaṅkhaye nātha, guṇe lakkhaṇadīpīte;
Gāthāsu sūcakāsveka, gāthampi sarate budho.
30. Caturāpāyamutto so, sādhatthadvayassa ca;
Hatūpaddavajālo ca, lābhī hitasukhassa ca.
31. Adhipo naradevānaṃ, catudīpissaropi vā;
Bhaveyya antime dehe, tamaññaṃ setachattakaṃ.
32. Bhāvanāyānamāruyha, samamessati subbato;
Imasmiṃ attabhāvepi, arogo dīghajīviko.
33. Pūjito sabbalokehi, bhāvanābhīratīmano;
Janappiyo manāpo ca, kā kathākhiladhāraṇe.

29. Evaṃ puññenetenatyādi gāthādvayena paṇidhiṃ katvā idāni buddhavandanassa phalānisamsaṃ dassento **itthanti**yādi gāthāpañcakama āha. Taṃ pana mūlacariyehi na vuttaṃ, pacchā pana hitakāmehi paṇḍitehi pakkhittaṃ gāthāpañcakanti daṭṭhabbaṃ. Tā pana gāthāyo pathyāvattagāthāti daṭṭhabbā.

Tāsu pana paṭhamagāthāyaṃ itthaṃ asaṅkhaye lakkhaṇadīpīte nāthaguṇe sūcakāsu gāthāsu ekagāthampi yo budho sarateti sambandho. **Itthanti** iminā sugatantiādinā vuttappakārena. **Asaṅkhayeti** ettakā buddhaguṇāti gaṇetum asamatthe. Saṅkhiyate saṅkhayā. Saṅkhiyati gaṇiyatīti vā saṅkhayā. Sakhidhātu saṅkhyāyaṃ yapaccayo. Atha vā saṅkhitum na sakkontīti asaṅkhayā. Ettakā buddhaguṇā ettakā buddhaguṇāti niravasesato ekabuddhopi anekavassa satasahassakoṭiyāpi gaṇetum asamatthova. Pageva pana aññeti attho. Vuttampi cetaṃ **apadāne** –

“Buddhopi buddhassa bhaṇeyya vaṇṇaṃ,
Kappampi ce aññaṃabhāsamaṇo;
Khīyetha kappo ciradīghamantare,
Vaṇṇo na khīyetha tathāgatassā”ti ca.

“Sakkā samudde udakaṃ, pametum ālḥakena vā;
Natveva tava sabbañña, ñāṇaṃ sakkā pametave”ti ca.

Mahāvaggasamyuttaṭṭhakathāyañca “appamañā hi buddhā tesam buddhāpi anavasesato vaṇṇaṃ vattum asamatthā, pageva itarā pajā”ti ca. **Lakkhaṇadīpīte**ti upalakkhaṇa nayena pakāsitaṃ. Ettha ca padhānanayo nidassana nayo ca labbhati. **Nāthaguṇeti** buddhassa sīlasamādhī paññādiguṇe. Tassa pana padassa vacanatto heṭṭhā vuttoyeva. **Sūcakāsvekaḥgāthampīti** sūcakāsu ekagāthampīti padacchedo. **Sūcakāsūti** pakāsakāsu. **Gāthāsūti** sugatantiyādinā vuttāsu chabbīsativandanagāthāsu. Niddhāraṇe cetaṃ bhummavacanama. Kavīhi gāyati kathiyatīti gāthā. Pajjaviseso. Gedhātu sadde tha. Gedhātussa gādeso. Atha vā gaṃ vuccati ñāṇaṃ. Taṃ tiṭṭhati etthāti gāthā. Gaṃsaddūpapadathādhātu gatinivattiyama. Gaṃ vuccati ñāṇaṃ, tena kavīhi bandhitvā thiyati thapiyatīti vā gāthā, tāsu gāthāsu. **Ekagāthampīti** ekapajjampī. Ettha ca pisaddo garahatto. Tena anekagāthāya buddhaguṇasaraṇe kā kathāvāti sambhāveti. **Budhoti** yo paṇḍito. So hi atthānatthama budhati jānātītibudhoti vuccati. **Sarateti** sarati. Chandānurakkhaṇatthañhi parassapadativibhattiyā attanopadatevibhattādeso.

30. Soti so budho bhaveyyāti sambandho. **Caturāpāyamuttoti** nirayatiracchānapetaasurakāyasaṅkhātehi catūhi apāyehi vimutto ca. Puññasammatā ayāyebhuyyena apagatoti apāyo. Ayato sukhato apagatoti vā apāyo. Abyayībhāvasamāsoyama. Atha vā tisso sampattiyo ayanti gacchanti pavattanti etenāti ayo, puññaṃ. Ayadhātu gatiyama a. Puññato ayati gacchati pavattatīti vā, puññakārīhi ayitabbo pavattetabboti vā ayo, sukham. Tato apagatoti apāyo. Caturāpāyo caturāpāyo, tehi mutto vimuttoti caturāpāyamutto. **Sādhatthadvayassa cāti** sādhatto atthadvayassa cāti padacchedo. **Atthadvayassāti** diṭṭhadhammikasamparāyikasāṅkhātassa

atthadvayassa. Ettha casaddo aṭṭhānayo. So pana sādako tyādīsu padesu yutto. **Sādhakoti** nipphādako ca. So hi sādheti nipphādetīti sādhakoti vuccati.

Hatūpaddavajālo cāti hato upaddavasāṅkhātājālo ca. Hanayittha apanayitthāti hato. Hanadhātu hiṃsāyaṃ ta. Upagantvā davati hiṃsatīti upaddavo, jātibhayādi soḷasaupaddavo. Upapubbadudhātu hiṃsāyaṃ, upaddavā nāma pana soḷasavidhā honti jātibhayaṃ, jarābhayaṃ, byādhībhayaṃ, maraṇabhayaṃ, rājabhayaṃ, corabhayaṃ, aggibhayaṃ, udakabhayaṃ, ūmibhayaṃ, kumbhilabhayaṃ, āvaṭṭabhayaṃ, susukābhayaṃ, attānuvādabhayaṃ, parānuvādabhayaṃ, daṇḍabhayaṃ, duggatibhayañcāti. Jalati hiṃsati macche etenāti jālaṃ, macchajālaṃ. Jālaṃ viyāti jālo, upaddavo. Nītatthena pana jalati hiṃsati satte etenāti jālo. Upaddavo. Jaladhātu hiṃsāyaṃ ṇa. Hato upaddavasāṅkhātājālo yena soti hatūpaddavajālo. Buddhapaṇāmacetanāya pahito upaddavasāṅkhātājālo bhaveyyāti attho. **Lābhī hitasukhassa cāti** hitassa ca sukhassa ca lābhī ca. Labhanaṃ lābho, taṃ assa atthīti lābhī, hinoti vaḍḍhatīti hitaṃ, atthaṃ. Sukhayatīti sukhaṃ. Yassuppajjati, taṃ sukhitāṃ karotīti attho. Atha vā suṭṭhu dukkhaṃ khanatīti sukhaṃ. Supubba khanudhātu avadhāraṇe kvi. Hitañca sukhañca hitasukhaṃ, tassa lābhī bhaveyyāti attho.

31-32. Naradevānaṃ adhipo ca catudīpissaropi vā bhaveyyāti sambandho. **Naradevānanti** narā ca devā ca naradevā, tesāṃ. Kammatthe cetāṃ chaṭṭhīvacanaṃ. **Adhipoti** issaro ca. So hi attādhīnaṃ pāti rakkhati dhammena vā adhiabhibhavivā pāti rakkhatīti adhipoti vuccati. Adhipubbapādhātu rakkhane a, narānaṃ adhipo issaro manussarājā ca devānaṃ adhipo issaro devarājā ca bhaveyyāti attho. **Catudīpissaropi vāti** ettha pisaddo sambhāvanatthe nipāto. Tena pageva ekadīpissararājabhāvo ca, pade sissararājabhāvo cāti sambhāveti. Vā saddo padapūraṇa mattoyeva. Catudīpissarotī pubbavideho, aparago yāno, jambudīpo, uttarakuru cāti catunnaṃ dīpānaṃ issaro cakkavattirājāpi bhaveyyāti attho. Tattha pubbavidehoti sineruno pure bhavaṃ pubbaṃ, vedena paññāya ihanti vāyamanti etthāti vedehe, vīdasaddūpapada ihadhātu vāyāme ṇa. Soyeva videho. Imaṃ dīpamupādāya sineruno pubbadisabhāgattā pubbo ca so videho cāti pubbavideho, pubbadīpo.

Aparagoyānoti sineruno apare pacchime bhavo aparo. Gavena yanti gacchanti etthāti goyāno. Gosaddūpapada yādhātu gamane yu. Sineruno pacchima disabhāgattā aparo ca so goyāno cāti aparagoyāno, pacchimadīpo. Jambudīpoti jāyatīti jambū. Yojanasatubbedho rukkho. Janadhātu janane ū. Nassa mo. Bakārāgamo. Jalamañjhe dīppatīti dīpo, dīppanti jotanti ettha saddhammāti vā dīpo. Dīpadhātu dīttiyaṃ a. Tassa pana dviāpoti padacchedaṃ katvā dvidhā āpo sandati etthāti dīpoti bahubbīhisamāsopi yujjati. Jambuyā lakkhito paññāto vā dīpo jambudīpo, dakkhiṇadīpo. Uttarakurūti sineruno uttare bhavā uttarā. Dhammatāsiddhassa pañcasīlassa ānubhāvena kaṃ sukhaṃ urumahantaṃ etthāti kuru. Bahubbīhisamāsoyaṃ. Kuṃ vuccati pāpaṃ. Taṃ rundhanti etthāti vā kuru. Kupubbarudhidhātu āvaraṇe kvi. Dhātvantassa lopo. Sineruno uttaradisabhāgattā uttaro ca so kuru cāti uttarakuru. Uttaradīpoti catunnaṃ dīpānaṃ issaro catudīpissaro, cakkavattirājā labbhati.

Evāṃ lokiyahitaṃ dassetvā idāni lokuttarahitaṃ dassento āha **antime dehe...pe... subbatoti** antime dehe subbato bhāvanāyānaṃ āruya aññaṃ taṃ setachattakaṃ dhārento samaṃ essatīti sambandho. Tattha pana atthakkamena vaṇṇayissāma. **Antimeti** carime pacchime vā. Ante pariyoṣāne bhavo antimo, pacchimasarīro. Tasmīṃ. **Deheti** sarīre. Dihati upaciyati vaḍḍhatīti deho, sarīro. Dihadhātu upacaye ṇa. Atha vā dihati upacayati etena puññāpuññanti deho, pacchimabhavabhūte bhāvakulaputtabhūte vā sarīreti attho. **Subbatoti** suṭṭhu paṭipannaṃ hutvā. Suṭṭhu vataṃ paṭipannaṃ assāti subbato. Vakārassabbo. **Bhāvanāyānamāruyāti** bhāvanāyānaṃ āruyāti padacchedo. Vipassanābhāvanāsāṅkhātayānaṃ āruhitvāti attho. Bhāvetabbā vaḍḍhetabbāti bhāvanā. Tebhūmaka saṅkhārāmmaṇaṃ. Atha vā tadāmmaṇaṃ bhāveti vaḍḍhetīti bhāvanā, vipassanāpaññā. Bhūdhātu sattāyaṃ vaḍḍhane vā yu. Sā ca samathavipassanā bhāvanāvasena duvidhā hoti. Tattha idha pana aññaṃ setachattakanti saddantarasaññānaṃ vipassanābhāvanā adhippetā. Yanti pāpuṇanti etena nibbānanti yānaṃ, aniccādivipassanāññaṃ. Yādhātu gatiyaṃ yu. Bhāvanāsāṅkhātāya yānaṃ bhāvanāyānaṃ, bhāvanā ca sā yānañcāti vā bhāvanāyānaṃ.

Āruyāti ārohitvā. Pakatiyānasadisāṃ anicca dukkhaanattayānaṃ āruhitvāti attho. Aniccādilakkhaṇena hi vinā maggaphalanibbānaṃ patto nāma natthi. Tasmā bhāvanāyānamāruyāti vuttaṃ. **Aññanti** arahattaphalaṃ. Tañhi paṭhamamaggena ādiṭṭhamariyādaṃ anatikkamitvā

catusaccadhammaṃ avabujjhatīti aññanti vuccati. Āpubbañadhātu avabodhane kvi. Āsaddo mariyādattho. **Setachattakanti** odātātapattaṃ. Seviyatīti setaṃ, dhavalaṃ. Sidhātu sevāyaṃ ta. Kilesatapaṃ chādetīti chattaṃ. Chadadhātu saṃvaraṇe ta. Taṃyeva chattaṃ. Setañca taṃ chattaṃkāñcāti setachattakaṃ. Arahattaphalaātapattaṃ labbhati. Aññaṃ arahattaphalasaṅkhātāṃ setachattakaṃ dhārento hutvāti sambandho. **Samanti** nibbānaṃ. Tañhi sabbāṃ vaṭṭadukkhaṃ samati vūpasamati nirujjhati etthāti samanti vuccati. **Essatīti** pāpuṇissatīti.

Idāni diṭṭhadhammikattaṃ dassento **imasmim attabhāvepīti**ādimāha. Tattha imasmim attabhāvepi arogo ca dīghāyuko ca sabbalokehi pūjito ca bhāvanābhi ratimano ca janappiyo ca manāpo ca bhavyeyyāti yojanā. **Attabhāvepīti** ettha pisaddo sampiṇḍanatto. Tena samparāyikatthaṃ sampiṇḍeti. Attāti bhavati etena abhidhānaṃ buddhi cāti attabhāvo. Khandhapañcakassetamadhivacanaṃ. **Arogoti** sabbabyādhiviraho ca. So hi natthi rogo assāti arogoti vuccati. **Dīghajīvikoti** dīghāyuko ca. So hi dīghā jīvi āyu assāti dīghajīvikoti vuccati.

33. Sabbalokehīti sabbadevamanussehi. **Pūjīti** pūjītabbo ca. **Bhāvanābhiratimanoti** samathavipassanā saṅkhātāya bhāvanāya abhiraṇaṇacitto ca. **Janappiyoti** sabbajanehi piyāyītabbo ca. **Manāpoti** sabbasattānaṃ cittavaḍḍhanaṃ ca bhavyeyyāti sambandho.

Evam chabbīsatiyā vandanagāthāsu ekagāthāṃmattampi buddhaguṇānussaraṇe phalānisamsaṃ dassetvā idāni sabbagāthāyo vacasā dhāretvā buddhavandane anekāni phalānisamsāni dassetuṃ **kā kathākhiladhāraṇeti** āha. Tattha **kā kathākhiladhāraṇeti** kā kathā akhiladhāraṇeti padacchedo. Sabbabuddhavandanagāthāya vacasā dhāraṇe kiṃ vattabbā yevāti attho.

Ettha ca akhilasaddo sabbavācako anipphannaṃpāṭipadiko. Atha vā khiyanaṃ khilaṃ. Khidhātu khaye lapaccayo. Khayaṃ lāti gaṇhātīti vā khilaṃ, appakaṃ. Khayasaddūpapadalādhātu gahaṇe a. Na khilaṃ akhilaṃ, sabbagāthāyo. Dhāriyate dhāraṇaṃ, akhilāya sabbāya gāthāya dhāraṇaṃ akhiladhāraṇaṃ, tasmim. Chabbīsatiyā buddhavandanagāthāsu ekaṃ gāthaṃ vacasā dhārayitvā buddhavandane yathāvuttaphalānisamsāni labbhanti, pageva pana sabbabuddhavandanagāthāyo vacasā dhārayitvā dine dine buddhavandaneti atthoti. Iminā pana gāthāpañcakena yathāvutta phalānisamsaṃ ṇatvā saddahako sammādiṭṭhiko kulaputto sabbabuddhavandanagāthāyo vacasā dhārayitvā rattindivaṃ pubbaṇhakāle ca sāyanhakāle ca rattiyā paṭhamayāme ca pacchimayāme ca satataṃ samitaṃ nirantaraṃ buddhaṃ vandeyyāti uyyojanaṃ dassetīti.

Pañcakagāthāvaṇṇanā samattā.

Iti porāṇācariyehi vanditassa namakkārassa saddatthanayehi chandālaṅkāranayehi ca saṅhasukhumasuddasa gambhīrassa buddhassa duppaṭivīdhaguṇaparidīpakassa sappurisānaṃ cittapasannajanakassa sātṭhakathe piṭakattaye asaṃhira visāradaññācārinā sāsanasodhakena bhaddantareva tattheravarena racitā buddhaguṇappadīpikanāmicā vaṇṇanā.

Nigamana

Idaṃ pana puraṃ nimmitena sirīpavaravijayānantayasapaṇḍita tribhavanādīyādhipatimahādhammarājādhirājāti lañchitanāmikena piṭakattayapāḷim silārūlhaṃ kārayitvā pañcama saṅgītikaraṇena timahādhammarājena ratanāpuñjanti sammate rājadhānībhūte nānakulasamkiṇṇe puññadhaññavantaṇaṃ sādhuṇaṃca silasamādhipaññavantaṇaṃ bhikkhūnaṃca nivāsabhūte buddhadhammasaṅgharatanākare candimasūriyā viya buddhasāsanujjotane **mantale** nagare iti parikittite mahārāme dese vasantena upāsaka guṇasampanna nāmikena upāsakena ca tassupaṭṭhākāya nāmikāya upāsikāya ca samakusalacchandaṃ katvā nibbānassa sacchikaraṇatthāya kārite manorame suvaṇṇena limpittā suvaṇṇavatī nāmike dvibhummike mahiṭṭhakavīhāre aṭṭhahi disāhi āgatānaṃ sutesanabhikkhūnaṃ sātṭhakathaṃ piṭakattayaṃ dine dine satataṃ nirantaraṃ vācentena adhivasantena sātṭhakathe piṭakattaye asaṃhira visāradaññācārinā mantale pure pariyattisāsanahitadhammācariyagaṇassa jeṭṭhukkaṭṭhabhūtena revatābhipaṇḍitadhajasāsanavaṃsamahādhammarājagurūti ca **agga mahāpaṇḍitāti** ca laddhalañchitena mūladvādasasāsana karamahāgaṇassa jeṭṭhamahānāyaka bhūtena **sāsanāpuñño**

ācariyoti vissutena sāsanasodhaka mahānāyakattheravarena porāṇehi tattha tattha pāḷiyaṃ bhagavatā vuttehi buddhaguṇappakāśakehi buddhaguṇapadehi thomitvā vanditassa atthabyañjanena chandālaṅkāranayena ca pathavīsandhārakassa udakakkhandhassa viya gambhīrassa pabbatena paṭicchādetvā ṭhapitassa vatthussa viya atiduddasassa satadhā bhinnassa vālassa aggakoṭṭiyā viya atisaṅha sukhumassa puthujjanañāṇena buddhassa duppaṭivīdhaguṇaparidīpakassa namakkārassa līnatthappakāsanā buddhaguṇappadīpikanāmikā saṃvaṇṇanā tāsū tāsū aṭṭhakathāṭīkāsu āgataṃ saṃvaṇṇanānayaṃ nissāya paññāpāṭavattāyā sāsanaṃvuddhiyā ca katā.

Ettāvatā ca –

Sampatte cakkavasse sā, dvisahassee catūsate;
Navādhikāsītīyā ca, sakkarāje ca sampatte.

Sattatisatasahassa, vasse phussamāsasseva;
Kālapakkhasattame ca, buddhadine suniṭṭhitā; Sāmañña.

Esā ca saṅkharontena, yaṃ puññaṃ pasutaṃ mayā;
Aññaṃpi tena puññaṃ, patvā sambodhimuttamaṃ.

Saṃsārato bahū satte, tārayitvā taṇhakkhayaṃ;
Nibbānaṃ sacchikāreyyaṃ, maggaññāntarena ca.

Sadā rakkhantu rājāno, dhammeneva pajaṃ imaṃ;
Sabbe sattā sukhī hontu, jotentu jinasāsaṃ.

Mrammaraṭṭhe manussā ca, sabbadā nirupaddavā;
Niccaṃ kalyāṇasaṅkappā, pappontu amataṃ padanti.

Buddhaguṇappadīpikanāmikā

Namakkāraṭīkā samattā.